



清代傳記叢刊・綜錄類②  
周駿富輯

# 清史列傳

(十)

卷七三至  
卷八十

清國史館原編



明文書局印行





清史列傳 卷七十三

文苑傳四

張澍 邢澍 任其昌

張澍字介侯甘肅武威人嘉慶四年進士改翰林院庶吉士時年甫十九博聞麗藻一時驚爲異人散館授知縣選貴州玉屏官數年引疾歸復出謁選會李家樓河隄潰決兩江總督百齡奏辟赴工以勞敘選四川屏山攝興文旋丁父艱歸再起令江西之永新署臨江通判以上漕銀緩去官開復補瀘谿再以憂去遂不出澍之改官也朝論惜之及爲吏政事修明所至令行禁止然性亢直時時責善於長官在黔時滇撫初彭齡過縣從者索金挾之百其任屏山以署任貪黷事上揭大府駭然議調署他缺勒署者休致以息事澍曰瘴惡舉賢上官職也某不敢與聞且不願因案調繁卒解任聽勘久之事乃白四川總督爲澍座主甫入蜀卽具疏舉劾屬吏震悚澍上書言其徇情市恩如所舉某守賊某令但佞佛耳其狂直如此蜀歲饑澍多方賑糶法周弊絕民乃大飽後主講蘭州大旱猶與邢彥成書

言賑事戒遲緩戒拘方戒遣使云澍讀書務博覽經史皆有纂著同時講漢學者武進臧鏞高郵王引之樓霞郝懿行所著書皆校正其譌誤自著詩小序翼說文引經考證亦蒐采極博其論文不分偶散振筆直書輒十數紙又性愛遠遊齊魯豫晉吳越楚粵嘗再三至黔蜀江右爲筮仕之邦凡所涉歷山川助其興自定詩集二十六卷文集三十六卷深雄雅健時罕儷者晚歲家秦銳心文獻纂五涼舊聞四十卷輯關隴作者著述凡數十種籍非鄉邦而其書闕佚者亦摭摭爲二酉堂叢書又著三古人苑續黔書秦音蜀典而姓氏五書尤爲絕學云 邢澍字雨民甘肅階州人乾隆五十五年進士官至江西南安府知府博學洽聞藏書萬卷宰浙江長興時與陽湖孫星衍撰寰宇訪碑錄復據唐宋以前金石刻並宋元刊本隸釋隸續等書著金石文字辨異十二卷尤精各史表志之學嘗以關中迭經兵燹昔賢著作淪佚者衆精心搜采爲關右經籍考十一卷洪亮吉謂其取材博而用心審爲世不可少之書又著有兩漢希姓錄守雅堂詩文集 任其昌甘肅秦州人同治四年進士授戶部主事十二年以母老乞養歸遂不出其昌天姿高邁博聞強識覃精三禮之學尤長於考訂史事而行己處世斤斤於義利之辨不

敢少有出入既告歸閉門教授主天水隴南各書院講席垂三十年弟子著錄者數百人其教人先經史旁逮古文辭尤以躬行爲本隴南素樸儉自是士習一變性至孝八歲喪父哀毀如成人奉母加謹通籍後迎養京師母性不喜獨食故終年未嘗一就客宴母病篤雨中露禱竟夕及卒喪葬一衷於禮兄弟皆早世卹嫠字孤如已出焉族弟歿遺女無所歸撫而嫁之微時爲州牧某所知及某罷官歸關隴回氛不靖徒步走千里爲致其妻子於西安所師歿妻子貧不能自存時周其乏終身不倦其風義如此光緒四年秦州大祲知州陶模延其昌總司賑事焦思瘖口昕夕不遑寢食全活流徙饑羸以數萬計十七年以總督楊昌濬疏薦詔加員外郎銜二十六年拳匪倡亂其昌聞變悲憤遂疾作而卒年七十所爲古文風力雅近宋人晚年肆力於詩宗法少陵著有敦素堂詩文集秦州志蒲城縣志史臆其纂輯未成者有史評八代文鈔三禮會通等書

瞿中溶 黃易 趙魏 張廷濟 陸增祥

瞿中溶字木夫江蘇嘉定人官湖南布政使司理問中溶爲錢大昕增博綜羣籍尤邃金石之學官湖南時政簡身暇復搜奇訪僻於人煙稀冷之境所獲益多平



生珍賞諸品若漢鐙銅象古泉山古鏡富貴長樂漢輒皆室貯之以顏其楣兼長音韻嘗著諧聲表以爲韻有古有今四聲以前爲古韻四聲以後爲今韻近人牽連切音字母而古韻愈以難通蓋古音一字有數聲聲相近者皆可爲韻凡同從此字得聲者無非韻也六書之指指事象形會意轉注假借五者皆不離諧聲諧聲卽古韻曲阜孔廣森取說文諧聲字以類相從名曰說文偏旁考然前後倒置兼雜以徐鼎臣新附字殊無倫理因重爲編次一依五百四十六部之序省聲者移列於後讀若者附注於下且倣馬班史表之式橫寫其文轉輾相從孳乳遞降庶讀者展卷易明推九千餘字之例卽可進而求三代之音云他所著有孔廟配享從祀弟子辨證三卷孔廟唐貞觀入祀諸儒傳略三卷孔廟宋元以來入祀諸臣傳略十四卷說文地名考異一卷三禮石經辨正一卷續漢金石文編十卷吳郡金石志三卷列代避諱札記一卷古文孝經辨疑一卷孝經釋文辨證一卷漢石經考異補正二卷魏石經遺字舉正一卷蜀石經考異補正三卷春秋三傳經異文備考四卷漢武梁祠堂畫像考六卷古泉山館彝器圖錄二卷錢志補正二十卷集古官印考證十八卷百鏡軒古鏡圖錄一卷校勘隸釋隸續古義拾補十



六卷宋本漢書附錄札記二卷郡齋讀書志考辨舉要一卷洗冤錄辨正一卷皆自爲序又有奕載堂文集古泉山館詩道光二十二年卒年七十四 黃易字小松浙江錢塘人官山東運河同知父樹穀孝子也工隸書博通金石易幼承家學苦貧游幕於外雖簿書迭進不廢風雅精究河防事宜凡隄埵大工閘口蓄洩每伏汛秋汛晝夜殫力捍禦兌漕釐運諸務籌畫備至尤嗜金石寢食依之在濟寧升起鄭季宣全碑於曲阜得熹平二年殘碑於嘉祥之紫雲山得武班碑武梁祠堂石室畫像卽其地築室砌石榜曰武氏祠堂立石以記之又出家藏宋榻石經殘字及成陽靈臺魏元丕朱龜譙敏王稚子范式諸刻雙鉤而鉸諸木凡四方嗜古之士所得奇文古刻無不就正於易者以是所蓄金石甲於一時工填詞精於摹印畫兼仿倪黃而實自成一格翁方綱嘗曰黃伯思米芾而後世久無此人矣著有小蓬萊閣金石文字小蓬萊閣詩 趙魏字晉齋浙江仁和人歲貢生博學嗜古尤工篆隸考證碑版最精所藏商周彝器款識漢唐碑本爲天下第一年至篤老雖衣褐不完猶堅守勿釋儀徵阮元以爲歐趙著錄不是過也阮元所作積古齋鐘鼎彝器款識及青浦王昶所作金石萃編皆其手定著有竹庵盦金石目

華山石刻表歷朝類帖考小學雜綴 張廷濟字叔未浙江嘉興人學有根柢詩樸勁典核書法米南宮草隸獨出冠時嘉慶三年舉人屢躋禮闈遂結廬高隱以圖書金石自娛自商周至近代凡金石書畫刻削髹飾之屬無不搜聚構清儀閣藏之各系以詩晚年眉長徑寸與儀徵阮元合摹眉壽圖泐石一時傳爲韻事著有桂馨堂集 陸增祥字星農江蘇太倉州人道光三十年一甲一名進士授翰林院修撰以母憂歸會粵匪陷金陵在籍團練與知州蔡映斗破走青浦賊日周立春復嘉定事聞以贊善卽補咸豐六年充會試同考官十年出爲廣西慶遠府知府湘撫疏請留辦軍需釐捐鹽茶局光緒二年補湖南辰沅永靖道地與黔蜀接壤增祥捕寇盜循恤苗民有政聲在任四年以疾告歸少通六書及長益劬於學性好金石文字搜羅徧天下積錄旣多踵王氏金石萃編成金石補正百餘卷凡三千五百餘通又以所得漢魏晉宋齊梁古甄琢爲硯搨墨本跋之題曰三百甄錄一卷而所著有吳氏筠清館金石記目六卷篆墨述詁二十四卷楚辭疑異釋證八卷紅鱗魚室詩存二卷晚作古今字表未成而卒年六十七

顧莼 朱綬 陸文

顧莼字希翰江蘇長洲人嘉慶七年進士改翰林院庶吉士散館授編修十三年充會試同考官十七年大考一等第三名擢侍讀尋奉命提督雲南學政二十五年充日講起居注官遷侍講學士以上疏不稱旨降編修道光九年擢右中允遷侍讀十年遷侍講學士十一年擢通政司副使踰年卒年六十八莼學問深醇急公忘己爲秀才時卽峻風裁素持清議幾爲勢家所中嘗從錢大昕遊大昕歎爲不世才官翰林屢上疏言事在史館撰和珅傳甫成卽出視滇學總纂刪易以進仁宗怒其不實總裁復取莼彙進上是之奪總纂某官督學時道出河南卽以所聞墨吏姦民入告雖忤當道不稍避莅滇知滇地僻遠陋習相沿乃實心訓導見有厲名節者立予獎飾去後人士尸祝焉林清之變則疏稱中禁嚴密若輩尙敢闖入肆猖獗圓明園距都城遠尤宜備宣宗御極則疏稱崇君德正人心飭官方三者爲方今時勢所急上召見稱是者三是年十月上令嗣後保送軍機章京勿庸迴避大臣子弟莼以貴胄居密地大不便事遂止西域逆回滋擾復疏請於喀什噶爾添重兵控制安集延俾回人不敢窺伺且謂其地密邇英吉沙爾葉爾羌又東南爲和闐皆有水草可以耕牧宜募民屯田備戰守而慎簡大僚無分滿漢



務得讀書識大體者任之以廉靜寡欲通達事理者佐之遷副使時適湖南北江  
南江西浙江皆大水復疏稱飢民與鹽梟糾合易生事鹽梟不去終當爲患然緩  
治則養禍益深急治又召禍更速故欲禁其妄行必先謀其生路惟有變通鹽法  
聽民挾資赴產鹽地收買隨時納課之後卽不問所往俟鹽產盛丁力紓卽令課  
歸丁不限疆域二疏皆下所司議行晚歲名益尊有文壇耆宿之譽四方士多就  
問業經指授類皆砥躬礪行有文學能自立詩文師大蘇音格高雅賦駢體皆師  
唐宋兼工書畫書由率更入後倣河南爲世所寶嘗手書小楷學庸孝經至數百  
本以貽親友子弟居詞館三十餘年文學動天下知與不知皆爭乞書畫以自飾  
云著有南雅詩文鈔 朱綬字仲環江蘇元和人道光十一年舉人燾躬幼學敦  
勵內行工詩古文辭與顧莈輩稱吳中後七子時長洲王嘉祿亦工詩又稱朱王  
然嘉祿才調宏富綬格律精嚴陳文述嘗戲反趙執信語云王貪多朱愛好綬嘗  
佐梁章鉅幕章奏多出其手而廉靜簡默衆皆重之爲文好表揚古烈感論人事  
言近旨遠深得風人之旨嘗作吳中風俗利病說謂吳俗之大害在遊民多必導  
之以儉德使之治生使之務本然後廉恥生而俗害去而治之者必自士始時以

爲篤論著有知止堂詩文集嘉祿字井叔著有嗣雅堂集 陸文字少游江蘇吳縣人諸生力學喜讀真德秀邱濬陸世儀顧炎武諸家書究心當世之務於農田水利持論皆有本末時淫雨爲災江水漲溢吳門被水尤甚文著救荒私議本林希元得人審戶兩言而以分圖爲審戶之本時多採用之好遊嘗過大梁徘徊澗瀘嵩少閒以詩古文辭名於時與顧菴相友善屢試不售遂歸專肆力於經術性耿介意有所拂輒聲色俱厲士無賢不肖皆畏愛之道光六年卒年六十一著有炳燭齋稿周官集義子嵩字希孫廩貢生官鎮江府學訓導京口之亂嵩募鄉勇隨官軍克復鎮江城城南九十九村賴以保全操守廉潔罷官後不名一錢咸豐十年卒年七十著有意苕山館詩十六卷文一卷蒙談一卷

謝蘭生 凌揚藻

謝蘭生字佩士廣東南海人嘉慶七年進士改翰林院庶吉士以親老告歸不復出幼聰敏博雅好古工詩文與張如芝黃培芳齊名詩宗大蘇出入杜韓兩家古文沈實渾厚具有典則兼工書畫書法顏魯公擘窠大字無出其右總督阮元亟賞之延修廣東通志晚年研究儒先書嘗謂濂溪主靜伊川靜坐朱子明心均不



外主敬工夫年七十二卒卒前五年預書遺命喪葬事敦儉守禮務革粵省奢汰之俗生平精鑒別工篆刻嘗選集漢印分韻四卷著有雞肋草常惺惺齋文集四卷詩集四卷北游記略二卷 凌揚藻字譽釗廣東番禺人諸生幼具異稟日誦數百言受知於督學姚文田與汪大源何應駒張業南同爲巡撫朱珪所賞識嘉慶十四年海寇迫內河土匪乘間劫掠揚藻爲畫方略各搃要害互爲聲援盜不敢犯爲文原本經史具有根柢所著蠡勺編四十卷論者謂不亞於陔餘叢考工詩有春水桃花送畫船句見賞於時嘗出游海縱覽焦門厓門天風海濤詩境益進選嶺海詩鈔二十四卷搜羅廣博甄錄精到抉摘國初諸老往往推見隱微能舉其大又著有藥洲詩略六卷藥洲文略十六卷續編十二卷四書紀疑錄六卷春秋咫身鈔十二卷

徐松 沈垚

徐松字星伯順天大興人嘉慶十年進士改翰林院庶吉士散館授編修十六年督學湖南因事戍伊犁松博極羣書居京師爲詞臣博綜文獻爲時流所推仁和龔自珍贈詩有笥河寂寂覃溪死此席今時定屬公之語笥河大興朱筠覃溪大

興翁方綱也自出關以來於南北兩路壯遊殆徧每有所適攜開方小冊置指南  
鍼記其山川曲折下馬錄之至郵舍則進僕夫驛卒臺弁通事一一與之講求積  
之既久繪爲全圖乃徧稽舊史方略及案牘之關地理者筆之成西域水道記五  
卷記主於簡所以擬水經也又自爲釋以比道元之注卽用酈氏注經之例記則  
曰導曰過曰合曰從曰注釋則於經水曰出曰逕曰會曰自曰入於枝水曰發曰  
經曰匯又以圖籍所記異文踏駁覽者混淆乃一以欽定同文志寫之而釋其可  
知者又以新疆入版圖已數十年未有專書爰搜採事迹稽覈掌故成新疆志略  
十卷於建置城垣控扼險要滿漢駐防錢糧兵籍言之尤詳將軍松筠奏進事略  
並敘其勞特旨赦還御製事略序文付武英殿刊行道光元年特用內閣中書轉  
禮部主事洵陞郎中補御史授陝西榆林府知府旋卒著有新斟注地理志集釋  
十六卷漢書西域傳補注二卷唐兩京城坊考五卷唐登科記考三十卷新疆賦  
二卷而新疆賦綜貫古今包舉鉅細尤足與和寧西藏賦後先輝映云 沈垚字  
子敦浙江烏程人道光十四年優貢生性沈默篤精漢學足不越關塞而好指畫  
絕域山川初爲道州何凌漢新城陳用光所賞拔入京師館徐松家松數言其地

學之精歎程恩澤嘗讀西游記擬爲一文疏通前人跋所未盡及見崧所著西游記金山以東釋歎曰地學如此遐荒萬里猶日驗矣我輩捫材未足語於是也又嘗與震澤張履論禮服往復詰難百辨益堅履瞠不知所答未幾歿於旅邸著有元史西北地蠡測二卷地道記十卷新疆私議一卷附蔥嶺南北河考漳北澆南諸水考一卷西域小記一卷落颿樓文集三卷後集三卷外集一卷別集一卷雜著三卷簡札摭存三卷

李兆洛

李兆洛字申耆江蘇陽湖人九歲爲制舉文操筆立就仁和盧文弨主講龍城書院從遊者極一時之俊獨許兆洛爲第一流嘉慶十年進士改翰林院庶吉士散館授安徽鳳臺縣知縣鳳臺西接蒙城北界阜陽遠者至百八十里官或終任不一履其地兆洛親歷巡行辨其里落之繁耗地畝之廣袤肥瘠次第經紀之焦岡湖漢之芍陂濱淮而山岡環繞易致旱潦兆洛增隄防設溝閘督民耕耘歲以屢豐俗獷悍私梟出沒其間兆洛擇耆老數人勸民孝弟分俸以獎其勞僻遠則擇地設義塾延師課讀捕獲首惡朱紀等置之法私梟絕迹在縣七年轄境大治旋



以父憂歸遂不出主江陰書院講席幾二十年其間治經術通音韻習詁訓訂輿圖考天官曆術及治古文辭者如承培元宋景昌繆尙誥六嚴輩皆兆洛所授也兆洛短身碩腹豹顱剛目望之若不可近而就之和易未嘗有疾言遽色藏書逾五萬卷皆手加丹鉛上自漢唐下及近世諸儒說條別得失不檢故本嘗分日課馬氏文獻通考比浹歲首尾皆能默誦尤嗜輿地學備購各省通志較五千餘年來水地之書證以正史刊定顧祖禹讀史方輿紀要之與原史不符者嘗病當世之治古文者知宗唐宋而不知宗兩漢六經以降兩漢猶得其遺緒而欲宗兩漢非自駢體文入不可因輯駢體文鈔以爲自秦迄隋其體遞變而文無異名自唐以來始有古文之目而目六朝之文爲駢體爲其學者亦自以爲與古文殊路夫氣有厚薄天爲之也學有純駁人爲之也體格有遷變人與天參焉者也義理無殊途天與人合焉者也得其厚薄純駁之故則於其體格之變可以知世焉於其義理之無殊可以知文焉文之體至六代而其變極矣沿其流而溯之以至乎其源則其所出者一也所至訪藏書之家求先賢遺集或得其手翰遺墨則摩挲撫玩不啻親接顏色又必求其子孫聞其賢而興則喜聞其愚而替則悲聞其幼而

慧則招致而陶育之又資恤而振拔之於平昔舊遊故人子弟及文學知名士子姓亦然晚得末疾道光二十一年卒年七十三所輯有皇朝文典七十卷大清一統輿地全圖鳳臺縣志十二卷地理韻編二十一卷駢體文鈔七十一卷舊言集初編次編廣編所著有養一齋文集二十卷承培元字守丹優貢生通小學著有說文引經證例籀雅經滯揭藥宋景昌字冕之縣學生精天文曆數之學著有星緯測量諸編繆尙誥字芷卿道光二十年舉人著有古韻譜雙聲譜又取史漢晉隋書志所載經星參以巫咸甘石諸家遺說及丹元子步天歌利瑪竇經天該等爲經星考六嚴字承如貢生輿地圖其手繪也

胡敬程同文

胡敬字以莊浙江仁和人嘉慶十年進士改翰林院庶吉士散館授編修時朝廷開館校纂書籍敬歷充武英殿文穎館纂修官全唐文治河方略明鑑總纂官所輯皆精審唐文小傳出其手者爲多其進唐文表凡數千言典覈裔皇尤稱傑作仁宗聞其名每有制敕碑版輒傳旨命其擬撰入直懋勤殿編纂祕殿珠林石渠寶笈三編時溥暑內侍捧軸倉卒展視敬衣冠端立執筆錄其文記載尺寸印章



日至百十卷無少懈二十一年充河南鄉試副考官二十四年奉命提督安徽學政累遷至侍講學士以乞養歸敬性耿介崖岸嚴峻學深思精少以水仙花賦闌干賦受知於阮元詩兼顏謝杜蘇文有六朝李唐之美著有崇雅堂詩文集二十卷程同文原名拱字字春廬浙江桐鄉人嘉慶四年進士由兵部主事洊陞至奉天府丞少以詩古文名及通籍益切研究期大用於時中歲入直樞廷練習朝章每擬稿輒當上意值軍務填委十餘紙一時並具曲折詳盡閣部大臣咸倚重之朝廷大典禮經進之製往往出其手平生於學無不窺尤長地志凡外國輿圖古今沿革言之極審於遼金元三史中建置之異同稱名之濬舛疏證確鑿若指掌紋嘗修纂大清會典八十卷裁酌損益不假旁助自謂一生精力盡於是書所著有密齋文集一卷詩存四卷

陳文述屠倬

陳文述字退庵浙江錢塘人嘉慶五年舉人官江蘇江都縣知縣文述少以詩名儀徵阮元督學浙江試杭州日以仿宋畫院製團扇命題文述詩最佳人稱爲陳團扇阮元入覲時文述從赴灤陽不及而月得詩百餘首游京師與楊芳燦齊名

一時謂之楊陳宰江都多惠政開伊婁河故道免渡江風濤之苦民感之名曰陳公河又監濬儀徵運河道光三年夏江水爲災拯恤更力熟習河防海運鹽政諸利弊著爲議大吏間采以設施天性孝友廣交遊重信義有孔北海之風又好修名人遺蹟遊焦山擬築棲雲閣於漢隱庵於西湖建蘭因館高致多類此生平與王曇郭慶查揆屠倬最稱契洽所爲詩工西崑體晚年復歛華就實一變錯采鏤金之習歸諸雅正著有碧城仙館詩鈔頤道堂集秣陵集西泠懷古集仙詠閨詠碧城詩髓子裴之官南河候補通判亦能詩天才英爽著有澄懷堂集裴之婦汪氏名端工詩宗明高啟選明三十家詩鈔初二集所著有自然好學齋詩集十卷屠倬字孟昭亦錢塘人嘉慶十三年進士改翰林院庶吉士散館授江蘇儀徵知縣甫下車卽捕縛鹽梟蔣先斗寘之法邑有婦鳩其夫倬廉得其情訪而按之嚴鞠數月始吐實四境懾服勸民紡織種桑養蠶並出貲募杭人爲教習在任前後五年循聲大著道光初元詔求親民官實有治績者僉以倬名上特旨擢江西袁州府知府未赴任旋移九江府皆以疾辭八年卒年四十八倬夙智早成質行獨絕鄉舉後讀書清平山中與一時名流以詩文相鏃厲阮元嘗謂吾於浙西得

文筆三人一陳文述一查揆一屠倬詩才伉爽與郭麐查揆齊名郭麐稱其詩有幽并烈士河朔少年之風畫工山水見重於時著有是程堂詩文集

錢林方元鵬

錢林字金粟浙江仁和人嘉慶十三年進士改翰林院庶吉士散館授編修二十一年充廣東鄉試副考官二十四年充四川鄉試正考官以大考一等洊陞翰林院侍讀學士左遷庶子林貌古神清學問淹博書無所不覽每執筆文不加點如夙構然阮元督學浙江時嘗歎以爲此邦翹楚又熟於漢唐注疏及近時經生家言於史記誦尤博嘗論遼金元兵制其門人汪喜孫謂足補史志之缺居翰林日嘗充國史館總纂官故於本朝名臣言行及河漕鹽榷倉儲平糶海運采買災賑銅政錢法地丁雜稅諸大端靡不熟究嘗爲人策采買倉儲見諸施行林不言世亦莫知其出於林也體羸多病不喜結納每夙興在丑寅之交燒燭讀書隨手著錄無閒寒暑所著文獻徵存錄十卷搜討極勤病革時以付喜孫其後通州王藻索得之乃始爲刊行詩醞釀於漢魏六朝而降就初唐高岑王李之法度將歿時曾寫定三十卷詒歛程恩澤今所存者玉山草堂集十二卷續集五卷 方元鵬



字海槎浙江金華人嘉慶六年進士官工部主事少耽吟詠爲諸生數十年悲憂  
愉樂一寓於詩性孤潔不耐官事居京師暇則扃戶長吟門徑蕭然張維屏嘗因  
鄭士超過其居稱其貌冷心冷室冷官不冷而自冷云元鵬鄉試出朱珪之門珪  
極賞其詩阮元亦稱其博取典籍約以性靈朗粲如李白質直如元結奔瀉如李  
華怪迂如劉义幽阻如李賀修潔如姚合孤往如方干其推挹甚至嘗輯唐宋金  
元明七律爲指南甲乙篇又著有涼棚夜話六卷舊雨新談四卷鐵船詩鈔十二  
卷鐵船樂府

姚瑩 戴鈞衡

姚瑩字石甫安徽桐城人嘉慶十三年進士選福建平和縣知縣以才著調臺灣  
縣署噶瑪蘭通判坐事落職旋以獲盜有功復官揀發江蘇爲兩江總督陶澍所  
薦擢淮南監掣同知權運使事未幾特旨命爲臺灣道加按察使銜時英人來犯  
瑩與臺灣鎮達洪阿擊敗之毀其船獲其人有詔嘉獎予雲騎尉世職進階二品  
和議成英人訴臺灣所獲船皆遭風觸礁文武冒功欺罔逮問下刑部獄旋出之  
發往四川以同知知州用兩使西藏訊乍雅案補蓬州二年引疾歸文宗登極以

大臣薦有湖北鹽法道之命陞廣西按察使參大學士賽尙阿軍事粵逆漸熾大帥懦不能兵都統烏蘭泰提督向樂皆驍將不相能紫荊山之圍賊就擒矣瑩以爲流賊如水宜環攻以斷其逸因條舉利害累百餘言不用比竄永安則又爲書白幕府請明法飭將并力合剿戒前失又不用而軍興以來將囂士玩賊善閒屢持金錢與我軍媾永安城小而卑方是時烏蘭泰軍西南向榮軍東北合滇黔楚蜀之軍總四萬餘人賊數千壁險死鬪永安東北有隘名水竇徑阻蒼緣之可以達桂林瑩與烏蘭泰皆主擊水竇絕賊外援向榮主開水竇使逸而尾追瑩力辯其失又力疾馳叩軍門數譬解之皆不果用瑩在軍中與烏蘭泰書曰某就木之年無以報國惟念主憂臣辱之義蔬食惡處與士卒共苦辛數十年貧賤憂患本無定居今日一如我素夫功敗於垂成病加於小愈前者武宣之事賊已將就擒徒以狃於大捷之後計慮稍疏遂使脫網今我師愈久愈疲賊又日懷奔逸萬一復蹈前轍不但無以對君父天下後世其謂之何未幾賊果突圍犯桂林勢益熾遂不可制賽尙阿逮問瑩辭營務籌饟湖南巡撫張亮基奏署湖南按察使積勞卒於官年六十八瑩之學源於從祖竊於書無所不窺顧不好經生章句而慕賈



誼王守仁之爲人文章善持論指陳時事利害慷慨深切異乎世以荏弱枯澀爲學桐城者著有東槎紀略五卷康輜紀行十六卷寸陰叢錄四卷識小錄八卷東溟文集二十六卷詩集二十卷奏稿四卷遺稿五卷遺稿續編三卷 戴鈞衡字存莊亦桐城人道光二十九年舉人少嗜學精力絕人事同里方東樹東樹爲姚鼐高足弟子鈞衡自以生望溪海峯姬傳之鄉守先正之法傳之後進義無所讓因專肆力於古文與同邑蘇惇元重訂望溪文集增集外文十之三四及壯爲經學講用世之具會粵匪陷桐城鈞衡籌餉結義民請兵於各大帥久之不得乃發憤上書皖撫極言用兵之道在神速設伏出奇宜乘閒分兵襲桐以斷舒廬賊後不宜坐擁重兵於一隅之地又著草茅一得謂今日之事最要四端一嚴軍令一求將才一明賞罰一籌大局軍令不嚴高官厚賞不能得其死力將才不求大帥一人不能衝鋒肆應賞罰不明雖有軍令將才人心不可得而固大局不籌雖有目前之捷賊勢不可得而滅又論嚴法令明教化勵氣節改科舉破資格久任使肅軍政省例案節財用禁奢侈皆按切時務反覆數萬言上之副都御史袁甲三甲三極重之賊聞鈞衡曾籌餉請兵又入營獻策遂掠其家妻妾皆死焉鈞衡走

臨淮依袁甲三會甲三被議鈞衡上書皖撫爭之且爲鳳潁二郡人士作書辨其  
冤性伉直勇言事義憤所激往往奮不顧身用是鬱鬱得疾嘔血而卒年四十二  
所爲文以才氣勝其始尙才華繼好倫理及事之有關實用者後遭喪亂益喜爲  
感時論事表彰忠義節烈之文著有存莊遺集文三卷詩四卷草茅一得三卷續  
得一卷尺牘二卷公車日記二卷雜記二卷書傳纂疑六卷

張作枏 沈欽裴 駱騰鳳

張作枏字讓之浙江金華人嘉慶十三年進士由處州府教授選江蘇桃源知縣  
調陽湖治事廉平能以經術輔律意遷太倉州會太湖溢境積潦未退旣請振借  
帑平糶乃開瀏河以洩水涸出良田七千餘頃州人頌焉時海濱姦徒乘間鈔掠  
作枏適捧檄讞獄松江遂集海戶百人夜擣其巢擒首惡二十七人巡撫陶澍奏  
補徐州知府旋乞假歸少稟異質敦內行學宗程朱於書無所不究好表揚人物  
刊刻鄉先賢遺書行之尤酷嗜曆算之學與齊彥槐江臨泰相友善以兩人同治  
西學也嘗謂僧一行以指南鍼較北極鍼指虛危之間極在虛六度初鍼實偏於  
極右二度九十五分北極偏右則知南極偏左沈存忠筆談亦稱微偏東不全南

徐元夢曆議稱鍼所得子午非眞隨地不同在京師則偏東五度四十分冬至正午先天一刻四十四分有奇梅勿庵揆日紀要稱天上正南非羅鍼所指之正南須於正午之西稍偏取之故楊光先有鍼路論陸燿切問齋集有指南鍼辨因量取坤輿全圖各直省府廳州縣及諸部落經緯綫推演列爲全表附造平面立面及面東西諸日晷法撰揣籥小錄又做梅氏諸方日軌例自北極出地十八度起至五十四度止推算各節氣自卯正以至酉正止太陽距地平高弧列表於前更取直表橫表各一尺表景亦如前算高弧法逐一推演列表於後撰揣籥續錄又取正弧及斜弧三角括以二十八例撰弧三角舉隅弧角設如二種又推測道光三年癸未天正冬至星度七十二候各中星列表而冠以四十五大星圖並附各星赤道經度歲差表中星時刻日差表太陽黃赤升度表二十八宿黃赤積度表可以逐年逐日依法加減使中星與時刻互求撰新測中星圖表金華晷景表金華更漏中星表三種又推算道光癸未年各恆星並近南極諸星及天漢起沒黃赤經緯度列表撰恆星圖表又因八綫及八綫對數表每十秒爲率卷帙繁重爰取簡便以每度六十分列表析弦切割三綫各爲一帙撰八綫類編八綫對數類



編二種又推算北極出地二十八度至三十四度及四十度各節氣逐時逐刻太陽高弧度分秒並直表橫表日景尺寸分釐列表撰高弧細草又彙采諸生量倉量田各法撰倉田通法十四卷第一冊曰量倉通法一之三第二冊曰量倉通法四之五附以借根方法第三冊曰方田通法補例一之三第四冊曰方田通法補例四之六第五冊曰倉田通法續編一之三附立天元一法居官不事酬應嘗曰與其浪費無益之酬應不若將薄俸製儀器刻算書俾絕學大昌故凡履任悉以銅木石工及剗氏相隨公餘孤燈夜課如寒素歸後二十餘年足不入城市道光八年卒嘗輯故人詩爲舊雨錄北麓詩課著書事存稿掇拾遺聞梅籜隨筆補括郡地志之缺他著有四書異同二十卷鄉黨小箋一卷證文一卷翠微山房數學三十八卷書目五卷文集十六卷又有筆錄識小愈愚錄東郭鄉談等書詩文稿未梓咸同間燬於兵 沈欽裴字俠侯江蘇元和人嘉慶十二年舉人官荆溪訓導以不節於飲病偏枯累年神明如常課講不輟布政使檄他人攝其官學中士相率具狀留之不可遂罷歸生平篤於學邃於思天文地形無不通曉尤洞精算術宋秦九韶數書九章元朱松亭四元玉鑑李冶測圓海鏡世稱絕學皆能通



之李潢撰九章算術細草甫寫定病不起囑曰必沈欽裴算校方可付梓後欽裴校勘算草圖說均輸一章增訂尤多又爲補海島算經細草一卷以成潢之志其校訂九章也於古曆會積則用四分術數開禧術推之以正其誤法最詳盡又因治推閏問演紀草與推氣治曆所求氣骨分秒俱不合改推證之又謂治曆演紀所求入閏閏縮元閏朔因數朔積年皆因入元歲而誤求人元歲當以歲餘爲奇紀率爲定用大衍術求之得部率此部率者是甲子子正初刻與冬至一會之年數也若如元術以斗分與日法用大衍術求得部率則是子正初刻與冬至一會之年數五周而後爲甲子子正初刻冬至也每歲氣骨分爲歲餘所積滿紀率去之之數非斗分所積滿日法去之之數有氣骨分求人元歲而以斗分與日法用大衍入之與率不相通此其所由誤也又虛設氣元率乘元限數以強合之而積年之不可知已多矣爲別立術草并設問於後以課元術新術之疏密乃改正答數設問六則以元術推之可知者二不可知者四以新術推之則歲歲皆可知又於均分梯田條校改至百餘字極爲精確漂田推積條辨正其命名布算立術三誤餘如測望類求深求遠法草並以天元一顯之本諸海鏡別爲圖說於是術意

之精深可豁然矣阮元稱其拾遺補闕匡謬正譌使搖搖將墜之緒復還舊觀有功於前賢不淺居京師時大學士董誥知之將薦修天文時憲志欽裴復書以爲暴翰林短且此爲榮利計非進禮退義之正力辭時服其有守所自著有補玉鑑細草四冊又嘗得明趙琦美鈔本數書九章訂譌補脫歷有年所以老病未卒業其弟子江陰宋景昌起而成之爲數書九章札記四卷 駱騰鳳字鳴岡江蘇山陽人嘉慶六年舉人官舒城訓導以母老乞養歸教授里中子弟卒年七十二騰鳳賦性敏銳好讀書尤精疇人之術在都中從李潢受算學研精覃思寒暑靡間著開方釋例四卷藝遊錄二卷略謂天元一術見宋秦氏九韶九章大衍數中初不言創於何人元李冶測圓海鏡益古演段二書亦用此術是術自平方立方以至多乘方悉用一術卽芻童羨除諸形亦無不可握觚而得洵算術之祕鑰也西法借根方實原於此乃以多少代正負徒欲掩其襲取之迹不知正負以別異同多少以分盈朒豪釐千里必有能辨之者因爲釋例以明其法復爲溯源以正其誤南匯張文虎嘗論其書謂李銳開方說詳於超步商除翻積益積諸例而不言立法之根令學者茫不知所謂騰鳳於諸乘方方廉和較大小加減之理皆質言

之而推求各元進退定商諸術尤足補李書未備誠學開方者之金鎖匙汪萊創設兩勾股同積同勾弦和一問以兩勾弦較中率轉求兩勾弦較立術迂迴騰鳳以正負開方法徑求得兩勾頗爲簡易惟其書於近世諸家詆謨已甚未免主持太過云

錢儀吉從弟秦吉

錢儀吉初名達吉字衍石浙江嘉興人刑部尙書陳羣曾孫侍讀學士福胙子年十二效選體作山賦千言張問陶見之擊節稱賞嘉慶十三年成進士改翰林院庶吉士散館授戶部主事累遷至工科給事中尋罷歸儀吉於學無所不通其治經先求故訓博考衆說而折衷以本文大義嘗謂欲得經解必通訓詁而泛濫訓詁未必遽獲神解著經典證文雅厭雅厭者以十九篇之次寫九百四部之文而以經籍傳註推廣之其讀史則補晉兵志及朔閏諸表又撰三國會要博采見聞旁羅散失期拾遺於正史不限斷以本書帝系輿地或爲之圖或爲之表條繫字綴鉅細畢賅嘗爲會典館總纂專辦天文輿地諸圖象復手撰皇輿圖說四十卷又嘗仿明焦竑獻徵錄爲國朝獻徵集得將相大臣循良忠節儒林文苑等凡八



百餘人又於獻徵集之外節錄名臣爲先正事略官戶部時值現審處剖決如流及改御史吏皆拊掌相告曰錢公去此吾屬無患矣巡城視事隨到隨決無稽留旬日者嘗曰小民細故導之使速已縱不免小有不平猶愈於久繫株累耳至有事關倫紀不可以窮治載某氏婦事於文稿中以見卽事窮理不可不深長思也主講粵東學海堂定諸生讀書法四則至今仍之晚主河南大梁書院道光三十年卒年六十八他著有衍石齋記事稿十卷續稿十卷刻楮集四卷旋逸小稿二卷 泰吉字警石儀吉從弟兄常以純儒相勉自弱冠後遠近已盛稱嘉興二石少孤丁母憂執喪盡禮爲文述二親行事樸實悽愴族人見之皆感歎家貧節布糲置書四萬卷雖甚煩困不廢好校古書假人善本及先輩評點之冊寫而注之眉端如史記前後漢書晉書集韻元文類禮記集說等編皆勘校數周一字之舛旁求衆證嘗著曝書雜記以發其凡其與兄儀吉書問往來皆咨詢學術或獻一疑而詰難十返或尙論前哲評隲時流窮極理趣動逾數千言與友人論文其要必本於性情之眞養之以正不爲偏雜故氣和而體醇以廩貢生官海寧訓導者近三十年大府計吏將以知縣薦力辭然於民生利病講求深至常舉民所不

便者斷斷爲州牧言之謹身教整士習臨去爲州人攀留後避粵寇卒於安慶年七十有三著有海昌學職禾人考海昌備志甘泉鄉人詩文稿二十四卷儀吉子寶惠泰吉子炳森皆能以學世其家

郭尙先何紹基

郭尙先字蘭石福建莆田人嘉慶十四年進士改翰林院庶吉士散館授編修十八年充鄉試正考官二十一年充雲南鄉試正考官二十四年廣東鄉試副考官道光八年奉命提督四川學政十二年充山東鄉試正考官歷充國史館文穎館治河方略大清一統志明鑑纂修官文淵閣校理累官贊善洗馬侍讀侍講學士擢光祿寺卿轉大理寺卒年四十八尙先博學善屬文與林則徐交莫逆在翰林時相與研究輿地象緯及經世有用之學尤熟於鄭樵通志館大學士盧蔭溥家甚推重之工書法嘗爲仁宗所賞識四方求書者無虛日高麗日本爭相購致然非其人不輕許有以厚資爲其父乞銘者拒不與旣又浼權要來仍不與丁艱歸值莆田大饑勸富民出粟平糶人咸曰郭太史活我督學四川裁陋規正文體士論翁服總督鄂山稱其洞達治體有大臣才識自蜀還召見宣宗褒其操守廉潔

辦事精細及卒諭尙書白鎔曰郭尙先學問人品俱好性狷介不苟取典試粵東榜後有同鄉持鉅金爲贄來謁者峻拒之所著有進奉文一卷經筵講義一卷增默菴文集八卷詩集二卷芳堅館書帖題跋二卷使蜀日記二卷 何紹基字子貞湖南道州人父凌漢官戶部尙書自有傳紹基道光十六年進士改翰林院庶吉士散館授編修十九年充福建鄉試正考官二十四年充貴州鄉試副考官二十九年充廣東鄉試副考官甄拔多瑰才咸豐二年提督四川學政崇學敦教士皆悅服按部所至尤留心民生利病南江鄭懷江冤獄及河東土司安安氏安平康母子爭襲各事皆據所見入告悉如所議平反未幾以言事罣吏議歸先後主山東湖南及浙江孝廉堂各講席同治十二年卒年七十五生平於諸經說文考訂之學嗜之最深旁及金石圖畫篆刻律算博綜覃思識解超邁能補前人所未逮性卓犖豪於飲客與之言侃侃窮日夜一材一藝時蒙特賞然非所心服雖名公卿不苟推許也詩瀨瀚曼衍宗李杜韓蘇諸家書法入顏魯公之室尤爲世所寶著有東洲草堂詩鈔三十卷

黃安濤 王衍梅 徐熊飛



黃安濤字凝輿浙江嘉善人嘉慶十四年進士改翰林院庶吉士散館授編修二十一年充貴州鄉試正考官尋出爲廣東高州府知府調潮州以告歸安濤殫見洽聞文辭傑出服官多惠政斷獄依經義不規規於成法初莅高州俗好訟多積獄安濤檄屬州縣書兩造辭揭通衢約以期自至逾期則削其牘不復聽未一年平獄以千計潮人好私鬪死則市人代抵名曰宰白鴨前守多不窮治安濤曰此長亂之道也我不可以襲之獄上有覺其非真殺者輒語曰若但弗承毋他慮獲犯則釋若然往往緝得之終任未嘗殺一代抵者所至好扶植士類歸後主上海講席以詩酒自娛有嫉之者遂不復出日與吳中名士聯詩鬪酒詩勁直幽峭著有詩娛室詩二十四卷息耕草堂詩十八卷真有益文編十卷慰託集十六卷王衍梅字律芳浙江會稽人嘉慶十六年進士官廣西武宣縣知縣衍梅幼有異稟童時背誦十三經不遺一字天才苕發爲文信手揮寫食頃卽成性高曠嗜酒暇則手一編默坐覽畢卽棄之而屬詞比事貫串古今他人不能窺其涯際越中稱衍梅者皆以爲徐渭復生初貢成均出儀徵阮元門下名噪一時官廣西未十日卽以吏議失官遂依阮元於廣東非見召請不妄謁也尤豪於詩嘗於友人坐

中用饒字韻賦江瑤柱時歎爲絕唱晚著紅杏邨人傳以靖節青蓮自況著有綠雪堂遺稿 徐熊飛字渭揚浙江武康人嘉慶九年舉人少孤奉母至孝嘗客平湖貧無以自存然勵志於學工詩及駢體文嘗投啟阮元元謂其不失唐人風範會開詒經精舍於西湖招集浙中文士三十餘人熊飛特爲翹楚中歲與楊芳燦王豫石鈞吳楚諸人流連詩酒江湖名士莫之或先王昶稱其詩多清峭風骨超然晚養疴家居以著述自娛特賞翰林院典籍銜其弟子多能詩者著有白鶴山房詩初集三卷詩選四卷挂笙吟一卷風鷗集一卷前溪風土詞一卷六花詞一卷駢體文鈔二卷續鈔一卷前溪碑碣二卷武康伽藍記二卷上柏志四卷

鄧顯鶴 周樹槐

鄧顯鶴字子立湖南新化人嘉慶九年舉人篤於內行事兄顯鵠如父撫兄子如己子嘗作聽雨圖及南村耦耕圖以見志博涉羣書足跡半天下凡海內文人多慕與之交晚授寧鄉訓導尋乞病歸時因事至長沙治旁舍舍客造請詩文者日相接歸然稱楚南文獻垂三十年性嗜善幼時聞長老稱述鄉賢嘉言懿行輒欣然聽之比長搜討楚故尤不遺餘地嘗謂徵文考獻當自其鄉始湖南自屈原賈

誼以來通人志士仍世相望而文字放佚湮鬱不宣因網羅散失爲資江耆舊集六十四卷沅湘耆舊集二百卷徧求周聖楷楚寶一書匡謬拾遺爲楚寶增輯考異四十五卷繪鄉村經緯圖以詔地事詳述永明播越之臣以旌忠烈爲寶慶府志百五十七卷武岡州志三十四卷又以鼎革之際湖南多殉節者各爲傳略二卷復搜刻蔡忠烈遺集王船山遺書編校歐陽文公主齋集重訂周子全書至議建會城前後五忠祠及寶慶府前後五忠祠欲舉貞臣烈士爲邦人勸用意尤深且遠焉所爲古文詳贍演迤壹意表章先哲時以比全祖望之鮎埼亭集詩導源於魏晉而馳騁於唐宋少與同里歐陽輅以詩相鏃厲每有篇什書問往來必得當乃慰故其所爲情深而文明氣深而節古咸豐元年卒年七十五郡人祀之寶慶府十先生祠所著有南村草堂詩鈔二十四卷文鈔二十卷又有易述八卷毛詩表二卷校勘玉篇廣韻札記二卷自訂年譜二卷 周樹槐字星叔湖南長沙人嘉慶十四年進士官山西沁源江西吉水等縣知縣爲治簡易便民有古循吏風年未五十卽告歸杜門不入城市殫精古文以起衰自任所著深純雅潔直追古作者有壯學齋文集十二卷



張鑑 楊鳳苞 施國祁 汪家禧

張鑑字春冶浙江歸安人嘉慶九年副貢生儀徵阮元撫浙築詁經精舍於西湖拔知名士講肄其中鑑及同里楊鳳苞施國祁皆與焉元督師寧波剿海寇挾鑑同行復以水災蠲賑皆資鑑贊畫今所傳阮元兩浙賑災記卽鑑所編詳贍足爲後世法適奉命豫籌海運因河流順軌事遂寢鑑以河運雖安而費鉅海運雖危而費省且得其人而行之海道習熟亦未嘗不如河道之安於是著海運芻言凡料淺占風之法定盤望星之規放洋泊舟之處靡不講明切究侍郎英和見其書稱爲可用道光四年河決高家堰漕艘路阻英和力主海運奏請允行大略用鑑說而稍加變通焉鑑所主南潯劉氏洞庭西山葛氏皆富藏書因得縱觀以資撰錄著有古文尙書脞說一冊詩本事一卷韓詩考逸一冊左傳規過比辭六卷喪服古注輯存二卷夏小正集說一卷論語考逸一冊孝經證墜簡一卷十三經叢說五十卷七緯補輯七卷說文補注一卷六書寤言四卷段借表通釋一卷西夏紀事本末三十六卷東南半壁紀事三十卷隋朝行宮錄一卷蕃釐觀志一卷洞書六卷海運芻言四卷孔子徒人圖法一卷嵇氏聖賢高士傳存真一卷兩浙賑

災記三卷附錄一卷雷塘尸主弟子記二卷墨妙亭碑日考三卷傅子廣輯三卷神農本草存真三卷眉山詩案廣證六卷兩宋畫院志四卷中西星歌合鈔二卷歷統歲實消長表三卷天元借根得一二卷立天元一捷法一冊釋菜一卷釋鳥一卷夢史一卷破蝨錄一卷冬青館隨筆一卷破睡錄一卷忼漱錄一冊楚詞釋文十七卷上林子虛賦郭注輯存二卷蠅鬚館詩話五十卷秋水文叢五十卷文叢再編一冊三編一冊四編一冊詹詹集八卷古宮詞三卷畫媵詩三卷冬青館甲集六卷乙集八卷秋水詞二卷賞雨茅屋詞二卷卒年八十三 楊鳳苞字傳九亦歸安人諸生少以西湖秋柳詞有名於時經學小學皆有根柢尤熟諳明末事嘗爲南疆逸史跋十二篇補溫睿臨之不備而訂其誤阮元編經籍纂詁鳳苞與分纂焉晚年館於郡城陳氏其書室爲鄭元慶魚計亭人以爲元慶復生詩初學李義山後出入朱彝尊厲鶚之間七言歌行尤勝嘉慶二十一年卒年六十著有秋室集十卷 施國祁字非熊亦歸安人諸生好學不倦工詩古文善填詞尤熟於金源事實嘗病金史蕪雜因詳加考訂有所得輒爲紀錄積二十餘年書成名曰金史詳校繼苦卷帙繁多乃列舉條目爲金源劄記三卷又以其餘作元遺

山集箋注十四卷及金源雜興詩皆行於世家貧爲人理生業設吉貝肆市中有樓顏曰吉貝居著書多成其中後不戒於火今存者禮耕館詩文集外集叢說半皆記憶補錄之作卒年七十 汪家禧字漢郊浙江仁和人諸生素好學性謙抑常若不及與楊鳳苞嚴元照同受知於學使阮元元立詁經精舍家禧爲舉首尤長七略之學其言著書之旨以修己治人爲本學務沈博卒歸極於理謂儒有鄭康成而經明有韓退之而用彰有朱文公而體立朱學之傳歷久無弊西湖六一泉有神位數百皆前明湛族破家遺老家禧嘗鈎考其事蹟爲六一泉神位考三篇嘉慶二十一年卒年四十二所著書凡數十卷歿後無子燬於火今惟存東里生燼餘集三卷崇祀三祠志九卷

余煌 施彥士

余煌字漢卿安徽婺源人舉人博極羣書尤精天文曆算至京師覩靈臺儀器歸益博採中西諸家創用弧角八綫盈朒諸法推測當時經緯距度以爲實驗嘗豫推嘉慶甲戌以後十年日月交食分秒時刻皆準工詩古文詞著有春秋求故四卷夏小正星候考一卷二十八星距度推步考要一卷句股晷度一卷日星測時



新表一卷弧角簡法四卷歲實異同一卷星名同異錄一卷參訂天官考異一卷  
衍談錄二卷句股三角八綫諸法纂要四卷讀書度園記十卷又有吹壺北征芝  
陽各詩草野雲詩餘詞鯖咫聞梅窗餘墨卒年年七十六 施彥士字樸齋江蘇  
崇明人道光元年舉人生平究心實學專以經濟致用爲主於天文輿地肆力尤  
深著有求己堂八種會高堰隄決運河失道當時議籌海運張作枻賀長齡陶澍  
以彥士書有海運圖說延訪入幕與之襄辦事成上於朝議敘知縣歷官直隸內  
邱正定萬全等縣以勞瘁卒官年六十一他著有春秋朔閏表發覆四卷

王贈芳 李祖陶

王贈芳字霞九江西廬陵人嘉慶十六年進士改翰林院庶吉士散館授編修二  
十一年充廣西鄉試副考官二十四年充會試同考官旋充福建鄉試副考官道  
光五年充湖北鄉試副考官隨奉命提督湖北學政歷官福建河南陝西山東江  
南貴州各道御史擢戶科給事中轉兵科出知山東曹州府調濟南擢鹽法道以  
疾歸二十九年卒年六十八贈芳學宗宋儒以身體力行爲主博覽羣籍購書五  
萬餘卷日寢饋其中工詩古文詞不拘體格不主門戶家數以性情醞釀出之纏

綿愷惻粹然有德之言官御史時數上封事行海運定鹽法除積弊指陳切要上嘉納之及出守曹州值定陶教匪事起縣令請發兵贈芳曰是愚民耳非謀逆以兵往定陶糜爛矣夜單騎至定陶召諸父老諭以投首免罪執其渠魁還居民安堵如故莅曹五閱月除蠹役懲窩戶行保甲羣盜聞風遠遁鹽場兵役多藉緝私爲騷擾贈芳謂鹽法固以裕課而其實原以便民民便則銷必暢銷暢則課自充不在緝私也乃令各井官卹竈督煎但平其價行之一年官民稱便督學湖北時漢陽有桃花夫人廟三春士女競集爲豔冶遊撤其像改爲先儒陳良祠又巴東往宜昌道經三峽春夏商旅不行生童往往以應試冒險覆舟乃更定章程令於冬間郡試次年院試歲科並考士林頌之歸後以著述自娛杜門不復出所著有毛詩綱領春秋綱領綱鑑要錄慎其餘齋文集四十四卷詩集十卷皇華日記四卷湖北表微錄書學彙編 李祖陶字欽之江西上高人嘉慶十三年舉人八歲而孤母苦節撫育嘗織布命祖陶赴市易棉與鹽祖陶市棉舉餘貲購書歸告其母母謂兒嗜讀書吾食淡不厭也旣長博綜羣籍工古文辭深非北宋以後無文之說謂文無古今惟得神解者爲貴生平足跡半天下晚築尙友樓藏書數萬卷

寢饋其間究心政事兼治兵家言年八十三卒著有邁堂文略初編十七卷續編十五卷賸彙九卷史論九卷詩存二十四卷又輯國朝文錄八十二卷續錄九十二卷金元明八家文鈔五十卷

李惺

李惺字西漚四川墊江人嘉慶二十三年進士改翰林院庶吉士散館授檢討擢國子監司業遷詹事府左贊善乞養歸咸豐十年滇匪犯四川給事中趙樹吉疏薦惺老成練達堪勝督辦團練之任上命加五品銜督辦四川團練惺以老辭總督駱秉章屬劉蓉致書敦勸亦不就惺嗜古力學博極羣書於事若靡所措意而器識宏遠能見其大嘗游江浙閩越歸語人曰天下將有兵事已果然與劉蓉書論籌餉練兵保衛安民諸策皆洞悉安危大計工詩古文辭著有冰言冰言補各一卷藥言藥言賸彙及老學究各一卷論者謂於世道人心大有裨益足與前明呂氏呻吟語小兒語並傳不朽詩清古高澹一洗穢纖之習歸後主講錦江書院二十年成就甚衆一時才望如洪雅曾璧光童棫皆出其門性篤厚樂善生平無私財修脯所入與兄弟共之餘以周其族黨華陽巫孝子歿無後爲醮貲立嗣灌



川知府張志忠卒於官貧無以歸櫬傾橐助之家故寒素不以有無介意終其身如一日同治二年卒又有西漚全集十卷試帖一卷銅匏館亂書二卷亂書補一卷

包世臣 齊彥槐 徐璈

包世臣字慎伯安徽涇縣人嘉慶十三年舉人大挑一等以知縣分發江西權新喻縣因劾去官少工詞章繼而喜兵家言善經濟之學朱珪巡撫安徽手書召至署垂詢練鄉兵安江賊事宜明亮爲川楚左參贊使治戎事發奇謀不見用遂歸世臣短小精悍口如懸河居金陵布衣儵然江省督撫遇大兵大荒河漕鹽諸鉅政無不屈節咨詢世臣亦慷慨言之雖有用有不用而其言皆足傳於後洋盜蔡牽犯上海鎮道迎世臣閱沿海島嶼見北洋商船千艘停泊黃浦遂建海運可救漕弊之議著策河四略一救弊二守成三籌款四積儲皆詳具籌河芻言又以漕爲天下急務而浮收勒折幫丁需索州縣虧空實由於此善治漕者先清屯田責成衛頭督課耕耘量其所入以半備公需停委重空責成本幫裁派總運責成糧道盡撤催趲委員責成沿途文武裁汰漕夫責成閘官看守閘板繳關每一幫船

抵聞聽其通力合作提溜更速水次則嚴禁賭博及隨幫收債者盤糧則責成漕臣而使督臣稽察之通州責成倉臣督同坐糧廳革去經紀之積蠹則幫丁之辦公從容無須州縣津貼州縣無所藉口誅求則奸民不能激衆凌辱其長吏藏富於民培氣脈尊體統否則浮收勒折日增一日竭民力以積衆怒東南大患終必在此是時鹽法以兩淮爲大說者謂私梟充斥阻壞官引遂以緝私爲治鹽之要世臣擬裁撤大小管鹽官役唯留運司主錢糧場大使管竈戶不立商垣不分畛域通覈現行鹽課每斤定數若干仿現行鐵硝之例聽商販領本地州縣印照赴場官掛號繳課買鹽州縣發照後具詳運司查覈則場官不能乾沒正課而運司與場官均有平餘州縣亦藉鹽照紙硃之費津貼辦公大江大河轉輸迅速鹽價必減於今十之五六私鹽皆輸官課課入必倍撥出現行課額以歸正供酌提盈餘增輸詹科道部院司員之廉俸使京職不爲債累衆美畢具千年府海之陋可以一朝盡革其語西北水利曰冀幽水利始於宋何承矩而元虞集明徐貞明爲說尤詳然其功莫舉今國家南漕四百萬石中歲腴田二百萬畝所產也有田四百萬畝歲入與佃半之遂當全漕先減運什之一以其米價及運資於近水之所

置官屯書畧召耕以習農而善心計者主之買農器安廬舍給牛種歲以爲常東南之運漸減西北之田漸增十年爲率則漕可罷賦可寬以其盈餘量加俸餉而官可廉兵可練民見官屯之利亦不令而爭趨矣咸豐五年卒年八十一著有中衢一勺七卷藝舟雙楫六卷附錄三卷管情三義八卷齊民四術十二卷 齊彥槐字梅麓安徽婺源人嘉慶十三年召試舉人十四年進士改翰林院庶吉士散館授江蘇金匱縣知縣毀淫祠斷疑獄振荒歉有衙齋書壁詩十九首宰金匱者至今奉爲圭臬十九年大旱設法勸賑全活無算遷蘇州府同知保擢知府陳海運策蘇撫以事屬創舉難之召彥槐再三詰駁彥槐條對詳明巡撫詞屈然終以河運既久不必改章爲言事遂寢後十餘年改行海運仍仿其法所製有渾天儀中星儀及龍尾恆升二車便民運水著有天球淺說中星儀說各一卷北極星緯度分表四卷海運南漕叢議一卷梅麓詩文集二十六卷道光二十一年卒年六十八 徐敷字六驥安徽桐城人嘉慶十九年進士授戶部主事後以迎養乞改官浙江知壽昌臨海縣事敷邃於經術官京師時與諸名士相切劘胡承珙公祭鄭康成於萬柳堂時同會者朱珔錢儀吉魏源胡培翬張成孫陳奐諸人敷與焉



所爲詩懲鹵莽流易二弊性情所抒時有超詣端木國瑚謂其有得於葩經溫雅之旨著有詩廣枯樗亭詩文集

陳沆謝階樹

陳沆字太初湖北蘄水人嘉慶二十四年一甲一名進士授翰林院修撰道光元年充廣東鄉試正考官三年充會試同考官轉四川道監察御史六年卒沆天光亮拔八歲能文出語驚其長老於學無所不窺尤篤好宋五子書嘗從婺源董桂敷歸安姚學塽講學與邵陽魏源友善病中自省恆書以相質其言有曰近自患病以來閉門謝客日坐斗室中初猶浮雜漸覺凝定性靈自炯諸妄徐呈於此之時以之檢察病根則毫髮畢見以之涵泳義理則意味彌長足見爲學之道靜虛爲本深密爲要又曰仲尼之門五尺童子羞稱五伯童子未必盡知學問祇是心胸見識已自不凡生成鳳翔千仞氣象我輩終身沈溺詞章豈不愧死工詩汪正鑿稱其懷抱深遠立心忠厚讀之令人孝弟之心油然而生嘗著詩比興箋以箋古詩三百篇之法箋漢魏六朝三唐之詩使讀者知比興之所起卽知志之所之又有近思錄補注十四卷簡學齋詩存詩刪 謝階樹字子玉江西宜黃人嘉慶

十三年一甲二名進士授翰林院編修五年充順天鄉試同考官九年充會試同考官二十一年奉命提督湖南學政累遷至侍讀學士階樹沈酣載籍工古文辭嘗擬文賦一篇論者謂出陸機之上所作大臣論縣令論等篇尤通達治體之言李祖陶嘗稱其有古大臣作用爲李紱後一人著有守約堂文集

劉淳 潘煥龍 謝葵

劉淳字孝長湖北天門人嘉慶二十一年舉人官遠安縣教諭淳資稟過人於書過日不忘下筆千言仁宗睿皇帝幸五臺獻詩五百韻廷試拜文綺之賜以是名大起鮑桂星督學湖北得其文大奇之環語諸生曰劉生曠代才也拔置第一壯歲放浪燕趙吳越及兩河閒所至倒屣相迎咸稱其才氣似牧之同甫五上公車不第歸而著書爲海內知名士所稱許卒年五十九其古文以氣爲主以意爲起止不規規繩尺詩剷除塗澤靡曼之習力追古人著有辛儂長短句雲中詩文集

潘煥龍字臥園湖北羅田人道光五年舉人歷官河南洧川商邱及山東鄒平知縣煥龍敦品勵學尤工於詩少嗜元白長遊京師與曾煥陳沆黃爵滋相切劘所詣益進嘗賦七白松歌蒼鬱古厚沆歎曰韓杜儕也一時傳誦都下官商邱時

布政使林則徐亟賞之以詩集丐爲校讎按察使麟慶謂楚中以公安竟陵一派爲作者所議煥龍一洗其習獨發爲和平中正之音以鳴於世嘗綜燕趙齊豫諸詩人爲論詩紀略一卷初任涪川地僻民陋力以振興文教爲己任商邱河決煥龍躬親畚鍤刻日葺工值臺灣用兵車馬絡繹於道芻糧皆出私購不以病民丁憂服闋需次山東堂邑令苛歛虐民萬餘人圍其城巡撫陳孚恩檄煥龍往且曰需兵幾何煥龍曰民鬧漕非叛也以兵往則激變矣單騎詣治所曉以大義民皆帖然其爲治官無留事獄無繫囚暇則與邑人士酌酒論文爲樂所至皆有循聲尋乞養歸年七十三卒所著有四梅花屋詩鈔十三卷臥園詩話十卷泰山游記讀書日記 謝莢字惕夫湖北黃岡人道光五年舉人歷官安徽霍山婺源涇縣知縣所至有聲決獄用漢儒援經斷疑之義一以情理爲衡歲饑榜戶口米數於通衢計口授粟胥吏不能爲奸民甚德之莢幼負異稟讀書日數行下長博通羣籍工詩文學政鮑桂星命擬鮑明遠舞鶴賦援筆立就大奇之謂莢曰文章小謝又清發今屬子矣由是小謝之名噪一時大吏爭延致幕府碑版書牘悉出其手每文酒唱和頃刻數十章新思古藻層出不窮名流咸推服焉書法李北海晚年



自卜生壙以詩紀之年七十五卒著有惕夫文集履尾居詩集

董祐誠 兄基誠 周儀暉

董祐誠字方立江蘇陽湖人嘉慶二十三年舉人祐誠生五歲曉九九數年十八與同里張成孫共治算學盡通諸家法始工爲漢魏六朝之文遊陝西成西嶽華山神廟賦名動西安繼復肆力於曆數輿地名物之學講求典章禮儀政治之要思有所表見於世涉獵旣廣撰述亦益富平居於世俗事絕無所嗜特善深沈之思書之號鉤棘難讀者一覽無不通曉復爲出新意闡隱曲補罅漏專門名家他人殫數十年之力而探索之者祐誠晨夕閒已突過之研究諸史曆志因撰三統術衍補一卷序云推步家實測日月星辰之行以算數綴之謂之綴術自漢以下無慮數十家莫不先審天行復綴算數數不虛倚則假物以爲用三統之律呂爻象大衍之著策授時之平差立差西人之小輪橢圓其用殊其設數以求合於實測一也俗學昧於原本毀所不見遂以律呂著策之說爲詬病是知槃之非日而並疑日之非圓也三統術爲諸家權輿史稱公孫卿等定東西立晷儀下漏刻已得太初本星度迺更選洛下閎等運算以律起曆則是已得諸數而復飾以律呂

爻象固章章矣錢詹事作三統術衍頗稱詳覈然於勘術之原猶有未備今輒依太初元年日月五步度數比而列之入以演撰之法爲衍補一卷後之學者庶無惑乎此也已復取三統以次迄明大統萬年回回各術計五十三家擬撰五十三家曆術其涼趙暉之元始術唐南宮說之神龍術及瞿曇悉達之九執術志不著錄用數更據開元占經所引補之屬稟未成但有序目載文集中又著割圓連比例數圖解三卷序云元郭守敬授時草用天元術求弧矢徑一圍三猶仍舊率西人以六宗三要三簡術求八綫理密數繁凡遇布算皆資於表梅文穆公赤水遺珍西士杜德美圖徑求周諸率語焉不詳罕通其故嘗欲更勘通法使弦矢與弦可以徑求覃精累年迄無所得己卯春秀水朱鴻以杜氏九術全本相示蓋海寧張豸冠所寫者九術以外別無圖說聞陳氏際新嘗爲之注爲某氏所祕書已不傳乃反覆尋繹究其立法之原蓋卽圓容十八觚之術引伸類長其累積兼差分之列衰商功之堆垛而會通以盡句股之變周髀經曰圓出於方方出於矩矩出於九九八十一圓弧也方弦矢也九九八十一遞加遞減遞乘遞除之差也方圓者天地之大體奇耦相生出於自然今得此術而方圓之率通矣爰分圖著解冠

以九術原文並立弧矢互求四術都爲三卷又撰斜弧三邊求角補術一卷自序云梅文穆公赤水遺珍有弧三角形三邊求角開平方得半角正弧法解於薛儀甫天學會通三邊求角用對數術略同其弧視總較術稍繁然用於對數則此爲簡省矣薛氏有法無解梅氏以平行綫作同式三角形釋之義亦未顯暇日尋繹迺知角旁大弧之弦綫與對比之弦綫相交成平三角形以邊角比例術求之可得所求角正矢之半爲末數故倍末數卽得角之矢而術必求半角正弦者八綫對數表無矢綫知此術之專爲對數立也別爲圖解並補求又一角術推步之士或有取焉又撰堆垛求積術一卷序云堆垛求積三乘以上舊無其術汪氏衡齋算學始擲諸乘方三角堆求積術以爲古所未發予釋割圓捷法更得求諸乘方所成之方錐堆術繼復以縱方堆推之而得諸乘方所成之縱方堆術以謂此兩術又汪氏所未發也近讀四元玉鑑茭草形段果垛疊藏諸問求其天元如積之原則與諸術皆一一符合學然後知不足旨哉言乎爰取舊撰兩術比而錄之爲讀四元玉鑑者助焉祐誠雖精力過人然用之無節卒以耗竭道光三年卒年三十三其兄基誠取已成曆算彙五種附以水經注圖說殘彙四卷文甲集二卷文



乙集二卷蘭石詞一卷刊行之 基誠字子誥嘉慶二十二年進士刑部郎中河南開封府知府工駢體與祐誠文合刊署曰移華館駢體文共四卷又著有玉椒詞八卷 周儀暉江蘇陽湖人嘉慶元年舉人大挑選安徽訓導擢陝西山陽縣知縣地貧瘠民以例供官之薪炭棚架儀暉皆罷之或曰俗好訟宜少立威自見於上官儀暉曰吾老矣乃復與少年輩爭名聲也鄧廷楨見儀暉所作韓城驛詩愛重之及巡撫陝西調署鳳翔以老乞休去之日民皆見思山陽父老亦曰官無遽歸必還我山陽卒年七十詩宗漢魏六朝出入三唐諸家奄有其勝著有夫椒山館詩集

方履錢

方履錢字彥聞順天大興人父聯聚官甘肅履錢隨父任時尙幼同官楊芳燦驚爲奇童嘉慶二十三年中式舉人道光六年大挑用知縣分發福建署永定縣事調署閩縣明年卒於官年四十一履錢初試吏持己廉任事勇其宰永定時豪家胡鳳兆與族人某甲不相能殺子劫其父棺棄深山中前令數年不能捕履錢爲書諭之鳳兆果自首遂論如律南鄉民許開玉殺其族幼姪而逃緝弗獲履錢禱

於神開玉至廈門將浮海矣忽懵然歸抵縣廨堂皇閒負手躑躅門吏有識者執之一訊而服聞爲會城首邑事旣煩且一省政治皆得與聞履籤抵任不半載釐積訟五百餘事而以文行道民一如治永定其俗好鬪小不適輒持械格殺棄其尸官勿得問履籤集鄉老多方曉諭之復偵知其將鬪者亟馳往杖懲焉故終其任無械鬪患會大旱步禱烈日中體素豐碩不耐暑又憂無雨日焦閱遽得疾五日而卒履籤讀書善求間經史百家言皆好之而能貫其源流善爲駢儷文始學其鄉先輩已復泛衍浸溢渾厚淵雅希踪於范蔚宗嘗過洞庭風浪急履籤方草檄江神文意氣益振詩則規槩於晉唐詞則胎息於北宋自天文地理氏族錢幣及六書九章之法梵夾之典靡不綜貫尤酷嗜金石文字所積幾萬種遊伊闕居山中彌月徧搜石刻得唐造像題名八百餘種嘗語其友梅曾亮曰吾於古今著錄家缺二碑而已著萬善花室文集六卷續集一卷詩五卷詞一卷河內縣志三十卷伊闕石刻錄六卷富蘅齋碑目六卷希姓錄一卷泉譜一卷

彭兆蓀 郭慶

彭兆蓀字湘涵江蘇鎮洋人貢生道光元年薦舉孝廉方正未就卒年五十四兆

孫少隨父禮官山西年十五應順天鄉試卽聲滿名場然竟十餘年無所遇禮後由知縣改官潁州府教授既歿家貧累甚議將析產以償人曰得彭君一言毋問舊事兆孫卒獨破產盡償所負而自鞠幼弟隻身客遊以爲養諸大吏多資其才傾身納交兆孫顧未嘗私請義所不可疑如也胡克家爲江蘇布政使時總督以國用不足議加賦兆孫方在幕中力贊克家白大吏寢其事又與長洲顧廣圻同爲克家校刊元本通鑑尤工槧文選獨成文選考異十卷鈎稽探索頗具要領南城曾煥轉運兩淮愛禮才士兆孫往依之煥爲點定其集陽城張敦仁時官揚州府知府亦敬禮之兆孫少爲閱覽博物之學覃精訓詁曾輯有經歧臆案後以爲多前人所已言乃芟薙之爲潘瀾筆記二卷晚讀其鄉先生黃陶庵日記憬然有省深悔其於聖賢大道茫乎未之有得遂作懺摩錄然亦時雜禪學婁縣姚椿微諷之隕然不以屑意也所爲文鴻博沈麗力追六朝三唐見者以爲金玉淵海卿雲黼黻尤長於詩始務琦瑰晚乃益慕澄淡孤篋深得古人意著有小謨觴館詩集八卷詩續集二卷文集四卷文續集二卷詩餘共二卷 郭麐字祥伯江蘇吳江人諸生麐少有神童之目一眉瑩白如雪舉止不凡見者不問而知爲通人雅



士桐城姚鼐極稱許之家貧客遊文采照耀江淮間負其才識不得有所見於世素所積蓄化爲憤鬱無聊而時寓於詠歌酣醉嘗病潘昂霄金石例止取韓柳二家因取洪氏隸釋條分縷析間以後人祖述之繇附識於後爲金石例補二卷詩初學李長吉沈下賢稍變而入於蘇黃青浦王昶題其行卷云攬其詞旨哀怨爲宗玩厥風華清新是上如見衛叔寶許元度一流人物詞尤清婉穎異具宋人正音嘗仿表聖詩品撰詞品十二則深得三昧所爲古文亦雅潔奧麗有古人法律著有靈芬館詩初集四卷二集十卷三集四卷四集十二卷續集八卷雜著二卷雜著續編四卷江行日記一卷楞園消夏錄三卷靈芬館詩話十二卷續詩話六卷蘅夢詞浮眉樓詞懺餘綺語各二卷道光十一年卒年六十五

王豫 吳翌鳳

王豫字應和江蘇江都人布衣性酷嗜詩家焦山北岸之翠屏洲楊柳桃花數萬本隔江京口諸山皆在几案間豫吟詠其中不求聞達其論詩以王孟韋柳爲宗高澹醇雅不爲風氣所轉移嘗下榻焦山佛閣本沈德潛別裁法輯國朝江蘇人詩五千四百三十餘家爲江蘇詩徵一百八十三卷攜兩兒司讐校披覽至夜分

於殘篇斷簡中得一佳句輒呼兩兒誦之自謂此境古人得未曾有歷十二年書成侍郎姚文田聞而異之題曰詩徵閣阮元稱其於忠孝節義布衣逸士集未行世者所錄尤多可謂發潛德之幽光云道光初元舉孝廉方正力辭不就卒年五十九又著有儒行錄明世說新語王氏法言王氏清稔錄種竹軒詩文集 吳翌鳳初名鳳鳴字伊仲江蘇吳縣人諸生博雅工詩文少寓陶氏東齋寢饋書史積二十年中歲游楚南徧歷匡廬嶽麓洞庭諸勝垂老始返卜居城南著書奉母題其室曰歸雲舫一時文士多從之遊詩工五言嘗輯有懷舊印須二集注吳偉業詩生平不喜空談心性及二氏之學又謂考據之文易於傷氣所輯國朝文徵四十卷自順治至嘉慶二百餘年凡忠孝節義有關風化或遺文佚事可備掌故者登之皆有裨於學問經濟著有稽齋叢彙

趙紹祖

趙紹祖字琴士安徽涇縣人諸生九歲卽以能文稱年十二以經解受知於大興朱筠筠愛其才期以精造旣不得志於有司遂棄帖括專力於經史百家下至碑版書畫之屬罔不鉤考決擇惟精性至孝居喪盡禮處鄉里恂恂然終身樸學手

一編日夜不少輟當事重其爲人咸禮敬之曾未一私謁兩署滁州訓導一署廣德州訓導皆不數月而士習丕變道光元年舉孝廉方正時陶澍爲安徽布政使延紹祖纂輯安徽省志詳瞻有體累主秀山翠螺各書院殷殷教誘始終無倦色卒年八十二紹祖之學無不窺尤深於史最著者一曰通鑑注商參研抉發至六百餘條視顧炎武日知錄所列及陳景雲之舉正不啻倍蓰一曰新舊唐書互證於劉昫歐宋之書無所偏徇然其閒摘新書者十之八九蓋新書考證頗疏同時吳縝已有糾繆之作但縝挾私忿有意吹索而紹祖則平心以救其失初不存門戶之見又篤好碑版謂可補史傳之遺成金石文正續鈔共十卷金石跋六卷他著有建元考二卷校補竹書紀年二卷校補王氏詩考二卷涇川金石記二卷涇事二卷讀書偶記八卷消暑錄一卷古墨齋筆記六卷觀書記八卷書畫記一卷琴士詩鈔十卷文鈔六卷在志局日又輯有安徽人物志八卷金石錄八卷

### 姚椿

姚椿字春木江蘇婁縣人父令儀官四川布政使椿自幼從宦滇蜀資稟絕人十歲卽通聲律喜博覽遇未見書必手自鈔錄以國子生應順天鄉試才名噪京師



既而連試不售夷然不爲意日與洪亮吉楊芳燦張問陶極論詞賦氣甚凌厲賢士大夫多道其賢令儀屢參諸大帥幕椿奔馳南北所至必周覽其山川交其賢豪長者乃更求爲有用之學凡河渠農桑漕務邊防以及閭閻疾苦無不反覆熟籌稽之史傳證以游歷思將大用於世既又從學於桐城姚鼐退而發濂洛關閩之書讀之爽然如有所失自此屏棄夙習豈意求道泊如也嘗得寶應朱澤澣遺書讀之數日作而言曰此真宗守程朱之道而不欲以文著者於是悉訪朱氏未行之書及其門人所述極力表章之又親詣其墓拜謁申私淑之禮道光元年詔舉孝廉方正松江府知府欲以椿與彭兆蓀同薦固辭不就先後主講河南夷山湖北荆南松江景賢書院以實學勵諸生惟成就人材是急咸豐二年卒年七十七椿好學不倦其解經主兼通漢宋儒曰譬之釋氏有宗有教不可偏廢論文必舉桐城所稱曰好學深思心知其意又自言曰文之爲用不外四者曰明道日記事曰考古有得曰言詞之美故其選國朝人文皆本此旨論詩以諷諭爲主以音節爲輔以獨造爲境以自然爲宗每曰元裕之以後無大家於明初推劉伯溫謂在高季迪上所自爲詩得陸放翁詩外有事之旨慘澹經營不遺餘力有杜白新

樂府之風著有通藝閣詩錄八卷和陶詩三卷晚學齋文錄十二卷又選國朝文錄八十二卷

梅曾亮 管同 毛嶽生

梅曾亮字伯言江蘇上元人道光三年進士用知縣援例改戶部郎中少時文喜駢儷既游姚鼐門與管同友善同輒規之始頗持所業相抗已乃一變爲古文辭義法一本桐城稍參以歸震川居京師二十餘年篤老嗜學與宗稷辰朱琦龍啟瑞王拯輩遊處咸嘖嘖稱賞其才一時碑版記敘率其手筆嘗著民論曰天下有亂民有姦民毒官吏迫飢寒挺刃而卒起索黨與隨和以自救此亂民之常態也若夫無所激發而倡爲狂悖之說以招誘愚瞽而名之曰教是爲姦民姦民者古無是也且夫教之名民所不易受於長上者也而匹夫能得之於鄉里非民之所能爲也勢也今夫民之生也耕而食織而衣貿貿然相往來不知有士大夫聲名文物之樂又非如富厚有力者有鳴鐘連騎采色視聽之娛若此者枯槁寂滅之士或能堪之而民固不能樂乎此也聖人憂之於是有飲射之典有雉蜡之禮有月吉讀法之令奔走之馳驟之而不憚其勞拙其意以爲吾法之可知者在乎角

才能習教訓而消息乎時氣而法之不可知者在使民回易耳目震盪血氣陽遂其鼓舞之情而陰輯其靜而思騁之意其教如是而已當漢之盛時凡鄉射大雉鄙肄鄉會皆太守與縣令親之猶古法也法之廢其東漢之衰乎嗟夫此黃巾米賊之禍所以起而不可禁也夫民所樂趨之事而不爲利導之草野之間必有因民之欲竊吾意以售其姦者其始特出於私立名字歛財帛賽會徵逐而已而其後遂爲有國者之憂至於爲有國者之憂蓋非獨從而和者不樂也而亦豈倡之者之始意及此哉然而勢必至乎此者何也吾爲之說以導之吾聚之吾能散之故其權在上民自爲聚者非法之所許也民知意不出於上而恐法及己也鯁鯁然有與上相持之心其勢遂聚而不可復散故曰非民之所能爲也昔子貢觀於蜡以爲一國之人皆若狂夫至於一國若狂雖後世游民聚衆之盛無過於此而聖王行之孔子曰張而不弛文武弗能也夫文武所不能者而後人能之必其民皆標枝野鹿如上古之不相往來者而後可也而豈有是理哉嗟乎權出於士而黨錮清流之禍成權出於民而左道亂政之禍烈然則以王者之權而謂教化不易興者則妄矣曾亮見川楚教匪之亂及嘉慶十九年林清之變故其言如此其



上汪志伊書亦諄諄言豪民易治姦民難知知之者獨州縣而今爲州縣者皆苦無權是時天下方全盛亂端未兆其後粵賊起陷江南卒如其言又著刑論頗中近日刑部說帖駁案之弊旣以文名輦轂有宮監謬聯文雅士傾動朝列慕曾亮名就門請謁曾亮笑曰吾豈學康對山哉卒謝之有後進來謁曾亮戒以長安居大不易惟擇交遊端言行勤讀書三言而已其人本誠篤用是益兢兢無纖芥過回里猶尋味其言不置云詩亦天機超妙爲同所推官戶部二十餘年沖淡自得以資久將遷聞弟病遽乞歸主講揚州書院金陵亂後依河道總督楊以增以增爲刊所著柏枧山房文集十六卷詩十二卷駢文二卷柏枧宣城山名曾亮祖居也咸豐六年卒年七十一 管同字異之亦上元人父文郁早卒母鄒以節孝聞同少負經世志爲學不守章句從姚鼐學爲古文鼐亟稱之所爲風俗書及籌積貯書皆通達政體深切時弊道光五年舉人主試侍郎陳用光亦從姚鼐受古文辭學者語人曰吾不多持節校兩江士獨以得一異之自喜其待同不敢以世俗門生之禮苟有稱必曰丈卒年五十二著因寄軒文集十六卷七經紀聞孟子年譜文中子考戰國地理考皖水詞存子嗣復字小異博雅好經術一時耆彥方聞

之士多折行輩與之交又研算術窺代數微積之略遭兵亂死吳中 毛嶽生字  
中甫江蘇寶山人以祖大瀛死簡州難廕襲雲騎尉改文學生幼孤貧事大母暨  
母孝未弱冠以白雁詩得名流離閩中十餘年刻苦不廢所學嘗從桐城姚鼐游  
古文得其家法著有休復居詩文集十二卷道光二十一年卒年五十一

張維屏 譚敬昭 黃培芳 彭泰來 倪濟遠 邵詠

張維屏字子樹廣東番禺人父炳文官四會訓導維屏幼奉庭訓內行修飭研究  
典籍夙有詩名年三十所作已卓然成家海內名流甚器重之嘉慶九年舉人至  
都大興翁方綱曰詩壇大敵至矣道光二年進士以知縣分發湖北署黃梅縣時  
江水潰隄災民徧野維屏以帑金賑濟區畫條法民得實惠嘗乘小舟勘災遇急  
溜衝去得樹免於溺民歌有官要救民神救官之句調補廣濟縣漕務非折色規  
費無所出維屏曰理不直則氣不壯吾寧舍官以伸氣引疾去汪廷珍語人曰縣  
官不願收漕世所罕見也丁艱服闋願就閒曹援例爲同知分發江西署南康府  
知府政暇至鹿洞與諸生以文行砥礪於廬山建李蘇二公祠祀太白東坡謂詩  
可以興因集諸生講詩寓規勸焉未一載罷郡請假歸時年五十七遂不復出隱

居花埭閉戶著書時泛扁舟往來煙水閒自號珠海老漁癖愛松又號松心子總督林則徐奉旨至廣東禁鴉片訪於維屏維屏曰毋開邊釁則徐不用旣而英人果攻廣州晚年耳目聰明讀書日有程課爲學海堂學長堂中士有善屬文者維屏往拜之曰昔吳學士齋老矣聞人誦吾詩輒來拜我我今敢不畏後生耶其愛才如此性好游嘗築室白雲山居之又游羅浮山告歸後遊鼎湖七星巖西至桂林徧遊諸巖洞其詩出入漢魏唐宋諸大家取才富而醞釀深論者謂爲必傳精醫術而不著書自言學醫四十年得黃元御書乃通長沙之學其深造過於詩也咸豐九年卒年八十所輯國朝詩人徵略初編六十卷二編六十四卷最有功於文獻著有松心詩文集 譚敬昭字子晉廣東陽春人嘉慶二十二年進士官戶部主事敬昭淹博羣籍其詩出入古大家而於太白尤近欽州馮敏昌招同粵秀山登高名流咸集敏昌盛稱其樂府獨出冠時時順德黎簡以詩名海內敬昭賦鵬鶴篇投之簡歎爲異才其爲老輩傾倒如此大興翁方綱督學粵東極賞其詩與張維屏黃培芳並稱爲粵中三子兼工文詞所作擅初唐六朝之勝其擬答客難一首七稽一首甚稱於時性廉退官戶部十餘年公餘退食輒手一編蕭然自



得於人世浮榮泊如也著有聽雲樓詩鈔詞鈔 黃培芳字子實廣東香山人嘉慶九年副貢生官內閣中書少慕古力學爲馮敏昌所器重詩格高渾有山水清音錢塘戴熙亦極譽之性閒靜然聞登臨攬勝輒神動色飛嘗三遊羅浮山於絕頂築粵嶽祠以觀日出自號粵嶽山人又以前人志羅浮山者多詳於羅而略於浮乃於攀崖躡磴時用所聞見作浮山小志而詩境亦緣是益進卒年八十二著嶺海樓詩文鈔 彭泰來字子大廣東高要人父輅少以詩古文辭受知於翁方綱錢大昕志高行清能自成一家言乾隆四十二年拔貢生任英德教諭著有詩義堂集泰來生二十月能卽事誦古經語無不切年十四以詩與譚敬昭相酬唱嘉慶十六年曾煥開藩於粵泰來與番禺陳曇俱爲坐上客十八年以拔貢入太學罷歸遂絕意進取宗屬或諷之泰來笑而不答總督祁墳欲延見之不往學使李棠階高其品屏騶從徒步就見復肅函問輓回風俗之道泰來乃比切時敝直明己意爲書數千言復之棠階表其廬且下教高要縣歲時存問所爲詩天才騁發出入於少陵昌黎香山長吉東坡遺山梅村諸家善屬文兼工隸草八分精篆刻生平心慕趙邠卿自刻私印曰趙齋著有詩義堂後集六卷昨夢齋文集四卷

端州金石略四卷讀史讎筆六卷又輯有端人集四卷 倪濟遠字秋查廣東南海人嘉慶二十二年進士嗜讀書詩才尤超軼通籍後令廣西之恭城荔浦賀縣桂林山水甲天下所治地僻政簡濟遠於川原奇秀民俗詭異可喜可愕均寄諸詩然本性慈良見纍囚卽惻然故其詩有嬌兒見爺娘惜極始一扑扑之傷我心肌膚吾骨肉之句又時與上官齟齬故十餘年不晉一階然所爲詩擺脫凡近論者謂廣州自張錦芳黎簡後惟濟遠卓然自成一家俸滿入都南歸道卒著有味辛堂詩存四卷茶堪舍詞彙一卷 邵詠字子言廣東電白人優貢生官順德訓導詠性孝友父天眷歿逾數年猶哀戚不已嘗闢地爲軒顏曰餘思與弟詩友愛尤篤旣而詩病歿詠益深悲悼因名其室曰存杜軒取詩杖杜之義也生平工詩文旁通書畫篆刻隨意爲之皆臻神妙有得其片紙寸縑者珍如拱璧道光紀元舉孝廉方正詠力辭不就著有種芝山房詩文集印譜魚山年譜電白縣志詩字子京嘉慶辛酉拔貢生少有夙慧下筆數千言能書畫詩亦感慨激昂才清而傑卒年纔三十七有遺藁二卷

黃爵滋 郭儀霄

黃爵滋字德成江西宜黃人道光三年進士翰林院庶吉士散館授編修八年充江南鄉試副考官十二年十五年兩充會試同考官十七年充山東鄉試正考官十九年充江南鄉試正考官歷官工科給事中鴻臚寺卿通政使洊陞禮部刑部侍郎遭父喪歸未幾戶部銀庫虧絀事覺坐失察落職服闋賠繳得旨以員外郎用尋卒宣宗廣開言路先後擢臺臣敢言者置列卿以爵滋爲之首爵滋陳六事察天道廣賢路豫備將材控制匪民整飭京營堆撥申嚴外夷防禁略言中國與外夷互市原有地界近夷人錄述中國情事潛繪山川形勢我示之弱則彼強我示之強則彼弱威服之道不在臨時張皇在平時振作奉旨飭堆撥肅夷禁如所請行又上塞漏卮疏謂鴉片流於中國爲害日深耗銀之多由於販煙之盛吸煙之衆得旨下各督撫將軍嚴禁自明季迄今閱數百年至是始知以有用財填無窮壑實爵滋發之及英吉利內犯復上籌辦海防疏大旨言水師廢弛兵額多缺戰艦不備宜廣召募助攻守集艇船資駕馭嘗著海防圖二卷表一卷工詩氣韻高雅力追漢唐其論詩謂儕俗之作有數非或聲調便利靡而不振或意旨蹇澀枯而不澤若是者非體或馳騁揮霍剽而不留或堆垛襍積滯而鮮通若是者非



氣或貌似神離虛而不實或以文飾俗雜而不清若是者非理或苦心束縛自謂親切或任情泛濫自謂周至若是者非法去茲數非求其一是然後可以語山水之助發智仁之妙而其道之靡窮業之不倦則又貴有畢生之閱歷同志之觀摩焉於近今作詩之弊指摘殆盡王昶謂其輔翼詩教之功非淺鮮云當時士大夫日以風雅文章自見爵滋揖讓其間爲名流所推重所著有仙屏書屋詩錄初集十六卷後錄二卷文錄十六卷戊申楚游草一卷 郭儀霄字羽可江西永豐人嘉慶二十四年舉人官內閣中書工詩出入漢魏唐人而能自抒詞藻卓然名家新樂府尤深妙古渾一時莫與抗手王昶謂近人多以史書中事作爲新樂府儀霄下筆嶄嶄不拾他人牙慧官京師時大學士潘世恩王鼎皆敬禮之朝鮮使臣權敦仁李石友嘗乞所作傳之東國喜畫竹生氣遠出黃爵滋贈詩有古之與可今羽可句儀霄喜甚製一小印印其畫著有誦芬堂詩鈔十二卷文鈔六卷

### 湯鵬

湯鵬字海秋湖南益陽人道光三年進士年甫二十豪於文負氣自喜下筆震爍奇特當世目爲異才以禮部主事入直軍機處補戶部主事轉員外郎擢山東道

監察御史鵬在軍機歷覽天下奏章又官戶曹明習吏事已慨然有肩荷一世之志及遷言職年始三十餘意氣踔厲謂天下事無不可爲者其議論所許可惟李文饒張太岳一流不屑以詞章士自居於是勇言事未踰月三上章會宗室尙書叱辱滿司員其人訐之尙書遂交部察議鵬援嘉慶中故事爭之稱司官朝吏過失當付有司不可奴隸辱之此臣作威福之漸也吏議輕不足示警疏入罷御史仍回戶部洊遷郎中英人事起沿海大擾鵬憤甚時已黜不得建言猶條上洋務三十事乞尙書轉奏當事者猶以爲書生之見及美利堅求改關市約有鵬奏中不可許者數事人以是服其言既負才氣不得施則益務著書以自暴白於天下所作浮邱子一書立一意爲幹幹分爲支支之中又有支焉又復爲幹支幹相演以遞於無窮大抵言軍國利病吏治要最人事情僞開設形勢尋躡要眇一篇數千言者九十餘篇最四十餘萬言每遇人輒曰能過我一閱浮邱子乎其友魏源每謂人曰是書可傳也又著明林十六卷指陳前代得失又著七經補疏以明經義又著止信筆初稿雜記見聞事實始成進士卽力專爲詩歌自上古歌謠下逮李唐無不規倣中更感慨抑鬱尤多悲憤沈痛之作爲文高語周秦每詆司馬遷

韓愈以張其說然徑涂出入體制佳惡自了然於心謂其友人曰漢以後作者或專工文辭而義理時務不足或精義理明時務而辭陋弱兼之者惟唐陸宣公宋朱子耳吾欲奄有古人而以二公爲歸其持論如此道光二十四年卒年四十四

項名達 戴煦 陳杰 夏鸞翔 汪日禎

項名達原名萬準字步來浙江仁和人道光六年進士官國子監學正生平專算學當窮極要眇時雖寒暑飢渴不暇顧苟有得欣然意適若無可喻於人嘗語黎應南曰守中西成法搬衍較量疇人子弟優爲之所貴學數者謂能推見本源融會以通其變竟古人未竟之緒發古人未發之藏耳以句股相求和較諸題術稍繁雜初學恆苦其難著句股六術及圖解復附句股形邊角相求法三十二題合爲一卷其法第一二三術及第四術之前二題悉本舊解餘爲更訂新術皆別注捷法各爲圖解明其意第四五六術其原皆出於第三術可釋之以比例第三術以句股較比股若股與句弦和以句弦較比股若句與股弦和是爲三率連比例凡有比例加減之其和較亦可互相比例故第四五六術諸題皆可由第三術之題加減而得即可因第三術之比例而別生比例因比例以成同積而諸術開方



之所以然遂於是得同時明算諸人皆相友善而錢塘戴煦烏程陳杰契最深晚年詣益進謂古法爲無所用不甚涉獵而專意於平弧三角與杰意合嘗謂平三角二邊夾一角逕求夾角對邊其法以甲乙邊自乘與甲丙邊自乘相加得數寄左乃以半徑爲一率甲角餘弦爲二率甲乙甲丙兩邊相乘倍之爲三率求得四率與寄相減鈍角則相加平方開之得數卽乙丙邊也其論割圓術率從三角堆整數中推出零數但用半徑卽可任求度若分秒諸弦不貲弧弦及他弦矢每一乘除便得一數其法簡易而捷實爲夏鸞翔李善蘭諸家開其先性溫雅歸後主講紫陽書院校閱精審士論翕然宗之卒年六十二又著象數原始一書未竟疾革時遺書戴煦續成之煦增訂補纂都爲七卷餘著述燬於亂今不傳 戴煦初名邦棣字鄂士浙江錢塘人增貢生生平冲澹靜默避俗如不及研精曆算兄熙督學廣東以英吉利人戰艦用火輪寄言謂吾弟精思必得其制乃著船機圖說又以劉徽九章重差一卷李淳風注未詳其理爲補撰重差圖說又著勾股和較集成一卷四元玉鑑細草數卷略同羅士琳書而圖解明暢過之中年益精進以求對數舊法數重緒多初學恆未易了乃揭其精要而變通之著對數簡法二卷

用連比例遞求法著續對數簡法一卷又因徐有壬割圓捷法著廣割圓捷法一卷與李善蘭參訂外切密率四卷又謂新法推步用八綫表則較繁用八綫對數表則較易必待求得八綫而後由八綫求其對數縱有捷法亦多輾轉若能舍八綫而徑用弧背求其八綫對數更爲直捷初悟得四十五度以內割綫頗可徑求假數不必借用數依法演之果得徑求割綫對數之術繼悟連比例開方法其用初商實較大者二術可求負算對數而因以得弧背求四十五度以外正弦對數之術著假數測圓二卷後總合四書名求表捷數英吉利人艾約瑟見之甚推服踵門求見煦引東坡事卻焉艾後轉譯煦書入彼國算學公會中其傾倒如此並世明算者若羅士琳徐有壬李善蘭張福禧皆來訂交互質得失晚絕意進取以著書爲務工書畫及古今體詩咸豐十年粵匪攻杭州熙死家人走報笑曰兄得死所矣亦自投井殉焉年五十六他著有音分古義二卷莊子內篇順文一卷陶淵明集集注十卷元空秘旨一卷汲齋臚稿戴氏泉譜等書 陳杰字靜菴浙江烏程人諸生官欽天監博士遷國子監算學助教以疾歸生平邃於算術尤神明乎比例之用嘗謂西人竊取乘除而爲比例竊取句股而爲八綫時以爲知言又

謂算法之用多端在官之事至要在治曆次出師次工程錢糧次戶口鹽引次堆積丈量其儒者所爲則考據經傳下及商賈庶民則貲本營運市廛交易持家日用事無鉅細悉原於算初著輯古算經細草一卷後又爲之指畫形象錄成圖解三卷又爲之證引經傳博采訓詁別成音義一卷官欽天監時供職時憲科兼天文科司測量爲上官所倚重嘗測黃赤大距所得之數爲二十三度二十七分當時未敢用迨道光二十四年修儀象考成績編成書監臣卽取此數上蒙欽定頒行歸後樓居撰補湖州府天文志七卷時遊於杭與項名達羅士琳金望欣徐有壬相友契年未及七十卒又著有算法大成上編十卷其下編十卷有目無書今佚不傳論者謂杰苦心孤詣洞見本源其定句股弦三數皆整法表列股弦較數以及倍弧求通弦諸三角邊角互求易弧爲平所創新法皆妙合自然自足名家云弟子丁兆慶張福禧皆能傳其學 夏鸞翔字紫笙浙江錢塘人諸生官詹事府主簿遷光祿寺署正少聰穎好學工詩精繪事篆刻於音韻卜筮等書能通其奧尤精算學爲項名達入室弟子與戴煦爲世交後遊廣州鄒伯奇吳嘉善皆相友善講究曲綫諸術洞悉圓出於方之理匯通各法更推演以窮其變著洞方術



圖解二卷又撰致曲術一卷曰平圓曰橢圓曰拋物綫曰雙曲綫曰擺綫曰對數  
曲綫曰螺綫凡七類於杜項戴徐羅諸術外自定新術參互並列頗爲精密又著  
有致曲術圖解一卷少廣縋鑿一卷伯奇序其書謂自戴震錢大昕表章算學古  
書其後李銳焦循輩皆墨守古法而不通融徒令讀者多一重障礙不如鸞翔書  
明白易曉云詩多憂時感事之作五言尤佳晚年應聘同文館教習同治三年卒  
又著有萬象一原春暉山房詩集嶺南集 汪曰楨字剛木浙江烏程人咸豐二  
年舉人官會稽教諭少秉母氏趙教敦行勵志學無涯涘精史學又精算學初撰  
二十四史日月考上起共和下與欽天監頒行萬年書相接各就當時行用本法  
推算詳列朔閏月建大小並二十四氣略如萬年書式爲五十卷又附古今推步  
諸術考二卷甲子紀元表一卷搜羅書逾數百部致力幾三十年其言曰學史者  
日月淆亂則事蹟之先後不明而興衰治忽之故亦無由考察欲求其精先求其  
粗吾識其小而人得識其大吾任其難而人將任其易於學史之人不無少補云  
其後莫友芝見其書謂可名家而惜其卷帙過繁乃刪爲歷代長術輯要十卷考  
二卷生平著述等身以書籍朋友爲性命修金所入悉以購書有荔牆叢刻又嘗

修烏程縣志南潯鎮志見稱於時兼通音韻之學好填詞所著又有四聲切韻表補正五卷推策小識超辰表三卷如積引蒙八卷隨山宇方鈔一卷荔牆詞一卷光緒七年卒年六十九

陳偕燦 艾暢 湯儲璠

陳偕燦字少香江西宜黃人道光元年舉人以教習敍官知縣分發福建署惠安有政績後爲言者中傷棄官歸偕燦天才敏捷少好六朝文尤喜庾開府既服習兩漢及韓柳歐蘇諸家下筆縱橫不可一世詩學劍南東坡四十後出入三唐於大歷十子爲近其論詩謂詩欲其真不欲其僞又謂古今論詩有二曰性情曰格調性情真也襲格調而喪其面目僞矣格調亦真也離性情而飾其衣冠僞矣此杜少陵所以有別裁僞體之說也東鄉吳嵩梁極推其詩決其必傳嘗遊齊魯燕趙吳越閒阮元陶澍曾燠等咸以文章氣誼相契洽天性醇篤孝友聞於鄉黨又工書法古秀似東坡畫有逸趣罷官後僑寓閩中貧甚以書畫自給著有鷗江漁隱集二十卷侯官林昌彝稱江西詩家蔣士銓吳嵩梁外推偕燦及艾暢湯儲璠艾暢字至堂江西東鄉人父方來有孝行暢幼讀西銘悅其言卽刻勵爲學鑿

壁納鐙誦達旦初以舉人大挑官臨江教授截取補廣東博羅縣知縣在官一年慨然曰不可以行吾學也遂乞歸道光二十年成進士暢工詩古文辭王昶謂其詩樸老真實無一浮淺語兼通經學尤長治詩著有詩義求經二十卷論語別注四卷大學古本注一卷中庸古本拾注一卷孟子補注二卷至堂詩鈔六卷 湯儲璠字若孫江西臨川人嘉慶十六年進士官內閣中書以病告歸儲璠夙具天才讀書過目成誦髫年卽名噪海內官中書進奉文字多出其手以病作忌者欲令去官大學士曹振鏞不可曰此今之燕許也會逆酋張格爾就俘振鏞以賀表屬儲璠文成古茂淵懿爲時所稱侯官林昌彝嘗稱儲璠駢體文沈博絕麗有復古之功詩跌宕酣嬉不可一世歸時舟中輒有吟咏其望海船與客談南河事諸篇憂深思遠洞達國體大有秦中吟遺響卒年四十餘著有布帆無恙草三卷忍冬小草二卷

黃本驥 兄本騏

黃本驥字仲良湖南寧鄉人道光元年舉人官黔陽教諭少孤與兄本騏互相師友砥學礪行名著江湖閒本騏以飢驅故常出游每歲盡歸來圍爐談藝爭執不



休家人苦其絮聒兩人者斷斷自若也本騏工詩兄弟時相唱和嘗刪存之爲式相好齋初稿本驥嗜學淹通經史尤癖愛金石有癡名嘗聚秦漢以來金石文字數百種及古琴刀布等名其居曰三長物齋又嘗自製溪州石磬及歷朝尺式自言客語猥雜一擊磬耳爲之清有持古器至以尺度之眞贋不能欺也生平好編訂古籍曾預修湖南通志搜采頗備官黔陽時建教澤堂課士多所成就屢至沅郡詢明米壽圖墓卒得之於榛莽中其好事如此著有聖域述聞二十八卷歷代職官表六卷皇朝經籍志六卷郡縣分韻考十卷避諱錄五卷詩韻檢字一卷癡學八卷古誌石華三十卷嘯山紺雪十二卷三長物齋詩略五卷文略六卷本騏字伯良嘉慶十三年舉人官城步訓導著有歷代統係錄六卷歷代紀元表一卷賢母錄四卷三十六灣草廬稿十卷

潘德輿 葉名澧

潘德輿字四農江蘇山陽人道光八年舉人十五年大挑知縣分發安徽未幾卒年五十五德輿年五六歲時母病行坐視母而哭母食乃食父患咯血疾每進藥必跪牀下旣而割臂肉以進父察其色動泣曰固知兒有是也旣洊臻大故祖母

猶在堂色養彌至及以嫡孫承重自小歛至反哭事求合禮而準度時制柴瘠儉然殆不勝衣著喪禮正俗文祭儀爲家法有寡妹無子德輿撫其猶子嗣之教養盡二十年從弟族子多賴德輿成立德輿爲學力求古人微言大義以爲輓迴世運莫切於文章文章之根本在忠厚源在經術其用在有剛直之氣以起人心之痼疾而振作一時之頹懦鄙薄以復於古其說經不祖漢宋而以近儒之破碎穿鑿爲漢儒之糟粕語錄之空虛元渺爲宋儒之筌蹄其論治術以爲天下之大病不外一吏字尤不外一例字而實不外一利字近世一二魁儒負匡濟大略非雜縱橫卽陷功利未有能破例字之局而成百年休養之治者也其學以克己爲要以有恥爲歸進退取與細大一節初儀徵阮元爲漕運總督招之力辭不往其後朱桂植周天爵皆願納交天爵至欲徵服郊外相訪德輿以爲義無所居徒駭流俗天爵喟然有望塵之歎少時與邑人邱廣業黃以炳相厲以懲忿窒欲之學中年所養益純善剴斷大事鄉人有事多取正焉居京後所與往來若永豐郭儀霄建寧張際亮震澤張履益陽湯鵬歙徐寶善窮精畢力研悅劇切盡一時之選座師侍郎鍾昌館德輿於家謂人曰四農乃吾師也爲文章入幽出顯沈痛吐露詩

精深奧窔一語之造有耐人十日思者所著有養一齋詩文集二十六卷劄記九卷詩餘三卷詩話十三卷 葉名澧字潤臣湖北漢陽人道光十七年舉人官內閣中書遷侍讀改浙江候補道名澧博學好古治經通易爾雅尤工詩居京師鍵戶讀書苦吟不輟與潘德輿交十年作詩之旨得於德輿爲多暇與二三賢士作山水游意度蕭曠有山澤閒意中歲徧游江漢吳越南抵黔中北至雁門所至皆紀以詩一時名士如湯鵬王柏心陳文述宗稷辰戴綱孫姚燮張際亮符葆森諸人皆與訂交後以兄名琛歿於海上侘傺不得志咸豐八年卒於杭州詩有真意託體在陶韋王孟之間際亮稱其深得唐賢三昧著有敦夙好齋詩初編十二卷續編八卷橋西雜記一卷

龔自珍 端木國瑚

龔自珍字璉人浙江仁和人道光九年進士授內閣中書陞宗人府主事十七年改禮部尋告歸遂不復出父麗正爲金壇段玉裁壻能傳其學嘉慶元年進士官至江蘇蘇松太道著有國語韋昭注疏自珍八歲得舊登科錄讀之卽有志爲科名掌故之學十二歲段玉裁授以說文部目卽有志爲以經說字以字說經之學



十四歲考古今官制卽有志爲國朝官制損益之學十六歲讀四庫提要卽有志爲目錄之學十七歲見石鼓卽有志爲金石之學生平著作等身出入於九經七緯諸子百家自成一言道光十二年夏大旱詔求直言大學士富俊訪之自珍自珍陳當世急務八條爲內閣中書時上書大學士乞到閣看本充史館校對上書總裁論西北塞外部源流山川形勢訂一統志之疏漏凡二千言官禮部時上書論四司政體宜沿革者三千言其官宗人府主事也充玉牒館纂修官則爲之草擬其章程當是時以奇才名天下者一爲魏源一爲自珍嘗著西域置行省議東南罷番舶議時躉其言尤精西北輿地之學程同文修會典以理藩院一門及青海西藏各圖屬爲校理自珍因擬撰蒙古圖志以同文歿不果成蒙古字類表册降表氏族表所爲文獨造深峻論者謂桐城之文如泰山主峰不可褻視自珍文如徂徠新甫相與揖讓俛仰於百里之間不自屈抑蓋一代文字之雄云著有尙書序大義一卷泰誓答問一卷尙書馬氏家法一卷左氏春秋服杜補義一卷左氏決疣一卷春秋決事比一卷西漢君臣傳春秋之義一卷典客道古錄一卷奉常道古錄一卷羽琤山金石墨本記五卷羽琤山典寶記二卷鏡苑一卷瓦韻

一卷漢官拾遺一卷泉文記一卷布衣傳一卷文集三卷續集四卷文集補二卷補編四卷道光二十二年卒年五十 端木國瑚字子彝浙江青田人生有異稟七歲入塾數月輒盡誦同學所誦書年十二或假以尙書四日卽成誦阮元督學浙江時試青田畫虎賦得國瑚歸與秦瀛言曰此青田鶴也檄之來杭州讀書敷文書院學使署西園有定香亭使賦之賦成海內傳誦焉旋由舉人大挑知縣改教任歸安教諭十五年清介絕俗未嘗妄受一錢貧士有志者輒分俸助之道光十年宣宗改卜壽陵那彥成恩禧以所著地理元文注獻上問近臣知此人乎曹振鏞對曰此浙江名士臣久聞其名上使召之國瑚方倚隱囊注周易聞命顛出坐後左右扶之起乃曰吾竟以方技名乎壽陵旣定將以知縣用原薦者稱國瑚不願上乃特授內閣中書道光十三年成進士仍以知縣改請歸中書國瑚好學深思通天人之奧旁及陰陽術數尤深於易同時龔自珍治經有聲傲睨一切常與國瑚論易歎爲聞所未聞朝鮮使臣入貢通問致殷勤曰君所爲定香亭賦東國人已傳誦請講易國瑚爲發揮旁通之旨皆鑿心而去詩崛強生峭耐人咀嚼不屑依傍自成一家所著有周易指四十卷周易葬說二卷太鶴山人詩集十三

卷文集四卷

戴綱孫

戴綱孫字襲孟雲南昆明人道光九年進士由工部主事官至給事中綱孫天才亮特幼失怙恃能自力於學以選拔第一入學使顧莛署中與池生春同讀書三年所學益進工詩與生春李於陽戴淳楊國翰稱五華五才子宋湘官滇時甚愛重之綱孫自言少私淑錢澧其後得之莛與湘爲多及居京師閉戶讀書與海內賢豪相切劘官臺諫時數上封事道光三十年綱孫奏殿試策以條對剴切爲主宜刪去繁聯不拘字數且勿專尙楷法奉旨允行俸滿不樂外任益專力於詩古文詞性耿直遇當世氣燄熏灼者必睥睨之若志行投合則傾輸肝膽嘗劇飲酣醉大呼俯仰古今治亂成敗之故盡然淚下作爲醉歌數十百言其詩蒼深雄健得力於太白及韓蘇諸家滇之爲詩者自錢澧後必曰綱孫王昶王柏心俱稱之古文初倣崔蔡後乃一以理勝而覈於事嘗著取舍篇謂學訓詁者議宋學之虛學心性者斥漢學之粗無訓詁安知心性非心性何爲訓詁使必外文章於性道則文章何事性道何物又著性善說謂孟子道性善此救時之論由春秋以至戰



國先王之大經大法皆已亡滅荀卿疾之故以性惡爲辭有慨乎其言之也易曰一陰一陽之謂道繼之者善也成之者性也溯於繼善之初性固無惡至賦之於人卽不得以皆善論然執是以爲言殘賊之子不將曰嗜殺人者之亦性乎吾故曰孟子之道性善本其最初者言之是救時之論也劉寶楫謂其有功於聖學甚大尤長駢體賦頌亦駸駸入古著有味雪齋詩鈔八卷文鈔甲集十卷乙集八卷

朱琦王拯

朱琦字伯韓廣西臨桂人道光十五年進士改翰林院庶吉士散館授編修尋遷御史琦直聲偉抱風采懷然與陳慶鏞蘇廷魁有三御史之目銳志潛修慕其鄉大學士陳宏謀之爲人思以學術勵當世不矜躁進在臺論章數上皆天下大計廣西賊起琦回籍團練張家祥之來歸也官吏多疑之琦獨識其人忠果可任力保其無他後更名國樑卒爲名將以死勤事琦敘團練勞獎道員入京候選踰年隨欽差大臣桂良等至江蘇卒無所遇布政使王有齡推重之及有齡撫浙琦亦遊杭州時方用兵籌餉孔亟一切苟且之政競進而琦言事每持大體務恤民或嫌其迂咸豐十一年總辦團練賊旣圍城琦守清波門督士卒守禦無閒晝夜食

將盡大府以米餉琦猶分數斗貽舉人伊樂堯樂堯者琦道義交也城陷琦死之琦古文學桐城步趨呂璜能自以才力充拓之而植體經訓原本忠孝常沛然有餘與梅曾亮邵懿辰相上下詩格渾雄不立綱宗而自成體勢著有怡志堂詩八卷文六卷 王拯原名錫振字少鶴廣西馬平人道光二十一年進士授戶部主事充軍機章京官至通政司通政使拯少孤家貧無所得食其母與姊勤女紅以養拯通籍官京師咸豐中隨科爾沁親王僧格林沁赴天津防剿又隨王大臣辦理巡防事宜進呈團練條議十則策畫詳明講求精切上嘉納之嘗與同鄉朱琦龍啟瑞以術業相高游處講習最號爲有名所爲文類情指事嘽諧通恕肖其心之所自出著有成有淪齋文鈔十二卷龍壁山房詩集十六卷茂陵秋雨詞四卷

### 鄭獻甫

鄭獻甫字小谷廣西象州人道光十五年進士官刑部主事以乞養歸丁父母憂遂不復出道光三十年廣西賊起獻甫東西避寇至廣州總督勞崇光故與獻甫交好延主講書院未幾辭歸至桂林復主講席廣東巡撫郭嵩燾奏獻甫學深養邃通達治體請飭廣東差遣委用獻甫上書廣西巡撫張凱嵩以年老求奏免凱

嵩復奏獻甫品高守正足勵風俗奉旨賞給五品卿銜獻甫天資高朗耿介豪逸象州亂後民失田契官失糧冊訟獄繁興獻甫請於官命民呈田數糧數總算符舊額而止鄉人服獻甫忠信無欺僞者於是官給印照訟獄遂息生平無嗜好惟好書終日不釋卷博覽強記十三經注疏校勘記皆有評點尤熟諸史爲文章貫串古今直抒所見絕去修飾所著法論曰開創之世所以治於承平之世者其法簡而易行也邊外之民所以安於中土之民者其法簡而易守也近代議法者好以一己之私心度萬世之私弊法未行而豫設一法以待之法既行而又增一法以制之法或窮而又創數法以救之問之民不能悉也付之官不能記也惟積爲塵牘以供狡猾老吏上愚官而下剝民同一事也一人賄吏吏曰法可一人不賄吏吏曰法不可如是則吏之權且在宰相上其儲材議曰以科目取士以資格用人以簿書考吏謂天下萬事皆有一定之例但得其似人者卽足以辦矣士無論有學無學皆可干名人無論有才無才皆可當官天下羣知其然也僥倖於名奔競於利游士滿世濫官滿朝夫豪傑之材不可驟而得氣節之士則可豫而養也救時之術不可強而爲經世之學則可勉而通也天下之人材不在於上則必伏



於下不出於正則且入於邪如今之法不足以得天下之大材且足以壞天下之小材也其權論曰大吏所以侵州縣之權者恐官病民也而不知大吏侵州縣之權則民又輕官官病民有上司之刺察有下民之控告知則去之而已民而輕官則風俗大壞雖有賢守令亦困於積習其弊必至決裂而不可救故欲伸大吏之權莫如勿侵州縣之權其治盜說曰重州縣之權而授以兵留州縣之賦而饒以財寬州縣之課而責以效盜之初起令能急治何至數千萬人橫行惟州縣不能治盜又不使有餘財而又處分太重彼苦於緝捕之難則縱舍諱飾以避考成至縣以盜報而縣破矣郡以盜報而郡破矣其必積而至於不能平無足怪也其練民練勇議曰招勇爲兵則散勇爲盜其變速而禍小練民爲兵則教民爲盜其變遲而禍大漢光武治盜謂執弓矢者始爲盜執鉏犁者皆良民龔遂之治民亦教賣劍買牛賣刀買犢今執鉏犁者反令執弓矢買牛犢者反令買刀劍馴至團練強而官無權彼習於攻戰之藝狃於殺伐之事試於報復之仇不知其害而因以爲利官兵至則以團練之旗往而索官賞客舟至則以盜賊之旗往而劫客資故曰教民爲盜也盜之數有盡而民之數無窮民變爲盜此所謂變遲而禍大也獻

甫學識博通而身遭亂離故其言痛切如此同治十一年卒年七十二所著愚一錄十二卷文集四卷駢文二卷詩集十二卷

姚燮 黃燮清

姚燮字復莊浙江鎮海人道光十四年舉人燮資稟絕人五歲能賦燈花詩讀書恆十行下自經傳子史至叢書小說旁逮道藏釋典靡不覽觀詩筆力雄健自遘海夷之亂出入干戈備嘗艱苦著繭拇錄一書縷述事故信而有徵所爲詩乃愈蒼涼抑塞逼近少陵駢體文亦沈博絕麗與彭兆蓀相近尤工倚聲其疏影樓詞讀之者以爲厲鶚復生著有復莊文推八卷復莊詩問三十四卷詞五卷玉樞經筵等編 黃燮清原名憲清字韻甫浙江海鹽人道光十五年舉人以實錄館謄錄用湖北知縣病不之官家居築拙宜園硯園栽花種竹著述自娛時與知交觴詠其間有終焉之志咸豐十一年賊陷縣城乃閒關之楚就官權宜都縣有虎患捕不獲爲文牒於神虎遂滅夏旱又以文禱翌日雨調任松滋有政聲未幾卒燮清穎敏過人才思秀麗詩格不名一家尤工倚聲所撰樂府諸詞流播人口時比之尤侗著有倚晴樓詩集十二卷續集四卷詩餘四卷國朝詞綜續編二十四卷

梁廷枏 楊廷桂

梁廷枏字章冉廣東順德人副貢生官澄海縣訓導其先人好聚圖籍廷枏髫齡而孤性穎悟成童時卽盡讀父書下筆有奇氣稍長益肆力於學爲總督阮元所器重嘗讀書訶林見兩鐵塔題銜覈與吳任臣十國春秋多不合乃據正史通鑑輿地諸書旁及說部金石著南漢書十八卷考異十八卷文字四卷網羅散佚鈎稽同異論者謂足與馬令陸游南唐書並傳道光中葉海氛不靖大吏聘修海防彙覽廷枏乃採集海外舊聞並得美利堅國人新編合省志略著粵道貢國說六卷耶穌教難入中國說一卷蘭崙偶說四卷合衆國說四卷蘭崙者英吉利倫敦也其合衆國說自序云予觀於美利堅之合衆爲國行之久而不變然後知古者可畏非民之未爲虛語也彼自立國以來凡一國之賞罰禁令咸於民定其議而後擇人以守之未有統領先有國法法也者民心之公也統領限年而易殆如中國之命吏雖有善者終未嘗以人變法旣不能據而不退又不能舉以自代其舉其退一公之民持鄉舉里選之意擇無可爭奪無可擁戴之人置之不能作威不能久據之地而羣聽命焉蓋取所謂視聽自民之茫無可據者至是乃彰明較著



而行之實事求是而證之爲統領者既知黨非我樹私非我濟則亦惟有力守其法於瞬息四年中殫精竭神求足以生去後之思而無使覆當前之餽斯已耳又安有貪侈凶暴以必不可固之位必不可再之時而徒貽其民以口實哉是論出人頗踴之林則徐自兩湖移節來粵耳其名下車拜訪詢以籌防守戰事宜廷枬爲規畫形勢繪海防圖以進後祁墳徐廣縉並聘入幕中襄辦團練咸豐元年以薦賞內閣中書加侍讀銜十一年卒年六十六他著有南越五主傳三卷夷氛記聞五卷論語古解十卷書餘一卷東坡事類二十二卷金石稱例四卷續一卷碑文摘奇一卷蘭亭考二卷藤花亭書畫跋四卷鏡譜八卷藤花亭文集十四卷詩集四卷東行日記一卷澄海訓士錄四卷兼通音律嘉應李黼平亟稱之總督鄧廷楨與論南北曲歎以爲粵人所未有又有曲話五卷江南春詞補傳一卷楊廷桂字天馥廣東茂名人道光十四年舉人平居恂恂樂易若無所能及遇事輒慷慨激烈當咸豐末年廉州賊張阿春李士葵犯境廷桂謁郡守馬麗文告以舉行團練法合郡鎮定後髮逆陳金釭陷宜信距茂名近廷桂又與郡守蔣立昂誓以死守賊數撲城卒不得逞城危獲安生平著作多爲水漂沒存論語靖箋十五

卷大學平箋二卷中庸平箋五卷南北日行記三卷嶺隅詩存一卷

馮桂芬

馮桂芬字林一江蘇吳縣人道光二十年一甲二名進士授翰林院編修二十三年充順天鄉試同考官二十四年充廣西鄉試正考官桂芬性穎異讀書日數行下講求經濟與陳慶鏞姚瑩趙振祚曹懋堅張穆等相切劘文宗御極詔中外大臣各舉賢才大學士潘世恩以林則徐姚瑩邵懿辰與桂芬同薦尋以憂歸總督陸建瀛聘修鹽法志咸豐三年粵匪陷金陵奉特旨與程廷桂韓崇胡清綬同辦團練勸捐事巡撫許乃釗駐師金陵羽檄日數至商略裁復皆桂芬主之中書馬釗白乃釗幕中來言及蘇松空虛可慮大營餘丁甚衆募之爲留守策應之師計甚便桂芬卽與廷桂定議令招募事甫集而青浦上海諸匪竊發連陷數縣釗與主事劉存厚馳剿青浦一鼓下之乘勝復諸城上海平敘勞賞五品頂戴六年遷右春坊右中允旣而蘇省陷於賊滬益不支吳人倡入皖乞援之議推桂芬具草桂芬爲陳危急情狀并時局利鈍及用兵先後所宜語甚辨總督曾國藩得書感動命李鴻章以水陸諸營東下遂成平吳之功國藩嘗言東南大局不出桂芬一

紙書云嘗著校邠廬抗議四十篇於經國大計指陳剴切先是吳中困重賦有破家者桂芬母每謂之曰汝他日有言責此第一事也桂芬讀書卽留心漕務民間苦累纖悉周知至是力請於鴻章具疏入告得旨蘇松太減三分之一常鎮減十分之一民困以甦同治三年詔求賢才安徽巡撫喬松年復薦桂芬以病不果行六年以蘇松太三屬辦團及善後功賞加四品卿銜九年鴻章奏桂芬平居講學著書巋然爲東南耆宿嗣與商擬江蘇減賦章程期於實惠及民謀設上海廣方言館務求博通西學卓識宏議足裨軍國而垂久遠請破格優獎賞給三品銜生平引掖後進出於至誠造就多知名士說經宗漢儒亦不廢宋精小學以段玉裁說文解字注引用多誤作段注考正十六卷又善爲古文探源左國下及唐宋四方丐傳志者戶外屨常滿於疇人家言研究尤深著有弧矢算術細草圖解及西算新法直解校定李氏恆星圖測定咸豐紀元中星表嘗手製定向尺及反羅經用以步田繪圖法爲捷合適官中用部頒五尺弓田多溢額因徧查會典及皇朝文獻通考戶工部則例知乾隆年間議丈舊田用舊行六尺步弓惟新漲沙田用新頒五尺步弓乃援案呈請奏准鄉里至今德之廷臣議治黃河欲輓使南流一



復道光時淮徐故道詔李鴻章妥議桂芬上書痛陳南流之弊鴻章用其說入告事遂寢桂芬登第後不十稔卽引疾歸每春秋佳日喜作山水遊尤喜鄧尉自號鄧尉山人嘗於光福得元人徐良夫耕漁軒遺趾湖光山色絕勝於其地築屋數椽供憑眺十三年卒於家年六十六他著有兩淮鹽法志蘇州府志顯志堂集

符葆森 樊雨 尙銘

符葆森原名燦字南樵江蘇江都人咸豐元年舉人少工詩賦家貧奔走衣食又遭寇亂轉徙齊楚吳越然不廢詩生平豪於酒廣交遊後留京師寓滿洲崇實家與陶梁張祥河汪陳朱琦葉名澧孔憲彝王拯蔡壽祺等往來論詩稱莫逆嘗仿沈德潛別裁例編乾隆嘉慶道光三朝詩總二千餘家釐爲百卷名之曰正雅集謂國朝諸老之作精深博大體正而意雅可輓詩之流失是集以詩存人非以人存詩棄短取長不拘體格然於詩教無關者亦置不錄焉沈兆霖謂總集之編必身在職局載籍富而交游廣故蒐採靡遺葆森伏處衡宇輾轉求借窮十餘稔始成是編其難蓋倍蓰德潛云卒年五十又著有寄鷗館賦稿詩稿 樊雨字古香浙江秀水人布衣早歲客南昌愛東湖之勝家焉讀書好古與王焜相友善工詩

古文詞下筆有蒼莽氣性抗爽不枉道干進用是艱於遇合乃發憤纂述雖舟車造次間必以筆硯自隨生平足跡遍天下嘗過潯陽愛匡廬奇秀裹糧往窮日夜不反其高致如此尤嗜酒醉後放歌動輒千餘言卒年六十三著有五之草堂詩文詞二十餘卷 尙鎔字喬客江西南昌人諸生樊雨之壻幼有神童之譽博雅負異才工詩文下筆千言尤精史學嘗著三國志辨微三卷抑劉知幾蘇洵而揚陳承祚又折衷於朱何錢惲時服其精確遍遊湖湘吳越嶺南後客河南歷主三山聚星崇實書院卒年五十餘又著有史記辨正十卷持雅堂詩文集十卷

王柏心

王柏心字子壽湖北監利人道光二十四年進士授刑部主事旋乞養歸少以孝聞於鄉里長博涉經史肆力詩古文辭按察使唐樹義見其文奇之謂人曰子壽乃叔度林宗之儔非今世之人也總督林則徐聞其名禮致之許以國士粵逆竄圍長沙柏心建議以岳州爲楚北門戶宜重兵防守迨賊攻長沙益急復逆料賊必因糧於我因丁壯利器於我宜守隘設奇使其進無所掠退無所據長沙可保無虞如縱其東下則不可復制當事皆不以爲然總督張亮基督軍湖北辟柏心

參佐戎幕建議以漢陽設重兵而後武昌可保岳州設重兵而後湖南可安田家  
鎮設重兵而後可制皖賊不爲皖賊所制亮基遑之嗣胡林翼巡撫湖北柏心屢  
畫奇策規復武漢各郡鄂省新復瘡痍未起林翼銳意埽除漕弊柏心復與胡大  
任龔紹仁共爲贊議期於益國便民至今賴之河南巡撫嚴樹森順天府府尹蔣  
琦齡先後疏薦柏心留心經濟請旨錄用同治元年柏心進呈經論復應詔陳言  
八條一曰廣師儒一曰屏嗜慾一曰博諮訪一曰開特科一曰先下金陵言粵逆  
悍酋略盡今所迫脅大都齊民勢易解散我據長江上游迫之一戰可殲一曰早  
備秦豫言今日兵將皆在東南秦豫苟幸無寇宜擇大臣有方略者厲兵講武毋  
使捻粵連橫衝突致遭瓦裂一曰外吏宜量才擇用言行閒有功者保薦文職違  
才易務必多繆摺一曰行營宜寬減權算言抽釐助餉網密文峻鞭扑交下徒飽  
私囊宜飭行營將帥權算必用廉正之人毋使驅民以附賊疏入上嘉納之九年  
丁母憂哀痛摺擗依然孺慕踰年卒年七十五柏心學務篤實爲文經術湛深議  
論純正使人悠然自得於簡篇之外所著有樞言上下卷導江議一卷子壽詩鈔  
六卷螺洲近稿詩六卷又稿二十卷纂修黃岡縣志十六卷東湖縣志十二卷宜



昌府志十六卷當陽縣志八卷

何秋濤 張穆 李光廷

何秋濤字願船福建光澤人道光二十四年進士授刑部主事侍郎李嘉端巡撫安徽奏辟自隨比還京師益留心經世之務以俄羅斯地居北徼與我朝邊卡切近而未有專書以資考鏡著北徼彙編六卷繼加詳訂本欽定之書及正史爲據旁采近人纂輯自漢晉隋唐迄明又自國朝康熙乾隆迄於道光代爲之圖並綴論說增衍爲八十卷咸豐八年尙書陳孚恩疏薦秋濤暨郭嵩燾通達時務曉暢戎機時秋濤居憂在籍命先將所纂書籍呈進九年服闋入京文宗覽所著北徼彙編稱其於制度沿革山川形勢考據詳明足徵學有根柢因賜名朔方備乘召見後復命賦讀書破萬卷下筆如有神詩二章晉官員外郎懋勤殿行走旋復以憂去官同治元年卒年三十九所著王會篇箋釋三卷以王氏補注爲本并取諸家於訓詁地理考證鈎析觀者咸服其精博又有篆隸源流一鎧精舍甲部稿其刑部奉敕撰律例根源亦秋濤在官時創稿云 張穆字石洲山西平定人道光十一年優貢生候選知縣穆少孤依母黨居卽喜觀儒先學案諸書言之甚悉及

長歛縣程恩澤許其得漢學淵源既而程見其所爲文驚曰東京崔蔡之匹也爲人豪放明銳極深研幾於經道孔氏微言大義精訓詁篆籀於史通天文算術及地理之學候銓時以負氣忤貴人罷去閉門讀書左圖右史日以討論爲事大學士祁嚮藻爲其父刻藩部要略延穆校覈穆因言曰自來郡國之志與編年紀事之體相爲表裏昔司馬子長作紀傳而班孟堅創修地理志補龍門之缺相得益彰今要略編年書也穆請爲地志以錯綜而發明之於是著蒙古游牧十六卷篤藻謂其結構詳而有體徵引瞻而不穢考訂精而不浮確而有據又以魏書地形志雖云據永興綰籍而分併建革一以天平元象輿和武定爲限則收志純乎東魏之志而已其第三卷雍秦以下諸州地入西魏不關於高途說失踳駁不可闔數徒以書綜全魏不得不旁及關西聊充卷帙爾於是更事排纂於沿革所係廢興所關及西北陂塘堰澤討論尤悉書未成其友何秋濤爲補輯之他著有顧亭林年譜閩百詩年譜舟齋文集詩集 李光建字恢恆廣東番禺人咸豐二年進士官吏部主事遷員外郎生平讀書苦搜力索考據極詳博而尤精地理之學著漢西域圖考七卷自燉煌關外西北二萬里至大秦又西北至於海西南萬餘里

至安息又西南至於海其間國土以百數若指諸掌自漢至今史傳說部以至沙門之記錄外夷之圖繪悉爲考覈方言譯語侏離喞晰同地異名同名異文無不通曉同邑陳澧嘗歎爲奇書時回民陸梁關內外騷動其所言多綜覈形勢指切兵機非盡考沿革也晚歲以鈔書自娛每鈔一書爲之序錄計六十三種爲榕園叢書自言漢張蒼年老無齒以乳爲養此書亦余乳也他著有廣元遺山年譜普法戰紀輯要詩集文集

孫鼎臣 吳敏樹 馮志沂

孫鼎臣字芝房湖南善化人道光二十五年進士改翰林院庶吉士散館授編修二十九年充貴州鄉試正考官咸豐二年擢侍讀充日講起居注官時粵寇肆擾有詔戒臣下因循鼎臣疏言因循之弊宜用法以治標用人以治本又疏陳團練籌餉事宜陝甘總督琦善釋自黑龍江署河南巡撫鼎臣言其人不足復用明年賊擾河北故督師賽尙阿徐廣縉並出獄赴軍前自效又亟言兩人失律罪大復用之無以申軍法尋乞假歸逾年入京補原官復以母憂歸尋卒年四十一鼎臣少聰穎年十一作西王母賦驚其長老後與上元梅曾亮遊乃變駢體爲古文會



亮稱其詞旨明健絕去六朝媵姍之習既乞假歸奉母讀書益取古今言學術治道諸書鈎抉奧祕成畚塘芻論河防紀略又謂自漢至今權鹽之法隨時損益法之興也愈繁則弊之出也愈滋善爲法者以民之利散之於民制其出入不務與民爭利而其利究歸於國家人第知厲禁之爲禁不知不禁之禁爲無形也知多取之爲取不知薄取之取爲無窮也著論鹽三篇又論川陝楚之變民皆以州縣爲辭州縣者民之所望爲父母也今疾之如仇讐而欲剗刃焉其所由來者遠矣豈盡州縣之過哉選之不精任之不重待之不寬夫是以敝至此也所爲詩峭悍饒險王昶稱其使黔一集幾入山水之窟而抉其精奧著有蒼筤文集六卷 吳敏樹字南屏湖南巴陵人道光十二年舉人官瀏陽縣訓導以不能行其志自免歸敏樹少治詩既治古文得桐城家法嘗客京師與梅曾亮朱琦邵懿辰王拯孫衣言及鄉人曾國藩講古文經學國藩督兩江敏樹東遊從國藩閱武徧歷各郡相倡和著有梓湖文集十二卷 馮志沂字魯川山西代州人道光十六年進士由刑部主事官至安徽廬州府知府尋卒志沂持論不肯唯阿官刑部時上官某謂之曰朝與上大夫言閤閤如也子何好與人忤志沂曰司官何以比孔子且堂

官亦非魯三家公事公言之上官甚怒志沂陽笑曰又忤矣嘗集顧炎武祠下一  
鉅公在坐蝶適至鉅公曰是太常仙蝶也舉酒祝之蝶翩然下志沂率爾曰仙蝶  
抑何勢利耶志沂嘗從梅曾亮遊古文得其家法兼工詩與張穆朱琦曾國藩諸  
人相倡和曾亮贈詩有吟安一字脫口難百轉千縑絲在腹語其刻苦如此著有  
微尙齋詩文集

徐肅

徐肅字彝舟江蘇六合人道光二十五年進士改翰林院庶吉士散館授檢討尋  
擢御史出知福建福寧府調延平同治元年卒於官肅負經濟才咸豐三年粵匪  
犯江寧肅在籍與六合令溫紹原募壯士數千人爲團練賊三犯東溝輒敗之奉  
命留辦團防守六合五年賊不得逞時稱紙糊揚州鐵鑄六合六合團練之名聞  
天下肅以常勝之衆易於驕驟積之財易於匱撤勇則可虞養勇則多費乃創保  
衛章程既出守福寧日以振興文教爲事葺近聖書院購儲經史郡東南濱海盜  
艘出沒肅募水勇嚴斥堠一以六合團練法行之擒巨盜李水等六十二人實於  
法屢蹙賊於浙東克復台州處州各府嘗具疏請禁開礦助餉極言足國之要在

重農桑貴穀帛禁淫侈媿媿數千言又爲務本論二卷多廣前人所未備事親孝自幼至長如一日疾侍湯藥衣不解帶者數月生平博通經史初入史館時敘明福唐桂三王及臺灣鄭氏事爲小腆紀年二十卷其書博採稗官諸家之說實事求是而竊取春秋綱目之義歷五載乃成團練時月夜登陴輒舉書中忠義事與諸同人口講指畫衆多感奮又著讀書雜釋十四卷考據詳明有裨經傳又有未灰齋文集八卷未灰齋外集一卷周易舊註十二卷禮記彙解月令異同疏解四書廣義補毛詩爾雅注疏說文引經考明史藝文志補遺小腆紀傳度支輯略延平春秋老子校勘記淮南子校勘記楚辭校註未灰齋詩鈔等書

周壽昌 郭崑焘

周壽昌字應甫湖南長沙人道光二十五年進士改翰林院庶吉士散館授編修二十九年充順天鄉試同考官咸豐二年大考二等擢侍講轉侍讀充日講起居注官時粵寇犯湖南督師賽尙阿逗遛不戰壽昌疏劾之並條陳剿賊事宜八則有皇上不惜千萬帑藏拯民水火而諸臣忍心老師糜餉坐失事機等語一時服其敢言迨賊踞金陵分股北犯壽昌連上封事召對稱旨命在巡防大臣上行走



兼辦京畿團防賊氛愈近門禁愈嚴有鄉愚十七人入城爲防卒偵獲當事擬以賊謀論壽昌廉得實趣令釋或恐忤長官意壽昌曰我豈以十七人命阿附權貴哉卒釋之然終以論列切直爲時所忌大學士曾國藩治師湖北擬奏請襄贊軍務鄉人有尼之者遂止同治五年大考二等選庶子充實錄館纂修官擢侍講學士轉侍讀學士陞詹事府詹事尋署戶部左侍郎壽昌精覈強記曹司不敢欺又以穆宗親政不宜就逸疏請躬行典禮朝論韙之光緒二年遷內閣學士兼禮部侍郎銜四年以疾告歸生平嗜班書手自丹黃每寫一册改竄無餘紙再寫復然凡易稿十七次成漢書注校補五十卷又著有後漢注補正八卷三國志注證遺四卷思益堂文集十卷詩集二十卷日札六十卷卒年七十一 郭崑燾字仲毅湖南湘陰人道光二十四年舉人幼穎異七歲能屬文年十九肄業岳麓書院與江忠源羅澤南劉蓉友善熟精儒先性理務爲有用之學咸豐二年粵賊犯長沙左宗棠參巡撫張亮基幕薦崑燾襄理倡率紳民共謀戰守圍解侍郎曾國藩受詔督辦團防勦爲湘勇營崑燾時預咨議江忠源督鄉兵討瀏陽匪首周國愚崑燾與有謀焉敍功賞加國子監助教銜駱秉章再撫湖南崑燾爲定越境剿賊之

計興師援江援鄂援粵援黔裹糧從征因時協濟先後籌設釐金鹽茶二局仿唐臣劉晏委用士人意訪擇廉幹士紳隨委員分司同事兵饗兼籌多資協贊秉章疏請獎勵奉旨以內閣中書用並加五品銜十一年左宗棠以四品京堂督兵去湖南崑燾獨佐巡撫幕時廣東樂昌之賊出入郴桂粵西逆酋陳金缸踞賀縣爲老巢侵擾邊境僞翼王石達開遣悍黨陳章明等分竄融縣擾懷遠各屬自率大股圍攻寶慶府城崑燾謀剗陳金缸巢穴清三省肘腋之患更以次派兵防守各賊解寶慶城圍皆功績之最著者毛鴻賓惲世臨劉琨先後撫湖南皆延入幕傾心倚任歷次奏保得旨加四品卿銜並賞戴花翎三品頂戴光緒八年卒著有說文經字正誼四卷雲臥山莊詩集八卷文集四卷

魯一同

魯一同字通甫江蘇清河人道光十五年舉人時海內方承平一同獨以爲深憂謂今天下多不激之氣積而爲不化之習在位者貪不去之身陳說者務不駭之論學者建不樹之幟師儒築不高之牆容容自安風烈不紀恐一旦有緩急相顧莫敢當其衝又論天下之患蓋在治事之官少治官之官多時以爲名言寶山毛

嶽生見其文謂七百年來文患於柔惟此爲能得剛之美建寧張際亮以詩名天下見其古歌行自以爲不及旣再試不第益研精爲文章其說長於史例旁及諸子百家之言禽魚草木之變靡不貫曉林則徐總督湖廣請與偕行以親老止周天爵督漕時見之曰此天下大材也豈直文章哉最後曾國藩尤相敬異粵逆之踞金陵也盱眙吳棠方宰清河衆志洶洶一同爲之明部分決機宜傳檄鳳潁淮徐滁泗宿海各府州縣辭氣奮發河北人心大定清江浦屹然成重鎮焉人或以是稱其能歎曰天下有百倍於此者何可易言也廬州危急江忠源馳赴安徽巡撫任桐城戴鈞衡走書通曾國藩之指欲其起佐忠源一同謝不出而復以書極言用兵機宜謂爲今之計莫若暫緩金陵之攻而專襲旁郡其時有謂先攻金陵剗賊腹心肢體自然散落者故書中及之其後大兵攻金陵築長圍以爲賊如釜魚阱獸期於旦夕成功一同獨決其必敗未幾果潰裂蘇浙淪陷迨國藩舟師下壓坐鎮安慶指復金陵一如所論一同無尺寸之柄而憂傷時世之艱危於田賦兵戎諸大政河道變遷地形險要以及中外大勢無不究其端委而得其機牙罕有遇合則一發之於文章爲文務切世情其言曰文章事業皆以靜儉爲根本又



曰行不蹈道則非經道不宗經則非道皆至言也同治二年卒年五十九著有邳州志二十卷清河縣志二十四卷通甫類稿四卷續稿二卷詩存四卷詩存之餘二卷又有右軍年譜二卷白奪山人年譜一卷

### 張際亮

張際亮字亨甫福建建寧人幼穎異閩縣陳壽祺主鼇峯講席極器重之內行甚篤善事繼母生平好遊伯兄嘗資之縱覽名勝伯兄歿厚視諸姪有加每言繼母伯兄未嘗不泫然也年二十七以選拔貢京師性伉直常以書投顯宦責其不能教導後進徒以財利奔走寒士累數百言顯宦怒際亮以是負狂名應鄉試不遇於是走燕趙齊楚吳越諭其風土而畢發之於吟詠到廣州尙未經旬買舟而西攬崧臺石室諸勝東入羅浮探其奇迹又訪順德詩人黎簡墓拜之道光十六年舉於鄉會試復報罷與姚瑩交最厚瑩以事逮刑部獄偕至京師周旋患難及瑩事白際亮益狂喜日轟飲遂以醉死瑩爲助櫬以歸際亮負經濟才磊落有奇氣所爲詩天才奇逸感時記事沈鬱雄宕嘉慶道光以來作者未能或之先也著有松寥山人詩集婁光堂稿

林昌彝

林昌彝字惠常福建侯官人道光十九年舉人治經精博從三禮問途知奧乃以貫通諸經所爲詩古文辭雄厚槃深入古賢之室漢陽葉名澧嘗曰昌彝學博詞雄今之顧炎武朱彝尊也生平足迹半天下所與游皆知名士性精勤舟車之中手不釋卷長樂溫訓嘗與同舟五十餘日每夜深就枕猶暢談經史亶亶不倦訓以爲聞所未聞因悉記之爲同舟異聞錄尤留心時務與邵陽魏源爲摯友同邑林則徐相知尤深家有樓樓對烏石山寺寺爲飢鷹所穴思欲射之因繪射鷹驅狼圖以見志鷹謂英吉利也嘗言中國以大黃茶葉救英人之命英人反以鴉片流毒之物賺中國財寶此爲天理所不容人情所共憤又言欲革洋煙須先禁內地吸食之士民然後驅五海口之英人驅之之法則不主和而主戰因著平夷十六策及破逆志四卷源見之決爲可行林則徐亦稱其規畫周詳眞百戰百勝之長策前在粵東五圍英兵三奪英船其兩次英船退出外港不敢對陣皆此法也昌彝又謂中國元氣已傷救之之法有二一曰絕通商一曰開海禁海禁開則彼國之人可商於我國我國之人亦可商於彼國如是則天下之財分於百姓不能

獨歸外地矣時服其見之遠同里沈葆楨年十七從昌彝游昌彝教以持躬涉世之道後卒爲名臣著有三禮通釋二百餘卷小石渠經說溫經日記說文二徐本辨譌詩文集又採海內詩人及師友交游之詩爲敦舊集八十卷其射鷹樓詩話二十四卷首二卷言時務末卷附載桂林朱琦新鏡歌四十九章用意蓋甚深云

史夢蘭 邊浴禮

史夢蘭字香崖直隸樂亭人道光二十年舉人選山東朝城知縣以母老不赴築別業於礪石山名曰止園取詩黃鳥邱隅之意奉母其中藏書數萬卷日以經史自娛咸豐十年英法內犯僧格林沁督師至樂亭屬夢蘭招鄉勇團練事平獎五品銜大學士曾國藩總督直隸手書招致與論古今圖史及地方利弊深器重之幕中桐城方宗誠吳汝綸新化游智開皆折節與交於智開尤契國藩留主蓮池書院辭歸總督李鴻章復延修畿輔通志夢蘭爲之刪定體例復與定州王灝參纂畿輔藝文考光緒十七年學政周德潤以學行薦奉旨加四品卿銜二十四年卒年八十六夢蘭少孤力學於書無所不窺尤長於史每縱談歷代盛衰之故與天下山川險要之區瞭如指掌嘗著輿地韻編二百卷又作全史宮詞二十卷書



成朝鮮越南使臣爭購致歸其國生平著述甚富解經論史之文及讀書雜記俱該洽古義折衷於漢宋諸儒其學以躬行爲本嘗謂近世講學家遵程朱詆陸王同室操戈甚無謂高明沈潛剛柔互克何有門戶之分學者亦惟得其性之所近去其性之所偏而已尤喜獎掖後進性和易樂善然不可干以私好游以母故亦不遠游也詩文抒寫性靈不拘格調著有爾爾書屋詩草八卷文鈔二卷疊雅十三卷異號類編二十卷古今謠諺補注二卷古今風謠拾遺四卷古今諺拾遺六卷燕說四卷雙名錄一卷筆談八卷 邊浴禮字夔友直隸任邱人道光二十四年進士官至河南布政使浴禮博聞宏覽於書無所不讀嗜詩年甫弱冠所作詩已數千首激昂排奐不主故常七古尤光氣逼人時以才子目之與馬壽齡楊淞華長卿陶樑相友善其和樑消夏諸詞樑亟賞之以爲清和諧婉有南宋人風味著有袖石詩鈔東郡趨庭集健修堂詩錄

譚瑩 子宗浚 熊景星 徐榮 儀克中 黃子高

譚瑩字玉生廣東南海人道光二十四年舉人官化州訓導陞瓊州府教授加內閣中書銜幼穎悟長於辭賦弱冠應童試時儀徵阮元督兩粵以生日避客往山

寺見瑩題壁詩文奇之告縣令曰縣有才人宜得之令問姓名不答已而得所爲賦以告元元曰是矣逾年元開學海堂於粵秀山課士以經史詩賦見瑩所作蒲澗修禊序及嶺南荔支詞百首尤爲激賞瑩少與侯康交莫逆以文學相鏃礪又嘗偕同邑熊景星徐良深漢軍徐榮順德梁梅鄧泰番禺鄭棻結西園吟社後與康景星儀克中黃子高同爲學海堂學長自此文譽日噪凡海內名流遊粵無不慕交者化州樸魯不文瑩居任最久諄諄引導士風以變性彊記過人於先哲嘉言懿行及地方事沿革變更雖隔數十年述其顛末絲毫不爽博考粵中文獻凡粵人著述蒐羅而盡讀之其罕見者告其友伍崇曜彙刻之曰嶺南遺書五十九種曰粵十三家集一百八十二卷選刻近人詩曰楚庭耆舊遺詩七十四卷復博采海內書籍罕見者彙刻之曰粵雅堂叢書一百八十種凡爲跋尾二百餘篇其考據淹博如此又嘗得影寫宋王象之輿地紀勝校刻之尤工駢體文沈博絕麗奄有衆長粵東二百年來論駢體必推瑩無異辭者詩初以華瞻勝晚年爲激壯淒切之音著有樂志堂詩集十二卷續集一卷文集十八卷續集二卷卒年七十二子宗浚 宗浚字叔裕少承家學聰敏彊記下筆千言由絢爛漸趨平澹詩醇

而後肆不名一體性好遊所至必探其名勝嘗與東莞陳銘珪遊羅浮鑿險縋幽互相酬唱銘珪以桂花酒餉之宗浚爲賦長歌時以爲追蹤太白著有遼史紀事本末十六卷希古堂文甲集二卷乙集六卷希古堂詩總集外集 熊景星字伯晴亦南海人嘉慶二十二年舉人大挑二等選開建訓導幼穎悟工古文辭詩亦奇麗以所作蒲葵扇詩見賞於阮元當壯盛時有用世志與曾釗徐榮等相礪以經濟之學憾文士多綿弱騎射技擊無不講求洎屢試不第困於學官不得逞乃藉書畫自娛卒年六十六著有吉羊谿館詩鈔三卷 徐榮原名鑑字鐵孫先世湖北監利人家遼東漢軍正黃旗駐防廣州道光十六年進士歷官浙江臨安縣知縣玉環廳同知紹興府知府陞福建汀漳龍道未赴任以統兵征徽州匪轉戰至魚亭歿於陣少從張維屏游工詩阮元開學海堂於廣州試十臺詩榮爲冠人稱徐十臺生平不讀無用之書居官時以弦歌節吏治元嘗以詩縣令推之官玉環時曾作詩冢自理其詩銘曰後五百年此詩其昌其自信如此屬海氛不靖軍書旁午榮判事若流水頃刻萬言朱緒曾謂其有劉穆之之風詩不分唐宋界託意深遠庚子以後諸作沈思獨往語重心長五古尤精刻著有懷古田舍詩鈔三



十三卷 儀克中字墨農先世山西太平人寄籍廣東番禺舉人少有異稟負奇氣頃刻間能作數千言以三日和方孚若南海百詠見賞於阮元元修廣東通志時獨以克中爲采訪總幽躋險剔苔捫碑多翁方綱金石略所未著錄者平居尙氣節談經濟又習擊刺騎射有利濟志高平祁墳撫粵尤倚重焉道光十四年夏廣州官窰大水決隄民居蕩析克中言患所由非濬靈州渠勢不足殺墳委曾釗及克中二人遂親歷石門至蘆包河相度沙水三閱月歲工克中積勞發背瘍幾殆久之小愈又念丙丁龜鑑言請建惠濟倉周一一年經營謀畫達旦不寐以此疾作卒年四十二遺書甚多後燬於火今所存者爲劍光樓詩鈔四卷詞鈔二卷黃子高字叔立廣東番禺人優貢生少以辭章擅名留心掌故考證金石藏書甚富率多異本尤精小篆人得片紙爭藏弄焉卒年四十六著有石谿文集二卷知稼軒詩鈔九卷續三十五舉一卷粵詩蒐逸四卷

張文虎 韓應陞

張文虎字孟彪江蘇南匯人貢生嗜古博覽不求聞達於名物訓詁六書音韻樂律中西算術靡不洞澈源流尤深校勘之學嘗僑寓西湖楊柳灣日假文瀾閣書

居兩月校八十餘種鈔四百三十二卷同治初與李善蘭同客曾國藩幕中居最久國藩甚重之金陵書局初開主校席十三年所著春秋朔閏考古今樂律考稿燬於兵其算學能綜論古今中西得失而持其平又著有史記札記八卷舒藝室隨筆六卷續筆一卷餘筆三卷雜著甲編二卷乙編二卷臚稿一卷詩存七卷索笑詞二卷 韓應陞字對虞江蘇婁縣人道光二十四年舉人官內閣中書少好讀周秦諸子爲文古質簡奧非時俗所尙既從同里姚椿游得桐城古文義法尤究心當世務譯算學及重學氣學光學聲學等書每自校錄復爲之推極其致故發於文益奇往往出西人所論外粵匪陷蘇州倉皇走避卒於道遺稿多散失其友張文虎輯編爲讀有用書齋雜著二卷

丁取忠 吳嘉善

丁取忠字果臣湖南長沙人少喜步算地僻不能得書持籌凝思寢食俱廢垂四十年故其學冥搜力索閤符先哲後與吳嘉善鄒伯奇李善蘭諸人友善數以算術相質證所詣益精嘗謂曾紀澤兄弟曰諸君博聞富藏師資友益視吾疇昔勞逸實相什伯其幼學可知已生平整躬飭己惟以著述自娛不求聞達晚應胡林

翼之聘校書鄂省得觀乾隆輿圖林翼贈之金因廣刊算術爲白芙堂叢書復購魏源海國圖志作爲密尺定分推算著輿地經緯度里表一卷又著有數學拾遺一卷粟布演草二卷補一卷對數詳解五卷時論謂其獨詣孤往盡歷艱苦卒成藝林鉅觀有功於疇人家匪淺年逾七十卒 吳嘉善字子登江西南豐人咸豐二年進士改翰林院庶吉士散館授編修光緒五年奉使法蘭西駐巴黎後受代還旋卒嘉善博通中西精研數理在京師時與徐有壬同治算學交最篤同治初避亂游長沙交丁取忠逾年客廣州交鄒伯奇夏鸞翔皆極相契所著算學二十一種取忠列入白芙堂叢書中其書術多而例少取忠爲依術各補一草自謂生平無他嗜好惟癖於算既忘其癖更欲以癖導人云

蔣曰豫

蔣曰豫字侑石江蘇陽湖人咸豐閒援例得知縣發直隸官雞澤元氏知縣遷蔚州知州同治七年捻匪擾直隸曰豫佐總戎幕以功擢直隸州賞戴花翎丁母憂歸哀毀卒曰豫少聰穎十歲詠詩效長慶體塾師歎曰詩中飛將也長研究經史旁及聲音訓詁之學嘗以漢儒經說傳寫失真文字譌脫乃自班范儒林下逮載



記家繫而人部補綴整齊輯兩漢傳經表又謂陸繼輅作離騷釋韻詩取秦漢子書詞賦晰著之然屈原生楚懷王時周韻未必與後人合惟詩經爲韻文之祖舉以相證當可不謬且居屈子前如諸經老墨皆可引而傳之著離騷釋韻其學以實事求是爲宗持躬篤謹宰雞澤時值兵燹後上官以軍事督催科甚厲曰豫愀然曰奈何迫吾民爰稱貸以爲供億元氏蔚州故廡仕去官囊橐蕭然有製頌功德者峻拒之中歲佐戎幕十餘年露布封章援筆立就他著有詩經異文四卷韓詩輯一卷論語集解校補一卷國語賈逵注一卷許慎淮南子注一卷問奇室詩集二卷續集一卷文集一卷秋雅一卷

潘詠 蔣湘南

潘詠字伯琴江蘇寶應人布衣父槐庭拔貢生工畫嘗手繪禹貢儀禮圖全本鄭高密義無一字出入詠幼失怙恃受業王瑤楨之門瑤楨爲其父弟子故雖少孤而能傳其家學年十一手竿於地上點畫縱橫諦審之則禹貢山水澤地也又嘗爲九重天圖高卑盈縮如掌上螺紋旣長益肆力於學博覽古今天算諸書一義未徹輒思之廢寢食古曆自三統以下通其義蘊嘗以時憲術推演同治紀元合

璧聯珠之瑞其於輿地之學凡經義沿革形勝次第研究同治五年淮水溢詠作  
籌淮篇謂河流重濁歷數百年則尾閭遷徙然行山東直隸土石磽确之地則流  
暢而久安行河南江蘇平沙曼衍之地則回曲而善決乾隆中廢雲梯關外遙縷  
隄而河身淤河身淤則黃河倒灌清口而清口亦淤後之治河者見淮不敵黃屢  
放毛城鋪虎山腰峯山四閘諸減灤以洩黃助淮黃水分則流緩沙停而淤更甚  
淮不能受黃則放周橋而東注清口之淤亦更甚若能束清口以東至雲梯關之  
河身濬清口以北至十三堡之引河加築高堰塞三河堵清水潭漫口使淮水北  
由清口歸故道出雲梯關入海泗沂出中河口入淮淮流迅疾日漸深廣水得其  
所雖異漲亦無虞如遇奇旱則塞束清壩及中河口以全淮注淮南運河漑淮揚  
諸州縣以泗沂汶沭注淮者注運河漑沂兗及海州諸州縣鳳泗徐州地居上游  
下有所束亦不至源澤枯竭兩淮之地旱潦得宜於天庾正供不無裨益更於開  
封築攔河壩使黃水永不東下塞山東魏家灣及龍灣兩滾水壩專力注大清河  
以免漫溢餘溜入運河以利運道下河州縣涸出溪蕩裁賣民間以償正帑開寶  
應白馬青蕩諸湖屯田以助軍實招募兩淮失業悍民爲屯丁以安反側設屯長

訓練屯丁聯絡皖豫控扼江淮以壯聲威此非常之功也劉恭冕謂研經術者考古而不善通今習河務者知今而不能博古詠實兼擅其長云詩宗漢魏長於樂府道咸間江淮主壇坫者首推孔繼鏞詠雖行輩稍亞而才足相埒文亦樸茂近古嘗一至京師王凱泰語人曰士之來輦下者多翱翔公卿間獨詠戲門卻軌絃誦自娛洵爲今世所難性篤摯每以不逮事親爲慟事仲姊如母故舊貧乏輒沽古器以濟之尤喜誘掖後進年三十六卒著有伯琴文存詩存 蔣湘南字子瀟河南固始人道光十五年舉人治經宗許鄭旁通象緯曆律輿地水利農田諸學嘗謂河被淮攻下流益爲害必改而北流然後治河治淮兩俱無患時服其遠見尤工詩古文辭洪符孫謂其嘗攬海岱駕伊涼南條北條之水太華空同賀蘭之山鄂爾多斯厄魯特之人皆足以盪胸襟而抒志氣故其爲文益奇詩經籍璘彬古香古色闢前人未開之境著有十四經日紀七經樓文鈔春暉閣詩鈔

吳觀禮

吳觀禮字子儁浙江仁和人同治十年進士改翰林院庶吉士散館授編修光緒元年大考二等充四川鄉試副考官觀禮潛心書史內行甚篤先由舉人捐輸獎



員外郎分刑部巡撫左宗棠廓清全浙聞其學行調佐戎幕入福建克漳州入廣東克嘉應及剗平漳泉龍巖積匪整飭吏事悉資籌策嗣隨左宗棠赴陝西復自山西追擒匪於直隸山東相與講求陣法師行平原曠野雖夜深天黑哨隊不亂觀禮短衣匹馬輒身先之時或並轡徐行共商戰略傳宣進止左宗棠深賴之以功薦保布政使銜陝西候補道捻平左宗棠反秦度隴軍駐平涼念隴地寒觀禮患日疾令暫駐西安督轉運觀禮以從軍而避勞就逸於義不可乃註銷所保道員應會試遂入翰林四年春京師不雨山西河南大旱詔求直言觀禮疏上九事一尋繹祖訓以求政鵠一採錄諫書以資箴儆一激勸臺諫以輓積習一實求自強之本節省海防經費移濟賑需一招募晉豫流民分別安插一整飭禁兵以嚴宿衛一慎簡東三省將軍以固根本一詳計西域善後以固邊防一改粵海閩海兩關歸疆臣督理以廣贏餘寬籌備四月復疏陳充善端四事絕弊端三事弭禍端三事充善端者曰廣疇咨曰徠忠讜曰永儉德曰大澄敍絕弊端者一在部院一在行省一在營伍彌禍端者一請專責宋慶清河南伏莽一請敕陝甘督撫嚴禁漢回仇殺一捕散布各省之哥老會重兩湖督撫之選左宗棠疏稱觀禮虛心

實行懇摯而有條理其局外論事直抒所見本於忠愛之忱非建言要譽者比云  
尋卒著有讀鑑隨錄三十卷圭齋文集六卷詩集四卷使蜀日記四卷

清史列傳 卷七十四

循吏傳一

李允禎

李允禎山東德州人明崇禎中舉人順治元年以薦授直隸故城縣知縣舊有丁二萬許兵後編審實丁纔七千有奇而額徵如故允禎將請以實丁徵會調知江南豐縣奸吏故爲稽留乃庭集縣民焚故冊晝夜治新冊申督撫而後行於是虛糧得免民困以蘇旣至豐庫吏張某陳金幣什器以進曰司庫者故例也允禎怒命悉撤其具杖吏黜之竟其任不支庫中一錢豐俗喜告訐豪猾與上官奸吏交通輒造事訟富人必盡其產號曰鏹狀允禎言於知府卽請爲鏹狀者數人還之縣置對明白斃之杖下訟乃止黃河決上官徵柳萬餘束吏請責里甲辦輸允禎曰吏樂從事民將弗堪召諸大家告以縣西鄙十里許有柳無主者可刈某某戶牛車可出官錢以賃衆趨役不旬日而事集縣有豪民欲得某之妻賄大盜引某已在獄瘐且死矣允禎獨覺其冤夜微行入獄中具得獄吏與豪相左右爲奸狀



立釋某而置豪及吏於法礪山監生吳某通盜爲亂城破被檄署其縣事夜倍道疾馳出賊不意入城力擊之賊敗走追獲渠魁撫安其民自吳某外一不問縣遂定而濟寧駐防兵奉調至聲言當屠城乃亟治牛酒迎犒於郊爲言縣內皆良民已無賊矣軍主不許允禎大言曰縣固允禎縣也脫有不虞允禎自任之卒拒不得入邑大姓猶多以通賊相告訐條疏解釋免死者甚衆三年陞南城兵馬司指揮六年遷工部營繕司主事八年建端門成以督琉璃窰功賜文綺鞍馬九年督清江船政兼理鈔關十一年進虞衡司員外郎故時船廠有大料小料關有濫差及額外稅諸弊盡革除之向之猾吏身無完衣時巡按御史秦世禎以風采著江南多所劾治獨重允禎清操歲饑出俸錢買穀數千石爲粥以賑民居三年去任校公帑得羨餘金數千兩籍而歸諸官著漕使五集數十卷凡所興革皆爲後法還部歷虞衡屯田二司郎中十三年擢廣西按察司僉事行之岳州病乞歸康熙元年卒

堯峯文鈔有懷堂集魏世倣李僉事傳

### 金鎮

金鎮字長真順天宛平人原籍浙江山陰揚州府志明舉人畿輔詩傳順治初授曹縣

知縣以艱歸服闋補闈鄉縣知縣改鑾儀衛經歷陞刑部郎中康熙十三年上方  
慎獄復矜恤之典分部使者巡行郡縣以鎮使河南凡十閱月所全活約一百一  
十人矜疑半之援赦又半之十五年授河南汝寧府知府時淮蔡多盜兼無年民  
田荆榛道殣千餘里前代眞陽西平諸遺孽根株未清往來萑苻間而新蔡李樊  
與泌陽郭三海據平頭寨相結以起民爭逃村落皆虛鎮一意撫字除苛細下墾  
土之令生聚教訓示民以自新取爲政去太甚一語書之訟堂而親統銳丁剿李  
樊除其根株一切勿引蔓會清理藩產躬驗丈尺而海上投誠兵適安插眞光之  
間凡開屯升稅極意調劑令民兵相安至於興利除弊一切津梁祠宇宜毀宜復  
者皆受整理改補揚州知府值撤藩兵變長江上下風鶴相驚府當其衝毛奇齡金  
君墓誌民震恐襁負爭出城有謂宜闌禁者鎮曰若遏之滋駭竄矣姑任之不旬  
日當來歸也已果如其言時征調猝至籌畫有方民不知擾先是負販謀生者必  
輸稅方得入城鎮以其窮概貰之僦屋者減其租貧民稱便城西北平山堂宋歐  
陽修所建棲靈寺僧據爲刹鎮復而葺之更修府志四十卷手自編纂揚州府志擢  
江寧驛傳鹽法道副使兼署鹽運司陞江南按察使大計入覲召對令敷陳時事

所對有二其一請定盜案嚴減之例謂江左連年災盜賊多由飢寒逼迫宜分別量減其罪至捕役營兵參縱勒財宜從窩盜律一體重擬則盜少而民得安其一言江寧京口二旗買人多有無籍者當申報巡撫巡撫按季報部行文原籍出示招驗有可疑者令旗主還契追價若旗人爲盜賊證明確者應許承審官徑行刑訊疏聞稱旨康熙二十三年引疾歸二十四年卒毛撰墓誌祀揚州名宦揚州府志著有清美詩集畿輔詩傳

### 王天鑑

王天鑑直隸萬全人順治三年進士授山東恩縣知縣恩在古貝州地爲河北山東要衝明季爲盜藪嘗一歲七失守天鑑甫下車進耆老諭之曰往歲之失由人無固志耳自今勿復逃視知縣所向俄而賊數萬奄至城下天鑑坐城樓從容指揮賊疑有伏逡巡去於是治樓櫓浚隍塹爲門五爲樓二十有八申條約嚴候望時巡徼守具大備復按行鄉鄙舉古田役追胥之法立砦十有九礮鼓相聞久之得步卒萬八千人騎士三百屹然若重鎮巡按御史疏聞於朝屬天鑑得自治兵是時榆林賊未平濟以東宵人多遙爲聲援乘間竊發天鑑廉得縣境賊渠數輩



夜突至其鄉呼某某出賊錯愕出因盡得其情實皆伏誅恩境遂安它邑有寇警巡撫輒檄天鑑往賊據曹縣巡撫督兵與諸道兵會剿天鑑率所部爲前茅冒矢石深入諸軍踵之復其城一日追賊急陷賊中從者財數十騎矢且盡日暮賊大至合圍數重天鑑操短兵殊死戰手殺傷數人潰圍出竟不失一騎在恩數年大小五十餘戰馘俘安撫者無算賊望見旗幟輒走事平招徠屯種加意優卹流亡復歸者踵於路墾荒田千八百頃建育英書院課諸生絃誦不輟一時循良吏無出天鑑右先後紀錄者三撫按疏薦者六民爲生祠尸祝者五七年大計卓異賜袍服擢禮部儀制司主事丁父憂歸服除還部十一年世祖章皇帝始行藉田禮天鑑參酌古今悉合禮宜特命陪祀與宴蓋異數也遷祠祭司員外郎充山東鄉試考官十二年晉儀制司郎中擢陝西河西道到官與吏約曰側媚上官獵民枉法此不戈矛而盜不知死所者也乃按籍討軍實戒將弁勿以軍糈肥私橐吏治軍政皆爲之肅然未幾謝病歸康熙十三年戶部侍郎魏象樞疏薦天鑑稱其有上馬殺賊下馬治民之略操守清嚴智深勇沈人以爲篤論天鑑竟不出二十年

卒 寒松堂集臥象山房集漁洋文略

畢振姬

畢振姬山西高平人順治三年進士初仕平陽府教授入爲國子監助教遷刑部主事歷員外郎公餘獨坐陋室中布被瓦燈伏讀不倦時稱爲有官僧十年出爲山東濟南參議道值歲旱流民踞山谷爲盜振姬晝夜馳三百餘里往諭之旋就撫全活者七千餘人先是泰山香稅歲籍羨餘銀七千金給參議署公用振姬至悉以充餉調廣東驛傳僉事道時三藩使命往來如織其商販盡取給驛傳胥吏乘便私派折價民生益困振姬一繩以法十閱月減船數百減費七萬六千有奇旋遷浙江金衢嚴參政道擢廣西按察使所至以廉能聞陞湖廣布政使會病乞歸康熙十七年詔舉博學鴻儒都察院左都御史魏象樞偕左副都御史劉綬疏薦振姬十八年命在廷諸臣保舉清廉象樞復疏言振姬清操絕世才略過人請告十餘年躬耕百畝猶讀書不輟臣前以有體有用薦之劉綬亦薦其居官廉潔一塵不染至回籍之日一僕一馬而外了無長物真學行兼優之人得旨下所司詳議部議振姬以年老告病回籍毋庸起用尋卒所著有尙書注西河遺教四川文獻摘鈔三川別誌西北文集

方國棟

方國棟順天宛平人明大學士從哲從子順治三年舉人除蠡縣教諭遷國子監助教進博士擢刑部主事歷員外郎郎中十六年出爲廣東按察使僉事分巡海北道值巨寇鄧耀盤踞海島中時時出沒剽掠國棟請於上官集兵三千分五路進剿又慮賊之他逸也檄鄰道及安南各出兵分扼要害耀遂就擒解散餘黨事遂平雷廉諸富人爲賊所誣株繫者衆國棟察其寃悉昭雪之諸富人哀金數千爲報國棟駭然曰吾憫若無辜耳奈何污我力卻不受遷山西寧武兵備參議以法飭武弁謝絕餽遺康熙六年參議缺裁十二年改分守蘇松常道地濱太湖隄岸歲久傾圯國棟躬率吏民併力修築又修沿海墩臺及吳淞劉河兩閘區畫經費不以擾民伶人某倚朝貴勢恣爲奸利有司折節下之國棟不爲屈某又以非法干請峻拒之時大兵方征閩粵羽書旁午國棟事事與民休息每遇急徵從容布算鎮之以靜芻芟糧糗之需日儲以俟軍用賴以無乏而民間晏然若不知有軍事者十六年有采木之役國棟親詣宜興深山中晝夜督視以勞邁疾歸遂卒民謳思不置二十二年立祠於虎邱山麓祀之



趙廷標

趙廷標浙江錢塘人順治三年世祖詔選天下奇才異能者補府縣官廷標以選拔貢生授福建永定縣知縣時大難初平民物凋敝特甚廷標請援鄰省糴粟煮賑子遺稍甦六年粵大埔逸寇江龍率衆萬餘人犯縣城廷標誓衆死守賊掘地入則瀦池水以待地礮不得發賊用雲梯乘城則於堞眼懸柵墮之相持三月食垂盡值立春日廷標乃廣張鼓樂開城門迎春於東郊賊懼有伏遂遁廷標密遣兵間道往伏兩山間出不意夾擊敗之追至龍磔寨捕斬略盡七年擢河南衡州府同知尋署府事府罹兵亂久田畝榛蕪廷標爲請蠲荒民漸復業九年大饑多方賑恤生全無算大兵平西南經略以廷標薦十七年擢雲南池東道安普諸蠻爲土官所誘競作不靖廷標決策行間遂復維摩舊地其寧州彌勒巴盤八甸咸驚恐乃移檄諭之罷捕逐之令諸持田器者皆爲良民持兵者乃爲賊巡行安撫諸路悉平康熙十年調廣東按察司副使分巡廣肇南韶道安普民暨洞蠻聞其去至塹所行道發巨石塞城闔願少留廷標慰諭再三乃得行適兩廣八排諸嶺寇起聞廷標至立解散連州復亂鎮臣以剿捕事委之至卽就撫分巡使者舊有

柴薪錢吏籍其贏以獻屏弗受資給民之窮獨無依者踰年以憂去十八年授湖南驛鹽道捕獲劇賊斬其渠魁餘悉縱令歸農是時長沙初規復而大兵進辰龍關軍書旁午一切芻茭械杖舟師竿役去來者絡繹於路廷標砥力給辦不誤晷刻民之被調者亦不致流散當事薦廷標能使兼攝糧儲道會湘東民變轉掠里偏沅巡撫韓世琦欲撫定之策非廷標不可乃語之曰湖南民望君如歲曷一行乎廷標單騎往諭皆悔泣投竿因散遣之事稍定倡修嶽麓書院繕舍宇置田以廩諸生俾肄業其中親爲策勵嘗行部至衡郡父老聞之舉手加額曰三十年慈母至矣皆羅拜車下廷標奉帷慰勞有若家人俄遷布政司參政督陝西糧儲道時已抱疾士民相率請留會武昌兵變羽書至湘潭猶強起視事月餘病益篤乃乞免歸抵家而卒

駱鍾麟

駱鍾麟浙江臨安縣人順治四年進士副榜授安吉州學正集諸生講授先行後文李容撰傳十六年遷陝西盤屋縣知縣其爲政先教化春秋大會明倫堂進諸生迪以仁義忠信之道增刪呂氏士約頒學舍朔望詣里社講演聖諭訪耆年有德

孝悌著聞者召使見與鈞禮歲時勞以粟肉立社學擇民間子弟授以小學孝經飭保伍修社倉百廢具舉莅獄明決所案治卽勢豪居間莫能奪以是人愛而畏之彭紹升良吏述縣城去渭不十里鍾麟行河畔知水勢將南侵議自覽家寨池東開復古道衆難之不果康熙元年夏大雨渭南溢且及城陝西通志齋沐臨禱自跽水中雨漸止水亦頓減又徙而北流者數里陝西通志攝興平縣知縣豪右分四門爲部黨前令不能制廉得其主名收按致法邵長蘅撰墓誌銘鄂縣知縣缺疆臣從鄂民之請以鍾麟往署視鄂若家撫字多端李容撰傳奏最擢北城兵馬司指揮後出爲西安府同知八年陞常州府知府常州繇賦重科條繁多吏緣爲奸輒輟轉難理前官累以積逋去鍾麟立法鈎校積逋清吏受成事而已屬邑漕羨三千金例以遺知府鍾麟曰利若金如吾民何峻卻之諸漕卒咸斂手奉法彭良吏述初鍾麟在盤屋以師禮數造李容廬至是創延陵書院迎容至講學其中率僚屬及薦紳學士北面聽講問爲治之要容曰天下之治亂在人心人心之邪正在學術人心正風俗移治道畢矣鍾麟書其言名曰匡時要務終身誦之已而江陰靖江無錫諸知縣爭禮致容容爲發明性善之旨格物致知之說遠近之士蒸然向風



吏治亦和九年大水發倉廩勸富人出粟賑民無流亡十年夏大旱鍾麟革衣草屨步禱數日不應躬詣獄日食糲飯責躬籲天就獄中引見屬吏耆老言知府不德致災累吾民涕淚並下尋丁母憂去官數千人號哭乞留不可既歸連遭父喪以哀毀卒年五十三常州人論賢有司知治體者必首推鍾麟

朱克簡 子約

朱克簡江蘇寶應人順治四年進士授中書八年典廣東鄉試時嶺南初入版圖鎮兵不戢克簡理責尙可喜耿繼茂於是將卒咸受約束十二年考授御史巡按閩省閩八府一州延建汀邵在西北福興泉漳福寧處海濱時海氛甚熾居民常被焚劫任斯土者視爲畏途緩則因循急則逃匿克簡至和睦將帥申明軍政不憚巡歷講畫之勞與文武同官經營修舉尋疏稱仙霞一關地聯三省盤山複嶺爲盜賊淵藪非多增兵馬則防圍不密詔如所請行時兵部尙書王永吉請汰營兵老弱及量減兵額克簡言八閩山賊伏莽海寇揚波省兵雖三萬四千而半多缺額似不可減議遂寢又言水將與騎將不同必善知水性者望風瞻星卜向方能統兵出洋用水兵之法不難得其力而難得其心閩地越在天南語言莫辨漳

泉係鄭成功故土沿海皆其戚屬宜行連保法察其蹤迹考其身家庶不得混入營伍投誠者悉令歸農或調別營效用離其原巢堅其歸志又以陸路精騎衝突功皆可施水兵一舟僅數十人出入於巨浪洪波非技熟膽壯者鮮不驚眩應著令凡出師開洋轉戰風濤中能破浪擒賊者受上賞海兵恃船所需如木竹釘鐵油麻椶葉等項海之所無者一物不備不能成舟宜設專官禁濱海奸民不得潛通接濟又言延建邵汀勢居上游寧化崇安沿海要地今俱爲賊踞必按其形勢增兵固守彼困自來來則撲滅之賊進無所得退無所守自當坐困又立六規二十四約以及鹽政屯政諸規條悉切事勢與提督馬成功總兵王之綱等相愛如兄弟故諸將奉令居福州月餘出巡至汀州聞海寇攻福州急統汀鎮兵兼程進寇聞援兵至遂退克簡帥兵入城曰寇雖退知我援少必復來不可無備乃修殘缺嚴卒伍爲守禦計數日寇果復圍城克簡謂其季弟曰城破吾與城亡汝以敕印歸都察院乃出死囚百餘人連發礮賊大潰出兵急擊賊死無算圍乃解先是海上被擒者立決無問克簡驗其髮不過五寸者免誅編爲民得萬餘人故囚感其寬仁咸出死力至漳州適左布政以軍餉匱乏詳請定遠將軍追徵前數年逋

賦克簡力阻之並疏請蠲徵得旨允免至福清以閩安鎮爲要地設兵守之連江羅源福清長樂各酌勢隘派兵分汛至興化見流民載道與知府張彥珩議賑捐俸爲倡活者萬數千人至泉州以崇武獺戶爲泉門戶大盈爲泉藩籬分設汛兵與同安聯絡至延平知延船梢工多通山賊令沿江州縣設巡環簿稽查之其弊頓息賊之伏於汀延建三郡者亦離其黨羽擣其巢穴次第歸誠計爲巡按時所上汰冗員革帶辦禁株連蠲鹽課恤驛困諸疏均蒙允可秩滿歸築環溪草堂讀書以老康熙三十二年卒著有奏疏二卷政略二卷石崖遺集若干卷子約 約康熙十一年副貢以教習期滿授福建福安縣知縣歷江西南豐山東費縣陞直隸晉州知州致仕歸在任以廉能稱尤善治盜其任福安也以兵火後田荒多虛報因仿朱子審田遺法令民自報田數丈量多逾額勸民自首免罪有吳某者姓名誤入逆籍約爲辨其寃得免費縣栲山愚民乘水災爲盜約指授巡檢郭茂桐往諭之皆服蒙山賊據紫荊關行劫不受招撫約用劉順昌更番之法分鄉勇六百名爲六班疊以金鼓臨之遇賊卽退賊退復進寇以困敝半月悉被縛而民不傷一人鹽徒聚衆過晉州約戒各村閉柵欄毋售其鹽迫之東去乃於東路選鄉



勇三百人備攜牌樹於前以禦鳥槍而以槍刀弓矢魚貫進鹽徒盡獲年七十六卒於家

多宏安

多宏安字君修直隸阜城人順治五年拔貢生畿輔通志康熙二年授廣東靈山縣知縣兵後邑甚荒殘居無衙舍器用匱乏宏安處之裕如廣東通志力請題免積年逋賦阜城縣志徐行招撫捐給牛種流移漸復廣東通志民慶更生阜城縣志迺葺城垣創學宮繕官廨除盜賊恩威並用靈邑草昧實宏安開之廣東通志士民勒石紀其勞一統志康熙七年遷奉天承德縣知縣察挾旗抗法者送部懲以法滿漢懾服十一年陞陝西延安府靖邊同知十六年補江南淮安府山盱河務同知時山陽西南高堰長隄潰決淮水注寶應高郵不復北出清口敵黃黃水遂直射裏河運道淤淺隨尾淮入堰無由會清口下雲梯關而趨海故海口一帶盡墊宏安與總河籌策先築高堰以束淮敵黃並治爛泥淺諸故道導清入裏河運道乃通且修築兩岸及河口清江大閘暨雁翅諸工與淮工相表裏然清河達雲梯關數百里葭葦榛蕪壅塞故道則用以水攻沙之法塞周橋高澗閘座使清淮旁無所洩而

蓄全力以攻積沙會十七年大雨淮水盛漲與黃並驅入海於是治淮治黃治運並收成效十九年陞淮安府二十一年特簡淮陽道二十四年陞安徽按察使是冬例應入覲值河臣開浚下河治高堰上特敕大臣會勘宏安具疏條陳謂高堰之工無論下河開浚與否亟宜加治至堰上加工之法砌石工必先打地釘湖底水深費帑甚繁若用板工埽工水勢蕩掣尤易摧殘若用密釘排椿碎石內灌以敵風浪庶爲兩全且可節省金錢十餘年後黃河刷深則河湖之水面俱卑而高堰下河亦可漸次就理疏入部議如所請行二十八年轉江西布政使歸里後值黃運兩河潰溢當事者疏請起用會病卒阜城縣志祀靈山名宦廣東通志

### 白登明

白登明字林九奉天蓋平人隸漢軍鑲白旗順治二年拔貢生五年授河南柘城縣知縣時大兵之後所在萑苻嘯聚登明治尙嚴肅悉禽諸盜魁按以法境內晏然憫遺黎荒殘多方招撫力請停止增派河夫設條教以勸耕讀久之漸復舊觀十年考最擢江南太倉州知州甫莅任立四禁衙蠹地橫賭博奸淫犯者寘重典訪察利弊纖悉咸周故所摘發輒中往往鄰境有冤抑赴愬上官願下州爲理時

海墘居民因亂蕩析登明召募開墾復成聚落海寇犯劉河堡侵入腹地登明盡力守禦寇不得逞遂退十六年復攻崇明甚急礮聲三晝夜不絕巡撫蔣國柱率兵策救欲遣告師期俱莫敢前登明獨駕扁舟夜半往緬城入衆知援至守益力寇乃遁州田資劉河爲蓄洩歲久淤塞北派名朱涇宋范仲淹新塘遺跡也登明請於上官疏鑿五十里復大開劉河六十里不兩月竣事震澤東北諸水悉導入海旱潦有備民咸賴之先是寇氛方熾無地籌餉姑取雲南協餉以應急需至是竟爲大吏所劾落職民列治狀請留弗得坐廢二十餘年康熙十八年以福建總督姚啟聖巡撫吳興祚薦起授高郵州知州值歲旱蝗十九年又大水請蠲勸賑全活無算湖決乃築清水隄以堵之計口授食嚴禁吏胥剋減役者咸踊躍從事時吳逆初平軍檄旁午登明先與民約凡供億驛夫以四城吹笳爲號免奪民時號發皆立至上官有所遣調從不輕給一人然均諒其清廉亦無相督責者以積勞卒於官貧無餘資州人醵金爲殮二十六年入祀名宦祠鄉鎮諸民各肖像立祠私祀焉

于朋舉



于朋舉江蘇金壇人順治六年進士改庶吉士授檢討出爲河南分巡睢陳道按察司副使自署其廳事曰無求於吏吏自察不擾於民民自安其爲政大指如此郟城有盜殺其知縣而逸士民洶洶謂城將受屠朋舉疾馳至撫諭無恐已而營將果統兵至城下拒不納營將訴之總督召朋舉詰責對曰郟城荆令朋舉婦翁也朋舉豈不欲甘心是盜乎獨奈何苦平民總督悟止兵盜亦尋獲正其罪遷福建分守福寧道參政興化瀕海其鎮將所部皆羣盜受撫者也有材官辱張給事之僕給事訟之鎮將撻材官數十部卒大譁相率入給事家毀門入欲殺給事給事逃遂欲劫鎮將爲亂鎮將先已潛行入會城不得逞則縊被撻者死復噪入給事家謂其僕殺之也時朋舉甫到官卽廉得首惡者姓名猝縛致之集文武諸官會鞠健兒帶刀林立瞋視朋舉從容呼首惡名語之曰軍法士在伍惟將之聽若曹乃敢不聽而譁其罪多矣然吾新下車上官又念若曹教訓無素但用殺人律從事則獄無蔓延於汝何如衆乃雜然言曰殺人者張僕也朋舉曰若曹氣礮何等張僕能於千百健兒中奪人而縊之耶更召縊者妻及其厮養童訊之皆吐實隨誅首從三人而釋其餘軍民以安泉州提督剿海盜盜逸入興化界者鎮將獲

數百人朋舉視其嘗薙髮者曰此良民被陷當宥有年少者曰童穉何知又當宥全活者甚衆漳州與盜所居廈門隔海相望也時固山額真大營駐會城別遣梅勒分番守漳歲四易兵馬多至三四千人往返千數百里凡供役者荷重踰險鞭箠飢餓顛仆死者相繼言於總督請駐防者無踐更總督不許因請展其期歲再易民以稍蘇息擢四川按察使山東右布政使丁父艱服闋補湖南布政使朋舉以湖南甫離湯火民不聊生務一切休息之見司中胥吏數百人嘖蹙曰民苦不堪此屬鮮衣張蓋縱橫市井間何所取諸下令汰其十九擇愿謹者數十人供文書而已數爲巡撫言士民利病及諸有司賢不肖狀積與巡撫忤遂被劾部議降二級調用未歸而巡撫以貪殘獲罪湖南士民皆快巡撫而惜朋舉年五十六卒

汪琬堯峯文鈔

### 吳汝爲

吳汝爲字伯寅山東霑化人幼承李氏通籍後復姓順治六年進士授陝西麟游縣知縣縣新脫盜害城隍摧毀戶口墾田存者十一汝爲請於撫按監司守願履熟定賦蠲其不墾者又請以鹽課通全府所屬縣丁口而均之莫敢應牒二十餘

上御史王某感其誠爲疏奏報可更出私金四百餘代償積逋民始蘇乃招流移勸種植少年爲盜已具悔者游博攬攘爲民害授以閒田勸之耕俗未知紡織命工製器具募能者教諸媪孺不數月人習其事縣始有杼軸之利故時民善陶有局廠貧民亦資之食亂後失業假以金而復之踰年流亡來歸田日闕乃繕治城郭又相形便立堡十二控引警察以故終任無一盜自罹喪亂人不知學建學立舍課諸生講誦其中舉節孝禮賢士修邑乘風勸多方喬僊一變拮据三年邑大治時有虎患爲文詛於神采樵者見有物如馬嚙虎殺之昇以獻人以爲德政所致嘗一署鳳翔縣知縣以廉惠聞居八年巡撫上其治行當內擢丁母憂歸服闋補廣東陽春縣知縣土風孱弱給事官府者皆旁邑黠猾藩鎮食客旅游者與商販者豪奪於民不得或誣以盜汝爲惟以鋤強梗扶弱植爲急民以不冤爲法均役大府過兵供億有方總督爲之減從甫一年以移牒文有脫誤論罷旋得白補江南廬江縣未之任道卒麟游人請於學臣康熙四年祀名宦張爾歧蒿庵集

### 湯家相

湯家相山西趙城人順治六年進士八年選江蘇常熟縣知縣潔己愛民誓於神



以自勵釐剔耗蠹撫恤流亡善政具舉前令以被劾逮問家相常左右之力白其  
誣以是拂巡查御史意然不顧也時江南五郡逋賦二百萬緡嚴旨奪各地方官  
職家相坐是免士民爭先輸納不踰宿而額足且以治狀走愬大吏請留弗獲既  
而給事中周之桂疏上其事十三年起授湖北南漳縣知縣南漳居萬山中爲巨  
寇所盤踞時出肆掠或戕官吏人咸危之家相慨然就道至則堅壁清野寇由西  
山大至家相謂守備徐必達秦之仁曰寇衆我寡當效羅士信破盧明月法可勝  
密授方略寇果墮伏中途擒其魁黨馬成孫信輩斬首數百級寇大創遠遁於是  
招徠流亡修復學校教養兼施墾田六百餘頃築永泉八觀諸堰用資灌輸民賴  
其利邑以大治疆吏交章薦之會以病乞歸囊橐蕭然靜居一室日惟訓迪後進  
絕迹公府莅其邑者得一接言論爲幸云

宋必達

宋必達字其在湖北黃州人順治八年進士授江西寧都縣知縣土瘠民貧噢休  
之如子有清泰懷德二鄉久罹寇民多遷徙地不治乃請盡蠲逋賦以來之貸以  
牛種甫二歲田盡闢縣治瀕水夏雨暴漲城且沒必達跣禱於神水落乃按故道

疏濬之自是無水患康熙十三年耿精忠反自福建出攻掠旁近地江西大震羣賊多響應寧都故有南北二城南民北兵必達曰古有保甲義勇弓弩社民皆可兵也王守仁破宸濠嘗用之矣按法訓練得義勇八千及賊前鋒薄城下營將劉邀必達議事曰衆寡食乏奈何必達曰人臣之義有死無二賊本烏合掩其始至可一鼓破也劉遂率所部進賊少卻必達以義勇橫擊之賊奔已而復率衆來攻巨礮墮雉堞輒壘補其闕隨方備禦甚堅賊失氣解去或言於巡撫縣堡砦多從賊請擊之巡撫將爲發兵必達刺血上書爭之乃止官軍有自汀州還者民婦女在軍中悲號聲相屬自傾橐計口贖之詢其姓氏里居護之歸皆感激泣下縣初食淮鹽自明王守仁治贛改食粵其後苦銷引之累必達請以粵額增淮額商民皆便卒以粵引不中額被論罷去寧都人哭而送之餞貽皆不受道出豫章爲盜所得脅之降大罵不屈繫旬餘忽夜半有寧都人數十人持兵踰垣入擁以得脫既歸里時兩江總督董衛國已移鎮湖廣見之歎曰是死守孤城者耶吾爲若咨部還故職且以軍功敘必達遜謝再三既而語人曰故吏如棄婦忍自媒乎褐衣蔬食老於民間寧都人歲時祀之韓莢有懷堂集

趙吉士

趙吉士安徽休寧人寄籍杭州順治八年舉人康熙七年選山西交城縣知縣縣居萬山中巖磴參錯孔河出塔莎谷東南流會於汾故水曰交水山曰交山縣曰交城地近屈產畜馬絕有力饒灌木歲取其材以爲利時禁民間養馬又廢南堡村木廠由是利爲文水所奪交人重困武弁路時運以需索擾民民殺時運作亂鄰邑諸盜亦並起而大同總兵姜瓖反盜遂與瓖黨姜建雄合陷交城文水汾州清源徐溝太谷官兵克之瓖誅建雄走餘賊潛山中滋蔓不能制吉士將之官或問曰若何靖盜吉士曰其必先撫後剿乎不先撫無以攜其黨不終剿無以絕其根到官浹旬有投撫者數十人人給一示令招其黨大閱南門外分鄉營兵列左右士民願與校者聽得技勇百人是歲饑錄山中貧民七十人使家人與雜處得悉羣盜陰事遂申警備令鄉紳家出一丁與民均役分夜巡城城中肅然又行保甲團練法犯者由甲長練總鄉督以達於縣匿賊者連坐不入甲者以姦民論鄰盜相戒不入境交城賦額二萬二千山賦居大半多抗不償有河北都賦倍諸都吉士率數十騎至其地爲陳朝廷威德勸以力耕保妻子慎勿爲盜取族滅聞者



竦息日暮宿土窖中有來訟者平其曲直左右多賊黨吉士若弗知明日復深入陰察其地勢民情至木欒窖把總蘇成甫迎之乃偕歸是歲山民無逋賦者八月充鄉試同考官而蘇家崖礦盜起吉士還縣令廣購糧草賊謂官兵且大至散去捕得數十人置之法未幾交山賊楊芳林芳清等復肆行焚劫吉士入山勸農有惠崇德者故從姜瓖反至是跪馬前自首吉士撫慰之爲易名重生明日宿其家詢二楊所在得實大饗山民立禽二楊杖二十繫之密遣卒從間道械以入城山民黨賊者愕視不知所爲吉士召山民徧飲以酒度二楊去遠乃整伍出山賊渠任國鉉鍾斗等糾衆尾其後卒不敢發會陝西叛弁黃某部衆二百餘踞葫蘆川與國鉉等合葫蘆川有東西兩川最險要吉士遣山民持書付斗與國鉉僞爲誤投黃弁者黃弁驚疑率衆出山去國鉉等無所恃乃就撫靜樂李宗盛踞山爲盜主九年春遣其黨趙應龍劫清源溫氏遇校官李開秀殺之吉士遣惠重生入山說國鉉等謂官兵且剿葫蘆川若獻趙應龍可脫罪國鉉恐致書李宗盛給應龍縛付重生應龍恨爲所賣乃盡發諸盜陰謀且爲吉士畫除宗盛策吉士乃械應龍赴太原自會營兵剿宗盛別遣重生往說國鉉等俾毋動羣盜聞所購祇宗盛

率自保莫爲用宗盛走被擒而兩葫蘆賊日夜爲備且謀劫縣城吉士從容治文書行鄉飲酒禮賊聞備少弛近兩葫蘆口三十里有靖安廢堡吉士築之會總督欲調官兵盡誅交山盜吉士曰劇盜有名者不過十餘人其他率烏合一聞盡剿恐山中向化之民畏罪自疑反爲賊用今靖安堡初復但請協兵三百以駐防爲名剋期入山賊可一戰擒也從之吉士自太原偕守備姚順率兵至縣大閱享賓夜半席未散吉士起馳馬出南門則姚順蘇成甫已集兵門外會師疾驅未五鼓行四十里至水泉灘飲犒畢始語順等曰此行奉詔討賊非爲駐防來少遲且得罪遂令把總王國振由西冶川進襲東葫蘆蘇成甫進襲西葫蘆吉士偕姚順進駐東坡底語順等曰賊謂吾由堡進兵近堡以東必設備今由間道得至此此地爲兩葫蘆要道據之則東西援絕矣國鉉等聞姚順駐防靖安堡僞就撫以餌順及至堡寂然乃大驚走還羣呼曰官兵入山矣兩葫蘆賊皆走上三座崖且語山中民官兵將屠山從者千餘人吉士率兵前進令安營止宿明日遣人至崖下諭之曰官謂汝等皆良民毋爲賊脅官且按戶稽丁不在者卽以賊論衆乃稍稍去僅存二百餘人吉士曰此真賊矣乃分兵爲四要賊去路自收軍駐橫嶺已而崖



上賊竄走伏兵起擒獲甚衆吉士復益兵進獨石河入爛團山永寧馮養成糾衆來援官兵大敗之餘賊逃入鄰境吉士馳報太原府發諸縣兵夾擊而已收兵駐獨石縱諸降賊質其妻子俾捕他盜以自贖先後均就獲入山旬有六日盜悉平乃召山中民始終不降賊者三十七家賚以羊酒立爲約正其素不與徭役者編其籍入都圖自後交山無賊患初吉士患山路深阻命山中民都具一圖鱗比爲大圖日召山中父老詢徑途曲折注明圖間次及永寧靜樂諸山朗若列眉每獲賊善遇之詢諸賊去來蹤迹而上官亦知吉士能辦賊不復拘以文法故所向有功吉士居官廉軍中賞賚皆自備班師日鄉大夫歛金五百爲犒辭不受治交城五年百廢具舉論平賊功徵入爲戶部主事以母憂歸服除旋丁父憂起復仍補原官二十年奉使徵揚州關鈔吉士寬以惠商負販乘小舟概免譏察輸稅者自封投積胥吏苛歛之弊盡革二十五年擢戶科給事中有忌之者劾其父子異籍吏議被黜旋補國子監學正四十五年卒交城祀之名宦祠著有萬青閣集

田起龍

田起龍字雲從河南襄城人順治九年進士授松陽縣知縣松陽僻邑無城郭苦



山寇大府置兵爲防守民又苦兵起龍至捐奉金募丁壯揆度地勢始築城躬負  
畚暴風日中爲倡城成選敢死士日訓練寇至輒擊退之遂請於督撫撤防兵去  
民以安堵有巨盜小魏者招納亡命爲數百里害以計擒之小魏獻金三千求免  
起龍曰吾豈可受此不義物遺赤子荼毒哉立卻之而正其罪政事之暇課諸生  
講伊洛之學十四年與鄉試分校考官多取輕淺之文私謂可得少年士起龍曰  
是豈童子科哉亦負朝廷求賢意矣力爭之榜發中六人鄭濂范櫟徐孺芳朱斐  
陳震先滕達皆知名士居三年督撫薦將內擢而卒年六十性孝友嘗讓產於兄  
授徒以食鄉里多弱侮之者及貴悉厚遇之有嘗欲致之死者亦不報抱膝廬文集

禮山園集 見碑傳集

李疇

李疇湖北孝感人順治九年舉貢生授福建將樂縣知縣始至拜宋楊時於書院  
新其祠刻時遺書召諸生肄業院中嘗曰禮讓不興國何由理每朔望率僚佐詣  
觀化亭爲縣人講鄉約春秋行鄉飲酒禮時至村落間問民所疾苦勉以孝弟忠  
信牧兒田婦皆環集如嬰兒之依慈母期月之間縣人悉化於善境內無盜賊堂

上稀鞭朴聲性耿介初至官與家人約曰在官奉金外皆贓也不可以絲毫累我衙內有二桂方華開疇指之曰此亦官物也擅折者必治之自是家人不敢簪桂華嘗出郭省農事從僕摘道旁一橘顧見之責曰豈可壞法自汝立下馬杖之命償其值居三年上官有索饋者無以應遂去官歸縣中老幼數萬人焚香擁馬行至境上皆號泣返家繪像以祀之康熙三年卒於家戚友醵錢以斂子孫常采藜藿以爲食疇女爲大學士熊賜履妻將樂人士以公車謁選至京者皆至賜履所問疇起居語及治行皆太息泣下聞其歿則痛哭失聲

熊文端集

### 劉偉

劉偉山東濰縣人順治十一年舉人補萊陽縣教諭歷東昌府教授遷直隸南宮縣知縣縣多浮稅悉爲裁革勒石以戒其後鹽禁嚴商人藉官引重價罔利交通官吏前縣皆與之比小民鎚銖以上輒目爲私販鞭朴慘毒偉持不可商乃藏黃金鹽鼓器中以獻發而得大怒投之門外杖門吏商人斂迹鹽價以平時方重逃人法漢人隸旗籍逃去者所過一食宿俱爲窩留兵部督捕司四出逮捕有司不敢詰督捕吏役與奸民結詭名隸旗者投止富人家捕者踵至家立破縣爲畿南

孔道害尤甚偉每力爭辨其冤苦積忤上官意到官甫七月罷去南宮民列其治行走闕下請留守四月不得達已而聖主廉知逃人株累者衆卒裁督捕官偉歸不復出數年卒於家南宮民赴哭送葬者五百餘人歸卽邑中建祠饗祀不絕乾隆三十年復立碑於祠前理堂集

### 黎士宏

黎士宏字媿曾福建長汀人順治十一年順天鄉試舉人除江西廣信府推官乾隆朝長汀縣志 鋤豪彊糾貪墨 陳壽祺黎士宏傳 丰采稜稜奸宄斂戢長汀縣志然嘗

受十二郡讞牘脫無罪數百人時爲語曰遇黎則生大清一統志屬邑玉山兵燹後城中草深三尺居民纔三十二家士宏立學建治招集流亡墾田定賦民復舊業

陳壽祺撰傳彫邑頓成樂土長汀縣志以裁缺補江西永新縣稽逃漏整風教政清獄簡陳壽祺撰傳與民休息境有虎患齋心致禱虎爲屏跡民稱黎青天長汀縣志舉廉

卓第一奉旨賜袍服擢陝西甘肅同知奏罷衛所屯丁額徵銀數百兩復以廉卓賜袍服晉江南常州府知府會逆賊吳三桂煽亂西秦震動督撫會題擢洮岷道副使署甘山道事提督王輔臣畔河東失守士宏以鎮兵雲集必一事權言於巡



撫謂恢復河東非用河西之兵不可用河西之兵非責之提督張勇不可疏奏授  
勇靖逆將軍節制諸鎮及復蘭州士宏贊畫功爲多陳壽祺撰傳署甘肅按察使分  
別失守官吏罪號爲平允甘肅通志寧夏營將畔殺提帥監司適以憂去鎮城危急  
改授寧夏道嚴守禦安反側又密啓免衛所逋糧七萬五千石康熙十六年寇平  
以功晉布政司參議以母老乞歸家居二十八年卒年八十陳壽祺撰傳著有託素  
齋詩文集仁恕堂筆記理信存稿長汀縣志弟士毅由拔貢授江西南昌縣知縣請  
免邑糧溢額剿平山賊彭酋民賴之後遷知壽州大清一統志叔子致遠盛京刑部  
侍郎陳壽祺撰傳

### 黃貞麟

黃貞麟山東卽墨人順治十二年進士選安徽鳳陽府推官初至任卽除訟師李  
守義闔郡慄然值大旱府縣禱雨未應貞麟曰得無有沈寃未雪上千天和乎遂  
於龍興寺禱雨壇下立判諸大獄三日果大雨江南逋賦案興逮蒙城懷遠天長  
盱眙各紳民百餘人繫獄候勘獄小不能容人皆夜立其時胥吏舞文有已完而  
注未完者有報在先而注完在後者貞麟分晰上聞保全者五百人天長有盜劫

銀鞘捕盜者多引陷良民按察使以案付貞麟貞麟訊知其仇誣悉請釋之有壽春營弁李某請曰此案某受累有年逋盜尙少一人君坐一人罪則某可以免貞麟曰吾不敢爲君功名妄殺人也河南優人朱虎山游食太和土猾范之諫與咎姓有隙誘虎山至家爲蓄髮遂誣咎姓將結明宗室謀逆事發江寧推官不敢問委貞麟貞麟力白其誣上命逮京師覆勘刑鞫無異乃釋咎姓而治之諫罪潁州民吳月以邪教惑衆仇者首之官株連千餘人貞麟反覆推訊祇坐月及數爲首者餘皆免有捕役索財水姓不得指爲月黨逐至新蔡殺之鄉人來救捕役並誣其村人黨月事聞撫鎮發兵圍之繫其衆至鳳陽貞麟悉縱之歸約卒歲後復至人感其德屆期畢赴貞麟廉得實重懲捕役而盡釋村人旋以他事解官事白入都康熙九年選直隸鹽山知縣鹽山故多盜爲立法令牌甲互相救護有警一村中半守半援盜日以息地瘠戶貧屬役者七十餘丁逃亡殆盡貞麟悉與豁除不期年流民復業者數百家邑有學田故明義士劉永昌所施者時奉部行查天下學田除濟貧生外餘銀皆充餉有司不察全數徵收貧生無所資劉氏子孫亦大累貞麟爲通詳請免十二年邑苦旱貞麟欲報災謂父老曰大吏使勘災者至供

給皆惟官是責期不費民間一錢及秋徵吏仍以舊額進曰准蠲若干待命下而還之民可也貞麟曰下輸上易上及下難反覆間損民實甚立令除之鄰邑有飛蝗至貞麟爲文虔禱蝗食草而不害稼又永革雜派陋例民皆感惠陞戶部山西司主事山西聞喜丁徭累民有一丁費十餘金者貞麟力爲請減歲省數千計監督京左右翼四倉每遇收放雖寒暑風雨不少避尋因旗甲領餘米數百石訊以監督離倉故鐫級調用而大倉筆帖式某復虧缺米數貞麟又與新代者有隙以倉役侵盜失察候勘十七年罷職歸三十三年卒

### 陸求可

陸求可江蘇山陽人順治十二年進士授河南裕州知州時徇地之師相望軍檄一日數至求可先事爲備民不告勞赭陽一驛舊設馬六十後減至三十站銀五千九百餘減至二千三百餘事多費少難爲意計乃自貸軍府錢市馬六十劣充急發縣戶舊三萬戶三男子則十萬丁也故事食鹽二千九百引後丁止千有九百引則千六百是一丁食一引矣力請於運使減至千引民力稍蘇舊墾田一萬九千三百餘頃兵後可墾者八百餘頃塞河之役逃荒三百餘頃其征賦皆取盈



於五百餘頃中逋亡日甚乃多方招誘行寬卹之政使汙萊二而當一确瘠三而當一民勸於農歲有增墾新學校興藝文禮其秀士又創爲州志當時謂其治裕如庭內洒埽罔不周款入爲刑部員外郎擢福建提學僉事考鄉賢之祀去其冒濫風教肅然士子有過請於督撫不得妄施刑革轉布政使參議未上卒其後康熙五十年至五十五年有知裕州董學禮者奉天人先後墾地三百七十餘頃又修城垣立義塾歿後官民建祠祀之黃宗羲南雷文約錢儀吉衍石齋合稿

崔宗泰 于宗堯

崔宗泰奉天人順治初授江蘇松江府同知偕知府李正華擒蔣莊劇盜以明幹稱十二年擢常州府知府爲政務惠貧弱抑豪強善發摘姦伏郡人驚爲神明十三年大兵征閩步騎十餘萬駐府四旬人情恆擾宗泰先期儲侍織曲備具有游騎十餘閒入村落逐婦女溺水死宗泰夜叩營門白將軍縛置之法一軍肅然又時時單騎巡行遇小有剽奪隸傳呼曰太守來則皆引避去民得安堵令甲府漕以推官監兌時推官懦而衛弁橫卒伍尤驕蹇要素無厭稍繩以法則聚而譁會宗泰署常鎮道自請於漕督以令箭檄之監兌於是盛驕從帶刀韃臨倉弁卒悚

懼終事無敢譁者尋以誑誤當左遷民呼籲請留弗獲降福建延平府同知後乞免歸 于宗堯漢軍正白旗人廣西總督時曜子順治八年時曜官陝西按察使廕宗堯入監讀書康熙七年年十九選江蘇常熟縣知縣興利除弊勇於爲治老於吏事者弗逮也時漕政積弊糧皆民運往往破家宗堯議定官收官兌之法重困得甦其納糧則張諭戒期令各自輸胥役莫由上下其手民便之他若興文教戢豪強救荒療疫諸政皆以勤懇肫摯出之四年如一日以勞致疾十一年卒於官年二十有三民爲罷市巷哭釀金發喪泊欲歸葬皆號泣挽留遂葬之虞山南麓題其阡曰萬民留葬復建祠私祀並爲文以誌遺愛焉

### 任辰旦

任辰旦浙江蕭山人康熙六年進士授江蘇上海縣知縣縣負海戶十餘萬歲租不下四十萬漕復半之異時縣徵漕追逮纍纍敲朴無虛日辰旦削木爲版有應逮者書其姓名使都亭長召之如期而至爭先輸納嘗詣倉隸人曳筮者徒手至呼之則寄筮中途酒家知其不常用也吳淞口舊設防軍後撤之去辰旦慮其乘發剽民財也密請將軍行期故邀軍主飲宣言期須少緩次日將軍忽下令促卽

行辰日厚具牛酒勞軍軍無敢遷延他顧居民帖然吳淞江黃龍浦爲入海要道去浦口三里先建閘資蓄洩尋圯江蘇巡撫慕天顏檄縣修治故事修閘必築壩費不訾辰日募浙匠仿浙地爲梁法度基廣狹約丈尺伐石識石甲乙下之水使善泅者厝之悉中程卽故址疊石爲門廣左右護隄束水就閘十月而工成民不病役上海沒水田六千餘畝賦額未除輸者率破家前官屢勘虛寔貿亂至是以慕天顏請得旨覆勘辰日喜曰此吾志也日往來泥沙中蓬首垢足按魚鱗舊冊履畝丈量釐其荒者閱二月悉白費皆自辦奉不足出銀釧棉布償之籍上得減除額征有差辰日清苦自勵在官衣木棉疏屨廢馬無棧豆親朋飲宴輒從薦紳假壺榼薦紳之賢者請其教卻其所餽餉浦東漁有屠蚌得大珠者隣首之官稱珠美色如含桃辰日判紙尾曰民自得珠與官何涉首者慚去康熙十八年舉博學鴻儒放還故官復以良吏薦入爲工科給事中連上五疏言皆切直遷兵科掌印給事中二十年充湖廣鄉試考官二十五年改大理寺丞丁母憂歸以前廷推事註誤落職卒於家著有介和堂集竝言近錄一卷毛大可上海集課記顧彥倫書記後

張沐



張沐河南上蔡人順治十五年進士康熙元年選直隸內黃縣知縣潔己愛民縣苦賦役不均輸糧者或無田沐令田主自首地畝不丈而清嚴行十家牌法奸宄斂跡時邑中大旱自八月不雨至明年九月民飢甚沐力籌賑卹捐資爲倡並勸富民貸粟官爲書其數俟秋穫取償多方獎諭人爭應之民免轉徙沐爲政專務德化令民各書爲善最樂四字於門以自警注六諭敷言俾人各誦習反覆譬喻雖婦孺聞之莫不欣欣嚮善也五年坐事免民惜其去如失父母十八年以都察院左都御史魏象樞薦起授四川資陽縣知縣方赴部時途出內黃民遮道慰問日僅行數里有遠送至境外者既抵資陽任值吳逆據瀘州相去僅七百里羽檄往來如織城中人戶不滿二百沐入山招撫量爲調發供夫驛不缺吳逆平以老疾乞休沐自幼勵志聖賢之學初官內黃講學明倫堂邑中及鄰境請業者恆數百人湯斌過境與語大悅遺書孫奇逢稱其任道甚勇求道甚切沐因以禮幣迎奇逢至內黃講學俾多士知所宗仰及在資供億軍興之暇猶進諸生諄諄誨導不倦歸里後卜居東岡日與湯斌孫奇逢往來議論力以闡明正學爲己任應聘主遊梁書院兩河之士翕然依歸多所成就年八十三卒著有道一錄學道六書

王又旦

王又旦陝西郃陽人順治十五年進士康熙七年選湖北潛江縣知縣潛江處漢水下游舊有長隄捍衛遇盛漲時或潰隄流溢每漂沒居民田廬又旦躬親巡隄先事豫防水不爲患邑中各田畝租賦徭役苦不均又旦爲區畫疆里稽戶籍察流亡覈詭匿以鄉規田以田均畝以畝定賦姦弊無所容於是無田者得免役逃亡悉復又建傳經書院以課士築說詩臺操縵軒以時講習會軍興縣當孔道羽檄絡繹又旦峙糗糧芻茭無後期十四年行取給事中丁父憂歸里讀書中條山陰芝川之上二十年授吏科給事中初又旦之官湖北知漢水多決屯營灣屯營爲荊州保障決則爲害郡治兼及鍾祥荆門天門京山潛江諸縣故事隄工向由諸邑合修事權不一百弊叢生旋築旋潰又旦疏陳其弊請令各治所轄罷協濟以專考成詔下所司議行二十三年補戶科給事中尋充廣東鄉試正考官嶺南物產繁富比還詩卷外略無長物花山者界接番禺清遠從化三縣崇岡密箐鳥道阻深通達四省積賊窟盤其中占據十八峒諸險時時出沒剽劫爲患又旦覆命疏陳其事請建縣治設官吏上允所請未幾以疾卒於官著有黃湄集十卷

崔華

崔華字連生直隸平山人順治十六年進士康熙六年除浙江開化縣知縣政務寬平力除蠹弊始涖任捐建義塾課文校藝士爭嚮學邑舊有里總名目橫派滋擾除之又以虛糧爲累請豁於上官未竟其事而閩寇亂作防兵吳正通賊陷城露刃相逼華從間道出檄召十六都義勇鄭大來夏祚等涕泣開諭立聚萬人躬冒矢石閱五日城遂復未幾再陷慘掠尤甚民無叛志洎亂平流亡初集積逋尤多華圖上總督李之芳乞爲請命恩詔盡蠲十三年至十六年額賦又贖民之流徙者俾得完聚旣而疫癘盛行廣施藥餌全活無算十九年論功擢江蘇揚州府知府值湖河並漲州縣被災者衆華加意撫恤二十三年上命九卿舉清廉吏華與焉超署兩淮鹽運使寬於督課商得休息賦亦悉完先是湖南長沙諸府因用兵蠲引三十九萬一千有奇至是有請補行蠲引者計課可四十餘萬兩華以兩淮浮課甚重又帶加斤商力疲乏若再補行蠲引必致額售者滯銷誤課因力言不便事得寢三十一年補甘肅莊涼道未行卒淮商祠祀之

姚文燮



姚文燮安徽桐城人順治十六年進士選福建建寧府推官建寧居閩上游崇山峻嶺爲盜賊淵藪俗號獷悍以睚眦相讎殺者案山積文燮片言立剖未數月囹圄爲空有方祕者殺方飛熊前令已讞定大辟文燮鞠得飛熊始爲盜時嘗殺祕一家旣就撫祕因乘間復仇不可與殺平民等請之上官祕得活由是大吏謂文燮明允凡疑獄悉委決之時耿繼茂猶建藩其下多怙勢虐民往往貸民錢而奪其妻女償息文燮悉使訐發爲捐俸並募同官代償贖民間妻子歸者百數閩疆初關總督李率泰檄文燮主丈量事建寧環郡皆山民依山鑿田如斗大砌岸以石自崖至巔勢陡峻不能施繩索弓口文燮授諸吏勾股法計田廣狹爲畝增減區畫悉當邊海戰船歲久失修或擬按戶口攤費新之文燮上陳疾苦籌款以代民乃安秩滿報最適推官裁缺改直隸雄縣知縣屬渾河泛溢城東南隅皆水樓櫓傾圮田廬漂沒文燮修城築隄造橋利涉者民德之名曰姚公橋俗以渾河有龍爲暴文燮做韓愈祭鱷魚事爲文檄之水果退邑有狐皮貢歲爲民累文燮條十三難上大吏題請獲免立屯丁爲團長以資守望盜賊屏迹報墾地蠲耗羨減鹽引恤驛政拊循瘡痍民慶更生以捕逃功擢雲南開化府同知攝曲靖府阿迷

州事吳三桂叛文燮陷賊中密與建義將軍林興珠約同歸林早發文燮不果行賊繫之獄乘隙遁詣安親王岳樂軍興珠先以文燮謀告安親王文燮至安親王以聞召至京賜對甚詳滇寇平乞養歸避居龍眼山中顏其堂曰樂耕未幾持母喪以毀致疾卒所著有耕湖詩選薤簾吟壬寅詩雄山草滇行草黃柏山房詩文集李賀詩注又工畫做荆浩關仝董源巨然諸家皆逼肖片縑尺幅人以爲寶云

### 韓蓋光

韓蓋光字篤臣直隸高陽人順治十八年進士康熙九年授河南中牟縣知縣冉

觀祖韓公德政去思石記 縣北界黃河河一漫決則平田爲壑 冉觀祖南梁重濬河渠碑記

故明時知縣陳幼學嘗濬渠百九十有六河南通志以備河患南梁濬河碑記 歲久漸

淤而縣東蓋寨里之渠 冉觀祖蓋寨濬河碑 南境張村寺之正禮陂冉觀祖張村寺重濬

正禮陂碑記 西北南梁里吳家堂之河南梁濬河碑記 漚塞尤甚夏秋霖雨輒害稼蓋

光皆因故道大加疏濬溝洫深通水有所洩民食其利蓋寨濬河碑 縣土多瘠少沃

若南境之楊橋冉觀祖楊橋折地碑記 及晶澤里皆沙薄不可耕 冉觀祖晶澤里折地碑記

田賦自明時原分上中下三等行折國朝定鼎兵燹之餘舊籍無存有司遂一概

按畝起科或有隄堰所壓無田而有糧者二十年相承民以大困逃亡者衆蓋光躬履畝洞知其苦楊橋折地碑記 乃廣招徠貸牛種建墾荒折地之議請於河南巡撫佟鳳彩著爲令冉觀祖申詳墾荒石記久之得新墾田百三十頃不報升科而以新賦代舊糧於是楊橋蠲地每頃獲折十有五畝楊橋折地碑記 晶澤里之田獲折六十餘頃隄所覆沒則除其征國課無逋民亦不病逃者日漸復業 晶澤里折地碑記 榛蕪化爲平疇衆皆稱其有撫字之仁兼催科之智申詳墾荒石記 往時弊政若漕米私幫驛站支應皆民所苦蓋光盡革之又以其暇修學宮建書院文教蔚起在任六年以內擢去士民感頌臚其善政刻石志之韓公德政去思石記康熙五十二年祀名宦河南通志卷五十五

### 江皋

江皋字在涓安徽桐城人順治十八年進士觀政刑部父病乞養歸喪除授江西瑞昌縣知縣故事歲一巡鄉堡校戶籍歛輿馬費可多金皋罷之縣城竝河壩岸善崩出奉金率先衆力爲堅隄杜水患民號之曰江公隄三藩叛楚有兵警縣界連楚土寇乘間起皋曰此吾民緣飢寒出此耳迫之則走楚藉寇耳敕鄉保長開



諭撫安之而密督丁壯巡察時刺取其魁擊殺之盜遂息轉九江同知擢甘肅鞏昌道大軍入蜀士卒驕悍所過漁奪百姓舉出郊遇之驗問得實立縛送軍主斬以徇改柳州府知府時新收粵西兵留鎮於柳婦女多被掠白督撫移軍主籍其人付府治給資散遣歸其家數百人藍千秋戶部集江公舉傳 太和殿工興使者采木至柳民大恐長老言故明嘗采木於此緣岡巒出入谿谷頭顱僵仆不可數事將奈何舉曰無急此上命也臣子何敢違使者至召民間木所在令前導而自控一騎偕使者往視木至絕壁下木森挺出坳輿下臨深谷則下騎掖使者登使者有難色則短衣攀援以先使者強從之崖益峻無側足所仰視木顧使者曰何如使者咋舌呼亟反曰是不可取舉曰誠然不可取然木固在也是賴使者爲上言不可取狀上愛民必免之矣使者還奏竟免役舉尋以薦提學四川丁母憂服闋補陝西平慶道副使遷福建興泉道參政以事左遷康熙五年卒藍千秋戶部集江公舉傳

### 孫蕙

孫蕙字樹百山東淄川人順治十八年進士王士禎感舊集補傳康熙八年知寶應縣

雍正朝揚州府志名宦傳 前官相繼貪殘雜派視正供數倍富人盡貧至是淮黃俱決

雍正朝揚州府志 湖水洶湧縣田廬盡沒民貧益不可狀蕙至首除雜派焚其籍并

革馬戶官農糧單等色日歲省費以鉅萬計自淮不出清口黃水灌淤漕渠 道光

朝重修寶應縣志名宦傳 歲徵夫七千二百濬四十日漕乃通蕙不忍勞民徵夫少濬

不如法 雍正朝揚州府志 河道都御史羅多怒將劾治之是時民德蕙甚走環都御

史署號泣者幾萬人羅多曰工六日竣貸令重修寶應縣志 士民感憤不呼而至者

萬餘人爭負畚鍤築隄堰 國朝詩別裁 三晝夜工成羅多驚喜而蕙譽望益著 重修

寶應縣志 士民繪圖紀其事於石 國朝詩別裁 先是明設鳳陽倉歲輸粟食護陵兵號

鳳米道遠又涉洪澤湖風浪靡常民甚苦其役至國朝罷護陵兵而設倉如故米

既由淮達鳳陽而淮兵之護漕者又自鳳陽運米歸兩不便蕙請以寶應鳳米解

淮食淮兵漕運都御史帥顏保深然之上疏如蕙請遂得免解鳳陽故事兵船繹

夫每站給銀一錢一分奏銷畢乃給或遲至一二年民不被實惠又兵船未至時

先集夫羈之輒曠旬日不得治生業三藩叛時兵船尤數數過蕙察驛設水陸夫

可六七百人借庫項先期給銀如額令治生業如故兵至乃集民既受官銀無敢

後期者故兵屢過而民無擾布政使慕天顏甚器蕙蕙因請曰清水潭決口未塞高寶諸邑田沒於水者冬春暫涸夏秋復沒如故縱他日隄成不沒而阡陌廬舍盡壞芟芻之屬暢茂填擁芟除視墾荒尤難須三年起科廣招徠勸開墾流移者庶有復業日耳會天顏入覲奏蕙語允之淮揚民頌天顏與蕙不衰蕙治寶應六年崙以愛民爲急不自計利害升沈重修寶應縣志有喬樂吾者富饒居柘溝隣村盜郭某往劫無所得因心恨之郭以它案發誣樂吾同爲盜按察使陳秉直令名捕蕙以百口保樂吾秉直不可蕙召樂吾使自赴訴秉直先入蕙言又見樂吾老甚遂白其誣生員湯輝祚有僕女嫁喬華楚與輝祚鄰有隙華楚子投充旗下挾旗主至邑指有貂裘金爐藏輝祚家擁輝祚入縣署勢張甚蕙執華楚父子笞之五十且上其事旗主懼而遁去淮揚道副使張登選舉寶應富室姓名詢之蕙正色曰此非公所宜問登選慚而止其伉直無所阿避多此類喬萊撰孫蕙傳十五年以卓異擢授戶部給事中雍正朝揚州府志上疏論優人錢永等不宜官縣令又論都察院通政司大理寺官不宜用任子聖祖深然之後有薦永者詔以曾被蕙劾不許又上疏陳秦省運糧苦請豁免閒架稅至數十萬皆得旨如所請行重修寶應



縣志 未幾以憂去遂卒於家 雍正朝揚州府志 著有笠山詩選王士禎感舊集補傳又撰歷代循良錄一卷但錄縣令不及他官意謂令與民近也 四庫全書提要

張瑾

張瑾字去瑕江南江都人康熙二十九年舉人十九年授雲南昆明縣知縣時吳逆初平故軍衛田隸藩府者租素重沿爲額徵又軍興後官司府署器用皆里民供應而取給於縣故昆明之徭尤重於賦瑾請大吏求奏減其賦不可乃畫荒地招流亡給牛種薄其徵以濟軍衛之賦一年墾田千三百七十畝三年得萬餘畝則又以均其徭里蠹無科派奸民無包收諸侵漁弊皆絕民舊供縣署公費日十金瑾曰吾食祿於君不食傭於民革之總督謂之曰陳仲子能理劇乎又問令家幾何人對曰子一客二人僕二人閭之信其子且夜寢之地諸臺司皆驚異自公費除而上之取給者亦減少矣昆明池受四山之水夏秋暴漲挾沙石怒流入昆明開河沙石壅塞水乃溢浸瀕池田歲用民力濬之晉寧州者界於昆明受東南諸箒之水舊迹有河道入江上官議鑿之以通開河瑾按地勢爲圖白於臺司曰一河不能兩受開河獨受昆明之水已不能吐納沙石旁溢爲害豈可更受晉寧水

乎且其地高若建瓴沙石犖确尤甚殆不可治臺司持之堅則指圖爭曰高下在  
日何忍陷民於死同官皆失色總督范承勳曰縣令言是也議乃寢縣有止善春  
登利城諸里田坳埕錯出不旱則潦瑾廉得旁近有白沙馬裹清水三河可資蓄  
洩年久故道塞親操板舌帥民浚治三月河復田以常稔大小東門外舊皆市兵  
後爲墟盜賊窟其中爲創造室廬以居流亡移城中驟馬羊諸市實之貨塵牧場  
相比盜無所託足遂絕安阜園者吳逆之囿也請於臺司以食孤貧廢疾而無告  
者是時上官多賢者每倚信瑾某兵備欲以流民所墾田牧馬求之期年瑾不與  
久亦稱其直將軍僕李殺人按察使置酒爲請陽諾之退而正其罪巡撫僕之子  
謀奪士人聘妻卽縣堂令士人行合禮判曰法不得娶有夫之婦婦乘我車墮  
乘我馬役送之歸有奪者治其罪梁嘉稷爲歌詩以傳之初至積案滯獄以數百  
斷訖皆當後一省疑獄皆付瑾治屢有平反有大豪侮搢紳者過其門停輿執以  
歸將杖聞其妻病乃止而頌繫之明日縉紳爲請卽釋之或問其故曰縉紳力終  
不足勝豪豪暴戾又有病婦杖之益與縉紳仇後事不已不若我爲惡而歸德於  
縉紳怨可解其委曲以安民生如是居三年病卒士民數千人奔哭已而相咎曰

恨未圖其象有祁洪謙者陝西人曾有獄於縣受瑾教戒感而圖象藏於家於是城內外皆相傳寫請祀名宦祭日諸司皆至爲立遺愛碑

焦循雕菰樓集

### 衛立鼎

衛立鼎字慎之山西陽城人康熙二年舉人初知直隸盧龍縣地當兩京孔道驛使旁午供張糗糒捐資營辦不以擾民先時縣中徵糧勺杪以下皆用升合量納草以銀代仍抑價買諸民間立鼎令輸戶合奇零統歸斗斛及額而止徵草者用本色輸民甚便之教誡諸生期變民俗而尤以清廉著稱聖祖仁皇帝命刑部尙書魏象樞吏部侍郎科爾坤巡察畿內至盧龍已治具不肯食僅啜茶一甌曰令飲盧龍一杯水耳吾亦飲令一杯水諸大獄悉以咨之立鼎引經準律咸大稱善于成龍之巡撫直隸也嘗迎聖駕於霸州奏舉循吏以立鼎與陸隴其並稱嗣格爾古德撫直以事至盧龍謂立鼎曰令之苦無異秀才時然作秀才自苦耳今令苦而百姓樂非苦中之樂乎疏薦立鼎治行第一靈壽陸隴其次之內遷戶部郎中秩滿除福建福州府知府上憫其年老命致仕歸歸卽教授鄉里以倡道論學爲事年七十有六卒著有約齋詩文集



龔其裕 子嶸 孫一發 曾孫景瀚

龔其裕字容溪福建閩縣人由生員投效江西軍營積功獎通判康熙六年補瑞州府通判十三年逆藩耿精忠據閩叛擾及江西疊陷袁州吉安各府其裕率鄉兵爲大軍嚮導克上高新昌旋擢吉安府知府時揚威大將軍簡親王喇布督軍駐螺子山其裕野處供餉無缺乏民間子女陷賊中爲軍前俘獲者爲請命將軍全活無算戰場遺骸捐資埋瘞之十五年緣事鐫級調用尋捐復原官十八年補河南懷慶府知府郡有順利渠引濟水入城通舟便民日久淤廢其裕甫下車詢之父老卽濬復之嗣以山陝不靖軍中馬匹多牧於懷民驚擾欲避其裕走告軍中請身任供億勿累民軍校有攘民雞者重懲之兵民遂相安二十一年陞兩淮鹽運使革除積蠹鹺政釐然二十二年以註誤褫職二十四年欽差大臣湯斌白其誣河道總督于成龍調赴河工其裕以疾辭三十七年卒於家入祀江西瑞州吉安河南懷慶各府名宦祠子嶸孫一發曾孫景瀚 嶸字岱生少隨父其裕之瑞州任值耿逆煽亂其裕練勇爲大兵嚮導嶸亦隨軍效力嗣捐知縣康熙十八年補浙江餘杭縣知縣力除宿弊葺城垣修文廟創義學除雜徭開渠築隄尤長

讞鞠民有殺僕而瘞之者截其足棄道旁以虎傷報嶸疑之環視所居側有寺寺園內隙土有新迹掘之餘屍在焉按得謀殺狀論如律旋舉卓異二十七年陞直隸趙州知州趙有支河久塞嶸使濬之灌田數百頃民獲其利會有山陵之役擇能者隨扈嶸奉檄往召對稱旨三十年授江蘇松江府知府松爲財賦區地廣事繁嶸治之有法鉅細咸理三十三年以保舉廉吏送部引見尋署江蘇糧儲道三十六年調直隸保定府知府三十七年丁父憂特旨令奪情視事兩次隨扈雄縣霸州均賜克食三十九年擢陝西甘山道地近邊塞民俗鄙陋嶸創立書院教之人始知學四十年臨鞏荒且疫飢民絡繹流入河西嶸賑糶兼施病者加致醫藥是年丁母憂嶸恐復奪情亟奔喪歸旋有旨慰留上官代爲陳請始獲終制四十五年服闋入都迎駕於密雲途次上嘉獎之四十六年授江西廣饒九南道嶸以五聖邪祠最爲風俗人心害撤之增修書院復宋臣范仲淹祠設育嬰堂百廢具舉時萬年縣匪徒煽亂從者數百人嶸單騎往諭罪其魁亂遂息累署按察使五十七年以疾歸五十八年卒入祀江西饒州府名宦祠 一發字天礪乾隆十五年舉人十七年以知縣揀發河南歷署宜陽密縣知縣發奸摘伏有神明稱能使

豪強悔悟樂爲善良十八年補林縣知縣引泉源溉田濬永惠諸渠民不苦旱縣有兄弟爭產挾母訟一發坐其母於庭爲譬解之兄弟感泣扶母歸請無竟訟二十二年調虞城縣適歸德府水溢虞罹患尤鉅一發覈戶口清囚繫去奸蠹禁盜賊難民以安修惠民永便諸河以工代賑飢民持畚鍤者相望一發日循河干與共勞苦力作倍勤捐資修縣城葺橋梁毀三教堂爲義學創建書院給諸生廩餼身爲之師時江南山東有蝗虞介其中獨不入境二十九年以病去官三十年病痊引見以知縣發直隸候補旋丁母憂三十四年服闋歷署平山元城等縣尋補高陽縣三十六年陞雲南鎮南州知府三十八年卒於官入祀河南虞城縣名宦祠 景瀚字惟廣一字海壽乾隆三十六年進士以知縣歸部銓選四十九年選甘肅靖遠縣知縣旋署中衛縣清釐獄訟案無留牘縣有七星渠淤塞常苦旱景瀚爲築壩遏水入渠濬常樂鎮靜諸渠重葺減水各牘溉田凡三十餘萬畝民享其利五十二年調平涼縣縣有書院傾圮景瀚出資新之親爲講學增驛站車馬罷民充鹽商俾無累歷署靜寧固原二州知州固原漢回雜處時構釁景瀚密探諸堡誅積賊息謠言境內大治旋署循化廳同知五十五年舉卓異五十九年陞



陝西邠州知州未赴任值川楚教匪肆擾陝甘總督宜綿調赴軍營越境剿賊於湖北鄖西克之旋隨大軍赴陝疊破賊巢陝境肅清嘉慶元年命以知府用先換頂戴二年由陝赴川屢著戰功賞戴花翎旋授甘肅慶陽府知府三年調蘭州府知府時流賊蠡起景瀚隨營充左翼長籌畫軍事作堅壁清野議上之略言邪匪滋事以來蔓延四省輾轉兩年處處有賊處處需兵負固則經年累月不能克奔竄則過都越郡不能禦議者惟以兵少爲辭於是調鄰省增新兵募鄉勇不知其無益而反有害也國朝經制之兵本屬有限而腹地尤少其重兵所在非番回錯雜之區則形勢要害之地一調不已而至再再調不已而至三備禦空虛奸民因而肆志則無事之區又將滋事卽如四川湖北之兵皆以全赴苗疆邪教遂乘機四起豈非明效大驗乎此調兵之害也倉卒募兵但取充數非市井無賴之人卽窮苦無聊之輩紀律不習技藝不精心志不齊膽氣不壯遇賊惟有紛然鳥獸散耳此增兵之害也鄉勇守護鄉里本可得力若以從征則非所願無室家妻子田廬墳墓之足繫其心也平居未受涓滴之恩臨難責以身命之報於勢既有所難能而爲之長者素與平等本無上下之分予以虛名強相鈐制於心又有所不服

加恩則玩而驕執法則紛而散欲約束而整齊之難矣其藉此爲利浮開勇數冒領錢糧者又無論也至於驅而臨陣未習戰鬪疑則易驚各爲步趨紛則易亂卽或誘之以重賞鼓之以大義而有勇無剛能暫而不能久闕然而進亦闕然而退耳此鄉勇之害也且兵勇多則糧饟廣糧饟廣則轉運難國家帑藏充盈殺賊安民雖千萬在所不計而民間之疲於轉輸困於差徭者不知凡幾矣文報有站糧運有臺軍營之移徙使節之往來其夫馬不能不資於民力近地不足調之遠處州縣雖官爲給價而格於例案所給豈能敷用每縣夫數百名馬數十匹道途之費守候之費津貼之費司事者口舌之費皆派之里下不肖生監又從而乾沒之爲日旣久民力竭矣官吏但顧考成一切以軍法從事科歛督責民不堪命事變滋起或遇水旱之災將何以處之況乎將領不能約束兵丁所過甚於盜賊鄉勇從而效尤激之生變是所憂者不獨在邪匪也然使有濟於事僥倖成萬一之功亦不必過爲疑慮而自去年以來其情形大概可見矣四省之山層崖峭壁立如城寨者所在多有其上有田有水賊若據之非數萬之衆不能攻取然周圍百餘里或數十里終未能環而圍之也卽竭力仰攻士卒傷損過半幸而得之賊已乘

間率衆他徙矣雖窮日夜之力以追之而其勢常不相及蓋賊因糧於民無地非民卽無地非糧官兵之糧必須轉運賊竄無定向亦無定期糧臺豈能豫設夫馬豈能豫增倉卒移營糧必遲誤此一難也賊皆輕身登降便捷而我軍烏槍弓箭火藥鉛彈身所佩帶不下二三十斤行走不易此二難也賊皆本地之人慣於山行婦人孺子亦趨捷若飛而我兵如陝甘等處壯健有餘輕捷不足登山半日汗流氣喘未遇賊而先困矣此三難也賊隨時隨地可以休息而我兵行必按隊止必安營掘壕樹柵守卡站牆日夜不得安歇此四難也賊常飽而我兵常飢賊常逸而我兵常勞勝負之勢已分矣幸而勝之所殺者賊之後隊數十百人或其疾病老弱不能行者耳其首逆不可得也賊之詭計又分布數人於左右十餘里中四面放火使我兵疑畏不敢遽進及至探明而賊蹤已遠矣此尾追所以常不及也於是有謂宜繞道前進迎頭截殺者究之亦係空言無實濟也前後夾擊則左右分驅東西並攻則南北各竄山澗重疊道路紛歧處處可通頭頭是道安所得十餘萬之兵一一追而擊之卽令四面兜圍而賊聚而衝我散而守十餘萬之兵分布於周圍數百里之內其勢旣分其力亦薄賊以全力矢死衝突未有不潰圍



而出者故賊之往來可以自如我之進退反不能自主賊合而我兵不得不分賊分而我兵遂不能復合焚掠裹脅賊愈殺而愈多疾病死亡兵日添而日少剿則無以爲守守則無以爲剿城池既在在堪虞將領惟斤斤自保今日之賊無論非今日之兵所能剿除卽或額兵全來新兵已練而使之追逐千里之遙奔馳半月之久力疲氣沮其勢又爲今兵之續賊勢益張兵氣益餒日延一日事恐不可問矣然則爲今之計將奈何曰賊未至巴州而巴州之民先去賊未至通江而通江之城已空守土之官雖欲效死勿去其誰與守此無他民心無所恃也故必先安民然後能殺賊民志固則賊勢衰使之無所裹脅多一民卽少一賊矣民居奠則賊食絕使之無所擄掠民有一日之糧卽賊少一日之食矣爲今之計必行堅壁清野之法責成地方官巡行鄉邑曉諭居民團練壯丁建立堡塞使百姓自相保聚併小村入大村移平處就險處深溝高壘積穀練兵移百姓所有積聚實於其中賊未至則力農貿易各安其生賊既至則閉柵登陴相與爲守民有所恃而無恐自不至於逃亡別選精銳之兵二三千名以牽制賊勢不與爭鋒但尾其後賊攻則救賊退則追使之進不得戰退無所食不過旬餘非潰則死耳不戰而屈人

策之上者也其要必先選擇良吏一省之中賢而能者道府豈無數人牧令豈無二十餘人其奔走趨事明白勤幹之佐貳豈無數十人今川省賊所往來川東惟夔州一府達州一州川北惟保寧順慶二府而已陝西惟興安一府商州一州河南惟南陽一府湖北惟荊州宜昌施南襄陽鄖陽五府而已所屬牧令賢者留之不肖者易之每處各派佐雜數人分任其事以一道府董局事輔以正佐數員講明利弊議定章程總其大綱其餘道府分路經理稽查不過三月可以畢事其次則相度形勢天成之險如大成寨太平寨者加卑因高使之可守移附近居民於其中先藏積穀貧者官貸其資茅屋草棚聽其自便其故居仍留勿毀賊未至時仍可照常安業也其村莊市鎮人煙湊集如臨江市普安場者隨其所居因山臨水爲築城堡外挖深壕務令高廣民居零星在外者移入之輒石木料匠役之費皆給於官惟丁夫取於民貧者量給口糧以代賑卹其次則選擇頭人山上之寨平地之堡人戶既多一切事宜需人經理擇其身家殷實品行端方明白曉事者或紳監或者民舉爲寨長堡長給以頂戴予以鈐記使總一寨一堡之事其清查戶口董視工程經營錢糧稽查出入訓練丁壯修飭守備別擇數人爲之副各就

所長分任其事以專責成其次則清查保甲戶口繁多奸良莫辨外至者疑其爲間諜也卽久居者亦慮其有匪黨也行保甲之法十家聯保互出甘結始准移居匪類送官究治其蹤迹可疑而無確據者另附冊尾聽其別居自便毋得溷入以滋後累其餘良民悉使團聚家有幾人大小幾口所操何業田土若干詳註冊內以便稽覈其次則訓練壯丁每戶抽壯丁一人或二三人編爲部伍鳥槍刀矛各習一技官爲給價製備器械每一堡寨擇營中千總或外委一員兵三四名使之教導勤加訓練有事則登陴守禦自保鄉里毋令出征惟本州縣有驚或鄰堡告急許其以半救援其次則積儲糧穀堡寨之中建倉數間富家囤戶有糧難以盡移者官給銀悉行收買入倉無者買於鄰近各鄉官兵經過卽以此糧供支賊至閉寨壯丁守陴按名給糧毋令家食其鰥寡孤獨貧乏殘疾及家稍充而實無糧者准其照冊分別賑借賊平之後卽爲本鄉社倉分儲常平一遇災歉亦可就近賑糶其次則籌度經費所有築堡挖壕建倉買糧置備軍械一切守禦器具及搭棚蓋屋之費銀皆官給交堡寨長司其出入惟倉糧之數主於官賑借供支官爲報銷其餘銀均攤於堡寨居民所有田地分爲十年或八年隨地丁徵還如此者



有十利焉川省無土著之民五方雜處其性輕於去就故一聞警報輒四散奔逃民心疑懼則千里無堅城矣今堡寨林立聲勢聯絡民居既安民志自定父母妻子團聚一家無流離死亡之憂並不慮爲賊逼脅陷於邪黨可以保全良民潛消賊勢利一糧皆藏於堡寨之內所餘村落店館皆空屋耳賊卽千里焚掠無所得食若攻圍堡寨則丁壯自護身家其守必力又有鄰堡之救援官兵之策應其力必不能攻陷狂奔十餘日非潰而四散則展轉於溝瀆之內矣區區首惡何難就擒可以制奔竄之賊利二據險之賊不能下山掠食今民皆團聚糧不露處秋冬之交野無青草附近已無所掠遠出則近山之堡寨皆得邀而擊之其勢又不敢出坐困月餘積糧旣竭終亦歸於死亡逃散而已可以制負固之賊利三州縣之有鄉村如樹之有枝葉枝葉傷則本根無所庇鄉村皆爲賊所蹂躪其城郭之不亡者僅矣今四面皆有堡寨障蔽擁護賊必不敢徑犯城郭有急則環而救之賊將腹背受敵況官兵又乘其後乎可以保障州縣利四堡寨遠者相距數十里近者十餘里官兵經過就近供支糧臺可以不設官無轉運之費民無輓輸之勞至文報往來無須兵勇保護卽於堡寨之在大路者安設夫馬遞送可以省臺站

之費利五每省挑選精兵三千賊合亦合賊分亦分牽制其後使之不得攻陷城  
堡足矣其餘悉令歸伍所省鹽糧猶其小者也兵少則差徭亦省民受無窮之利  
而營伍不至空虛亦無虞更生他變利六守陴壯丁惟賊至時給以數日口糧耳  
無按月之鹽糧無安家之銀兩也其費較招募鄉勇所省何啻天淵而愛護鄉里  
朝夕相見猶有古者守望相助之意可以情法維繫之不若募勇從征日久習於  
凶暴怯公戰而喜殺掠釀爲將來無窮之隱憂利七保伍時相糾察而堡寨之長  
又從而稽查之則奸宄無容身之地其桀驁不馴如嚙嚙者亦懾而不敢肆可以  
漸化爲良民利八邪教蔓延爲日既久伏而未動者正不乏人今淑慝旣分居不  
相雜冥頑者苟潛入於賊黨可以一併殲除其愧悔者必安居故業可以保全身  
命絕後患之萌開自新之路利九規模旣定守而勿失遠近一體上下同心如網  
之在綱有條不紊如身之使臂無令不從無事之時按籍而稽瞭如也有事之時  
畫地而守井如也一勞永逸數世賴之利十然而愚者可與樂成難與圖始因循  
目前畏難苟安此議一出必有沮之者一則曰騷擾反以累民也夫擇利莫若重  
擇害莫若輕賊匪所過焚燒房屋殺戮人民擄掠婦女其慘極矣民雖至愚亦必

明於利害所全者大卽小有騷擾猶當毅然爲之況保其身家全其積聚順其情之所樂何累之有若云奉行不善則官吏之過當易其人不當廢此法如戰場失利豈以偶無良將而遂永不用兵乎一則曰迂緩不切於事也夫欲速則不達自去歲以來各省所行何一不速何一有效事固有不急急於目前而收功於異日者及今爲之未爲晚也行之一縣可保一縣行之一府可保一府同時並舉不過三月賊在羅網之內矣是速莫速於此也舍此以圖其果有旦夕奏效操券而得之策乎一則慮其費大也夫成大事者不惜小費苟能平賊卽多費亦所不惜今州縣大者不過堡寨數十處小者十餘處一省所辦者不過三四十州縣耳哀多益寡合計每省不過用銀一百萬而已後此卽無所費較之養兵養鄉勇每月需銀百萬兩而無所底止者其費何如且如買糧爲費較鉅而糧分儲於堡寨何異儲於州縣之倉今各州縣豈能不採買乎其餘借項分年帶徵歸款是不獨省費且並無所費矣一則畏其煩難也夫天下無難成之事患無任事之人今自道府下至堡寨之長總理者有人分任者有人勞瘁不辭纖悉具舉何慮其煩難且通江巴州儀隴賊所蹂躪之處失業難民豈能不爲撫恤清查戶口修理房屋弔生



恤死賑乏周貧其煩難何止十倍於此與其補救於已然之後何如豫備於未事之先是數說者皆不足以難之然則今日急務莫有先於此者矣安民卽所以殺賊懼賊而逃猶可言也兵愈增則差愈重用兵愈久則擾累愈多數月之後恐民見賊至將不逃而與之合矣今不早爲後悔無及矣嗣是被兵各省仿其法行之民獲自保賊無所逞成效大著五年赴蘭州府任七年送部引見卒於京十一年命以景瀚堅壁清野議編入皇清文穎尋入祀甘肅蘭州府名宦祠福建省城鄉賢祠

### 陸在新

陸在新江蘇長洲人順治初爲諸生躬耕彭山之下向晨荷鋤出暮歸讀書已而應鄉先生聘入城授徒每謂弟子曰我輩豎起脊梁便合擔當名義何得負此昂藏七尺爲康熙五年詔以策論取士在新故以經濟自豪遂得舉尋除松江府教授教諸生以質行爲先其以金贄者卻之用不足知府魯某時分奉助之巡撫湯斌察其廉勤以卓異薦是歲江南七府一州諸長吏被薦者獨在新一人人以此益服斌知人也詔賜蟒服遷江西廬陵縣知縣單車就道始至誓於城隍神不以

一錢自污晨起設香案令贊禮生誦戒石四句箴跪而聽之四拜起然後治事以爲常錢穀耗羨革除都盡傍水設五倉便民輸納建問苦亭於衙西朔望坐亭中訪求民隱時裹糧携供具歷山谷間勞苦百姓軫其災患而導之於善修學校進諸生考論德藝如爲教官時設四門義學刻孝經小學頒行之二十六年江水泛溢民多溺者在新急出錢募民船往救身爲倡率出入洪濤中全活無算在新之始受事也前官虧帑盈萬大吏曰第受之我等行相助在新以爲信受之已而奏銷無所抵憂甚遂得咯血疾臨終北向謝恩手書教條示民反寢而卒初在新將赴官子孔奐在京師蹙然曰吾父此行必殉是官矣亟從之在新亟諭使還涕泣請留乃止卒之日唯孔奐在鬻書數篋以歛廬陵人爲罷市三日會哭者萬餘人孔奐猶以前事被羈閱五年始以喪歸而生產盡沒爲官物矣廬陵人合辭請於官祀吉州名宦祠長洲人亦以鄉賢祀之南畝文彙鄉賢錄名宦錄

陳洪諫

陳洪諫山東德州人進士康熙七年知興化縣雍正朝揚州府志練達明敏綱舉網疏興化縣志時邑疊罹水災饑饉徧野洪諫顧之心惻會巡撫至境乃刺血寫書爲

民請命血盡有賣菜備播鼻出血以助之書七上乃得請民賴以活 雍正朝揚州志  
流民迫於饑寒走險剽掠 興化縣志 洪諫練鄉勇嚴保甲守禦有方又厚加撫循一  
統志 招來復業盜賊衰息置義冢設育嬰堂皆自捐俸不費民財 興化縣志 後陞江  
西撫州府知府晉神木副使 雍正朝揚州府志 祀名宦祠 興化縣志

### 邵嗣堯

邵嗣堯山西猗氏人康熙九年進士授山東臨淄縣知縣有惠政著勸民續言以  
憂去十九年服闋補直隸柏鄉縣興水利減火耗禁差擾民甚安之有言開滏陽  
河通舟楫者巡撫于成龍使嗣堯往相度嗣堯力持不可謂此河旱潦不常未可  
通舟楫卽或能通恐舟楫之利歸商賈挑濬之害歸窮民矣事遂寢會盜殺人於  
縣界立捕至置之法上官以酷刑奪職待罪時上命刑部尙書魏象樞巡視畿輔  
民爲申訴事得白罷歸以于成龍薦復補清苑縣嗣堯以感奮廉明白勵民咸以  
包孝肅比之二十九年戶部尙書王鶚薦嗣堯清廉慈惠行取授江南道監察御  
史值歲歉疏請平糶倉穀又請罪止流徒者准贖均議行三十年出爲直隸守道  
正己率屬州縣肅然奉法三十三年江南學政缺出諭曰學政關繫人材甚屬緊



要朕覩原任御史陸隴其直隸守道邵嗣堯操守學問俱優若以補授必能秉公校士革除積弊時隴其已卒遂命嗣堯以參議督學江南既蒞事虛衷衡校杜絕苞苴論文宗尙簡質著四書講義傳示學者甫試三郡以積勞遘疾卒身無長物同官歛貲致賻乃得歸葬士民思之爲立祠肖像以祀焉

井睦

井睦直隸文安人康熙十二年進士官內閣中書授浙江衢州府同知衛兵後人物凋敝又總督移鎮於此供應繁睦布衣茹蔬不受民一詞不擅差一役務與民休息曰捕務吾職也則清嚴保甲禁絕匪人而諭民以孝弟力田睦少孤奉母以孝聞居喪三年無愉容赴官時悉以田廬讓兄子以奉寡嫂而攜族子外甥之困乏者自隨共食粗糲久而不厭故衢人心悅其行服其教數年之間民安盜息入庠講學士風振厲上官聞其清無不敬禮巡撫趙士麟尤愛重之兩署金華嘉興知府正己率屬禁革火耗肅清漕白去之日襪被蕭然送者哭聲聞數十里凡欽部大案若催運皇木繪畫地圖清丈西安田臺司悉以屬之檄到稱貸以行所過民不知有官趙士麟調江蘇巡撫入京上問循吏以四人對睦居首擢河南河南

府知府聞命卽去署僦居杭州薪水之資朝不及夕河南屬吏遣役投批來迎賚長夫公費千金拒不納以典質爲食會病無醫藥貲遂卒年五十三上官聞而哀之皆有賻杭州知府馬如龍爲疏引告諸同寮讀者多流涕乃援其柩以北衢人請祀之名宦又列其惠政鐫之木流布兩浙間陳儀學士集

### 蔣伊

蔣伊江蘇常熟人江蘇通志康熙十二年進士奏進所著玉衡臣鑒二錄玉衡者言君道臣鑒者言臣道有旨留覽選庶吉士十四年散館授監察御史時南方用兵城邑殘破民多流亡伊上疏言新復地方宜量緩徵輸責成有司招徠開墾又以奸民挾仇動借畔逆害良善請嚴反坐律其有司受贓枉法者加等治罪又以浙江白糧準順治十一年價米一石折銀一兩今米價減至五六錢請準時爲高下又以蘇州駐防兵糜餉擾民請移駐它要地下所司議奏多見施行十五年移疾歸十八年補廣西道御史時連年用兵征調四出又方開捐納例選途頗壅伊乃繪十二圖上之曰難民曰刑獄曰讀書曰春耕夏耘曰催科曰鬻兒曰水災曰旱災曰觀榜曰廢書曰暴關曰疲驛復爲疏言江西浙江難民妻女被掠乞錢求贖

狀請自後新復地方責成督撫嚴禁將吏掠賣男婦使水火餘生來蘇有望其論刑獄言外省有司多以酷濟貪應令各官廨立石中庭鐫刻上諭除命盜重案外不許濫行監禁擅用夾棍及株連婦女違者治罪庶足以儆貪殘惠熒獨其論銓法云捐納知縣本出一時權宜其人未必無賢能而不可不選擇請未選者責成吏部行簡選法身言書判實加考驗優者以資除授劣者給以空銜其已選者責成督撫試其才守行保舉法否者黜之並請停止捐納知縣聖祖覽圖及疏爲動容嗟歎又疏劾江西董衛國擅役民夫縱兵焚掠詔衛國軍前帶罪圖功十八年地震疏論六部積習遇有銷算案件要求貨賂意爲高下堂司書吏連爲一手請嚴加飭禁又言災眚疊見乘輿不宜輕出宜日御便殿咨諏治道飭官常求民瘼以幸天下時江南江西游饑上救荒策請獎廉吏緩催科通商賈興工作養孤老掩骼鬻爲五疏上之二十一年補廣東督糧道參議 彭紹升一林居集按察使副使蔣公事狀 廣東當兵燹後供億煩苦蠹吏倚爲奸弊 熊賜履懋齋文集蔣君墓誌銘 奉檄下縣促解派款勢張甚廣東通志民不聊生熊賜履所撰墓誌銘伊至蠲耗羨卻饋獻除差徭日買乾魚自給誓不取民間一物二林居集蔣公事狀解省米價例浮於時伊平準



諸市官無侵漁時逆藩多占據民舍伊暑不張蓋躬自察勘民得復還故業兵糧撥支苦跋涉吏又持之伊酌以本地糧給本地兵軍民便焉二十二年學宮傾圮且藩卒橫踞伊出俸錢造軍房八十餘楹先申總督以戢兵隨鳩衆工以葺廟兵心安而士氣振其持大體定危機類如此尤加意文教風勵後進創立穗城書院嶺南義學置膳田六百餘畝以給四方來學之士月吉課甲乙化海濱爲鄒魯廣東通志 二十四年詔求學行兼長者充督學任九卿舉伊以應遷河南按察副使提督學政二林居集蔣公事狀河南自明季剝於兵民氣未蘇士久廢學僅守帖括伊下車卽頒條約示以爲文之法刪蕪收實本於古學其教士敦行也旣刊布孝經以明百行之原又自著淺說頒行橫舍使易遵守士有以行修名者獎勵唯恐或後王廷璧督學蔣公德政碑 伊之去廣東也解纜日囊橐蕭然士民攀轅號泣廣東通志至是於廨之東偏建孟子游梁祠顏其堂曰關利苞苴請謁望風退避 王廷璧所撰德政碑 考校所至車馬供給不擾民間然時時出已俸修葺文廟及名賢祠墓士有貢太學而貧者必助其膏秣河南通志二十六年試開封得疾卒二林居集蔣公事狀兩河人士感泣盡傷一時輓詩有百世師恩千點淚兩河官橐幾篇文之句 河南

通志 赴至廣東士民設位嶺南義學哭者甚衆籲祀名宦又公葺穗城書院爲蔣公祠祀之廣東通志後亦祀河南名宦河南通志著有莘田文集子陳錫官至雲貴總督廷錫官至文華殿大學士 二林居集蔣公事狀 自有傳

張堦

張堦江蘇長洲人以官學教習議敘知縣康熙十七年選河南登封縣登封自明季遭寇亂逮入本朝比歲不登民多失業堦至誓於嶽神除私歛招流亡督之耕種復相土宜課民植木棉及諸果實莅官甫五月大修學宮復嵩陽書院延耿介爲之師導諸生以程朱之學自縣治達郊鄙立學舍二十一所課諸童子以時巡閱正句讀導之以揖讓進退之禮聞者皆灑然易慮間策蹇驢歷民間問所苦有小爭訟輒從阡陌間決之縣西境有呂店者俗好訟難治堦察里長張文約賢舉爲鄉約禮遇之俾行化導俗爲一變甲長申爾瑞負稅且受杖路拾人輸稅金疾走衙俟失金者反之堦詰爾瑞曰爾旣拾遺充稅可免責何爲其反人也對曰小人安命寧受責終不利人財堦曰義哉奇男子也舉爲鄉約旌其門後有王進寶魏光大秦瓚皆拾遺金而反失者邑民高鵬舉死妻孟氏年少舅欲強嫁之孟氏

哭夫墓將自縊堽適微行問其故乃給之銀布勸還家而免其徭歲時存問俾終其身縣故多胥役時獄訟日尠姦僞無所容諸胥多自引去其更番執事者退則操耒耜爲農以在官無所得錢也開萼嶺二百里復古轅轅路建古賢令祠修鄆公墓歲三月率民致祭鄆公名廷誨崇禎末爲登封令守城抗賊死者也康熙二十一年旱自春徂夏不雨堽暴烈日中拜表引罪步登少室東峽冒夜行達旦汲泉水反嶽廟叩頭呼籲俄而雨大注鄉長郭九合赴縣輸稅路出金星廟遇虎九合叱曰我不懼死獨慮違張公限耳虎俯首避道去自此境內無虎患堽在官五年民知向方生聚日盛家設位旦夕尸祝大書官清民樂於門耿介嘗歎曰年來嵩穎間別一世界矣二十二年以卓異薦陞廣西南寧通判去之日民遮道痛哭立祠於四鄉肖像以祀榜曰天下清官第一至南寧未幾乞歸旋遭母喪服除赴京師卒

### 張克嶷

張克嶷字偉公山西聞喜人康熙十八年進士選庶吉士改刑部主事累遷郎中有獄連執政族人諸司莫敢任克嶷請獨任之內務府以其人出使爲辭克嶷鈎



提益急牒問奉使何地歸何期力請於長官謂宜入告事雖格聞者肅然尋授廣西平樂府知府搖獐雜居盜不可詰克嶷至浹月以信義服苗酋獲巨盜二人斃其一宥其一責以偵緝竟任盜不敢窺調廣東潮州府知府屬縣賊蠡起或稱明裔聚衆千餘人克嶷疾馳至其地命吏士速據白葉祁山設疑兵嚴守而張軍聲賊不敢偪會夜半大風起簡健卒二百斫其營呼曰大兵至矣城中鼓譟出兵以助之賊奔祁山要擊之斬其渠魁三人衆散降巡撫將上其功克嶷曰此盜耳而稱明裔興大獄株連多恐轉生變乃以盜案結潮有大豪狀親迎者於路而奪其妻拒捕經年克嶷微行迹而得之獄成當大辟監司銜督撫命爲之請且曰稍遼緩之當潛餽黃金四百鎰克嶷曰吾官可罷獄不可鬻也卒寘諸法或假親王命以開卅縛執之其人出龍牌衆色然駭克嶷命繫之獄以牌申大府情旣得立柱殺之丁父憂歸遂不出六十年卒於家年七十有六

方望溪集所撰墓表

### 靳讓

靳讓河南尉氏人康熙十五年貢士十八年殿試歸班二十六年選授浙江宣平縣知縣會旱災被數縣獨宣平請蠲賦甚力巡撫張鵬翮以爲賢丁父艱服除補

汾西知縣清編審罷里差減例耗歲旱卽停徵發倉以賑民無流亡聖駕北征計費賦民爲供張皆親籍記橫索中飽弊胥絕明年再供軍需念民力已竭請以正賦辦治巡撫許之尋行取山西道監察御史上疏言三事首言察吏安民實行教養又禮部齎解冊卷費宜革沿邊同知宜簡用後二事下部議行爲首疏指陳詞過當部議降授通州知州皇莊旗莊壯丁多恣肆病民讓繩以法不少貸私錢私鑄令行禁止治禁河捕魚案分別旗民誣者獲免犯者薄懲而已上是之有謀開麥豆總店者侍衛以入告下部行查讓力言無成例事遂寢又有欲爲薑總店者亦拒之會學差更替特旨命督學廣西尋復調浙江皆有廉明稱聖駕南巡召見嘉獎賜皇輿表松花石硯及御書天庥堂額以榮其母尋以母老乞終養踰年母卒哀毀致疾甫終喪卒於家

趙炳所撰傳參用冉覲祖寄顧堂文測

### 朱振

朱振浙江秀水人康熙十八年進士二十六年授江南舒城縣知縣縣自明崇禎壬午遭寇亂流亡未盡復歲稍歉輟耕而走士多廢學振至修復明倫堂以課士均賦勸農去其害民者數事二十七年武昌夏逢龍作亂大兵自舒入楚民大恐

市肆皆閉振慰諭之曰師行糧食若絕其糧是導之掠也於是縣門洞開盡徙市肆所有於廊廡間振立其下偕胥吏與隸操斤權斗斛平價鬻之以供兵芻茭甕盎皆備兵過晏然縣之西南有七門堰漢龔頡侯信創爲之魏揚州刺史劉馥更治諸竭樂史所云築斷龍舒水灌田千五百頃者也明時知縣事范得民劉顯一再修之其後爲勢家曲防遏流使不得下水利遂失振考故迹排異議盡力興治竟復其舊舒地產穀赤白雜戶部謂米色不純行令赤白分貯山農苦其役振力請漕督援河南事例免分貯且曰爲親民吏而民隱不知罪也知而不爲之所視一己之榮祿爲重而萬民之怨讟爲輕義所不敢出也漕督感其誠爲咨部以免焉三十一年卒於官舒祀之名宦朱彝尊曝書亭集嘉興府志

成康保

成康保江蘇寶應人康熙十八年進士授內閣中書遷浙江台州府同知揚州府志引寶應縣續志彙 台州爲濱海要區沈廷芳隱拙齋文集台州府同知成公墓表山深箐密揚州府志值國家方弛海禁奸民出沒其間草竊時發沈廷芳撰墓表康保飭聯保甲摘發禽治盜賊屏息揚州府志又特設巡船選廉吏稽察海口權稅巡役困商重懲



之奸杜而百貨集民賴以殷台州屯田在黃巖太平二縣磽瘠莫治屯戶咸以衛將貪利多逃亡莫敢承墾康保招徠之繩衛將以法荒蕪日闢 沈廷芳所撰墓表數年盡成沃壤揚州府志民有訟康保將理胥以同知職不受辭告康保曰民瘼罔聞何以官爲是鰥職也凡求直者悉爲之理多所平反 沈廷芳所撰墓表 署仙居縣知縣仙居額徵秋米撥解兵糧歲二千石山路崎嶇米一石約費銀一兩有奇康保詳請改折歲省縣民金錢無算尋又署麗水凡盜案疑獄歲久不決者一鞠卽明沈寃盡釋 揚州府志引寶應續志彙 所至事無不治民愛戴之而於維風厲節尤勤府之龍顧山有八忠祠祀明靖難死事諸臣歲久蕪沒康保重建且稽圖經益以林嘉猷葉希賢顏曰十忠躬詣方孝孺故里酌酒祠下訪其裔孫諸生潛加禮焉樂安南有雙忠祠祀鄭恕盧迥請於學使俾其子姓奉祠祀台人感焉康保本宿學初居禁掖著有周易闡微春秋要旨左傳解讀史辨誤諸書康熙四十八年卒 沈廷芳所撰墓表 祀名宦揚州府志

### 高蔭爵

高蔭爵漢軍旗人康熙初任直隸蠡縣知縣縣多旗屯分民田之半佃者倚勳貴

爲奸利持吏短長河數決孟嘗邨歲比不登民大飢蔭爵至曰吾未暇理它政且活民倉有粟二萬石請發以賑牘再上不許請解官去乃許之五千石蔭爵曰若今歲又惡民不能償二萬石五千石等死耳吾且活吾民盡發之更貸金五百於民令種麥約曰麥熟償種禾熟償粟以二十之一爲息夏旱蝗起捕蝗盡禱雨輒應秋又大霖雨河暴溢率吏民冒風雨捍禦隄完而歲大熟民乃活某甲以財雄諸佃多爲不法誣縣諸生爲奴而籍其田按治得實並發它贓事置之法豪猾惴服莫敢犯令於是設義倉置鄉學興立教條尊禮賢士民大和悅調三河知縣一以簡易爲治無所設施或問之曰前令已治矣何紛更爲前令莆田彭鵬也上校獵至三河問父老高令與彭令孰賢對曰彭廉而毅高廉而和上稱善擢南路捕盜同知巡撫于成龍問以捕盜方略條三事以對大略言盜以旗屯爲囊橐而出沒變幻不可蹤迹請嚴保甲首實之令使無所匿而平日能使之衣食充足則可不至爲盜成龍知其能丁父艱歸會成龍總督南河築界首隄以屬蔭爵隄成上南巡閱工召見賜克食補湖廣德安同知應山知縣爲民所逐蔭爵奉巡撫檄往署改紀其政和其民比代至送者數萬人擢分巡四川松茂道遷直隸口北道皆

處以廉靜絕饋遺減郵傳詰奸慝恤商旅民夷安之卒於官子五人其倬官至大學士自有傳嚴太僕集

### 祖進朝

祖進朝奉天人以廕監生起家康熙二十三年由部郎授江蘇常州府知府有惠政以失察鑄級去民呼籲於巡撫湯斌請留斌上疏言祖進朝履任未一載操守廉介辦事甚勤臣私心重之頃緣失察法寶一案降調常州五縣士民輒號泣罷市赴臣衙門請爲題留日不下數千人臣諭以保留例已久停毋得瀆擾士民以爲常州四十年來未有愛民如進朝者其減絲輕耗興學正俗戢奸除暴息訟安民窮鄉僻壤盡沾惠澤皇上軫念東南如江寧知府于成龍特恩超擢吏治丕變進朝操守才幹實可與成龍頡頏而獨以一眚被謫士民攀留言之泣下臣不知進朝何以感人之深如此臣受事四日始行拏獲法寶是受事之日已爲失察之日且當靜候處分何敢代人瀆奏惟臣蒙恩簡畀封疆大任屬吏之敗檢者得而糾劾之廉能者不能爲之一言非公也民情皇皇如是而不爲之解慰安輯非仁也畏罪緘默而使輿情不能上聞非忠也因與督臣熟計敢據情陳奏章下吏部



議格不行諭曰設官原以養民湯斌保奏祖進朝清廉百姓同聲懇留可從所請以勸廉吏進朝回任後益自勵未幾以老疾乞免民恆思之不置云

劉棨

劉棨山東諸城人康熙二十四年進士三十四年選湖南長沙縣知縣以廉明稱邑人患育女爲累多棄不畜棨嚴禁之時有訛言裁兵撫標兵千餘人環轅門大噪棨馳赴爲開陳大義且借給三月餉示必無裁意衆乃定總督吳璵以循良薦三十七年陞陝西寧羌州知州值關中大饑漢南尤甚州無宿儲且介萬山中艱於輓運棨請貸廳倉約民能負粟一斗至州者予三升不十日輓三千石大吏以其法賑他邑咸稱便又奉檄賑洋縣移粟沿漢而下棨先馳赴徧歷審勘剋期給發數日而畢謂洋縣令曰此粟貸之官儻民不能償吾兩人當代任瀕行老稚爭擁馬首比秋大熟洋縣民相勉運粟還倉不煩催督始寧羌頗形凋瘵棨爲均田額完逋賦補棧道修旅次安輯招徠期年而廬舍萃集山多榭葉民未知蠶棨遣人旋鄉里齎蠶種及募善蠶者教之人習其利名所織曰劉公紬士苦無書爲召賈列肆分購經籍又建義學親爲講解未幾舉鄉試者二人蓋前此所僅見也四

十一年擢甘肅寧夏中路同知未赴丁母憂去以代民完賦負累不能行致書於弟令售遺產不足弟則益以己產易金致之以償負民間之爭輸金爲助卻不受服闋補湖南長沙府同知引見奉溫旨且試文藝於乾清門卽日授山西平陽府知府裁汰陋例蠲除煩苛訟牘來立剖決之四十八年詔大學士九卿舉各省操守清廉才具優長之員以知府被舉者惟榮與湘潭陳鵬年二人四十九年遷直隸天津道副使迎駕淀津詔許從官恭瞻親灑宸翰榮因奏兄果昔任河間縣知縣奉有清廉愛民之旨乞賜御書清愛堂額上允其請旋擢江西按察使五十二年擢四川布政使五十五年上詢九卿以本朝清介大臣數人求可與倫比者九卿舉四人榮與焉車駕幸湯泉又以榮治狀語諸從臣時湖北巡撫缺出廷臣共薦榮上曰榮居官甚好但四川現在用兵未可輕調嗣榮因籌畫兵備勤勤致疾五十七年卒於官年六十有二子統勳孫墉俱官大學士曾孫鏗之官至吏部尙書均自有傳

### 楊朝正

楊朝正漢軍鑲白旗人由侍衛授東昌府知府既至訪民間利病銳意興革臨清

舊有額外銀米稅朝正白巡撫聞於朝減歸正賦東昌濬河舊有額夫率憚役求免至是改爲均役有訟者輒自剖決未嘗委屬吏民憚其嚴明獄事日損月朔望宣講上諭春秋徧歷郊野課農桑歲暮訪高年者賚之其賢者尤尊異之東阿教諭王璜事繼母孝歲荒救飢民數百監生崔允璧建橋通濟開設兩渡船朝正請於布政使竝旌其門民有蠲金治道者治酒勞之由是人爭向義府治西南地窪下遇大雨泛溢五六十里溺者衆朝正自蠲金八百兩剏大石橋三治道六十丈益增隄禦水水患息康熙二十四年旱朝正宿齋戒除壇與妻磨麥爲麪作供具然香籲天曰知府若有罪願身受譴無累百姓伏壇前自子至亥大雨徧四境明年復旱發倉平糶復蠲金煮粥以食飢人王璜崔允璧等各蠲米數百石爲助民得不害卒祀名宦祠子宗仁仕至湖廣總督宗義至河南巡撫八旗通志

王繻

王繻河南睢州人從學於同邑湯斌斌深契之康熙二十五年授東明縣知縣二十九年補直隸獲鹿縣行取戶部員外郎遷郎中三十九年授江南糧儲道四十九年擢江南按察使以疾告歸其在東明也以錢糧多欺隱居民流亡乃爲易甲



長法大戶用其族長催之於是兼併之弊絕流亡者來歸繻酌給牛種縣分四十里里養馬一匹以備官用侍芟芻補倒斃民苦其累繻勒石禁之賈五雲梁進皆盜魁也諭之曰吾知若名素矣五雲汝爲練總進汝爲保長邑有盜汝緝不用命卽斃汝盜自是絕迹有馮化者以句逃人誣其鄰繻匿鄰他所別令一人踞堂下召逃者曰誰句汝可執以出逃者執踞者衆皆譁逃者窮乃曰馮化給我衆中有欲遁者繻曰必化也追執之果然重杖之邑安姓某客於外繼妻高及前妻之女在室高與人通忌女圖並亂之不從戕女以滅口事覺繻曰高母道已絕應照故殺前夫之子律斬巡撫具題報可著爲例東明距州八十里繻以憂歸縣人赴睢弔白衣冠往者數千人其在獲鹿也當山陝衝衢繻治驛有法民不知供億苦歲歉出穀以活飢人親給銀米編審戶口人不得爲姦利其任糧道也所屬舊有倉規銀鉅萬並虐取之民繻至皆杜絕轉漕時扁舟巡察懲其濫收者宜興僻處萬山中一夕繻忽至百姓訝曰吾民不見糧道四十年矣今乃飛至耶因號曰飛糧道道庫歲收銀八十五萬兩爲修船及弁丁運費前運丁預支行糧例扣月利丁益困繻悉除之照額全給仲雍有墓在虞山久廢不治繻減城隍廟演劇金數萬

修復之而其遷按察使也十五衛四十九幫官丁咸請留不遂則泣拜以送胥門外有湯斌坊民鐫繻姓氏於其次爲臬使時宿州某生攜妻子授徒某氏家其妻兄女來視數日生妻子皆中毒死生故與妻兄有隙疑女毒之控諸府女不勝刑遂誣服獄具繻疑之問曰館中來往者何人女曰祇一十二歲某徒耳召而曲誘之曰師扶我急因致砒麪中寃乃釋無錫民某與皮匠毆已而匠死有僧故與某仇證以爲因傷致死縣令據僧言擬抵繻察鬪毆月日在保辜限外因詰曰傷久何得不醫曰醫矣檢所用方則匠死傷寒耳僧乃服罪所平反多類此四十二年聖祖南巡繻力疾迎覲上顧巡撫宋犖曰朕聞王繻督糧儲時甚好隨遣太醫臨視賜德里雅噶神藥並御製初寒詩一幅繻趨謝恩溫旨再下教以調攝甚備繻叩謝感泣謂臣受國恩今疾無以圖報上因書世恩堂額賜之尋告歸曰按察使任大責重臥治卽辜恩矣竟不出五十九年卒於家

趙俞

趙俞字文饒江蘇嘉定人康熙二十七年進士三十七年授山東定陶縣知縣縣地瘠水政不修淫潦徧田野歲常不登民多就食它縣俞集問父老知所苦乃行

度地勢量爲縱橫之渠三捷以隄如古溝洫畛涂之制以達於大川蓄洩有法車輿可通令民自治其界之渠旁近者爲協理俞日單騎巡導之民知其生我也趨役不後樹之桑棗榆柳落實取材皆有貲而隄藉以完又以三渠之隄不能徧通四境車馬陷淖輒橫驅損禾稼行人與農交病則又規築六路廣倍於三渠之隄亦樹之以爲固並路皆爲溝殺於渠三之二以達於渠歲乃大熟 張雲章所撰行狀立法徵糧不施鞭朴吏役無事公庭寂然則課士親爲講解指畫暇或挈之以游士忻然向學修學宮考闕里誌正從祀位次自爲文以記之 王昶所爲傳 邑素多盜有獲輒死之俞於律無所加縣紳爭言舊例不可破活之盜益肆且懼忤上官指俞曰吾固以柔道治民者也詩有之仲山甫之德柔嘉維則柔失其則爲弱吾嘗念之故治盜必嚴保甲除窩頓自始至今未嘗縱一人柔故不失其則者也若博名徇俗殺人媚人仁者不爲也前後免死者甚衆盜亦衰息在任五年以老乞致仕不許乃以病告歸五十二年卒於家 紺寒亭文集樸村集嘉定州志

### 陶元淳

陶元淳字子師江蘇常熟人康熙十七年詔舉博學鴻儒元淳在舉中以疾不與



試二十七年成進士主試者初擬前列以策陳會推之弊抑之及廷對論西北賦輕而役重東南役均而賦重願減浮額之糧罷無益之費閱者以其言戇置二甲三十三年選廣東昌化縣知縣到官日值大旱徒步禱峻靈山雨立降首定賦役均糧於畝均役於糧裁革雜徵自坊里供帳始以海濱土瘠禾稼鮮登乃度隙地立墟市大招流亡勸開墾予以牛種不責償民始相率以力耕爲業縣隸瓊州故與黎爲界向設土舍制其出入吏得因緣爲奸元淳立撤去一權量定法度黎人便之城中居人舊不滿百至是戶口漸蕃元淳時步行閭里閒周咨疾苦煦嫗如家人瓊處海外武弁多驕橫崖州尤甚元淳嘗署州事守備黃鎮中以非刑殺人游擊余虎縱不問且素貪屢索黎人獻納元淳廉得其奸狀列六款以上虎聞私以金賄之不得輒造蜚語聞於上總督石琳下瓊州總兵會訊元淳申牘曰是非本一定耳目難盡塗若其公道猶存私揭不應發審鎮臣不應侵官必挫執法之氣灰任事之心元淳當棄官以全政體不能蒲伏武臣貽州縣羞也初鞫是獄鎮中陰令甲士百人佩刀入署左右駭懼欲走元淳據案怒叱曰吾奉令治事守備敢令甲士劫持是藐國法也鎮中氣懾疾揮去卒定讞論鎮中罪如法崖人爲語

曰雖有余虎不敵陶令一怒而總督石琳卒因元淳倔彊坐不檢驗失實會赦免復於計典將黜之巡撫蕭永藻新受事解於總督乃已元淳自奉儉約節衣縮食在官惟日供韭一束然喜接諸生講論嘗至夜分不倦屢以疾乞免未果竟以勤績卒於官所著南崖集明史傳廣東志凡數十卷昌化額田四百餘頃半淪於海賦不及二千浮糧居三之一民重困元淳爲浮糧考一冊歷請於上官乞豁除無應者乾隆三年元淳子正靖官御史疏以入告竟獲奉俞旨免焉馮景所撰傳見碑傳集

鄭善述 子方城 孫天錦

鄭善述字孚世福建建寧人康熙二十九年舉人四十六年除直隸固安縣知縣縣在京南百二十里濱河又鑲藍旗圈地所在旗丁河兵倚勢陵縣民令率依違遷就幸無事莫敢持公道善述至厲風操嚴法紀有與民譁於庭不問誰何據理鞭之受楚者無慮數十其主怒且怨賂權貴訟於部檄他縣廉理不能移善述判怨者日伺其短不能得始慙服戒其下勿犯自是民無屈抑歲修永定河椿葺工料取給宛平良鄉永清東安霸州及固安而五邑少遠河員平日不儲材遇急工

輒責固安秫稽麻柳歲供至數十萬民不堪多逃散而責者如故善述陳其狀總河未卽罷除然責料亦因以少緩五十五年以失出放歸道旁泣送者千人車不得行慰遣之不去乃停車卽有授館者夜半復百餘人款門入牽衣泣夜話達旦持隻雞盂麥束薪來者踵於門累日乃得歸善述至性過人十歲時屋火母王老不能疾走與老嫗踉蹌翼之出前母瘡歿藁葬東郊以閩藩圈地失其處隨兄某日夜往來榛莽中求得之母王歿殯西郭別室會大風雨慮室壞及棺趨視悲號守之終夜早歲與兄各餬口四方官固安時乃得迎養性命一之姊陳早寡妹葉貧皆置之安全旣歸築木石居論述古今忠孝事輒萬言教諸子弟以倫紀爲本子方坤官至山東武定府在文苑傳劉紹放鄭先生善述傳 方城字則望四川通志初入資爲教諭康熙五十三年與廷試擢第二除泰寧縣教諭雍正十一年成進士乾隆二年授四川新繁縣知縣劉紹放鄭先生方城傳 以經術爲吏治四川通志民有訟者引至前曉以倫常禮義動其天良民多因是以化羅村李長榮無子養子景鮮俱死遺二幼孫長榮妻年八十餘傭者李雲利其田冒族姪以異姓亂宗控逐二孫方城鞠得實重懲雲爲長榮別立後雲訴於府賄通府幕流言四布知府王某



婉諭方城勿執成見方城持益堅既而事敗幕逃王謝曰微君守正幾墮術中其  
明果多類此縣故有牌頭執薪水糞除之役皆貧民日求升合不能在官輾轉雇  
募歲以爲苦或流亡方城毅然除之墾田令下奸民夷古墓塞堰溝謬稱新墾力  
陳其弊於上官阡陌得無恙劉紹放鄭先生方城傳勸民積社穀以濟匱乏歷三歲得  
穀一千七百餘石分貯四村貧民賴之四川通志六年秋大水立詳報布政使遣知  
縣某勘實某縣固匿災因言報災非上官意方城曰吾不能病民以希旨卒除其  
賦九年六月再水錦水河溢齧城冒雨立水中親荷鍤民皆感動爭負土堵門城  
賴以不沒鄉民避水至渡以舟縋而入爲謀栖止捐金以賑水猶不減乃歷四境  
相地形疏溝洫隨時而涸是秋大熟方城爲治務竭心力如文廟城樓壇壝倉獄  
橋梁道路之屬靡不修治行部勞農採風謠清保甲信浹於民共相休息每坐堂  
一二人持牒前輒逆迎之曰若來爲某事片言立決或久坐無人則退集諸生課  
文指陳經義士蒸蒸蔚起十一年大計舉卓異部議以九年科場磨勘事降二級  
既解任上官不令歸延主錦江書院蜀士景附踰年病卒成都府李斗百率僚屬  
經紀其喪抗衾舉棺之役皆門弟子爲之訃至新繁無遠近皆哭數月不息方城

初考方志於新繁縣署東築三賢堂祀唐宋縣令李德裕王益邑人梅攀至是邑人奉方城主入祀焉所著書有燥吻集綠痕書屋詩彙劉傳子天錦天錦字有章以博學鴻詞薦辭不就乾隆十七年進士授廣東連山縣知縣兼署理搖同知民夷愛之連有銀穴曰海崗與廣西賀縣蕉木廠一山也廣西布政使惑人言欲踰界採銀於穴或勸天錦招商自利天錦曰聚衆起爭此異日大患也上言總督以穴不可開指畫其害甚切總督悟檄兩省巡道會定地界禁採穴者巡道某與知州歎曰真廉吏也天錦工詩古文著書甚富其一則連山縣志云廣東通志引朱士琇梅崖文集

廖冀亨 曾孫文錦 文錦子惟勳

廖冀亨福建永定人康熙二十九年舉人四十六年選授江蘇吳縣知縣是歲江南早有旨留漕賑饑吳縣截漕米三萬九千九百餘石冀亨以四十七年三月受事飢民待賑方亟而米已告罄得前令冒銷狀詳蘇州府請追弗許不得已貸銀購米二千餘石繼之是冬又饑十一月詔撥米施賑冀亨奉文設粥廠十有一領米二千七百石每廠日食數千人未一月米匱上言知府陳鵬年請益不可又自

貸銀五千餘兩易米以濟士人感其誠相率助賑以是無缺乏蘇省錢糧繁重甲天下吳縣尤多冀亨徵收不重火耗催科必用滾單民皆稱便知收漕弊重拘尤不法者治之無留難勒索蹋斛淋尖高颺重節諸害轄境有蘆洲在太湖中居民或墾成田或種蓮蓄魚利特厚地方官吏奉文丈量每假增糧名以自爲利冀亨曰天子富有四海歲蠲租億萬發賑億萬俯念民艱至悉也湖蕩偶爾成田未可久恃今特增其糧朝廷所得不過太倉一粟而爲累於民無盡期矣一無所問冀亨初莅任有吳人語之曰吳俗健訟但其人兩粥一飯肢體薄弱凡訟求少准速決更須加二字曰從寬冀亨悚然受之書諸廳事其收詞不立定期民情易達在吳三年非奸盜光棍行杖無過二十蓋守此六字箴也有庠生授徒鹽商家自刎死勘問得實將脫鹽商於罪或有謗其受賄者冀亨無所避卒脫之東山司巡檢報人二子弑父屠嫂未遂自盡冀亨方秉二燭閱其詞燭無風齊滅知有冤剋日往驗渡湖大風舟幾覆從者色變冀亨曰縣官伸冤理枉而來神必佑何懼焉須臾抵岸研訊半日得其父故殺狀巡檢得賄誣報俱論如律冀亨既有聲於吳他州縣疑獄往往令推治會有宜興縣知縣誣稟典史故勒平民爲盜因夾致死冀



亨奉檄按驗知縣爲總督噶禮舊友或語冀亨宜少假借冀亨不爲動既蒸檢踝骨無傷又密訪原稟皆誣據實詳報噶禮屢駁詰覆審再三卒如冀亨議冀亨以是見惡於總督時江蘇巡撫張伯行清節爲天下第一深契冀亨署布政使陳鵬年尤重之而噶禮不憚伯行惡鵬年尤甚四十九年鵬年被劾欲並及冀亨令藩司嚴查虧空皆有抵款五十年卽以有抵之款及民欠漕米奏劾奪職出署日惟青錢十九枚而已五十一年噶禮敗冀亨尋得旨開復原官以病不赴選及卒蘇人祀之百花書院曾孫文錦 文錦寄籍江蘇嘉定嘉慶十六年進士改翰林院庶吉士十九年散館授編修充國史館提調二十三年充順天鄉試同考官道光元年充江西鄉試副考官尋充文淵閣校理二年京察一等授河南南陽府知府護理南汝光道六年撤任改簡七年補衛輝府知府十四年卒於官文錦潔己愛民凡興利除弊務期實效數決疑獄所在仰若神明其在南陽也教匪初平禁令綦嚴有武生介居內鄉浙川間內鄉役瞰生富誣其佃農爲教匪詞連生以賂免浙川役又至亦捕其佃者數擾之鄉人不能平拒捕於是誣生爲逆首巡撫檄兩境會緝文錦馳至廉得實獄上議革釋大吏欲張其事咎之文錦曰殺人以媚上

吾不爲也卒如議有楊寡婦遺腹得子族人誣以不潔奪其田產契券逐出之控數年弗得直訴於文錦婦盛暑猶衣棉人咸目爲癡文錦察其言非癡詰之泣曰不遇青天不敢洩家計盡在是一不慎爲誑去更無據矣蓋其夫手記租賦出入在焉案驗悉符讞遂定及調衛輝嚴治代書唆訟終其任無敢犯者倡捐修試院整理崇本書院輯學規出俸錢給膏火生徒常百數十人又飭屬建義學三十餘所自是文教振興郡城外河渠久淤盛漲輒爲民害督縣疏治並濬延津任光屯溝渠不科民一錢農田悉成膏腴勸民植桑徧歷各邑親開諭之蠶事以興表章節孝逾千人創置義冢設施棺埋葬局曰性善堂病者藥之寒者衣之他惠政多類是二十三年府人舉祀名宦祠子惟勳 惟勳道光十三年進士改翰林院庶吉士十八年散館授編修時上命部院保外任人員惟勳與焉召見授貴州鎮遠府知府二十年兼署清江通判鎮遠故盜藪惟勳下車捕治其魁風少戢府南曰衛城澗水介兩城間山水所會陡注大王灘怒石激湍舟遇之輒碎惟勳募工鑿石濬其川而廣之始利舟行衛城地卑舊築土隄水漲恆決淹田廬惟勳易以沙石地瘠無桑麻購木棉子散民間數年徧山谷時巡撫患苗匪難治議裁土司而

撤其兵惟勦執不可曰苗性頑率有訟則向土司耳今裁之徒使睚眦登公堂且欲辨苗之爲匪非土司安從識哉土司多豪貲一旦激不測則傳匪以翼矣宜因有罪革其承襲使歸屬有司以漸汰之巡撫不聽旣而苗洵懼上聞敕督撫會議卒如惟勦言歷署思州銅仁都勻府事至有政聲二十七年舉卓異尋署貴西道二十八年還鎮遠二十九年調補貴陽府知府三十年以蜚語被劾上命學政翁同書按其事皆不實有旨開缺送部引見咸豐二年卒子壽豐官至浙江巡撫壽恆官至禮部尙書自有傳

### 陳汝咸

陳汝咸浙江鄞縣人幼隨父錫嘏講學證人社中黃宗羲謂人曰此程門之楊迪朱門之蔡沈也康熙三十年會試第一成進士改翰林院庶吉士散館出知福建漳浦縣漳浦劇邑多詞訟汝咸勸民親遜嚴懲訟師聽斷明決民莫敢欺有被訟者爲立期限令原告自召之一訊卽決縣中賦役故責戶長爲主辦丁糧版籍歲久混淆胥役因緣爲奸汝咸念編審爲賦役大政躬自覈算編糧均戶人丁各歸見在之籍定三百畝爲一戶令民具親供計丁口產業自封投納糧多者爲首行



滾單法以次輪催均保甲以三百家爲一保第其口多寡藉以供役五年一編丁而役法平吏胥陰撓之大吏幾爲所惑汝咸毅然不回條分縷析三年而法立奸人無所施其技民樂輸將歲賦無逋負閩俗信鬼賤醫病輒昇土木神卜藥以療往往不幸死汝咸厲禁之因曉以方證自制刀圭施濟貧病全活甚衆毀學宮伽藍祠凡陳眞晟周瑛高登諸儒之著作皆葺而表章之尤服膺黃道周之學東郊歸誠書院故道周講學所久爲僧據汝咸逐之而主以黃氏子孫漳浦有教堂男女羣聚茹蔬禮佛曰無爲教汝咸籍其居爲育嬰堂西洋天主教將開堂於漳且藉上官爲言汝咸不顧邑城隍廟功曹祠旁有鬼卒相傳能禍福人汝咸命毀其像修文廟造祭樂諸器又設義學在邑者一在雲霄銅山杜潯者三延諸生有學行者爲之師時會邑中士大夫及鄉之俊彥集明倫堂講經史性理諸書終日無倦又修朱子祠之在銅山雲霄者古田黃櫨有明錢忠介墓爲釐其墓田繪圖貽錢之子孫漳浦之俗遂如鄒魯邑俗每輕生多因細故服斷腸草挾死以圖財汝咸力懲其弊令當刑者掘草根贖罪出俸錢市草積堂下焚之革相驗陋規臨尸必反覆諦視以手指按雖作作謝弗及邑多虎捐貲令鄉民設虎牢復募善射者

伏強弩毒矢要之患頓息歲早朝夕步禱梁山絕頂之龍湫經涂數十里從者皆憊而汝咸無倦容甫下山卽雨人以爲精誠所感丁亥夏霖雨溪流泛溢高及雉堞民升屋而號汝咸急登城樓輿錢數十萬募船拯救又多爲木筏渡一人賞錢千好善者皆輿錢以助援登至數千人多方撫恤雖災不爲害有奸匪百餘人潛伏七里洞將入海發兵擊之走平和山中謀再至漳浦汝咸遣人密致賊黨林大札啖以重利誘擒首從曾睦蔣卿江貴等奸徒悉散復獲海賊徐容等十餘人得金寶悉以入藩庫容盜首也汝咸因詢賊中情形並剿撫機宜均得其要害乃條陳撫捕以靖海氛利商舶並請赦容以致餘黨諸盜遂陸續歸誠時南靖亦患盜大吏移汝咸治之縣民列狀請留不得各歸取田器塞縣門晝夜環守汝咸夜以兩騎疾走出門縣民覺追送十里許號泣而歸歸則構祠城北門名月湖書院歲時祀之汝咸之至南靖也深山逋盜咸相謂曰此漳浦陳公善治盜出沒必知之安所進顧其人長者自首必無患於是悉就撫汝咸開示威信頌聲大作四十八年內遷刑部主事旋擢廣西道監察御史上言商船出海口挂號無益又言海賊多陸居時返其家下海劫掠責之巡哨官未下海之蹤迹當責之本籍縣令請力

行各澳保甲上嘉納之海賊陳尙義乞降汝咸請入海往撫上以御史近臣不宜輕涉海命郎中雅奇偕汝咸所薦阮蔡生撫之卒降尙義及其黨百餘人五十二年擢通政司參議奉使入楚祭炎帝神農帝舜諸陵兼賚駐防士卒山路險峻營汛僻遠或謂可調官代給汝咸曰奉天子命何敢憚勞因簡從裹糧而行歷施州辰州永定九谿至紅苗界猺獠土官率男婦出迎帕首歌土音汝咸爲竹枝詞宣布上德使習而歌之因徧歷苗疆考其情形以籌撫馭之計使還遷鴻臚寺少卿尋遷大理寺少卿五十三年命赴甘肅賑荒汝咸不苟酒肉又慮窮鄉不能徧及日徒步行郊野時值厲疫病遂不起卒於固原之海都喇囊惟衣一襲錢一緡而已訃至漳浦士大夫及農工販豎奔哭於月湖書院數十日不絕復醵金置田春秋祀之初汝咸出大學士李光地之門光地以講學招來後進江陰楊名時邀汝咸同往汝咸曰梨洲教人頗泛濫諸家然意在博學詳說其究歸於戢山慎獨之旨初聞之似駁而實未嘗不醇今相國步趨朱子其言粹然矣然未知其躬行者何如也名時爲之瞿然著有兼山堂遺稿漳浦政略

蔣兆龍



蔣兆龍浙江鄞人四歲而孤依外家以成立甫就塾卽循循有規矩刻意勵行非禮不履康熙三十年進士補雲南浪穹縣知縣遷直隸保安州知州其爲政也以學道愛人爲先務民有爭訟反覆譬喻若家人訟者多內媿有吏進金求出人罪立杖而禡之吏乃驚相語以爲使君煦煦易與耳不料其難犯若此調湖廣歸州知州入爲刑部員外郎訊獄必再三詳審盡得其情乃比諸法人不能欺乃以貨請於其子無敢應者是時禁網疏闊公卿上下爭以奢靡相高京師游手之徒爭求爲官僚執役獨相約莫事蔣大夫補陝西平涼府知府值西陲用兵大將軍過平涼兆龍供應薄遂以買馬不稱被劾平涼民叩首於總督乞留不能得雨泣送之旣免歸尙令償馬直卒無以給日爲諸子講易及卒家無以治喪聞者哀之至

祖望齋詩集

佟國瓏

佟國瓏遼東人隸漢軍籍康熙三十年由筆帖式授山東文登縣知縣文登俗愚悍有勸尙嚴峻者國瓏曰爲政在誠心愛民興利除害化導之而已嚴峻非邑之福也邑副將某以暱妓蝕軍餉合營大譟夜半斬關出屯東郭國瓏聞變單騎往

諭曰吾與軍民同疾苦有冤當訴我何妄動衆猶洶洶國瓏當礮立曰吾不忍見爾曹族誅請先試若礮衆動色曰公廉明軍何敢犯然事已至此奈何國瓏爲力任保全再三覈其故得實縛妓扶之衆泣拜而散副將尋被劾去值歲饑奸民騷動國瓏歷村墟給賑撫諭捕治凶渠民賴以安邑豪宋某以鄰婦貸錢不償殺之吏役得賂皆爲豪掩又以千金賄國瓏國瓏怒覆驗婦有重傷鞫得其情置豪於法一邑肅然邑故瀕海副將林某縛商船之泊島嶼者數十人指爲寇國瓏訊釋之別捕誅真盜四十餘人旋陞山西澤州知州屬歲大祲發常平倉捐貸民剋期輸還無爽者又減耗羨革陋規平物價民情大悅國瓏常以論事迂太原知府某某族人誣揭之坐罷任州民鳴鐘鼓罷市欲詣闕旣而得旨畱原任民皆歡躍時平陽民變略同宰文登時巡撫檄國瓏以兵往國瓏曰是速之亂也復單騎馳赴民皆額手曰佟公至吾屬無慮矣乃安堵受撫捐廉修州城民感其德爲立生祠旋以疾引去攀號者聲震郊野雍正二年以舊屬高平令虧帑被逮責償萬金先是國瓏在澤州辦軍需數年未嘗以尺寸擾民至是澤民感念舊惠共捐五千金投州庫國瓏復竭舊產完之歸里後布衣蔬食裕如也乾隆三年聞兄喪悲慟遂

卒蔣士銓傳略

周中鋮

周中鋮字子振浙江山陰人國朝先正事略康熙中爲崇明縣丞崇明故重鎮坐甲千人欲豫取軍食於官不獲曹激穀刃官吏咸避匿中鋮獨挺身前宣布順逆成敗感切聳動衆皆投械散華亭縣缺江南督撫以中鋮名上召見奏對稱旨授華亭縣知縣胡天游所撰墓誌銘民有被誣殺人久繫獄中鋮立出之而坐其實殺人者提標兵庇盜前令莫敢問中鋮捕治置諸法先正事略境壤乂安康熙三年秋大霪雨以風胡撰墓誌海水驟溢漂數縣迺具衣糗棺槨救卹之又爲請振弛租四年以催科不及格罷縣民以萬數遮言上官聞於朝得復職時左都御史朱軾被命修海塘知中鋮賢悉以事付之塘成丁母憂民復籲留而世宗先已擢中鋮松江府知府至是予假治喪還視府事五年朝議濬淞婁諸水以中鋮署太倉州知州董其役六年二月築壩於陳家渡一再潰與千總陸某晝夜凌險指麾倉卒覆其舟旣卒而築合事聞賜祭葬贈太僕寺少卿先正事略廕一子入國子監胡撰墓誌當中鋮令華亭縣時奉賢猶隸境內其後析爲縣中鋮適爲知府至是民懷其澤奉中



鉞爲奉賢縣城隍之神歲時祈報著靈異長洲王芑孫爲廟碑紀其事道光七年江蘇巡撫陶澍復濬淞江以中鉞陰佑入奏奉旨立廟江干春秋致祭

### 劉繼聖

劉繼聖山東濰縣人歲貢生授直隸廣宗縣學訓導遷蠡縣教諭正己帥人士習丕變擢湖廣慈利縣知縣初滇逆之亂慈利被兵尤劇人民彫敝繼聖以寬爲政不輕用刑與民語常呼爲兒有一罪人被杖而呼繼聖蹙然曰兒再忍一板慈利人皆相傳戒毋犯法戚我爺也病癰將告上官求去民間之擁使者數輩皆不得往乃使其子荀明間道往竟得告民數萬詣上官乞留上官遣人視之實病乃謝罷民謁繼聖流涕爲吮癰曰信也奈何時流亡新集方編審戶口民請繼聖畢是役乃行慮代者之擾也及行費不給慈利人口出一錢以饋之凡數萬康熙四十四年卒於家

閻懷庭集

### 遲維坤

遲維坤漢軍正白旗人康熙中任山東聊城縣知縣月以三八日召諸生課文禮其賢者能者問政事得失歲以三七月巡行畎畝視田之荒易加賞罰焉額徵冊

有逋稅八百兩以問吏故無田主歲雜取它戶代之維坤言於大吏以新墾荒地補稅額代者悉免故事縣有役按戶徵夫吏緣以爲奸維坤令履畝出錢二改爲雇役上官下其法於它州縣御史嚴有犯者必痛治之縣常多賊陰倚捕役爲主維坤杖殺其桀黠者一人賊皆遠竄設櫃徵銀令納者自投其中耗羨無所取官府興作必如直給工匠錢又人與之食買器物一從市價商民頌之既卒祀名宦祠八旗通悉

### 黃世發

黃世發字成憲貴州印江縣人康熙三十五年舉人李塏恕谷集觀察黃公傳授直隸肅寧縣知縣性慈良質實畿輔通志引肅寧縣志於民財一無所取錢糧舊例加一二作耗銀世發亦收之而不自用肅寧舊雜派重畝派銀至三四錢世發悉除之縣有役事若修學校繕城垣之屬或上官別有攤派卽以耗銀應之河間府檄修府城親齎餼糧出銀錢僱役不日竣事不以擾社甲也李塏觀察黃公傳其視民如家人畿輔通志引肅寧縣志好教以生計李塏觀察黃公傳坑鹹荒地令穿井耕種沿城植桑柳數萬株凡水車蠶箔糞灌紡績諸務悉爲民籌畫畿輔通志引肅寧縣志復自闢

護城廢地穿池種稻以導示之夙講聖賢名理建置學社教民孝親敬長贖官田九十餘畝以其租爲學者膏火畿輔通志引肅寧縣志定三六九日集諸生講書會文士有自鄰封來學者雍正三年縣水災督撫遣官履勘世發不能得其意被劾去官肅寧士民號泣輓留特旨復官加四品服已又授按察使直隸營田觀察使令巡行直省勸民農桑爲善並察水利可興者世發夙耐勤苦居官糲米自養鷄鳴卽起批閱官書晝理庶事無頃刻暇蠡縣李塉嘗勸以少捐細碎世發曰吾何德與才而朝廷委任之吾惟知傭工免忝愧耳至是每至一處輒登高坐大聲宣諭士民徹日不倦民多興起李塉觀察黃公傳修隄墾田變汗下爲沃壤畿輔通志引肅寧縣志最後之易州水峪相一地開水田經營年餘未就而卒李塉觀察黃公傳遠近聞之莫不流涕畿輔通志引肅寧縣志

### 李發枝

李發枝浙江山陰人康熙二十六年進士授江蘇上海縣知縣上海於東南爲劇邑俗黠而悍好博筭競拳捷爲諸偷窟穴發枝始至廉得主名置其魁於法餘悉勸諭使去期以三月一至縣呈自新狀厲鶚樊榭山房集深州知州李公墓誌銘皆大感



悔無敢逞汪由敦李君墓誌銘有以衣杵擊人額致死者左證已具驗其傷痕纔一線  
囚辯不服發枝曰是易辨也折几足圍者墨其上擊白版痕亦如之獄遂定巡撫  
湯斌之斥五通神祠也上海城南有祠未毀民訴婦爲神所憑幾殆發枝詣祠命  
負婦至則指衣紅像迺立命夷祠斧像投於火崇遂絕厲鶚所撰墓誌銘邑人相驚  
以海寇至相率奔避城守將禁弗止汪由敦所撰墓誌銘發枝聞之視事如故間遣役  
出城諭民民見發枝弗爲動遂稍稍還密覘之則訛言因估舶鱗集也白關監督  
令事竣速去毋滋擾民乃安巡撫宋犖曰李令非獨治縣有譜其定變亦將才也  
將以治行第一薦會總督好畲弗善發枝劾罷之厲鶚所撰墓誌銘比去民走送者  
自縣門屬於黃浦潮水至且沒膝垂涕跪泥淖中不忍去發枝家居二十年世宗  
御極以薦起授直隸深州知州汪由敦所撰墓誌銘地稍僻一以安靜爲治舊有公使  
錢千緡發枝革除之曰奈何以吾民膏血飾廚傳耶先是直隸州縣賣官米買補  
從田分配發枝以其病民力言於上官上官又弗善發枝遂改教職授臨海縣教  
諭久之謝病歸發枝爲學以躬行爲先厲鶚所撰墓誌銘於天官河渠樂律農田兵  
賦諸政汪由敦所撰墓誌銘無不研究故用世之學尤精歷官皆有異績乾隆五年卒

爐規取西藏道出新津里甲擬各斂千金治供張如某年唐提督故事慶曾曰此成都東來第一驛也自此而西尙數千里新津或可辦彼荒徼下邑何以應命但多駕浮橋得疾渡圈曠地便下營此外求索知縣以身當之遂出境迎軍爲民請命詞意慷慨溫福感動嚴約束不久淹比至打箭爐皆無擾焉會理舊爲南詔會通府地荒江犖確領州者寄空名於土舍上資彈壓而已總督年羹堯於慶曾爲同歲進士會有夔州重慶二知府缺謂慶曾曰惟子擇之吾爲削牘慶曾辭曰十年外吏精已銷亡家有老母行且陳情不足辱厚意尋告歸六十年卒後數年而羹堯敗人以慶曾爲知幾竹墩沈氏家譜楊汝毅怡庭沈公傳

夏熙澤

夏熙澤江西新建人康熙三十九年進士出同考官竇克勤之門獲聞身心之學兼博覽史書求實用丁母憂服闋選授廣東增城縣知縣邑大水田疇成巨浸開倉發粟按行村落散米數千石更勸富人捐貸民以不困秋大熟民相率輸倉至冬缺三百餘石吏請追比不許出私錢貸償之陳道撰家傳聽訟之暇振興學校購書籍聘名師聚邑人子弟教之縣有靈山嶺復徑僻潛通七邑爲諸盜逋逃藪嘯

聚剽掠禽人民索金帛粟米出偽牒要贖熙澤與同城武弁謀曰俟報上官往返積旬日賊糧足守險益難奪出不意攻之兵法也我領敢死士先子繼之其可乃戎服佩刀帥衆夜發至山口武弁逡巡不敢進熙澤自分鄉兵爲二隊直搗賊巢賊聞鼓礮聲不辨衆寡皆犇散追殺十餘人生擒其魁男女被虜者悉奪以歸當是時武弁恐形其短不以白上官上官亦諱言用兵功抑不敘熙澤素清介凡上官胥吏婪索不一應百計中傷之旋以監斃盜犯多被劾罷時斃者十二人臬獄四府獄三皆歸獄於縣增城老幼皆太息泣下既歸僦屋讀書間出游歷名山大川訪異人逸士至老不倦卒年七十陳傳

### 陸師

陸師浙江歸安人康熙四十年進士授河南新安縣知縣既至修學校集諸生治經童子能應縣試者免其徭民興於學馬賊季國玉爲患久設方略捕誅之鹽使者下縣取鹽犯四十人師曰於律人鹽並獲始爲犯今勘犯止二人何濫爲丁父憂歸在塗有六七騎挾弓刀驅牛車載婦女三十餘人言此歸德飢民某將軍家買以歸者也師叱止之令官還婦女於其家白將軍收其騎卒或謂師已去官胡



忤將軍爲師曰知縣一日未出境忍以飢民婦女媚將軍耶服闋補江蘇儀徵縣日晨起判訟有神明稱有盜引民某自馳至某家見敗器滿道言有暴客食此不償值因而鬪毀詰其人狀與盜肖事遂白春徵先勸富戶輸旣徵卽以解秋則減其耗令自封投匱疫起出俸錢購藥施民故事上官往來驛夫臨時取給鋪戶倉卒滋擾師一切禁革但令戶日賦一錢歸驛商賈以安揚州五屬饑督撫下知府各以五千金糴穀借賑符旣下具舟車往則虛而歸師察知府意欲縣官借補所虧帑也親往力爭卒得請於是五縣皆得穀以振鹽商致例餽卻弗受商固請乃藉其入以修學宮作明倫堂具祭器樂舞浚泮池植桃李其上修宋文天祥祠又以其餘建倉廩潔治囹圄爲別屋以居女囚質庫書票故有月無日勿論久近皆取一月息師辭其歲餽令視它處月讓五日縣舊有豬稅領於知縣歲贏千金下令蠲除之課最奉行取民奔號上官請留弗得旣去乃畫像尸祝之比入對聖祖溫諭有加試制舉文一首取第一授吏部驗封司主事陞員外郎掌選有要人求官力持不可尋奉命督視山東卅務疏言開採無益罷其役還擢御史又命巡河讞獄均稱旨未幾河督陳鵬年奏請以師爲兗沂曹道有旨趣其行已得疾卒康

熙六十一年三月也年五十六師性孝友好讀書與方苞儲在文何焯張伯行友善著有集雲書屋采碧山堂玉屏山樵諸集祀兗州儀徵新安名宦祠 國朝先正事略

### 沈光榮

沈光榮漢軍正白旗人歲貢生考授七品筆帖式康熙四十年授河南河內縣知縣專務德化月朔望集城中居民宣講上諭翼日單騎歷郊野召鄉民徧戒之往復懇到聞者莫不感動徵科不用敲朴設盒酒花帛召諸里長令逋課者跪堂上斟酒進它里長之畢輸者飲之爲簪華被帛鼓吹導出中門由是輸者畢至有李家窪者地斥鹵多逋賦光榮爲引溝渠開稻田招流民復業給以牛種改名藏富邨遂成沃土民有訟令兩造要而來立剖決遣胥攝事按日給錢絲粟不得擾民時出奉錢行諸利益事夏設茶衢路冬施棉衣其病者藥之死而裸露者棺之三年去任八旗通志陞山西遼州知州甫下車卽詢民疾苦舊時州責供應於里老人按月輪派至有變產鬻子者光榮盡除之鹽法議未定商不至虧稅六百餘金自任之馭胥役嚴野無追呼及去民立碑以志遺愛山西通志卒後祀河南名宦祠八

張士琦

張士琦江蘇嘉定人舉人以文學知名大學士徐元文引入史館與修明史康熙四十一年選江西永新縣知縣前令故貪縱徵斂橫出土琦至革除溢徵銀三千餘兩米二千餘石捕逐豪右懲奸胥遇平民輒與溫語不輕箠一人月置酒召諸生考論德藝士民翕然居三年大饑士琦發倉以賑不足出私錢佐之縣西礮山有三邨者俗驍悍屢阻險爲盜前令時糾衆數百劫掠至縣城令犒以酒食散遣之而已士琦至爲設練長嚴立約束至是復聚衆強糴格鬪士琦禽其渠餘黨逸去遂列狀請兵鎮壓或言長官諱盜久矣遽以實聞如吏議何士琦曰拚一官絕民患吾甘之矣已而部議下士琦果以註誤去縣民聞其將去樹大旗城中央及四門以集衆集者數千人負土塞縣衙城門不啟罷市者半月相率詣南昌請大吏乞留士琦不省會聖祖南幸復集衆詣蘇州具章欲上不得達竟罷職新令至以士琦前發倉粟貧民未盡償不聽去民間設櫃釀金輸者畢集遂盡償之比歸餞送者塞衢巷或追至百里不絕五十八年復游京師得疾卒永新紀實



竇容遂

竇容遂河南柘城人父克勤翰林院檢討在儒林傳容遂康熙四十四年舉人候補中書遷兵部職方司主事王紱直隸忻州知州竇公墓誌銘雍正十一年授四川新寧縣知縣四川通志地荒僻百務凋敝且四年中七易令官茲土者視若傳舍莫可施爲容遂下車誓神曰令有不明惟神啟之令有不公惟神殛之邑民周公騰女爲張公拔冒婚奪去前令某殺周公騰於三木知府某陰爲護持獄幾寢容遂力爲昭雪某卒以濫刑敗有假總督差官者招搖耳目立縛其人盡法治之總督嘗語人曰若竇令者可謂不畏強禦矣創建宕渠書院置經籍立規條進邑中子弟教以立品制行卓然有所興起人比之文翁之化蜀又修邑乘葺學宮 王紱所撰墓誌銘一切道路橋梁及勸農掩骼諸事無不實心舉行四川通志考滿卓異擢山西應州知州距城西北三十里爲桑乾河所經流沙遷徙常阻方舟容遂相度形勢於白塘子建石橋繇亘三十餘丈小石口山水暴至築壩於三里河民賴以安以大學士陳世倌薦陞忻州直隸州乾隆十年秋忻及定襄旱經營振卹不遑寢食十一年夏又不雨爲文禱神立應州人立碑紀其事是年冬上幸五臺州當孔道承

辦大差及什物局事宜經緯井井咄嗟立辦民不知擾未幾乞病歸 王紱所撰墓誌銘四川通志主講朱陽書院築約守精舍無遠近皆來學十九年卒著有孝經管窺易卦箴二思編經學省身編敬義堂文集王紱所撰墓誌銘

余甸

余甸福建福清人康熙四十五年進士生平以名義爲己任福建巡撫張伯行延主講鼇峯書院每咨事焉郡守周某將登白簡以丁艱去疑甸排己後甸知四川江津縣周適補本郡守有基心甸不爲動攜一僕赴任早起坐堂皇民投牒者不以屬吏單辭立決訟爲清簡日與諸生誦說文字疏解性理所徵賦卽儲庫中纖毫不入私室周廉其實亦加敬焉時青海用兵四川巡撫年羹堯多額外急征檄再三至甸不應乃遣內丁持印文告諭自朝至日晡甸不出使者譁甸立坐堂命反接衆相視莫敢動甸怒乃共推曳伏之地甸投六籤丞簿皆曲跽爲請士民集堂下數千人耆老數十人升堂蔽使者爲之告哀曰公何難棄一官但我民自今無怙恃矣望哀赤子無依寬使者汝久之乃命釋縛羈候越日使者介衆索原文甸曰還報大人我閉門待劾原文已間道付二三執友矣遠近驚駭聲震京師羹

堯曰此民所戴也斥之傷衆心不去百城玩令會行取遂以旬應擢吏部考功司主事既莅任事必躬親出入封緘其室自佩鑰時尙書張鵬翮素稱剛直侍郎湯右曾聰明辨察事有不合者旬每會議必直前爭辯盈廷愕然終不能屈主選三年權要富人請託者多爲所格長官亦陰患其戇間紕其議旬怒求退甚力吏胥私語求進者曰請少待此君將去必可得也旬聞之乃條列文書已駁議而未奏者十餘事曰此皆作姦巧法易爲所蒙者必上聞吾乃去長官許諾始探懷出告歸牒遂歸旋丁父憂既免喪猶廬墓陳鵬年嘗歎今世無豪傑及趨死不顧利害者侍郎方苞以旬告及鵬年總督東河薦旬爲濟寧道士民間旬至訟獄者爭赴之幾奪臬司柄久之巡撫及按使有秕政亦赴愬於旬旬刺得其情反覆申列必得當乃止鵬年卒齊蘇勒繼爲督以工事劾旬會巡工至旬所部父老結綵手炷香稽首舟前請登岸受萬民拜擁肩輿至廣原升高座聚者萬餘人四面環拜投香於地高丈許齊聲呼曰還我余公當萬世尸祝齊蘇勒大驚慰諭之衆皆涕泣曰吾民愚非得實據不敢退齊蘇勒許拜疏出矢言衆乃散世宗聞之召旬入見退語執政曰朕又得一直臣矣特授山東按察使旬以地近聖人居崇禮教輕



刑罰因有不能白衣食者酌取商人歲餽三之一以資之其他公用委有司注籍  
逾年入爲順天府府丞坐失察事除名歸年七十有二卒旬剛方清簡以儒術節  
吏治直聲震天下文章書法亦冠一時歿後所歷官地父老聞之皆羣聚哭奠焉

清史列傳 卷七十五

循吏傳二

閻堯熙

閻堯熙字涑陽河南夏邑人祖籍山西太原康熙四十五年進士五十二年除直隸藁城縣知縣邑濱滹沱河常以秋浸溢爲築隄建木椿數千以捍其衝夾岸植柳以固之水不爲患雍正元年調南宮縣未幾擢晉州知州州瀕河河失故道蕩析民居請設法安集民免河患者來謝扶攜老稚相屬於道堯熙曰聖恩我何與令望闕拜復念遠來給百錢以資裹糧散錢十萬民益感激泣下曰眞父母也怡賢親王奉使過晉聞其名奏循良第一授山東青州府知府未之官改授浙江嘉興府俗健訟良懦不得直府訟批縣或不理狡黠者益無忌堯熙始至日判狀三百比對簿自請息者二百餘庭折數十得豪民張某狡黠狀杖殺之民謹然稱快府賦重吏胥因緣爲奸民完如額官不知民亦不自知前官累以缺賦課殿去堯熙巡行清理民始知額歲無逋賦海鹽縣塘工不就總督李衛欲開引河堯熙言

滷水入內河田畝皆傷非特壞廬舍糜帑金也議遂罷營弁緝私鹽縱其梟持他人抵罪堯熙言其誣總督不聽庭爭再三總督乃自勘釋獄愈賢堯熙累遷湖北按察使前政深刻堯熙至務生全不苛擢四川布政使成都當康熙時兵燹未久人稀穀賤故滿兵願得銀雍正以後生聚多穀貴又願得穀或徇其意請於朝令民受銀購穀給兵而漢兵亦欲仿行堯熙不可督兵爭之堯熙曰滿兵例不出城文字言語與漢殊故代之購漢兵募自民間父子兄弟皆民也奚不自購而煩代購乎督兵語塞事遂止堯熙質直好面折人過雖上官不少假然宅心光大勇於從善初至成都聞錢價貴榜平其直以成都知府王時翔言立毀榜又總督議徙涼州駐防兵於成都拓滿洲城堯熙與時翔按圖籍力爭止之語皆在時翔傳中乾隆七年卒劉紹攷九畹集

魏嶮

魏嶮畿輔詩傳直隸南樂人太學題名碑康熙四十五年進士五十四年授浙江錢塘縣知縣縣附藩事至劇吏易爲姦嶮下車先潔已罷民間供應曩時相沿如倉胥供署中食米屠僧供肉江步供薪廬戶供魚之類一旦盡革之晨夜治簿書斷理



獄訟無留牘無遁情減正賦耗羨諭民以時輸租民爭相勸輸勿累縣官課遂稱最故時徵漕主倉吏饋官千金嘖嘆曰無故捐多金非人情其姦不待問也自止於倉親評米高下令納者自操量畢徵吏無私焉杭駐防旗丁多不戢市物薄予之直挑婦女於道民病之前官以非所隸不致詰嘖至輒移所司論罪遂相戒勿敢犯海塘歲修不貲時議有欲令民出家財佐公者令紳士爲倡嘖請曰浙士皆無貲且此例一開貽患無窮事遂寢縣志閱八十年不修嘖開館搜輯成書三十六卷五十七年自劾去官時勢豪與民爭墓田上官右豪嘖不自得力求去無以爲辭迺以庫貯前官所補金微惡及民輸錢之當易銀者未盡納二事坐虧空免百姓籲留者數千人或持金代償上官意亦悔奏復原官嘖堅不起雍正九年卒

抱經堂集有鋤經山房稿一卷且齋草四卷畿輔詩傳

### 趙之鶴

趙之鶴奉天正白旗人康熙四十六年由四川納谿縣知縣擢濟寧州知州州有稅課局額不及千兩吏以術數倍征之之鶴悉爲裁革物少不及稅則者免其徵四十八年秋大雨水城中挈舟往來西城外南北瀦爲大澤之鶴爲開水道發土

得故溝命工增鑿之故溝見於元李謙爲冀德方去思頌謂迹訪故渠而爲之者其始作更在元以前舊矣於是爲橫溝一縱溝南北各一凡三溝達諸西門之外更立約每歲先夏啟治之今州無壅水之患之鶴力也阮氏衣冠族有世英者獨爲竊其母求斃之絕後禍察其色甚恐爲委曲開誨世英頓首堂下痛哭負其母歸卒爲良民回民文朗號虎頭魚淫暴鄉里則令荷校死州人快之州時屬兗州府兗之山繭衣被天下民資以爲業者衆有權貴人出巨資爲壟斷之鶴百方爲求免事獲已民爲堞像築生祠於南門外之鶴毀像而以其屋爲濟陽會館又潛立木主或刻像於石祀之在州十九年雍正二年州陞爲直隸州上官謂之鶴不勝任降補堂邑知縣去之日百姓挈壺跣拜號泣送者以萬數之鶴爲墮淚自朝至暮始達康莊驛至汶上爲鬱結不能食遂有疾至阿城卒之鶴之自汶上發也汶上人送者復數千怪問之皆曰吾邑知縣虐使吾民聞濟寧州善政愧而效爲之今亦爲好官故吾邑人無不戴德也祗平居士集濟寧州志

陳惠榮

陳惠榮直隸安州人爲諸生時與博野尹會一切劇正學有經世之志康熙五十

一年成進士六十一年授湖北枝江縣知縣修百里洲隄以息水患請除解餉入川雜派民無擾累雍正三年遷貴州黔西州知州丁父憂歸服闋署威寧府知府未幾威寧改州陞大定爲府以惠榮移補焉烏蒙土司叛東川鎮雄附之上官檄惠榮赴威寧防守城西陴傾圮聚民間米桶實土石累丈餘上加雉堞不終日而功成賊離城三十里縱火牛光燄燭天惠榮督士卒晝夜備禦賊不敢逼總兵哈元生援兵至賊乃遁尋丁母憂服除署江西廣饒九南道督潯陽大孤兩關宿弊盡革乾隆元年擢貴州按察使疏言古州吏目葉封印江縣典史章秉惠均以疏脫重犯越獄題革覆准獨貴定縣典史倪永吉部覆照有獄官例止予虛革前後互異無以示勸懲且府司則有司獄州縣則有典史吏目若司獄爲專管獄官典史吏目爲兼管獄官是覈轉衙門有專管之員承審衙門反無專管之員於設官制律之本意均有未協請處分酌歸平允監獄照例責成上是之飭部議行時苗疆新定方駐師歸興屯經略張廣泗以威重鎮服用法嚴峻二年貴陽大火惠榮入見廣泗曰天意如此當設誠修省苗亦人也可盡殺乎廣泗大感動申戒諸將吏如惠榮言四年署布政使以黔地瘠薄宜勸民務本計疏言黔省山多水足可



以疏土成田惟小民艱覓工本不能變瘠爲腴至於山土荒棄尤多流民思墾輒見撓阻桑條肥沃亦不知蠶繅之法自非牧民者有以經營而勸率之利不可得而興也今就鄰省雇募種棉織布飼蠶紡績之人擇地試種設局教習轉相倣效可以有成應將上游責成貴西道下游責成貴東道屯軍責成古州道俾之因地制宜隨時設教則一年必有規模三年漸著成效矣疏入得旨允行六年又奏陳課民樹杉得六萬餘株諭曰覽之欣悅蠶桑樹藝爲政之本所當時時留心教民務本足用之道均不外此七年貴筑貴陽開州威寧餘慶施秉各縣具報墾田至三萬六千畝種桑飼蠶秩然就緒復開野蠶山場百餘所比戶機杼聲相聞惠榮據以入告諭曰此等事論之似迂行之甚難若果妥協辦理則實有益於農民其勉爲之前後疏九上皆蒙嘉獎復繕城垣恤流民給孤老益囚食修拓黌舍進諸生勸以爲己之學自立志始士風爲之不變十一年陞安徽布政使適鳳潁水災田廬漂沒急請發倉賑恤流移得以安集十二年卒於官

謝濟世

謝濟世廣西全州人康熙五十一年進士選庶吉士散館授檢討雍正四年轉浙

江道監察御史時上御門許科道直前奏事濟世露章言三事世宗霽顏問云何對曰一錢法一鹽法上曰錢法大難朕方籌畫已又奏劾河南巡撫田文鏡貪贖不法狀上顧諭曰彼號能臣朕方倚任爾無惑浮言還其奏衍石齋記事彙濟世伏不起爭益力上怒付法司鞫問梅莊雜著尙書勵杜訥命刑訊問指使何人濟世曰孔孟問何故則曰讀孔孟書自當忠諫見奸弗擊非忠也奏上議大辟得旨免死令往阿爾泰軍前效力先正事略濟世在軍臺平郡王及公大臣博爾屯伯大臣欽拜皆遇以殊禮欽拜則北面稱弟子夸藍大以下受業者不可更僕數平郡王命嗣王從受業會得二獵犬擬進奉濟世曰進犬非王事孰若進一二賢臣王顧嗣王曰侍御良言真古人箴規之義不可忽也謝庭瑜撰小傳居三年上念效力諸臣以問振武將軍將軍劾濟世注大學誹謗程朱奏進其書廷議又謂有諷刺語卽戍所下獄論死上復宥之尋準噶爾擾邊徙濟世察翰麥糧餉營已又徙無量臺營已又徙鄂爾坤營衍石齋紀事彙高宗登極召還復補江南監察御史同上以母老乞外補小傳得旨授湖南督糧道衍石齋紀事彙善化知縣樊德貽衡陽知縣李澎巡撫許容心腹也其徵糧浮收皆倍蓰濟世易服爲鄉民廉得實乃捕澎丁役

揭參德貽皆格不行詣許容面陳狀詞過激容恚甚反列款糾濟世於是湖南士民揭帖訟冤有旨交總督孫家淦會鞠濟世解任以岳常澧道倉德代時布政使張璨按察使王玠鍛鍊成獄謂所訪衡陽事皆虛而長沙知府張琳原詳稍徵寔與劾疏歧適玠擢四川布政使過岳州手致璨書於倉德請密易原詳倉德不可慮撻衆忌遂以書呈總督總漕總督寢其事總漕移牒都察院左都御史劉統勳上之御史胡定采民謠以聞上命侍郎阿里袞馳讞至則士民數千人戴香迎馬首跪稱冤盡得朋謀傾陷誣罔周內狀力爲平反坐許容及藩臬守令皆革職總督亦免官濟世得雪李元度撰事略改授鹽驛道以老病休致家居十有二年卒濟世在塞外九年得究心聖經尤精易理所著易在曾進御覽又著有匱匱十經及以學居業集史評纂言內外篇離騷解西北域記小傳

葉新

葉新浙江金華人康熙五十一年順天舉人從蠡縣李塏受業立日譜稽核功過尤嚴義利之辨雍正五年就吏部揀選往四川試知縣既署理華陽縣事尋補仁壽民或與隣縣爭地界當會勘鄉保因閹人以賄請新怒悉下之獄勘畢歸各按



其罪由是吏民悉斂手奉法八年署嘉定州知州州故有沒水田多逋稅新視曠土可耕者召民墾闢以新科抵稅額逋稅悉免仁壽奉旨采木匠人倚官爲暴民弗堪糾衆相抗縣令以變告新馳至訊匠頭及首糾衆者一人竝治之釋餘數百人  
人不問上官以爲才有疑獄輒令往讞多所平反十二年遷邛州知州乾隆元年再遷夔州府同知署龍安及成都府知府又署瀘州知州瀘俗好訟初至案牘委積新日坐堂上訟者至立剖決誣罔者杖遣之旬餘獄事大減及百日遂無留獄  
七年署順慶府知府遷雅州丁母憂歸服除授江西建昌府知府以簡靜爲治先教諭而後刑罰修盱江書院招引文學之士復南城黃孝子祠以厲民俗十三年南豐縣知縣報縣民饒令德謀反請窮治令德好拳勇知縣以風聞遣役往偵誤探其讎謂謀反有據遂逮令德適它往乃逮其弟繫縣獄令德歸自詣縣訊以重刑遂誣服雜引親故及鄰境知識爲同謀知縣遽移檄追捕蔓贛撫二府新得報集諸囚親鞫時株連者已七十餘人言人人殊新大疑詰縣役捕令德弟狀役言初至令德家獲一篋疑有金寶匿之及發視無所有則棄之野知縣聞意篋有反迹訊以刑遂妄稱發篋得簿笥納賄毀之矣令謂實然遂逼令德俾服也新於是

盡釋七十餘人繹具命隨往南昌戒之曰有一逋者吾代汝死矣及至七十餘人則皆在謁巡撫具道所以巡撫愕不信集才能吏令會勘益雜逮治諸所牽引卒無據然不可卒解先是巡撫得報時遽上奏命兩江總督委官卽讞新爲一一剖解得白所全活三百許人十七年調贛州府有贛縣民搶奪拒捕案新依故例擬發邊充軍時新例已改本條爲斬決院司欲以改例擬新謂事在例前爭之不得復以寧都民獄事與同官持異同不得直遂謝事閉門候代上官慰諭再三不從遂以任性被議免歸家居十餘年卒魯仕驥所撰狀

### 施昭庭

施昭庭江蘇吳縣人康熙五十四年進士授江西萬載縣知縣縣險僻多山有客民自閩粵來居之累數十年積三萬餘人號曰棚民溫尙貴者臺灣逸盜也其黨亦散處山中爲拳勇師與棚民往來雍正元年福建移捕盜黨急尙貴度不免謀爲變始昭庭之至也以棚民爲慮縣人易廉野富而才昭庭厚禮之使交於棚民而偵其所爲廉野大積粟貸棚民還不取息或免償如是者數年棚民大悅棚民之才者嚴林生羅老滿數從廉野游盡得山中要領尙貴將舉事召棚民廉野以

聞於縣昭庭集勇敢三百人卽以林生老滿統之爲要約以待棚民多受廉野恩不忍往從尙貴然往者猶數百人尙貴有衆二千大掠山林間時三月十三日也昭庭謂林生老滿曰賊易破也然吾慮賊或擾旁近縣旁近縣無備若使向萬載破之必矣會得賊諜四人厚撫之使告尙貴曰萬載人盡逃城虛可唾手得也賊遂決意向萬載乃張疑兵伏諸山徑中時鳴鼓譟樹大旗見旂或連擊數十馬相踉蹌或蕪草若炊煙賊疑不敢入遂由官道來而棚民多受林生老滿計使趨捷者數十人分曹持兵伏叢棘中賊過突躍大呼擊賊賊驚走輒追殺之伏數發賊疑駭欲卻又懼棚民之踵其後也於是濡被爲盾以進昭庭望見笑曰彼已懾矣使火槍二十餘迭擊之一戰獲尙貴尙貴起二日而敗又二日而撫營兵至初棚民嘗入市欺市人人積畏之尙貴叛道路洶洶指棚民昭庭謂林生老滿曰撫營至必搜山吾負棚民奈何吾以免死帖與諸降者汝及今趣棚民具不從賊結狀來其免乎兵至果搜山如昭庭計不戮一人巡撫初到官張其事入奏旣見君申文不合使請於總督查弼納欲改之昭庭曰吾不忍迫棚民使畔而殺之以爲功也不可改巡撫乃檄君謂棚民匿盜已久又從亂罪皆死今雖赦之必驅歸



本籍昭庭乃使人徧諭棚民無恐而請於督撫曰棚民者閩粵之貧人耳來居山中種麻自給以席爲屋故曰棚民非刀手老瓜賊之比也歷年多生齒衆與居民間有爭訐皆細故不足深懲今日之亂由臺灣逸盜不關棚民而探賊動止離賊黨羽誘賊就縛悉資棚民力請覈戶口編保甲列齊民泯其主客之形寬其衣食之路長治久安於計便查弼納許之巡撫尋亦悟如昭庭策棚民乃安事聞世宗臨朝諭九卿曰知縣以數年心力辦賊巡撫到官幾日豈得有其功耶獨下總督疏交部議敍以主事知州用昭庭尋引疾歸後十餘年卒於家錢儀吉撰事狀

### 劉士銘

劉士銘直隸宛平人康熙五十六年舉人六十一年授山西聞喜縣知縣聞喜故劇邑會政弛吏偷逋賦累歲而催科急民益大困士銘至則召縣之父老謂曰令拙於催科而民賦不輸是欲見令拙也應與父老約行滾單法何如滾單法者縣出單書賦戶名先甲次乙甲受單輸賦畢而單至乙乙受輸之如甲以次及於一縣賦戶畢然後上單於令者也父老則頓首曰如約於是士銘爲畫催租役於單首行之如法國賦歲入民無謗者又縣故有市集所在迴遠盜賊竊發爲買遷患

士銘令改市適中之所民大便利盜賊亦罷去民爲立祠祀之歷攝臨汾蒲州解州雍正六年擢太原府同知兼攝和平定州尋授朔平府知府朔平地連北邊蒙古部人與民相雜處而郡又新設民屬府而蒙古人隸都統戲下訟輒牽掣號難治士銘謁都統與之談讌極歡曰某奉命來從公偕治天子人誓不得畫彼此界自是蒙古人或暴恣士銘立柱決之久之帖然而民賴以安八年七月以母憂當罷有旨在任守制士銘力請反葬而後赴職許之乾隆三年父歿去官兩喪六年服闋補湖北安陸府知府楚俗悍詐獄成則抵罪而情或不實士銘苦心讞鞫多所平反漢江在府城西上去襄陽七百里下去沔陽七百里水自北來徑石城西南與大江合自石城下抵蔡家橋灣由馬公洲小河口以達於南河迴折三百餘里土人謂之紅廟隄最要害在昔石城遠近湖港支分用洩水勢其後日以堙塞而捍水者獨特隄隄不固則風日霖夕一蟻所盜千里爲壑士銘躬親相視滲漉與役夫同甘苦其課工視引錐穿土毫髮不損乃已郡人喜曰我公不寐我民安睡矣會孫家淦總督兩湖疏請調士銘知荊州士銘曰某得荊州人以美官賀豈此間有所利耶問府四關有東中西北徵稅處卽令曰商賈自入庭中投所稅錢

於積役是土者不得與又問駐防兵丁糧餉故事自府支給所在州縣歲當輸南米二十餘萬石上府卽令諸邑曰至期悉以米來不得他有所代令兵丁曰月至府支餉二日支糧三日至期一如所支各罷去諸邑或請曰公若少通自便亦以便人士銘曰人之不便某任其咎通則何敢乎人以是服其清間攝理事同知事或有姦其姊之女而殺其夫者事已私解士銘訪按確實立置之法有兵丁在校場用火槍誤殺五人律不抵罪士銘驗得鉛子於屍中訊得故殺狀抵之士銘於所事雖非其專任未嘗苟也十四年春奉特命赴四川辦理臺站及金川平而還十五年八月授本省驛傳鹽法道各省鹽價皆畫一獨湖廣無定式士銘始令商毋二價且時取市中權秤親爲較其斤兩輕重毋多取民利十六年三月以所轄驛站遲誤公事劾去初士銘之被劾也同官有軋大吏以去者繼至者疑士銘主使之輒撫細故以劾士銘且欲窮治其他事以聞卒無所得旣而以士銘在荊州十年於是更使蹤跡之亦無狀所使者走謁士銘曰公誠賢者然上官使某蹤跡公無所得某無以報請公自書一二事告我士銘曰某不肖不敢不自愛惟憶爲齏使令節受商人花鐙數物此破吾檢耳卽書款付之所使以反命上官默然及



按驛站所遲誤者在江南與士銘無與人曰何不白之士銘曰某服官三十年今以此釋負載可矣遂歸三十年卒

### 莊亨陽

莊亨陽福建南靖人康熙五十七年進士知山東濰縣母就養卒於塗歸而廬墓三年自是未嘗一日離其父父既沒講學漳江乾隆初元禮部尙書楊名時薦士七人亨陽與焉授國子監助教當是時上方嚮用儒術尙書楊名時孫家淦大學士趙國麟咸以耆壽名德領太學事相與倡明正學陶植邦彥六堂之長則亨陽與安溪官獻瑤無錫蔡德晉等皆一時之儔每朔望謁夫子釋菜禮畢登講座六堂中國子生以次執經質疑旬日則六堂師分占一經各於其齋會講南北學絃誦之聲夜分不絕都下號爲四賢五君子遷吏部主事外補德安府同知擢知徐州府徐仍歲水災亨陽相川澤諮耆民具方略請廣開上游水道以洩盛漲且告石林可危未及施工而石林決沛縣城將潰民逃竄亨陽駕輕舸行告父老曰太守來爾民何往親率衆堵築七日夜城完在徐三年兩遇大荒勤賑事至廢眠食九年遷按察司副使分巡淮徐海道亨陽通算及董河防推究高深測量之宜上

書當路大略謂淮徐水患在壅毛城鋪而徐州壞壅天然減水壩而鳳穎泗壞壅車邏昭關等壩而淮揚之上下河皆壞宜開毛城鋪以注洪澤湖則徐州之患息開天然壩以注高寶諸湖則上江之患息開三壩以注興鹽之澤則高寶之患息開范公隄以注之海則興鹽泰諸州之患息當路者未能用頗違其言故事京察大臣當自陳高宗命自陳者各舉一人自代內閣學士李清植舉亨陽時論以爲允勘淮海災過勞以羸疾卒卒之日淮海諸氓罷市奔走樹幟哭而投賻亨陽少時執業於李光地光地甚重之鄂爾泰陳元龍嘗問士於方苞苞首言亨陽鄂爾泰使亨陽同官達意欲令其來見至再三亨陽曰吾往見是慕勢也相國何用見此等人將命者以告鄂爾泰瞿然曰吾非敢安坐而相招也願吾非公事未嘗一出內城恐時人以爲疑吾平生惡勢交若以老諸生視我則不妨顧我矣亨陽始入見志相得後終不再至訥親巡江南監司皆鞞袴跪迎亨陽獨長揖訥責問曰非敢惜此膝於公其如會典所無何訥默然亨陽出巡屬吏餽殺烝弗拒曰物已烹飪卻之是暴天物而違人情也所從僕皆自飲其馬或犒之蹠而辭曰公視奴輩如兒子不告而受於心不安告之必命辭是仍虛君惠也強之皆伏地誓指其

心其感人如此

葉左寬

葉左寬江蘇長洲人康熙五十九年舉人授山西定襄縣知縣通達政體悉民隱滌煩苛不假胥吏故事辦而民不擾雍正八年陞沁州知州署潞安府知府除無名諸稅復四門集以便商民民大懷畏歷權平陽太原治行爲山西最以十二年卓異引見賜蟒服擢浙江紹興府知府紹興有情民格殺士衆譁將罷試左寬在三江聞飛騎至數言剖解試如初尋調金華府東陽縣飢民求賑者萬計左寬曰按冊施賑是賑冊非賑民也乃召飢者前注名於冊而撻其二人衆乃定二人者一婦人曾以訟至官服華服至是易敝衣乞賑左寬識之令褫其敝衣內華服如故一男子容甚澤令飲阜茨汁嘔出酒肉衆驚服冒賑者潛散去在金華三年多善政擢杭嘉湖道旣去人爲立祠遇其生日張燈合樂以祀有武人自沁州來者言沁州亦有祠曾於左寬生日過其地祭獻者擁馬首不能行是時左寬去沁已數歲矣旋調金衢嚴道衢州地高西安龍游諸縣素築壩蓄水溉田木商入山者私開壩行水日涸左寬嚴禁之民皆稱便八年移寧紹台道釐關政修戰艦親巡



外洋雖遠必至紹興水蕭山諸暨民多挾衆詣縣求食巡撫惡之不欲賑左寬曰某來時民飢幾欲死何忍坐視其填溝壑耶繼以泣請巡撫心惻聞於朝遂得賑左寬以待饑而賑常不及因議修復紹之鑑湖寧之廣德湖用資灌溉會去官乃止著浙東水利書冀後有行之者丁父憂歸遂不出卒於家

沈起元

沈起元江蘇太倉州人父受宏歲貢生起元中康熙六十年進士改翰林院庶吉士以父病乞歸終養入京雍正四年未散館授吏部驗封司員外郎尋兼考功時嚴六部缺主之禁不自首者死直隸學政缺主事發起元爭曰學政衡文缺主不能舞弊與六部不同宜減死爲流從之五年以知府指分福建權福州府調攝興化莆田有黃陳二姓爭訟久不決結黨互毆上官慮釀禍將悉捕治之起元責兩人而釋其餘報曰釁由主者懲之畢矣餘不足問也巡撫常安委攝海關關役與洋船歲有例獻各數千金起元並革之巡撫有家奴守關阻二十餘船欲浮收糖稅起元立督收稅如額放船行而白其事常安召家奴切責之常安去代者詢常奴贓狀起元不對強之則曰但悉常撫任內革除浮稅四千他非所知也總督高

其倬奏開南洋已貼黃曉示有旨禁內地商人羈留外國其倬猶豫命商人戚里具原船往回結起元曰此法立將一船不得行其倬問故起元曰出洋者生死疾病無常數貨物利鈍無常期豈內地戚里所能逆料者苟無出洋之示商無怨也今商造船者費若干製貨者費若干忽以結狀相黷商必怨且走南洋者須北風今立春已半月儻結狀來北風不來彼失業商聚集廈門或爲盜賊害將何已其倬曰然則如何起元曰但令出洋商自具狀以三年爲期過期不聽回籍卽以此狀咨部足矣故事驗放商船爲興泉永道及泉防同知洋船人數多寡視梁頭大小民懼納稅大輒報小及出口船不得行乃求增船夫同知啟督撫時起元攝道篆曰此啟誤矣船夫工部所定督撫不能增勢必咨請部示從此駁詰不已奈何俄而衆商具牒願自掉船免增船夫同知不可起元曰南風起矣衆商懼不得行故爲此請再固執必生他變同知不得已驗放之船中商果已集無賴袖瓦石將堵公門當是時微起元幾不測督撫聞之嘉獎者再時史貽直奉使至閩以牧守第一薦攝臺灣府臺灣賦重上則一甲收穀八石中六石下四石視內地加數倍然向多隱占不甚困時丈量法行占者不得匿高其倬語起元曰欲使臺田悉按

同安下則起賦但恐不及故額致部駁奈何起元曰此事籌之熟矣宜令著籍田且仍舊額重者均於新額之上賦不虧而民不病其倬以爲然及至臺會大風壞海船廬舍人民多漂溺起元單騎按視振濟流民多所全活而按察使潘體豐中以他事部議降四級用蓋同安縣民有冤獄潘不能察獄成起元直其冤故銜之也旋引疾歸高宗純皇帝御極召入京授江西驛鹽道乾隆二年授河南按察使河南多盜半由流丐起元檄州縣遞送回籍盜案頓減夏大水災被四十六縣飢民四走布政使欲闌之起元曰民飢且死奈何禁他徙惟州縣有被水者安插流民給以口糧俾勿出境可矣屬吏報鹽梟拒捕傷人已而獲二十餘人法皆當斬訊之自四五人外餘皆飢民起元請於巡撫雅爾圖斬三人而成其二餘杖遣而已舊例命案凶犯未獲令州縣於三月內結報是仇是盜有司欲避處分輒含混具結得凶後則牽合附會以符前結起元詳巡撫具摺請免得旨允行雅爾圖令府州各立書院屬起元總其事起元以教士當先實行頒鄉賢陳瑚敬怠日程自大梁書院始進諸生示以省身克己之學覈其程而差等焉又請立章善坊令諸州縣舉孝子悌弟義夫貞婦登其名並採訪事實著章善錄刊行之七年遷直隸



布政使直隸政煩吏猾號難治起元至事無鉅細悉由手定又絕鹽綱之例餽卻庫封之羨餘省州縣解項之苛駁寬盜案三月之率結八年夏旱時總督高斌方自江南視河工還起元迎於途議賑事斌欲遲至仲冬起元曰飢民朝不謀夕豈能久待請先普賑一月再查戶口分別加賑斌愠曰必如此爾自奏之起元出語清河道方觀承曰普賑萬不可緩時之安危民之生死於此決矣觀承入言於斌卒從起元請所屬有倡言賑戶不賑口者嚴斥之災民俱得實惠時戶部尙書海望奏清查直隸旗地有司違限奉旨嚴飭高斌命起元劾數州縣以自解起元不可曰旗地非旦夕可清州縣方災何暇了此必欲劾官請自藩司始九年轉光祿寺卿並稽察右翼宗學京職事較簡暇則鍵戶著書於周易尤邃其說以彖象文言繫辭乃孔子所作離孔子而別有推闡均失其宗也十一年上幸五臺十二年幸木蘭十三年巡狩山東起元皆扈從旋以事干部議降一級調用十四年乞假歸二十二年上南巡起元接駕賜緞匹墨刻二十七年上南巡再賜緞匹諭曰爾年老在家休養不必常來伺候二十八年九月卒年七十九著有周易孔義集說二十卷敬亭文藁九卷詩藁八卷唐詩鑰一卷古學錄四卷古文八卷詩四卷起

元自少覃心理學謂學須知行合一從五倫起張伯行李紱皆其座主也張主朱李主陸王起元則謂孔門弟子自顏曾外入門各異同歸於聞道今但守定經書實實做人不必高言做聖尤嚴義利之辨自爲諸生不妄取一非義之物及由郡守歷藩司十五年未嘗置屋一椽田一畝所至深求利弊次第酌行之心切愛民而以寧靜不擾爲主歸田後授徒自給晚歲杜門日誦先儒書病中猶手鈔明道語錄臨終語人曰生平學力無住手處年來日夕檢點身心仰不愧俯不作或庶幾焉嘉慶九年題祀鄉賢祠

翁運標

翁運標浙江餘姚人雍正元年進士初授河南桐柏縣知縣多惠政民爲建生祠乾隆八年知湖南武陵誅左道莫少康釋其被誘者有兄弟爭田親勘之坐田野中忽自掩涕訟者驚問之曰吾兄弟日相依及來武陵吾兄已不及見今見汝兄弟偶思吾兄故悲耳語未終訟者亦感泣以其田互讓乃中分之又有兄弟爭產父歿弟以其兄爲父養子分以瘠壤使別居其兄控訴狀中有父嗜酒得疾語運標怒其暴親過笞之仍斥其弟割腴田以畀兄有子證父竊人金拘其父婉詰之

終不加刑曰脫有誣天性之恩絕矣請姑俟後廉得其實果黑夜爲他人攫去而其子誤以爲父也唐氏子聘張氏女兩姓皆貧不能婚乃鬻女運標出資贖女召唐氏子婚焉有重囚亡命匿衡州人業織者家此人故不知情大府下檄索之急囚逸去運標令此人導役往捕卒得囚竟不坐主者鄧康二姓爭湖洲利鬪殺積數十年久不服運標親往勘其地會大雨二姓人皆請少避運標曰爾輩爲一塊土世世罹重法不顧予何愛此身乎植立雨中逾時堅不去遂皆感動劃界息訟邑東長樂村有江隄久圯民屢遭水患德山石塔明提學董其昌建亦就頽形家言頗以爲病邑又無書院借設僧舍運標次第修建不數月而工胥成十年歲大旱運標芒屨草笠步禱於百二十里之龍門洞窮日夜始至以瓶汲水歸就郊壇跪烈日中膝盡腫邑人哭請息運標不可七日而雨歲大豐民間繪龍門禱雨圖歌詠其事旋擢道州知州州路通郴桂山徑險峭運標捐俸修鑿八十餘里皆成坦途會大疫爲文牒城隍願以身代民親製方藥行施村落間或有以傳染戒者運標曰我民父母也子弟病忍不一顧耶年六十以勞瘁卒於官祀道州武陵名宦祠運標性至孝甫三歲其父赴廣西夜泊祁陽之新塘失所在舟人報其家並



返其行篋扇鎖如故失其鑰遂與兄運槐招魂葬父比成進士悲不得父骨誓與兄往尋刺臂血禱諸神徧走湖南萬山中兩歲無所遇洄溯衡永間又半載一日泊新塘遇士人鄭海還者言三十年前葦間有溺屍佩小鑰囊瘞之白沙洲存鑰囊爲誌乃遣人證鑰於家啟篋膈合遂號泣舁柩歸於原瘞處留封樹焉及運標令武陵復於洲建祠曰永思又立啟鑰亭買祭田命鄭氏世董之遷道州過祠展墓哀感路人視祁陽紳民如故舊時人競傳翁氏兩孝子云

朱宏仁

朱宏仁直隸清豐人雍正元年進士五年授山東昌樂知縣時吏治頗尙嚴急而宏仁持大體多寬政其折獄務情實不輕笞人人無不得其意以去催科吏未嘗至里舍歲終稅不滿出俸銀充之異時商民歲出官使錢悉免耗羨三分去一鄉士大夫間有餽遺無所受父老有獻瓜菜者受之坐之堂下賜以食問歲豐歉及民間所疾苦又時出循行鄉社民有取婦生子者勞以壺酒在官四年民大和悅以誑誤去官民間立生祠久之復以事適縣民相率持一錢飯滿盂逆之境數十里不絕也懷庭集

蔣祝

蔣祝浙江仁和人雍正元年進士改翰林院庶吉士散館授行人司行人父疾乞養歸父服除以知州發直隸用署樂亭縣知縣釐積案千餘國朝先正事略乾隆十二年授晉州知州興農桑濬河渠嚴保甲事無不舉民白某習邪教祝曰不治則滋蔓蔓而圖之難矣遣數十人縛以來寘之獄使人開諭之白悔泣卒爲良民州濱滹沱河歲葺隄於隄上徧植柳數年成陰民呼蔣公柳總督方觀承薦於朝引見賜朝衣一襲會蝗起自都門還州禱八蜡廟蝗皆南去其飛蔽河土人爭爲詩歌紀之勒諸石畿輔通志陞永昌府同知有土司頗猷法單騎入苗洞曉以大義苗大戢會它苗蠢動境內卒帖然它府民避賊至厚撫之賊退而民不忍去署永昌府知府爲置義倉或曰攝守乃不憚勞如是祝曰苟利於民奚問攝爲會夏旱民賴倉穀得食乃大服銅廠有羨餘悉籍以歸公上官入覲嘗舉祝以對上稱爲真廉吏久之引疾歸家居有直隸雲南民數十人送衣物至仁和縣庭曰蔣公去官時不受饋遺吾儕戴其德請以歸諸其家浙江大吏異之爲作圖紀其事先正事略

陳慶門

陳慶門陝西盩厔人雍正元年進士從鄆人王心敬講明體達用之學養親不仕有終焉之志母王趣之乃謁選七年補安徽廬江縣知縣以文廟規制未備倡輸銀六千餘兩修建大濬城濠置義田二百畝有奇瞻養熒獨立社倉四所積穀以貸貧民又以平疇藝稻高阜率成廢壤因市牛具仿北方種植法躬督墾闢遂享其利尋署無爲州事州瀕江上下二百里率當水衝前人築頭二三四壩常沒於水慶門沿流測量深淺於鮑魚橋鮑魚口二處役夫千人樹椿編竹實土爲坦坡取碎石築之水渟沙淤久而成洲民免墊溺之患又署六安州事州舊有水塘議者謀改爲田將絕灌溉之利慶門力言於上官事得寢十一年陞補亳州知州亳俗多不逞倚蠹役表裏爲奸慶門廉得其魁黨數百人杖遣之悍俗一變訟牒山積仿古置鄉約使之宣導排解坐堂皇自辰至酉判決日數十事不數月澆風漸息瀕湖多窪下地督加挑濬水歸其壑田獲有秋尋丁母憂歸乾隆元年服闋以大臣薦補四川達州知州境環萬山歲常苦旱爲購旱稻種導民樹藝達鄰巴州桑柘素饒乃買桑徧植教民以分繭縑絲諸法獲利與巴州等時川東多流民官廩不給遂釐剔腴田之被隱占者爲義產以贍之全活甚衆又建宣漢書院聘名



師教授文風漸振未幾乞病歸著有仕學一貫錄

### 紀達宜

紀達宜直隸文安人雍正元年進士畿輔通志授湖北黃陂縣知縣俗雕悍多姦民好剽劫爭訟達宜強教而悅安之時甫更赦令羣盜在案者餘黨七十人渠魁三人主坐二人餘皆置勿問達宜傳集庭下反覆開諭令改行爲良民羣盜皆感動悲泣有自愬不爲鄉里所容者無以營生故流離匪竊達宜卽爲傳諭保甲長聽其居住自新咸流涕去竟任無一人爲盜者初受訟牒日三百紙率多翻舊爲新達宜剖析無遁情羣驚以爲神自是講張之幻頓息會詔覈天下墾荒田額州縣以多報爲能達宜獨無所上曰官以足額邀功則民以加科受害磽瘠奇零且登畝籍他日按冊徵輸民不堪命卒至流亡究於國賦何裨乃白上官言今之報墾本於昔之報荒黃陂故是狹鄉昔旣無地報荒今復有何田報墾上官不能奪也然亦以此奇之屬容美土司占長陽民田民訟之縣土人抗不就理反虜數十人以去達宜奉總督檄往勘單騎之荊州先移書諭之其酋懼卽還所虜數十人誘罪土目並案犯解送聽勘諭如律與定界而還土司由是斂跡達宜沈敏有大略

不肯隨人俯仰義所可否卽確然不移糧道某誣劾罷之會大學士邁柱爲總督直其枉復原官再補浙江瑞安縣温州知府某復以私憾百計扼之適以令黃陂時疏解流人降調去然後已其在瑞安也有丈田之役議者欲派費於新灘畝四錢民苦不均而弓手算手所用皆外募人又不悉田中曲折徒供官吏乾沒而弓算手亦私有取受意爲增減輿論皆不能平達宜曰瑞安之事當與瑞安人共之此圖彼社交丈互勘弓算皆用土人董率責之紳土壤址相錯則耳目難欺儕輩相監則譏評莫掩址段可得真形田糧可知實數隱占詭寄弊何由生丈勘一定戶給田單收執此百年之利也乃召紳士耆民告之此意莫不翕然樂從事且願畝出銀二分爲清丈費無煩復派新灘上其事總督總督以爲然而知府某多方沮之卒格不行達宜旣去官家居跌宕文史無復仕進之意十年冬詔選名行經術之士充太學官孫嘉淦鄂爾奇疏薦召對授國子監助教遷宗人府主事所著詩曰繭甕集八卷陳儀撰傳

謝仲坑

謝仲坑廣東陽春人雍正元年舉人登明通榜初任長寧教諭阮元廣東通志陞授

湖南常寧縣知縣下車署聯宅門峻卻餽遺遇履勘至鄉自裹行糧至嚼生萊菔供饌月兩課士兢兢以節行相勸勉調平江再調衡陽以代李澎澎徵漕米浮收斛面糧儲道謝濟世發其奸澎與濟世並免戶部侍郎阿里袞奉命使湖廣訊狀事急澎盡出其賄贈簿籍以脅上官阿里袞重興大獄欲出澎浮收罪與濟世俱復官仲坑重治澎丁役乃以決罰過當被劾罷官明年特起爲衡山知縣李元度撰謝仲坑傳以巴陵審案撫臬互奏奉命引見陞荊州通判又以歸州縱盜寃良案堅不會印特旨召對擢常德同知歷知襄陽寶慶宜昌武昌永順岳州永州七府署永郴桂道仕楚三十餘年所至興利除弊潔已愛民尤長於折獄明析秋毫案無留牘民有謝青天之日大僚倚重廣東通志檄翰湖南北大獄二百餘案多所平反肇慶府志其巴陵歸州桂陽命盜三案至棄官爭枉直直聲聞於朝謳歌浹於野廣東通志解組日貧如故府志卒民以神明事之通志著有耳溪文稿山餘堂詩集

楚南紀略廣東通志

### 王時翔

王時翔江南鎮洋人爲諸生博學能文雍正六年州人沈起元官興化知府奉詔



當薦士以時翔應引見授福建晉江縣知縣時世宗以福建吏治頽廢遣使按視倉庫盡更諸守令新治者頗尙操切晉江民好訟前官以擊斷爲治而訟益繁時翔至曰此吾赤子也忍以盜賊視乎縱解苛政坐堂皇响响作家人語曲直旣判呼兩造前令釋忿相對揖罷去由是訟者日衰觀風整俗使劉師恕按泉州委時翔鞠疑獄二十餘事輒報可語人曰時翔長者決獄又何精敏也尋爲知府所嫉調政和知縣晉江民乞留不得縣有平糶米六千石代者以虧耗不受衆譁曰前官飲此閒一杯水安所得錢補耗米請各出錢買米納價如額十日而事集治政和誅劇盜懲訟蠹引諸生講學尋調甌寧擢漳州府同知駐南勝南勝山箐深奧民族居崗中鬪者輒百千爲黨手兵械抗官吏莫敢詰有賴唱者其黨犯法捕治糾衆奪之與諸賴萬人匿險自固時翔馳檄示以利害親入山山中人聞時翔至夾道跪族長帥諸賴迎謁時翔謂曰汝諸賴萬人奈何庇一賴而以死殉之爲我縛唱來卽無事矣諸賴唯而退唱不得已自縛出遂繫以還治如律自是崗民帖然歲除繫囚數人許暫歸已而如期悉詣獄瀨子阮民葉揚扇亂時翔謂緩之可一紙定矣或張其事聞於大吏遂奉檄入山剿之事平意不自得乃乞歸乾隆元

年以薦起蒲州府同知特詔遷成都府知府以廉率屬爲政持大體善審機要錢價騰布政使榜平其直市人皆譁時翔方請假謂成都華陽二令曰市直當順民情抑之錢閉不出奈何二令言於布政徹其榜錢價尋平總督欲徙涼州兵於成都議拓滿洲城當奪民居二千家時翔考故牘請於布政使曰成都滿洲城故容駐防兵三千見兵一千五百尙虛其半但出駐兵所侵地足矣毋庸拓也乃止已而涼州兵亦不果徙七年江南湖廣災巡撫奏請運蜀米四十萬石濟之報可已而湖廣急米委屬吏領運而江南獨無巡撫檄州縣餽運舳艫蔽江商賈不通成都薪炭俱絕時翔謂江南運可緩而徒病蜀甚無謂力言於巡撫請獨運楚而聽商人自運江南則公私兩便巡撫不聽江運卒行吏民重困在官屢雪疑獄闔府稱神九年卒於官疾亟猶召成都華陽二令入內問獄事口爲定讞而瞑年七十

敬亭文集

### 藍鼎元

藍鼎元福建漳浦人少孤力學通達治體嘗觀海廈門泛舟過浙江舟山乘風而南沿南澳海門歸自謂此行多所得人莫能測也儀封張伯行撫閩表章洛閩之

學獨禮鼎元及蔡世遠嘗曰藍生經世之良材吾道之羽翼也康熙六十年朱一貴叛臺灣鼎元從兄南澳鎮總兵廷珍統師進討以鼎元從大海風濤浩沔不測軍事旁午草檄數十紙搖筆立就七日臺灣平復從廷珍招降人殄遺孽撫流民綏番社歲餘始返著論曰臺灣地數千里其民數百萬守土之官有道府縣令大小丞尉又有總兵官副參游守弁日額兵七千有奇糧儲器甲舟車足備顧承平日久上下玩愒兵有名而無實民逸居而無教官吏皆以爲利藪本實先撥賊未至而衆心離雖欲不敗不可得已曩者臺地祇府治百餘里鳳山諸羅皆毒惡瘴地令其邑者不敢至今則南盡耶嶠北窮淡水雞籠以上千五百里人民趨若鶩矣曩者大山之麓野番嗜殺人莫能近今則羣入深山雜耕番地甚者傀儡內山臺灣山後蛤子難崇爰卑南覓等社亦有漢人至其地與之貿易生聚日繁漸廓漸遠雖厲禁不能止也郡治有水陸兵五千餘足供調遣鳳山南路以四五百里山海要區民番錯雜之所並淡水耶嶠盜賊出沒之地而委之一營八百九十名之兵固已難矣諸羅地千餘里淡水守備僻處天末自八里岔以下尙八九百里下加冬笨港斗六門半線皆奸宄縱橫之區沿海岸口皆當防汛戍守近山又有



野番出沒以險阻叢雜之邊地而委之北路一營八百九十名之兵聚不足以及遠散不足以樹威今請劃諸羅縣地而兩之於半線以上更設一縣管轄六百里其錢糧合之番餉歲徵銀九千餘兩草萊一闢貢賦日增數年間巍然大邑也半線縣治設一守備兵五百淡水八里岔設一巡檢佐半線之所不及羅漢門故賊藪宜設一千總兵三百駐其地使千餘里聲息相通又擇實心任事之官爲臺民培元氣大兵大疫而後民之悴憊極矣然土沃而物產多化導整肅均賦役平獄訟設義學興教化獎孝弟力田之彥行保甲民兵之法聽開墾以盡地力建城池以資守禦一年民氣靜二年疆圉固三年禮讓興化生番爲熟番熟番爲人民而全臺不久安長治吾不信也夫土地有日闢無日蹙經營疆理則爲戶口貢賦之區廢置空虛則爲盜賊倡亂之所臺灣山高地肥最利墾闢利之所在人所必趨不歸之民則歸之番與賊即使內賊不生野番不作寇自外來將有日本荷蘭之患不可不早爲措置者也又言臺鎮必不可移駐澎湖哨船更卒繚斗旋兵必不可易大吏采其言奏聞其後諸羅遂分置一縣曰彰化且建鎮於臺灣矣鼎元復爲臺灣道條上十九事曰信賞罰懲訟師除草竊治客民禁惡俗儆吏胥革規例

崇節儉正婚嫁興學校修武備嚴守禦教樹畜寬租賦行墾田復官莊恤澎民撫土番招生番時頗違其言雍正元年以選拔貢太學三年校書內廷分修大清一統志六年以大學士朱軾薦召對奏時務六事凡五千餘言世宗善之授廣東普寧縣知縣在官有惠政聽斷如神暇則與邑士之秀者講明正學風俗丕變旋攝潮陽縣事潮陽連歲大饑多逋賦鼎元揭榜告民減耗米除苛累民爭趨納妖女林妙貴惑衆置於法籍其居爲棉陽書院尋忤監司褫職或勸其委蛇以紓禍鼎元曰吾嘗涉大海歷澎臺出沒驚濤間冒矢石深入窮筭觸惡瘴毒霧不稍懼今肯頰首媚監司哉總督鄂彌達疏白鼎元受誣狀徵詣闕明年命署廣州府知府抵官一月卒鼎元善治盜及訟師多置耳目劾捕不少恕然治獄多所平反論者以爲如杜延年嚴而不殘著有鹿洲初集二十卷東征集六卷平臺紀略一卷棉陽學準五卷鹿洲公案二卷

童華

童華浙江山陰人雍正初入貲得知縣時方纂律例大學士朱軾薦其才世宗召見命察賑直隸樂亭盧龍兩縣報饑口不實華倍增其數怡賢親王與朱軾治營

田水利至永平問灤河形勢華對甚晰王器之尋補平山縣邑災不待報遽出倉粟七千石貸民擢知真定府權按察使以前發粟事部議免官特詔原之怡賢親王奏以華理京南局水利華度真定府城外得泉十八疏爲渠溉田六百畝先後營田三百餘頃上磁州計板開閘議略云滏陽河發源磁州前州民欲擅其利旣建東西兩閘復於東閘下建第三閘以束之每遇三月後八月前三閘盡閉永年曲周思涓滴不可得因磁地屬豫莫能控制經怡賢親王奏請改磁州歸直隸廣平府滏陽一河全屬直隸磁州西閘在西門外十二里之槐樹村閘有七洞每洞下板八每板以地畝尺一尺三寸爲度積水至六板卽分注溝渠至八板而各田充足請自二月三十以後將閘板全下月開放六次放閘之法水底留板六水面去板二使本地之溝水常滿而下游之餘波不絕旣不遏水以病隣亦不竭上以益下東閘在城東二十里之琉璃鎮閘有一洞下板十三每板以一尺爲度使與西閘同日啟放放閘之法水底留板九水面留板四每啟閘時視水與板平卽止五日一啟至東閘下十五里地名閻家淺州人建有第三閘地勢低欄河收束水難下灌應飭拆毀此仿唐李泌明湯紹恩西湖三江兩閘計板放水之遺規庶可



息永磁官民之爭矣華又以北人不食稻請發錢買水田穀運通倉省漕費民得市稷黍以爲食王爲奏請上從之調知蘇州府時有詔清查康熙五十一年以來江蘇負課千二百餘萬巡撫督責急速捕追比無虛日華固請寬之巡撫怒曰汝敢逆旨耶對曰華非逆旨乃遵旨也皇上知有積欠不命嚴追而命清查正欲晰其來歷查其委曲或在官或在役或在民或應徵或應免了然分曉奏請聖裁詔書意也今奉行者絕不顧名思義徒以十五年積欠立求完納是暴征非清查也今請寬三月限當部居別白分牒以報巡撫從其請乃量釋獄繫千餘人次第造冊請奏時朝廷亦聞江南清查不善下詔嚴飭如華言浙江總督李衛嘗取人於蘇華以無牒不與衛怒爲蜚語以聞世宗召見華責以沽名干譽對曰臣竭力爲國近沽名實心爲民近干譽上意解發往陝西以知府用時鄂爾泰屯田肅州華署肅州佐鑿通九家窰五山引水穿渠溉田萬畝復忤巡撫被劾歸旋卒著有銅政條議等書

魯淑

魯淑字靜陶江西新城人雍正八年進士授浙江泰順縣知縣積能調黃巖縣黃

巖故劇邑財賦甲浙東諸郡東南瀕海總兵鎮之軍民雜處奸宄時出沒其間淑至調和文武以飭風紀勵廉隅爲先邑有項貞婦貧無以活割俸資之歲時存問其他問民利病興革惟所欲斷決訟獄如神明歲大稔請賑於藩司不許乃直請總督得許而後已邑有八閘宋朱文公所建歲久湮廢訪其故蹟復之民號爲魯公閘嘗丈田均賦雖劇寒甚暑必親泣吏不敢欺爭端以息以積勞得疾民皆走禱於神卒之日巷哭城內外皆縞素有善繪者各以意圖其像或以規諸孤有象額者眉者兩顴者復醮金爲祠四時祀之

### 金溶

金溶順天大興人雍正八年進士分刑部授江蘇司主事歷員外郎中乾隆元年充貴州鄉試考官旋擢山東道監察御史畿輔通志繼協理京畿道巡濟寧漕盧文

昭撰一齋金公家傳性忠純梗亮嶷嶷自立會上詔求直言袁枚小倉山房文集溶上培

養元氣疏其略曰臣聞國之所恃者民民之所賴者養是以有天下子萬民者其道必以遂其所欲給其所求爲最急家苟寧矣國亦固焉人苟遂矣君亦泰焉是則好生以及物者乃自生之方施安以及人者乃自安之術民於今日生齒日益

繁費用日益廣財之流也不見其充財之用也常苦其誦養生之累深而有生之樂寡救死之念切而畏法之情輕京師者天下士民之所樂趨也今反殷實不及於前時規模大減於夙昔推之各省抑可知已陛下臨御以來綸綍之宣無非國計綱紀之布俱關民生以箴諫爲國華以謙沖爲治本當此時而富實不登治化未洽追懷前修實用內熱此臣反覆思維而願直陳於聖主之前也比者天災流行亦甚頻矣乾隆三年陝西地震爲害甚鉅四年河南山東咸被水災今茲浙江福建湖北之地亦有淹浸之患從來外吏之弊揣悅意者則侈其言度惡聞者則小其事災異之來得達九重之上者慮未必盡實幸而實矣而蠲賑之下逮者慮未必無遺故與其補苴於已然之後不若保護於未然之前書曰制治於未亂保邦於未危已亂已危則無及也故今日所當務者在乎培養元氣臣愚所見及者六事具陳於左惟陛下裁察一曰開荒之地免其升科二曰帶徵之項宜加豁免三曰守令殿最必以民事四曰關稅額外免報盈餘五曰京師鋪面門稅請免徵收六曰積誠以感召和氣凡千餘言辭多不載末復言昔我聖祖仁皇帝道冠古今澤被無窮所以養民生之元氣而繇無疆之休者固可行之萬世而無弊我世



宗憲皇帝遺詔內云凡各衙門條例有從前本嚴而朕改易從寬者此從前部臣定議未協朕與廷臣悉心斟酌而後更定以垂永久者也應照更定之例行若從前之例本寬而朕改易從嚴者此乃整飭人心風俗之計原欲暫行於一時俟諸弊革除之後仍可酌復舊章此朕本意也向後遇此等事則再加斟酌若有仍照舊例者仍照舊例行夫張而不弛文武不能也弛而不張文武弗爲也一張一弛文武之道也則所以爲國計久長者其意可深長思矣時翰林科道輪日奏陳經史溶首以易益彖傳損下益上之說進謂務鳩歛以裕籩積之積者匹夫之富也務寬惠以成盈寧之象者天子之富也損下益上上固益矣卦不名益而名損則知下損上亦損矣損上益下上固損矣卦不名損而名益則知下益上亦益矣八年湖廣總督孫嘉淦以事被議奉旨派修順義城工溶上疏言向來臣工有罪於應得處分外間令出貲效力者緣其在任之日素無清名但撓其職不足蔽辜是以罰令出貲效力使天下曉然知所得者究不能爲子孫身家之計明以開急公贖罪之條默以寓禁暴止貪之意孫嘉淦歷任以來操守不苟久在聖明洞照之中今亦令其出貲效力似於用罰之本意有所未協且使天下督撫聞之謂如嘉

淦之清廉尙不免於議罰恐一不得當而已卽踵其後將必墮其廉隅以豫爲將來之地是一賞罰之行卽天下風聲之樹不可不慎也疏上部議革職九年二月復原官旋命往福建以道員用十年授漳州府知府漳俗强悍好訟胥役多至千餘人黨類盤據各上司衙門勢力出長官上藏納姦人多耳目偵伺捕之卒不可得溶至汰去有違犯者數百人盧文昭一齋金公家傳有吳成者設局誘羣少年淫博積十數年事未發溶具得其蹤跡乘夜開門出召徼循三四輩執銀鐺突入其家禽治之合城歡呼袁枚小倉山房文集一監生有罪請褫革上司不許溶知吏人實爲之奧援不具官文書而自爲稟以申上乃始得請盧文昭一齋金公家傳龍溪縣有華封村去縣二百餘里納租赴愬皆不便康熙中知府某請設縣丞移駐其地督撫批准及溶至已四十餘年尙未具奏詢其故以設官則縣吏之司徵者失權利故爲所格也溶再具詳督撫又已許諾適司藩者代去藩吏役乘間議駁文書不下府而徑行縣溶聞之大怒嚴訊縣吏得其交通阻撓狀乃詳請治罪而設丞封村親往營度無敢梗者袁枚小倉山房文集府城內舊有河歲久爲民屋所占溶察其阻水道者撤去之稍侵岸旁地而猶不礙者令出貲輸官以爲疏濬費不踰年舊渠

以復地氣疏泄舟楫無阻於是修文廟樂器選俊秀教以樂舞新芝山丹霞兩書院籌其脩脯膏火學業大起釐名宦鄉賢之合祀典者約其行誼功績各書於神位親率其後人而致祭教之以無忝乃祖行鄉飲酒禮擇鄉先生致仕工部主事王材以爲大賓跪荷械者於門外禮畢諭罪人使知愧悔而量減其罰賓興之禮廢久矣溶始復之明燕王之變漳州教授陳思賢與諸生六人殉於明倫堂舊有專祠廢爲民居溶令民納地價因其貲改建於芝山書院之旁並以明末黃道周合祠焉盧文昭一齋金公家傳十三年春旱米貴上司檄平糶溶計府縣所儲俱十六萬石去新穀登場時尙遠慮其不繼乃先勸有穀之家出三萬石以糶又給印紙令商人赴糶於足穀之處又請弛臺灣米入內地之禁並開倉出糶而羣穀畢集至六月雨降米價頓減民情帖然袁枚小倉山房文集其聽訟也息牽連速審斷又慮言語不通而譯者移易其輕重也書牘以示其人懸牌以諭於衆皆可爲來者法十四年授臺灣道丁母憂二十一年赴陝西辦理軍需補驛鹽道復丁父憂二十九年補浙江督糧道歷署福建汀州府陝西潼商道延綏道浙江寧紹台道陝西按察使布政使三十二年休致四十二年卒盧文昭金公家傳



朱懋德

朱懋德江蘇靖江人雍正九年授直隸完縣知縣時方大稔躬歷鄉村盡發社倉穀以貸其民以出借過多奪俸七年勿悔也縣故多旗圈地佃民各附近開墾業主思奪之懋德亟言於上官請以圈餘墾熟之田許民自首悉依例升科而田則歸民執業一時首墾者至千餘頃勢要無如何也縣歲辦蘋婆果解京申牘請咨部免其役縣志久殘缺獨修輯之調長垣鋤強扶弱豪右爲之斂跡境有太行隄隄生芟歲折徵解南河銀一千兩繼荆龍決口淹隄草不生而額解之項自在累及原戶子孫懋德復請豁免焉遠公書院膏火田五百八十畝爲有力者所占爲贖回之歲收其租延師課生童以興文教未幾爲知府所誣罷職事尋白謁選得山東夏津縣知縣邑被災悉發倉儲減價出糶復詳免牛稅以勸耕徵糧舊有合勺之零官吏藉以取盈懋德蠲除之著爲例調長清察民所苦在辦解京之闊布雇運糧之腳費勒於碑盡除其累後長清復稔賑例發米同僚憚於撥運欲代以銀懋德昌言曰飢民得銀不及得米之半何惜費而不惜民遂撥米一萬二千餘石賴以存活者數萬人久之引疾歸

牛運震

牛運震山東滋陽人雍正十一年進士十三年詔舉博學鴻詞巡撫岳濬以運震應廷試以文逾格報罷尋授甘肅秦安縣知縣開九渠溉田萬畝縣北玉鐘峽山崩塞河河水溢爲災運震率丁夫併夜開濬凡兩日夜水退而民安復緣山步行以錢米給災戶縣聚曰西固去治二百餘里村民苦輸糧費多積逋運震許民以銀代納閭閻悅服自是無梗化者先是巡檢某誣馬得才兄弟五人爲盜前令弗察得才自刎死其兄馬都上控令又誘而斃之獄其三人者將解府運震鞫得情昭雪之又清水縣某令寃武生杜其陶父子謀殺罪上官檄運震覆治驗死者得自刎狀以移屍罪其陶因釋其子官秦安八年惠農通商以經術飾吏治設隴川書院日與諸生講習民始知學兼攝徽縣縣多虎募壯士殺虎二十六道始通及自徽歸秦安遇白額虎當道從者股栗運震叱之虎帖耳去人作馴虎圖傳其事旋調平番縣值歲饑捐粟二百石賑之民感其惠人輸一錢製衣銘德運震受衣返幣固原兵變大肆剽掠督撫皆至平涼檄招運震問方略運震請勿以兵往但調隊遙爲聲援亂將自定游擊任某執城內三百餘人衆恟懼運震請釋無辜者

入城慰諭斬首亂者三人餘予監禁杖責反側遂安上官咸異其才忌之者乃撫前受民衣事劾奏免官紳耆留主皋蘭書院教學得士心及歸有走千里送至灞橋者運震性開敏有斷制居官不延幕友事雖鉤棘輒自治不問家人生產嘗與弟書曰吾本非長才不過殫精竭慮極吾耳目所能而出之以至誠將之以小心事無不治保甲嚴行禁令漸張鬪爭獄訟日卽於少至於責士過嚴懲盜過甚以邊鄙之地風俗疵悍不如此則法不立令不行民不可得而治且當官治民要通盤籌算與其輕刑十人而不足不如重處一人而九人畏是懲一而恕九也又與人書曰爲縣官有三字一曰儉薄於自奉量入爲出此不虧帑不婪贓之本也一曰簡令繁則民難遵體冗則下難近一切反之毋苛碎毋拘執毋受陋規毋信俗諱儀從可減減之案牘可省省之當無日不與百姓相見而詢其苦樂惟求一切便民雖舉世笑我以黃老吾不易也一曰檢天有理人有情吏部有處分上司有考課豪強在國將吾伺奸吏在衙將吾欺入一錢乙諸簡期勿納賄施一杖榜諸冊期勿濫刑今日居官吾倉庫不畏後任明日還鄉吾心迹可白友朋時以爲名言年五十三卒著有空山堂易解四卷春秋傳十二卷金石圖二卷史論二十卷



空山堂文集十一卷

邵大業

邵大業字在中順天大興人祖籍浙江餘姚雍正十一年進士乾隆元年授湖北黃陂縣知縣初到官投訟牒者數百人不移晷決遣立盡有爭產者兄弟皆頌白絕相類令以鏡鏡面問曰類乎曰類則進與爲家人語絕痛曰吾新喪弟獨不得如爾二人白首相保也言之嗚咽各相視涕泣罷去縣有溪環城蛟雨溪漲破隄嚙城城壞勢且潰大業卽壞處泣拜誓以殉水爲驟止拯溺舖飢完毀岸築民隄民得無以水死旱禱不應爲文告城隍神雨立沛總督宗室德霈以其名聞會丁父憂去服闋署河南開封府同知收土惡號木耳大王者杖殺之授禹州知州移睢州睢頻澇破匿報習請糶請振民以不飢濬惠濟河以俸錢更直江南蘇州旱米價騰貴民譁於市擢知蘇州府至則盡得囤積罔利者名宛轉譬語皆心動曰唯命則出酒食綵帛勞遣之價頓減貧民以安松江盜獄株連死者衆大業奉檄鞠治取羣盜至則皆斷脛折踝蹙然呼之曰爾等亦人子也迫飢寒遂至是猶茹刑詭辭顛倒首從誣殺非罪人且誣殺人何益於爾盜幡然曰官廉正以人類待

我我不忍欺獄辭立具自是獄無不待治於大業者兼署蘇松道尋攝治布政使事督撫交章保薦十六年高宗幸江南御舟左右分兩岸輓行名蝦鬚絳大業語從臣曰除道增絳必毀廬舍平田疇伐桑柘梁支河塞汊港非所以宣上德意也遂改單絳會積雨治吳江帳殿基未就總督慮不及事豫劾大業觀望及乘輿至則供備咸具總督悔前奏然大業卒左遷再至河南特旨授開封府知府府瀕河多灘地有陽武祥符民合控封邱史固村民侵占者及清丈侵占妄而畝數則浮於額巡撫欲照欺隱加賦大業持不可顧無解於數之浮考志乘及諸舊牘始知河南賦原分上中下三則自明萬歷間改并中地十畝有奇完上地糧七畝下地十畝有奇完上地三畝畝數浮而糧不減陳之巡撫巡撫曰昔爲下則今爲膏腴如之何不加大業曰此河衝淤積百姓以墳墓田廬父母妻子所易之微利也烏得以爲膏腴而增之且今日可爲退灘淤地異日即可爲沙壓水衝冬春播種夏秋之收穫不可知況此村向稱瘠苦十室九空上年河決正當十三堡口門之衝屋宇未盡葺流亡未盡復議振議借苟得延命舊賦已艱復增歲額其何以堪巡撫作色曰是國計所在誰敢撓之大業曰公爲國計某爲民生民生卽國計也不

聽卒請加賦部議試種三年而後加次年盡沒入水乃止未幾以陽武工漫溢降江南六安州知州二十三年治潁亳水利民忘其勞尋又以盜案例議降去引見再還江南署江寧府二十八年署徐州府上南幸卽眞授治徐州水利躬勤宣洩民所號邵公河者其一也府城三面濱黃河河盛漲則建瓴下西北隅尤當其衝雖有重隄獨特韓家山埽工爲固失固則城危大業按視得蘇公舊隄於城西起城西雲龍山迄城北月隄長三里湮爲民居大業曰此隄似無用然大隄猝潰循此南下城可不沒請於大吏卒復其舊隄建蘇公祠置祠田夾置桃柳自爲文記之越歲韓家山工幾潰民恃此以無恐三十年奉檄督濬荆山橋河治徐凡七年水不病民三十四年循例引見還道聞訛言妖匪割辦事至卽坐是革職謫戍軍臺三十七年卒大業所至以勸學爲務因黃陂二程子祠建義學葺睢州洛學書院集諸生月課之親爲之師著有讀易偶存八卷 鄭虎文吞松閣集徐州府知府邵公家

傳謙受堂集十二卷蘇州府志及畿輔詩傳

### 李大本

李大本山東安邱人雍正十三年舉人乾隆九年揀選得湖北棗陽縣以試取奏



摺改湖南益陽縣居官自奉極約勤於吏事識大體所規爲多遠圖益陽人不知蠶大本教之樹桑後賴其利號李公桑縣多山有里豪謀開礦以利昭大本大本叱去之因爲上官言開礦之害請勒石申禁從之十年調長沙縣考績爲湖南最十六年遷寶慶理搖同知其所隸通水峒有苗僧行賈臨桂知縣田志隆見之意爲賊黨吳方曙方曙者從馬朝柱謀反時方繪圖懸購者也僧畏刑誣服又訊朝柱所在妄言在峒中志隆以告巡撫定長立上奏帥兵出命大本從行大本曰僧言真僞不可知大兵猝至苗必駭且生變請潛訪之果在以兵禽之未晚也旣而白僧言實妄定長疑未釋復欲率兵往大本力諫乃已復再訊苗僧果誣如大本言橫嶺峒苗乏食籲官求粟大本多方賑之復請於上官曰橫嶺峒自逆渠授首安插餘苗在事文武官惡其人遂薄其產每口授田起三十積至四十積每積上田獲米六升中田五升下田四升以中田爲率四十積者獲米二石三十積者獲財一石五斗耳峒田稍腴者又盡與堡卒極惡者方畀苗民歲入不足男則斫柴易米女則劓蕨爲粉給口食年來生齒日繁材木竭米價益昂飢餓愁歎深可憐閔恐不可坐視而不爲之所也見有人官苗田一千三百四十八畝舊募漢民佃

種出租供餉奸良不一屢經淘汰請視苗民家貧丁衆書簿有漢佃應除者卽書簿之丁次第受種出租如故則苗民得食而饒亦無虧此補救之一端也議上不許後巡撫陳宏謀見之曰眞經世之言也將因北觀陳其事會遷兩廣總督遂寢二十一年大本遷長沙府知府以病足告歸卒於家懷庭集

### 陳玉鑿

陳玉鑿山東歷城人由廕生補光祿寺署正出爲江西贛州府同知乾隆三年陞貴州遵義府知府郡多榭樹舊供薪炭資玉鑿曰此青菜樹也吾得以富吾民矣四年冬遣人歸歷城販山蠶種兼以蠶師來至沅湘間蛹出事不遂六年冬復遣人往取歲前到蛹得不出明年布子於郡西小邱上春繭少獲分之附郭之民爲秋種秋陽烈民不知避成繭者十無一二次年烘種鄉人又不諳薪蒸之宜火微烈蠶未繭而病發種竟斷復遣人之歷城多致之審其利病蠶事大熟乃遣蠶師分教四鄉收繭益繁於城東白田壩誅茅築廬令織師二人導民繅煮絡織之事給工資備緯具公餘往視有不解者親教之八年秋民間報獲繭八百萬遵紬之名大著鄰省多取給焉旋致仕歸後五年而正安州吏目徐階平亦自浙江購繭

種仿玉鑿行之自是正安絲與遵義繭並食利無窮遵義人鄭珍本玉鑿遺法著有樛繭譜

### 陸廣霖

陸廣霖江蘇武進人乾隆四年進士五年選授福建連城縣知縣趙懷玉亦有生齋文集恭城縣知縣陸君墓誌 爲治嚴明而平恕張惠言茗柯文集恭城縣知縣陸君祠版文有余氏兄弟三人孟與叔後皆鼎盛合建宗祠以仲後單寒誣其已爲人後不得入主仲之後鴻漸者縱火焚祠遂相劫殺趙懷玉所撰墓誌 吏當之死廣霖至 張惠言所撰祠版文 召兩造集於庭以情諭之聲淚俱下衆感且悔卒送主入祠六年調寧化趙所撰墓誌豪民劉席玉其黨數百人號鐵尺會爲鄉里害廣霖行縣召之及其黨皆至遽執之衆大驚不知所爲皆首服論十四人如法 張惠言所撰祠版文 餘勿問趙懷玉所撰墓誌 盜邱氏者居下泉里聚黨自衛積十餘年吏莫敢捕張惠言所撰祠版文廣霖乃設廣筵延邱氏之諸生舉酒屬之曰家有圯族之子教之不先禽之又不力咎將誰諉乎衆皆曰諾卽歛金爲購緝費不二旬積盜皆獲黃家峒黃氏人多獷悍嘗遣役有所禽治役難之廣霖曰無畏彼或不率吾當親往至則其家已極



梏以待其先聲奪人如此八年調臺灣之彰化未幾以寧化讞上遲延部議革職督撫連章奏保有旨仍以彰化知縣用縣設於雍正四年其初囹圄空虛官吏無事及廣霖再至訐訟日繁以盜牛殺人者尤衆廣霖虛衷研鞫不以爲倦虎尾溪地遼曠爲劫奪藪請添設一縣丞以資彈壓趙懷玉所撰墓誌臺灣多漳泉人素不相悅往往持兵鬪因肆劫一日廣霖以事赴淡水泉人乘縣令之不在也攻漳人於市衆大駭張惠言所撰祠版文廣霖馳歸委曲勸諭兩郡之民咸悅服彰化多鴨寮康熙中畔賊朱一貴卽飼鴨者巡道某恐爲患趙懷玉所撰墓誌謂廣霖必禁斷對曰此民業不可禁因審其籍令鄰里保任之張惠言所撰祠版文俸滿調順昌嚴隱糧之弊使民自首民不敢欺請於學政復歲科兩試府學分取之額嚴立講院程課福建巡撫陳宏謀最重廣霖廣霖爲陳十二事曰崇貢院通水利整橋梁裕積貯廣郵亭興煤廠端士習嚴械鬪禁屯積廢闢神戒溺女止燒山多見施行十八年以宏謀薦擢知府引見記名再陞吏議再以知縣用丁母憂服闋揀發廣西補恭城署百色同知有周甲與二人夜行爲槍所殞二人驚避黎明走報汛兵已失尸前官因是被劾廣霖問周甲之子曰汝父故與人有隙耶曰有舊僕某家頗饒父

每向假貸積有隙或卽其人乎乃召周甲所宿逆旅主人詰之則曰僕於數日前曾屬周若過此盍通一耗廣霖恍然曰賊在是矣立械僕至一訊而服蓋是夜僕與其弟殞周於途剖腹置石投之河中至是得尸沈寃遂雪百色界連雲南有田岑二土官爭地久不決廣霖奉檄履勘知爲岑氏產毅然斷歸之田氏無怨言尋以同官牽連罷職歸四十五年卒子繼輅孫耀通趙懷玉所撰墓誌皆在文苑傳

王希伊

王希伊江蘇寶應人祖懋竑翰林院編修揚州府志儒林有傳希伊乾隆六年舉人授陝西白水縣知縣實心愛民不利於民者不恤觸上官怒以與之爭翰林院侍讀學士朱筠稱其能以程朱之學致卓魯之績以病改青浦縣教諭尋乞歸卒年七十六著有清白堂存稿十二卷彭衙存稿十卷由拳存稿四卷詩集十卷阮元

淮海英靈集

張甄陶

張甄陶福建福清人性嗜學巡撫王恕學政周學健以甄陶爲國士貢成均乾隆元年舉博學鴻詞試罷大學士朱軾侍郎方苞李紱薦充纂修三禮官甄陶辭而

從苞問學得於詞館讀書取永樂大典二萬卷編觀之至廢寢食十年成進士時方許直言極諫甄陶對策因詳陳時務略謂開邊外屯田以養八旗餘丁猶勝貸金於府改捐監條款以充地方公費猶勝積粟於倉請以州縣佐與州縣並選以疏通舉班而陞巡檢之秩比縣佐以處選用縣佐之貢生則三途並用選法疏通其言深切大臣或不敢進呈乃置二甲選翰林院庶吉士十三年散館授編修旋改授廣東鶴山縣知縣調香山新會高要揭陽諸縣皆劇邑也所至疆田疇修隄圩弛蟹戶蠓蜺之禁馭澳夷毀淫祠定常田建書院調孤貧實社倉理鹽筴策荒政雪冤獄詰盜賊塞潰隄凡有舉措必熟計事勢使無拂逆於民而民陰被其福方甄陶之補外也人咸惜之甄陶獨慨然有用世志大學士陳世倌知其才臨別取明呂坤呻吟語贈之甄陶讀其實政錄喟然歎曰視國如其家視民如其身視官事如其日用飲食以天下爲己任者不當如是耶在嶺南作學實政錄丁憂服除起補雲南昆明縣知縣坐事免巡撫劉藻善遇之延主五華書院藻總督兩省移主貴州貴山書院復上言甄陶教士有成效賞加國子監司業銜甄陶居五華貴山前後將十六年訓士如子弟尹壯圖錢澧等皆其弟子晚病歸主講鼇峯書



院以經義教閩士於是咸通漢唐註疏之學書院創自張伯行而蔡世遠爲之長繼之者惟甄陶與通政使林枝春講明正學嚴憚有法論者謂不啻世遠主講時也同邑人孟超然稱甄陶淹洽似王伯厚而切於世務慷慨似陳同甫而根極理要雖不竟其用卓然可傳於後無疑也居滇南時著正學堂經解周易傳義拾遺十二卷詩經朱傳拾遺十八卷禮記陳氏集說刪補四十七卷春秋三傳定說五十卷松翠堂文集三十卷

謝應龍

謝應龍字西舫浙江會稽人乾隆十一年大金川酋莎羅奔作亂應龍方任四川汶川縣典史奉檄駐沃日土司地偵大金川兵事沃日與大金川接壤而土民不及七百戶十二年金酋率兵圍之時沃日理事者爲土婦澤爾吉勢弱而孤應龍撫慰番衆力爲防禦金酋不得逞乃遣人誘澤爾吉使降應龍使峻拒之旣而援兵不至土婦恐欲降金酋爲自全計應龍痛哭責以大義且拔佩刀以誓曰事不濟先殺爾而後自殺土婦悟協力堅守五十餘日而救始至圍遂解應龍復奉檄辦大營糧運總兵任某率數百人深入踰昔嶺抵九山梁餉道絕應龍冒險出奇

以米百餘石往軍乃得濟尙書班第總督張廣泗上其事超擢漢州知州遷寧遠府知府後除甘肅平慶道未赴任卒四川通志

### 周克開

周克開湖南長沙人乾隆十二年舉人十九年以知縣分發甘肅旋補隴西縣調寧夏寧朔縣寧夏並河有三渠曰漢來唐延大清皆引河入渠灌田唐延渠行地多沙易漫克開治之使深狹又改其水道渠行得安渠有石竇洩水於河以備旱澇者民謂之暗洞時暗洞崩塞渠水不行上官欲填暗洞而竭唐延水入漢來以便寧夏縣之引河然寧夏利而寧朔必病克開恐夏秋水盛無所宣洩時新水將至不可待克開請五日爲期取故渠及廢閘之石晝夜督工五日而暗洞復兩縣皆利大清渠長三十餘里鑿自康熙間久而石門首尾壞民失其利克開亦修之皆費省而工速再以卓異薦擢知固原州丁父憂服闋補洮州知州尋擢貴州都勻府知府從總督吳達善侍郎錢維城治貴州逆苗獄獲首從輸之法倚輕重必力爭無少遜旋調貴陽府亦以強直忤巡撫宮兆麟嗣因公累解職引見授山西蒲州府知府調太原府清釐積案修復風峪口隄堰障山潦導入汾尋擢江西吉

南贛寧道署布政使以王錫侯書案被議高宗知其賢發江南以同知用會南巡克開署江寧府迎駕命知江西九江府擢浙江糧儲道時浙江巡撫王亶望頗黷貨屬吏多重征以適上官意克開以清白勵並請於亶望約與之同心亶望心厭克開乃奏克開才請移治海塘於是調杭嘉湖道會改建海岸石塘總督欲徙柴塘近數百丈以避潮克開曰海與河異讓之則潮必益侵無益也力爭迺止年餘以督工勞瘁卒於官

林明倫

林明倫字穆菴廣東始興人少好學讀左氏傳輒以意首尾聯綴之作數十大篇以觀其文章事迹之終始乾隆十四年成進士改庶吉士日與同官建寧朱仕琇相劇礪居三年仕琇外授去明倫取宋五子之書日夜沈潛反覆觀之於義利之介確乎如黑白不可淆十七年散館授編修十八年用薦得旨記名以御史用方保舉御史時同官有要之者曰行舉御史不可不謁掌院明倫毅然曰御史以求而得尙何以自樹立耶謝不往其秋充山東鄉試正考官十九年授浙江衢州府知府俗好譏鬼歲春秋民相率往九華山求福籛金橐糧男女奔走明倫諭之曰



爾民爲不善爾祖父之鬼不祐爾矣若善何求於神衢人大感悟又其俗婚嫁壻家先張酒食於中途待婦家送女者飲噉愚民小忤意輒使酒罵坐客甚者碎其器物兩姓往往終身不和喪事則薄其死者棺身之所附而親交來弔問必遍遺布帛呼僧唱經以故民有婚喪每一召會費錢幾十萬中資之家至破產不恤也明倫爲一切厲禁去之郡間有雨雹偏災明倫身親周視具書冊上報請賑貸毫毛無所隱歲旱爲文禱於仙霞嶺請罪已天立大雨歲以豐熟城南故有正誼書院久荒圯明倫立出俸銀爲治講堂學舍而延郡人爲之師治事之暇月一至書院與諸生講學相礪錯毅然以教化爲必可行抗顏告諸生曰諸生其務讀書明理求至於聖賢毋爲區區文章之末而已守衢三年以安靜爲治吏民敬愛會新易巡撫以病不卽上謁謁稍遲巡撫疑其傲以才力不及劾罷衢人哭而送之二十二年入京引見至京病益甚遂卒門人爲經紀其喪友人朱珪發其裝官翰林時敝衣數襲而已所著有詩集一卷文集二卷學庸通解二卷讀書邇言一卷

### 白雲上

白雲上河南河內人乾隆十五年武進士由侍衛任江南都司陳宏謀撫江蘇知

其才數以手札獎勉之太乙駟言事摺子總督尹繼善奉旨裁汰江寧京口駐防以旗人藉錢糧爲生稍不公輒起物議召雲上至密室曰江寧吾自爲之京口事以委若年六十五以上十五以下者汰之雲上出三日復進見繼善曰尙未行耶曰雲上已畢事來覆命耳問裁汰幾何可呈冊籍則曰皆無可汰者繼善曰豈無一人在六十五以上十五以下者耶雲上跪曰十有其四雲上皆損益其年齒以稱中堂意是以得不汰繼善怒雲上曰請得畢其詞我朝幅員萬里歲賦所入豈不能贍此數旗人耶旗人不注四民籍汰之則疆者盜弱者丐京口當衝塗外藩貢使由此往還旗婦章服與民人異沿街乞丐恐有傷國體爲外夷所笑繼善意解扶之起指其座曰此席當屬君矣遂上疏切論罷其議雲上擢揚州游擊有通州奸民告海外沙民謀爲逆繼善檄雲上先率所部往雲上乞病假五日繼善莫喻其意親帥兵抵六開雲上忽上謁繼善曰故未病耶對曰雲上何病度沙民必無他兵行必驚擾故單騎往察仇怨所自起召其父老諭令指親串之任內地者傳集訊驗取結狀三百紙並帶曉事數十人馳迎中堂耳繼善握其手曰吾固知君能了此也卽集衆諭遣之置告者於法江防揚糧兩河廳故事派柴戶輸工料歲

賠累以萬計雲上白繼善裁之徐淮揚三府民困以紓天大旱火起飛騎往救躬乘屋以帥下祈雨長跪龍王廟階上凡三晝夜乃大雨階石至有兩膝暈民以爲至誠能格金石歲潦民苦薪斷冒雨督舟運薪給之累遷至漕標副將引疾去雲上工詩善草書在官愛民戢士卒多美政嘗曰官樂則民苦官苦則民樂以吾一人之苦易數十萬人之樂吾獨不樂乎後得旨入名宦祠男婦爭進香楮迎主者至萬餘人子守廉進士官知縣有廉直聲國朝先正事略

### 康基淵

康基淵山西興縣人乾隆十七年進士歸班選河南嵩縣知縣縣地磽瘠稍嘆卽歛舊傍伊水有渠十一道久湮絕基淵按行舊址勸民修復山澗諸流可引漑者皆爲開渠渠身高下不一者分段設閘以蓄洩之水勢湍急則設閘渠口防沖漲田高渠下者則教爲水車引漑凡新舊開渠十八灌田六萬二千餘畝巡撫上其事優詔議敘邑舊貢百合以本草經云百合生宛胸嵩西南連宛胸榛莽間亦時有之惟邃谷危崖艱於採取基淵乃謀之士人購地西郊凡四十畝分六區令民試植歲產千餘斤五年一取更番種刈時其培護節其旱潦募田夫給工食以專



其任建亭樹柳藝桑鑿池夏則迎其母清暑於中四郊婦女咸來起居或有勃溪時一赴愬間賜果餌歡如家人及母卒臨奠者日數百人卽百合園立祠歲時祭焉嵩有絲而植不繁基淵教民蠶爲建先蠶祠繪蠶織之事於壁又示民以種桑法由是蠶絲甲於旁邑基淵以嵩民樸厚有古周南遺風貧寒者不知詩書乃核無業地若干建社學由城及鄉凡三十二所相距或十餘里每社脩脯以二十金爲率酌定學規擇本庠通亮之士專其教授尋以丁憂去三十四年服闋選甘肅鎮原縣歷任皋蘭陝肅州直隸州知州州有洪水渠舊築峻岸崩沖而下爲田禾災基淵度形勢於南石岡別鑿渠口以避沖陷之害野豬溝有古荒田無水久廢基淵詢訪耆舊於柳樹閘龍口寬加六分分別開子渠界荒田爲七區招民佃種區取租十二石額糧則由佃自納而以其租給各社學師名曰新文渠肅東南九家窰鑿山後渠開屯田向移駐州判主之久之田薄瘠民租入不能支官役基淵請汰州判改屯升科爲籌歲修費民於是有恆產肅民樵蘇遠取諸邊牆外日費而價貴基淵相東北郊外廢灘不堪種藝勸民濬溝以洩鹵鹹種楊十餘萬株擇人董守之徧諭鄉堡可種樹處皆如其式薪樵於是不外取肅屢經軍旅民不知學

基淵爲建置社學二十一所社中有無主絕業取以爲歲修以新文渠地租供學費選老成者司其事無捐助勒派之擾肅境距城遠者徵收糧石借國民房多至四十餘處且有久假不歸者日夜警守頗爲民累基淵請於金佛清水建倉數十間以舊屋清還諸民肅南三山口有番民向通茶馬更無征求軍興時皮革羽毛等暫著採取後沿爲例名曰給價官吏藉以需索諸番苦之基淵言諸鎮營悉與裁革四十四年擢江西廣信府知府廣信俗多溺女基淵勸諭之并設厲禁給接生婦人以口食令有溺者卽首之立嬰長一人給田十九畝使之稽察女嬰或貧不能養則暫育於嬰長月以所育女數列冊呈官因推其法於屬邑旋卒於任基淵爲學務究根本其治官事如家事博求利病而洞審原委故推行有序著有南圃文鈔女學纂家塾蒙求子紹鏞歷官安徽廣東湖南巡撫

### 鄧夢琴

鄧夢琴江西浮梁人少貧勤學以小學近思錄洛學編爲宗乾隆十七年成進士出蔡新之門得窺閩學源流惲敬撰墓誌植躬行已非義不蹈陳用光撰墓表二十六年選授四川綦江縣知縣董詔撰墓誌縣人相沿呼大府胥吏爲老上司橫甚君察

其尤者杖之申請治罪遂俱歛迹貴州遵義有巨盜亡命過縣遣捕人蹤迹千餘里至萬縣獲之以能署江津縣知縣縣民宋志聰與楊在位爭博負在位毆之仆死置尸黃君相之門前令比君相殺人罪已瘐死夢琴至鈎距得實獻之前令因推事官請於按察使搆其獄夢琴力爭按察使遂怒又民周景康盜樹爲樹主斫顛左尋以他事與周秉魯爭傷腹下死前令以比樹主夢琴請復勘腹下傷重罪當比周秉魯而按察使挾前怒欲如前令比且聞它蜚語謂夢琴好排人惲撰墓誌欲中以法齮齧者數月董詔墓誌會夢琴還棊江定遠民譚學海被殺主名不得縣攝民六人笞服之至府皆不承夢琴奉府檄廉得諸偷鄧理瑤等實殺人一訊獄具白府分功定遠令定遠令得免吏議諸上官乃信夢琴善平反非排人者適按察使又署布政使周景康獄乃如夢琴讞惲墓誌一時人頌神君三十年以繼母憂歸尋丁外艱四十三年選授陝西洵陽縣知縣董詔撰墓誌縣多楚人流寓其墾田者請於上官不報升科以利安之惲墓誌其豪猾教民訟持官短長者廉得其歛錢諸簿籍置之法楚饑資米於洵陽勸以平糶而有力者居奇貨次年春楚民糾衆強借米距城二百里勢張甚陳用光撰傳疾馳往諭以明憲衆叩頭求活但杖



倡者十二人餘不問巡撫畢沅聞而善之四十八年署岐山縣四十九年調署寶雞縣利民渠開自前明灌田三十頃久堙夢琴濬之增灌至五十頃其南北注渭諸渠亦加疏導董詔撰墓誌縣臨棧道有陳倉東河二驛馬多疲損前令以給里民需其值曰領馬有事復搜私馬應官曰里馬乃下令領馬者悉交見馬驛遂充非大差不責里馬逆回田五作亂陷通渭惲墓誌疾馳二百里至仙靈峪斷道設戍董墓誌歸而授兵登陴賊以不至惲墓誌及漢南援兵過縣爲供其車馬乏困民皆應役如趨私事既平他邑皆訟派累寶雞民獨製錦壽縣官過客歎曰寶雞令豈有餘財爲供張耶官無所私而區畫得宜乃使民知感如是孰謂廉吏不可爲耶陳用光撰墓表五十四年以卓異陞商州知州六十年擢漢中府知府署陝安道董撰墓誌因事鐫級大府以教匪方熾奏留任惲墓誌募鄉勇相險易爲防守自冬徂夏跋涉山谷得足疾嘉慶二年引疾歸十三年卒年八十有六二十二年入祀名宦祠夢琴故善爲文所著有懋亭文集十六卷陳撰墓表詩集八卷惲撰墓誌其它主端明鹿洞書院所謨示士子及在官所修志書復共若干卷官洵陽時答督撫諮訪事宜諸官行文文字皆詳究利病足資考核子傳安輯爲外集傳安嘉慶十年

進士羅源縣知縣

李炯

李炯江蘇元和人乾隆十七年進士授廣東茂名縣知縣以慈惠爲政每聽訟平心察理未嘗用一暴刑縣有重獄株連二十餘人炯按驗多縱舍所羈候才一二而已彭啟豐撰傳縣屬地有黃塘者濱臨山谷暴雨水漲居民多死言之府請發官銀收葬不足請復發知府不可則捐俸以益之其生者爲起竹屋復煮粥食之士人載贄見謝弗納乃潔治書院俾肄業其中公事之暇親往慰誨初紹興沈某爲炯幕友頗通賄炯知卽謝遣之及是客府署構炯於知府遂以不勝任被劾改教官去之日彭績撰傳士民執香送者踵錯於道作德政歌用金書采旗爲導有警者百餘人製布袍獻炯服而見之瞽曰貧不能得錦恐不當公意炯曰服之矣瞽前捫炯衣果布也則皆大喜羅拜去舟過梅棗鎮商民張彩棚設樂以餞三爵後獻百金爲壽卻之已而昇炯徧歷鎮中曰公去矣俾鎮人一識公炯旣歸遂不出卜居靈巖山下野服翛然以山水自樂四十年卒年七十一彭啟豐並彭績所撰傳

顧光旭

顧光旭江蘇無錫人四川通志乾隆十七年進士戶部山東司主事擢員外郎二十四年授浙江道監察御史是年直隸山東大水明年正月光旭上奏曰近見流民扶老挈幼什百入京詢之是近畿數百里內被災之民相率逃荒先之毀屋伐樹繼以賣男鬻女飢羸老弱踣頓不可勝計耳目所及如此其外可知伏思救荒無奇策惟督撫及有司親民之官實心實力方克有濟乃各州縣未嘗不設廠未嘗不施賑而或委任佐貳假手吏胥所設廠或遠離村鎮窮民奔走待食或得或否凍餒顛斃皆所不免國家良法美意一入俗吏之手民需實惠者十不及五卽有一二賢能有司撫循周至而他境流民聞風畢集日聚日多轉難措手此督撫不能真實愛民下亦以應付塞責一切皆屬具文臣請敕下督撫分飭有司隨地撫綏毋致流移失所去年被淹之地積水未消宜設法疏導以工代賑然後借給牛種資其耕作儻仍因循侵蝕有流民有曠地卽重治督撫州縣之罪至京城外來飢民雖已獲赴廠領賑但一年之計全在東作應給資遣回原籍其本籍全無倚賴者卽歸大興宛平作何安輯免致流亡并請敕順天府尹會同五城御史查明人數請旨遵行抑臣更有請者外省遇有水旱司道府親臨查勘州縣先以伺候



供應爲能所委佐貳亦盛索劇傳請嗣後大員親臨災地州縣毋許供應亦不得帶同佐貳多攜人役致累災區違者嚴參重處似於荒政亦有裨益奏入上善之王昶春融堂集 二月命赴京畿查勘光旭至文安大城疏積水撫飢民入樂亭境民數萬擁縣門欲斃知縣及悍役王姓者時已昏黑光旭令老者數人前宣示上恩言至痛切衆哭光旭亦哭乃乘夜秉燭起草馳章奏乞加賑次至寶坻灤州盧龍皆如之四月復命召見嘉許良久畿輔通志旋命赴通州坐糧廳任三十二年擢工科給事中三十三年授寧夏府知府明年調平涼三十五年甘肅大旱光旭請賑於布政使不許乃以便宜查災戶發銀米適布政使以憂去代者胡季堂謂光旭曰輪蹠鳥道羊腸路溝壑鳩形鵠面人賢二千石涕泣多矣蓋光旭口占詩句爲人傳誦而季堂聞之也按察使畢沅見光旭青嵐山詩產破妻孥賤腸枯草木甘歎曰一字一淚十字千古矣是時隴坂災黎鬻妻子裝木籠於驢背每籠兩人光旭命城門籍其數五閱月共出六萬七千餘人則他郡可見也皋蘭各縣聞平涼設粥廠相率就食日以萬計總督明山巡邊至隆德告光旭路有饑死者光旭率縣令請罪總督曰百姓道斃於知府何與光旭曰知府任地方責烏得辭罪且總

督見者一知府見者十知縣見者百鄉長保正見者以千數矣曩知府於路見羣鴉飛鳴樹枝牽挂縷絡則人腐敗之腸也跡而求之澗谷中齧骸堆積繇延不絕是皆地方之責烏得無罪總督蹙然問何如而可光旭曰平涼隆德固原靜寧各有二粥廠飢民日增每廠多至四五萬人天漸熱疫將起願給兩月口糧爲歸農資俾得及時布種總督曰諾乃具薄笨車數百兩陸續送歸其地時光旭已陞涼莊兵備道而總督以罪免文綬代之屬光旭以河東一路賑事光旭曰河東道路遼闊倉庫空虛官吏非本屬未敢任也文綬曰一切錢糧惟子支取自府以下惟子調遣某帥以聽誰敢犯子光旭爲治素有聲旣奉檄罔不響應遂分八路比戶清查用三連票填注極貧次貧大小口數一付領賑者持票領賑一貼災戶門首一存本官覈對未領之戶晝夜抽查發奸擿伏官吏惕息暨於訖事無敢絲毫中飽及秋大熟甘肅民遂以生全時大兵方討金川土司三十七年文綬調任四川總督以光旭自隨部署餽運三路軍營賴以無乏十二月署按察使 王昶春融堂集裁抑奸貪剔除衙蠹四川通志先是四川有失業無賴之民好拳勇嗜飲博掠惡少年爲從四出劫殺衆莫能制名爲囑嚙子至是益甚光旭督役搜捕獲之則予杖

荷校反覆理喻咸股慄誓改悔乃令率其侶爲運丁軍米因以益裕光旭常謂天下無飢民無游民則揭竿篝火之盜斷無從生譏者以爲名言四十年以秋審失出五案革職仍留四川總理糧餉春融堂集出南徼事竣回成都百姓以香盆花燭迎者數萬人時塞外軍興而腹地不知兵光旭之力也四川通志四十一年正月金川平大軍凱還馳駐西路臥龍關料理回兵兵十餘萬抵關震光旭威名無有叫喚需索者尋以積勞得疾乞歸百姓送者亦數萬人士大夫爲立生祠於坡仙樓上著有響泉集春融堂集

王德屏

王德屏廣東吳川人乾隆十八年選拔貢生廷試後以資授貴州平遠知州值苗匪倡亂德屏單騎深入反覆開導酋長感化縛其渠以獻得脅從名冊焚之存活以萬計尋以前官事落職歸三十五年恭祝皇太后萬壽恩復六品職銜降補南匯縣丞調常熟職小而節彌勵邑民聞德屏廉明皆趨走質訟縣貳例不受事諭遣弗去隨事剖析民皆悅服來者不絕德屏亦弗能禁也鄉俗投牒有官錢德屏曰是何足污我大署牒後曰本衙不收陋規役卒多散去由是見知上官調署嘉



定縣知縣檄下適以病卒士民爭贖錢乃成殮後祀常熟名宦採訪冊

### 茹敦和

茹敦和浙江會稽人乾隆十九年進士初嗣妻父李爲子占籍廣東登第後始歸宗復籍二十九年選授直隸南樂縣知縣初下車卽諮詢紳耆訪求民間疾苦矜慎庶獄有訴訟者書片紙呼被告至立剖曲直罪當笞杖薄責之民咸感愧自新擇鄉間清白謹愿者俾充社長里正朔望令畢集密陳其鄉利弊爲籍以記次第施行南樂地故卑下當豬龍河之衝時有水災敦和尋察源委於開州清豐間審地形高下因勢利導水有所歸遂不爲患以縣地多茅沙鹽城教以周禮土化之法廣植雜樹瘠田皆變沃壤邑人以麥稽編笠爲生率荒本業敦和勸令育蠶先於縣治後圃種桑多株春時分給四境並勒碑紀其事民獲利賴焉三十四年調大名縣地濱漳河水患尤劇敦和謀開渠以殺其勢議甫定內遷大理寺左評事不及上請乃手書懸城闔勸民興修刻期令集河干親爲指示形勢及期鄉民各具畚鍤偕來者以萬計敦和爲擘畫講論大衆歡呼爭先從事及旬而渠成四十年授湖北德安府同知尋署宜昌府事弛商船報驗之禁以便行旅緣事降調

歸五十六年卒以紳民請入祀直隸名宦祠所著有周易二閩記大衍守傳周易證籤周易小義尙書雜說讀春秋筭記子蔡乾隆四十九年一甲一名進士官至兵部尙書

莫蕃

莫蕃廣東定安人廣東通志乾隆二十五年舉人五十三年選授直隸安肅縣知縣縣爲九省通衢驛傳絡繹民疲於供應蕃至供張芻豆皆自置辦每大吏臨境輒布席坐行館外有騶從需索者則曰縣在此勿他問也有使臣于役西藏從者濫徵馬不得擊傷圉人立械繫之自是過境者咸知歛束五十五年調靜海縣去之日民泣送者不絕於路先是靜海有搶劫案擬大辟者十許輩蕃至廉得其情皆荒年飢民也親詣省白其寃得從輕典縣濱運河有隔淀隄長數十里屢潰決蕃躬親相度無靳工料期於堅固自是歲省公帑而田不病潦五十八年兼署滄州歷署河間府通判廣平府同知五十九年以運河淤淺阻糧艘奉檄還靜海以督濬令於衆曰有能出土一囊置之隄外者給一錢衆皆曰諾越三日而漕以濟大吏上其事奉旨嘉獎且著爲例秋汛河溢督工堵塞晝夜坐臥隄上者一月餘所

護民田無算又親履村落按戶給錢米自捐廉俸於近郊設粥廠養流民民有鬻子女者以重價收買逾年焚券令其父母領歸存活衆甚又創建瀛海書院割俸置田以資脩脯膏火嘉慶元年署通州旋回任五年擢灤州知州州廣袤二百餘里旗地居其半俗悍健訟 陳昌齊灤州刺史莫君墓誌銘 善明於斷獄民無遁情 廣東通志 未半年清積案二百餘件 陳昌齊撰墓誌 奸宄斂迹廣東通志 捐修海陽書院葺學宮建忠孝節義兩祠 陳昌齊撰墓誌 造榛子鎮石橋六年灤溢民多漂沒幾輔通志 令人收葬之尸五金八年兼護永平府十年署趙州直隸州在趙半年政清訟理回灤州十一年卒於官 陳昌齊撰撰墓誌 靜海灤州民各請祀名宦廣東通志

### 鄭基

鄭基字築平廣東香山人邵晉涵江南守巡道鄭君墓誌銘 乾隆間授例銓安徽鳳臺縣知縣下車卽問民疾苦縣東北鄉有通川三日黑濠曰溼泥曰裔溝匯穎上蒙城諸縣水以達於淮縣人統謂之三河歲久盡涸上游水無所洩秋雨暴漲爭注鳳臺彌望成巨浸時戶部侍郎裘曰修出治淮穎諸水基申牘請濬三河而曰修先與江南疆臣議所濬川獨不及鳳臺疏稿已具矣得牘面詰之基侃侃陳利害



及畚揭木石之用廣表之勢程功久暫之期甚悉邵所撰墓誌曰修悅爲補疏工成民不知役農食其利縣偏隅有魯松灣地遠於淮而卑頻年患潦乃捐俸倡築隄障遂成膏腴調定遠縣舉卓異擢壽州知州署安徽六安州知州再任壽州劉鴻翔所撰傳州故有安豐塘周百里灌田四萬頃楚令尹孫叔敖所治之芍陂也歲久塘圯基審覈舊制繕復之爲水田三十六爲閘六爲橋一其旁則爲埭爲堰爲圩啟閉以時汙萊盡田嘗循行阡陌見沙地磽确多不治以爲古者淳鹵沃瘠分植五穀教民種山薯蒱佐菽麥俾無曠土壽州不知蠶織而地多椿樗可飼蠶迺遠購蠶種教民飼養農桑並興其後鳳陽亢旱民多流離獨鳳臺壽州秋成稔於他縣邵所撰墓誌在壽三年令行化洽陞泗州會水災籌畫振撫飢而不害擢淮安府知府淮安故水鄉基謂聚衆水以爭一門淮所以潰也疏之不可緩於府東開濬東鄉澗市河於北則開漁濱山字河於西則開護城河壅滯旣通農田資灌溉引其流兼濟漕運民便之基博覽前史於河渠水利圖經諸冊丹鉛殆遍故施行輒有成效乾隆四十一年擢江南分巡道命甫下而卒劉所撰傳

汪輝祖

汪輝祖浙江蕭山人少孤繼母王生母徐教之成立入州縣掌書記漸習刑名乾隆三十一年成進士授湖南寧遠縣知縣縣雜徭俗積逋而多訟前令被訐去攝者務姑息黠桀益伺間爲挾持地又流丐多強橫輝祖下車卽掩捕其尤而驅餘黨出境民納賦不及期諭以官民一體緩急相關聽訟之責在官完賦之責在民官不勤職咎有難辭民不奉公法所不恕寧遠錢糧素多延欠今約每旬以七日聽訟二日較賦一日手辦詳稿較賦之日亦兼聽訟若皆遵期完課則少費較賦之精力卽多留聽訟之功夫民感其誠相戒無負好官不逾月而賦額足治事廉平尤善色聽援據比附律窮者通以經術決獄皆曲當而心每愀然遇罪人當予杖輒呼之前曰律不可違然若受父母膚體奈何行不屑虧辱之再三語罪人泣亦泣或對簿者反代請得免卒改行爲善良每決獄縱民觀聽又延紳耆問民疾苦四鄉廣狹肥瘠人情良莠皆籍記之據漢書趙廣漢傳鈞距法斷縣民匡學義獄唐書劉蕡傳斷縣民李氏蕭氏爭先隴獄他邑有訟聞移輝祖輸之者皆大喜在寧鄉時訟師黃天桂與大府吏史坤攬訟輝祖以他事搜其筆據陳之大府革坤役天桂逸去終輝祖任不敢出寧遠例銷淮鹽值數倍於粵鹽民多食粵私大

吏遣營弁偵捕人情惶擾輝祖爲帖白上官以鹽愈禁則值日增夫私不可縱而食淡可虞請改淮引爲粵引未及報輝祖卽張示鹽不及十斤者聽偵弁謂其故縱私聞於大吏輝祖揭辨總督畢沅嘉賞之立弛零鹽禁時偉其議稱莽知縣云兩署道州又兼署新田縣皆有惠政以足疾請告時大吏已疏調輝祖善化疑詭疾規避奪職歸里值西江塘圯巡撫長麟吉慶先後遣官勸輝祖董其事不獲辭初估工費錢二萬八千九百緡用輝祖議工倍而錢省嘉慶元年詔舉孝廉方正邑人以輝祖應固辭免輝祖少尙志節老而愈厲持論挺特不可屈而從善如轉圓性至孝痛父早歿兩母孤苦撫己成立故於守身之義懍懍自防終其身罔敢隕越嘉慶十二年卒著有元史本證五十卷史姓韻編六十四卷九史同姓名略七十二卷二十四史同姓名錄一百六十卷希姓錄四卷遼金元三史同名錄四十卷學治臆說四卷佐治藥言二卷

陳昌齊

陳昌齊廣東海康人乾隆三十六年進士改庶吉士散館授編修晉中允三十九年典試湖北四十年充會試同考官五十年大考三等左遷編修五十五年補河



南道監察御史奏言各省首府宜請旨簡放以杜夤緣直省督撫政治宜令學政隨時稽察以防弛縱京師各門宜嚴章程以杜勒索均下部議覆又奏緝捕洋賊事宜略言洋匪會匪相爲狼狽會匪藉洋匪爲去路洋匪靖則會匪自消又言沿海居民類皆採捕爲生習拳勇諳水勢向爲匪等所畏自匪等以利招誘遂多從匪者夫可以爲盜卽可以捕盜似宜令地方官明示有能出洋剿捕或匪等上岸並力殲擒送官驗實者其船隻資財一概充賞已經聽誘下海之人若能設法殲擒者連船投首亦准免罪嘉慶元年陞兵科給事中轉刑科給事中九年授浙江溫處道時海寇蔡牽騷擾閩浙昌齊抵任修戰艦簡軍伍又令人出海繪浙閩海洋全圖纖悉備具每汛口弁兵稟報殺賊情形及道里遠近稍有虛妄必加申飭雖百里外事如親覩凡接見武員必加禮曰海氛未靖正武夫效命之日也一等侯德榜奏奉命按閱閩浙營伍議中海禁不數月盜可盡斃侯風采嚴厲屬吏莫敢置對昌齊進曰侯未身履其地也閩浙兩省環海居民皆捕魚爲業若禁其下海則數萬魚戶無以爲生激變之咎誰當任之侯默然徐曰君言是也永嘉民有胞弟誤用屠刀格兄致斃訟師使認爲木柴毆傷刑訊十年堅不改昌齊曉之曰

汝明認刀傷早以誤殺援赦釋矣木柴斃命則故也非誤也訟師利汝財以延歲月耳犯大驚叩首曰公活我指使者實某也昌齊按律定擬置訟棍於法一時稱神明在温州造戰船支帑不足歲負債數千金大吏委權鹽運使調劑之昌齊曰此脂膏地也卒不就尋因事陞部議上命刑部尙書景祿光祿寺少卿吳俊按其事或語以往謁辯之不可竟投劾歸總督阿林保調兩江欲奏調昌齊赴江蘇辦理河務而閩浙總督方維甸又以昌齊諳練海疆欲奏留原省補用昌齊並辭初在翰林時大學士和珅欲羅致之昌齊以爲非掌院無晉謁禮卒不往歸里後修雷州府志海康縣志總督阮元修廣東通志聘昌齊爲總纂並主講粵秀書院二十五年卒著有呂氏春秋正誤二卷淮南子考證六卷楚詞韻辨一卷測天約術一卷賜書堂集六卷

劉大紳

劉大紳雲南晉寧人乾隆三十七年進士以知縣歸部選用四十八年選山東新城縣時累年荒旱大紳在任多惠政民愛之若父母五十一年調曹縣代者至民數千遮道乞畱鄰邑長山民亦代籲留大吏爲畱大紳三月始抵曹任歲又旱災

重於新城大紳方設法蘇其民忽河督檄修趙王河決隄大紳不得已集夫役萬餘人以工代賑兩月竣事無疾病逃亡者既又委辦河工稽料三百萬大紳以時方收歛請緩之大吏督責益急與十日限否且罪民間爭先輸納未及期而數足公暇卽親詣書院校士嘗謂諸生曰小學一書爲作聖之階梯入德之軌途師舍是無以爲教弟子舍是無以爲學也晚近急於利祿惟以記誦詞章博取功名爲務是以人心不正達則驕奢淫佚窮則僥捷偷薄今與諸生約必讀此書身體力行由灑埽應對以馴致乎達天知命之域庶幾明體達用有益於天下國家之大於是士知實學風氣一變嘗按視鄉間聞有議穀賤銀貴徵期促迫者大紳顧而語曰俟穀得價再輸未遲也語聞於大吏怒其擅自緩徵遊員代之紳民慮失大紳爭先交納屆期畢完大吏因飭徵累年逋欠儻不足終以代者受事紳民愈恐晝夜輸將不數日得銀三萬餘兩大紳由是膺上考初大紳以忤上臺意自効求去民間之環署泣留且相率走訴大吏適大吏有事於泰山見而諭止之大紳以是得不去至是密自申請民知之已無如何矣乃得引疾歸五十八年病痊仍發原省以知縣用補文登縣未抵任值新城縣修城大吏徇士民請檄大紳督工五



十九年工竣尋以曹縣任內舊案被議革職發往軍臺效力贖罪新城曹縣民爲捐金請贖得免歸嘉慶五年諭曰有人奏保劉大紳操守廉潔兼有才能辦理城工渡船二事民情甚爲愛戴該員籍隸雲南著初彭齡送部引見旋得旨仍發山東以知縣用嗣補朝城縣是年大雨水大紳以災報大吏駁之民素知大紳賢雖未得減徵亦無怨謗者十年署武定府同知適蝗蝻起登萊間復值河南黃河水漫自漕運河至大清河災甚鉅大紳奉檄捕蝗並查辦沿河賑務事竣以母年八十請終養歸旋丁母憂遂不出以詩文教授鄉里道光八年卒入祀鄉賢名宦等祠

張吉安

張吉安字迪民江蘇吳縣人乾隆四十二年舉人六十年大挑知縣分發浙江嘉慶二年署淳安調署象山阮元撰傳洋盜由閩擾浙必由縣境之南田大佛頭山而入沿海漁鹽民多以米及淡水火藥濟盜且嚮導之吉安嚴法禁盜漸窮蹙又遇颶風覆其艇洩至岸盡爲舟師所獲遂不敢犯象山提督李長庚歎曰牧令盡如張象山盜不足平也又嘗建議宜如明湯和策封禁南田以斷盜翼韭山當海道

衝宜增兵力事雖見格其後卒如所議四年奉浙江巡撫阮元檄署新城邑爲漕賦區去水遠倉設省垣民以折色輸官官購米兌軍多浮取爲平其折價民力以紓五年署永康蛟水猝發山石大如屋隨流下平地水深丈許田廬蕩析故事撫卹必待申詳報可且偏災多不查振吉安卽日履勘搭棚廠棲民阻水者具舟鑿之溺者具棺厝之巡道行縣不善所爲吉全力請於阮元給賑如例六年夏處州早元以吉安能卹民復檄署麗水下車步禱雨立至轉歉爲豐麗水山地險遠吉安就山寺讞獄民不苦廢時失事八年春署浦江縣浦江疊被水奸民鳩衆掠富室伐墓樹鄰邑多煽動吉安白大府曰聚衆肆掠非法無以止奸民聚衆以飢非米無以安良民良民安則奸民氣散請運兵米所餘往振許之民知吉安已請米勢漸解擒首惡論如律是年冬補餘姚九年春雨傷禾米價騰踊旣糶倉穀又請運川米五千石民食以足十年復被水鄰邑煮振於城擁擠傷亡日數輩吉安分鄉設廠別男女迄撤廠無枉死者邑多名區次第修復以工作代振 包世臣所撰行狀十四年引疾歸道光九年卒舊治士民皆跋涉來弔永康餘杭新城淳安象山麗水浦江均請祀名宦祠

紀大奎

紀大奎江西臨川人乾隆四十四年舉人父綸邃於易大奎幼時侍側輒與言易象一日謂之曰汝何觀對曰觀易曰觀易而已乎當以天地觀易以易觀心以心觀天地又曰以天地觀心以心觀易以易觀天地大奎於是研精殫思以求天人

之故盡通陰陽曆算之術乾隆四十三年以拔貢生充四庫館謄錄因得縱觀祕書由是學愈貫穿不可端倪五十年議敘知縣分發山東署商河縣事會李文功等倡邪說將誘民爲亂訛言四起大奎集縣民諭以禍福皆驚愕乞命他郡惑者聞之亦相率解散補邱縣後歷署昌樂棲霞福山博平等縣民皆敬而親之丁父憂歸嘉慶中選四川什邡縣知縣或謂什邡俗強梗宜示以威答曰無德可懷徒以威示於民何益未幾縣人士競爲詩歌頌德大奎謂同官曰無德且懷況有德乎先是奸民吳忠友據高山聚衆積粟講清涼教大奎偵知其事躬率健役夜半擣其巢獲忠友餘衆驚散下令受邪書者三日內繳予自新民遂安居擢知合州宋儒周敦頤曾通判合州大奎祀之合宗書院作示學者一篇發揮希賢希聖之學道光二年引疾歸年八十卒祀鄉賢祠合州名宦祠著有觀易外編六卷易問



六卷及周易附義老子約說上中下篇地理末學上中下篇古律經傳附考五卷  
筆算便覽五卷讀書錄鈔一卷

狄尙綱

狄尙綱江蘇溧陽人寄籍順天乾隆四十六年進士以知縣歸部銓選五十七年  
授安徽黟縣知縣有王姓者恃富豪縱尙綱以法懲之丁父艱歸嘉慶四年揀發  
廣東署化州知州化濱海俗獷悍尙綱解煩滌苛治以簡易民自不爲非明年補  
花縣縣地僻事簡屢調省發審要案博羅陳匪倡亂據鐵籠嶂大兵當其衝而慮  
匪旁逸檄尙綱統鄉兵禦之尙綱與兵同甘苦皆感激效命匪偵知不敢出遂窮  
困就殲九年代理香山縣事旋捐陞知府十二年選江西南康府知府先後在任  
二十有四年有武舉調族姪婦羞忿自盡者以無告發事寢有年矣尙綱甫下車  
武舉以他事涉訟尙綱反覆詰問忽露前情因窮究得實置之法羣驚爲神不期  
年理滯獄百餘無一留者聽訟不用刑威不設鈎鉅先事必詳觀案牘沈思研慮  
至廢寢食及訊囚絮語如家人聞者厭聽而已無倦容或夜以繼日囚卒感泣輸  
情實饒州有兩姓爭洲田世相仇殺尙綱爲判斷調和爭端永息南安會匪李詳

誥傳徒聚衆事發大吏檄尙綱按之戴奉飛實罪首詳誥爲從當減死論同官以詳誥巨富須引嫌尙綱曰無愧於中何嫌可避巡撫某亦疑與原奏不符尙綱曰不護前非乃見至公聖明在上又何慮焉力爭再三卒從其議株連者亦多省釋嘗言獄不難於無枉縱惟干證之牽累吏胥之需求受害者不可窮詰雖拘訊迅速究不能信其無弊生平思此時用疚心又曰人知命盜巨案之當慎不知婚姻財產細務尤不可忽蓋必原情度勢使可相安於異日不至釀成別故斯爲善耳南康自宋淳祐間始有城國朝康熙三年改築尙綱以其頽侈建議修復閱兩歲告成宋郡守孫喬年以郡治濱湖風濤險惡舟無泊所築石隄百餘丈廣三丈內浚二澳可泊千艘朱子知南康增築之於闡內浚池引泉以備旱名紫陽隄而池東一路水齧崩岸侵及城址明知府田瑄增築石隄亦百餘丈以衛之久俱圯尙綱增修兩隄丈尺一準舊制而堅緻過之府治東爲周子朱子祠拓而新之爲置祭田十畝又以匡廬彭蠡爲東南名山巨浸律以祭法應列祀典膺謚號申請奏封彭蠡湖神爲顯應將軍封廬山神爲溥福廣濟廬嶽之神春秋致祭著爲令蓼花池周五十里內田萬二千畝南受廬山九十九灣之水北流入湖水門淺隘積

潦每沒田廬尙綱親度疏濬歲增收穀萬餘石星子有官田租穀供鄱陽湖救生用向準時價折銀徵解田饒佃苦逃亡者累及親族尙綱三請咨部減半徵之歷署饒州吉安廣信護理糧道均敝衣蔬食不問家計旋卒於南康

### 蔣勵常

蔣勵常字岳麓廣西全州人金川用兵時父振閫署四川龍安府知府筦金川南路西路糧站事勵常隨左右廩食皆手自俵散役去他站來者至四千人有勛官至站驕貴甚陰使悍役折其氣而徐出禮之遂帖然去大軍進至噶拉依糧路險遠有放夾霸者土番也劫糧車於噶喇穆不及告而自以兵役擊殺百餘人後遂不敢犯大吏聞之曰以子才參吾軍事五品官可立致也辭不就乾隆五十一年舉人時州大旱貸錢居麥秋得兩施麥種於人明年又饑民剽掠爲變見知州曰請無用兵而先發粟以賑某往衆可立散遂以無事官融縣訓導去省遠士不樂鄉試乃汰文書錢列入官者以便貧士或以三百金賄獄事怒責之請除名於學使巡撫汪某重其名將改邊缺教官以擢知縣吏索賕不應遂引疾歸主清江書院十年士皆懷恩服教蔣氏丁萬餘人散遠不相識乃建安陽侯琬之大宗祠修



譜牒以禁族訟別昏姻而祭祀期會無寒暑必親往年八十餘每日猶徒步省墓當往來道有博戲者聞杖聲鏗然皆避去既卒門弟子百餘人以齒引奠於庭其居首者年亦七八十矣皤然老儒跪拜哭不勝其哀見者歎爲盛事有文集八卷名曰岳麓齋皆敘述古儒先條教及訓誨子孫門弟子者也

### 伊秉綬

伊秉綬福建寧化人福建通志父朝棟師其鄉雷鉉爲程朱之學官至光祿寺卿秦瀛光祿寺卿伊君家傳立朝有氣節唐仲冕撰揚州府知府伊君墓誌銘秉綬乾隆五十四年進士授刑部浙江司主事陞員外郎嘉慶元年充湖南鄉試考官三年授廣東惠州府知府甫下車問民疾苦裁汰陋規有豪辱寡婦子予杖荷校寡婦呼冤秉綬立拘豪鞠責民皆稱快倡修學宮趙懷玉亦有生齋文集揚州府知府伊君墓表建豐湖書院牖諸生以小學近思錄海上人士皆知有朱子之學唐仲冕撰墓誌銘秉綬故練刑名總督吉慶屢以重讞委之趙懷玉撰墓表海盜中有被脅未從盜者二十有二人律載三年減死比五年總督疑當重論秉綬以委未行劫五年一如三年宜從實請卒得問遣陸豐巨猾肆劫勒贖遲者支解力請於大吏震以兵威縛其渠七

人戮之唐仲冕撰墓誌銘六年七月歸善陳亞本將爲亂廣東通志提督孫全謀駐同城秉綬屢請兵往捕不允乃部役七十餘人夜擣其巢禽亞本趙懷玉撰墓表餘黨入羊矢坑廣東通志未幾博羅陳爛展事又且起又請兵於總督提督沮之兵仍不發秉綬言於提督曰舉兵愈遲則民之傷殘愈甚言已繼之以泣提督不得已予兵三百人秉綬復力爭曰偵虛實則三四人足矣如其用武以寡敵衆徒債事耳提督不聽以三百人往領兵者游擊鄭文照子身歸亂遂成廣東通志而秉綬適以博羅絞犯越獄呈議去官士民共籲奏留乃留軍營辦事當是時提督旣擁兵不前其標下兵丁卓亞五爲僞先鋒朱得貴爲僞三大王均通賊縱掠民旣死賊又死兵秉綬憤懣請兵益力遂逢總督怒復以失察教匪論戍軍臺會新總督倭什布至惠人訴秉綬冤者數千百人倭什布以入告上以情事與劉清之於魁倫相同有旨免罪回籍僚友伙助捐復原官兩江總督鐵保奏發河南特旨授揚州府知府時秉綬方檢高郵寶應災傷刺一小舟雖棲戶枉渚必親閱手書唐仲冕撰墓誌銘寢食俱廢趙懷玉撰墓表及之任尤劬躬率屬賑貸紛紜錙銖必覈吏無所容其奸倡富商巨室捐置粥廠費以鉅萬計誅北湖盜鐵庫子輩杖詭道誑愚之輩

兆和唐仲冕所撰墓誌銘它奸猾擾民者皆嚴治之趙懷玉撰墓表故民雖飢困心無惶惑唐仲冕撰墓誌銘歷署河庫道鹽運使胥稱職趙懷玉撰墓表尋以父憂去家居八年嘉慶二十年將入京道經揚州故有三賢祠祀宋歐陽修蘇軾及國朝王士禎道光二年以秉綬配食爲四賢祠梁同書名人尺牘小傳著有留春草堂詩七卷

劉體重 子煦

劉體重山西趙城人乾隆五十四年舉人嘉慶六年大挑一等以知縣分發湖南歷署石門新化衡陽臨武衡山湘陰等縣知縣捐陞同知改掣江西歷署九江袁州饒州南昌等府同知道光元年補袁州府同知署南康臨江等府知府陞廣信府知府六年調吉安府十三年再調撫州府其宦轍所在有聲於撫尤著甫視事親歷各屬相度當因當革諸事宜以時舉廢所至問民疾苦集父老子弟以孝弟耕讀相勸勉凡所區處曲中隱微而往復周詳無異家人屬吏不職參劾無少徇馭胥吏尤嚴有攬辦詞訟者發其奸慝痛懲之於府署堂後設治事所終日危坐內外肅然每夜分檢校文書訖出巡兩廊察吏勤惰僕從胥役非稟令無敢擅出



入者郡城舊有興魯書院體重厚其廩餼勤加培植尤崇尙經學剖析疑義娓娓不倦後遂相沿以五經課士焉其規矩嚴肅諸生中或偃蹇從事必繩以禮法體重性端謹動必循禮每丁祭輒先期詣學宮躬執灑掃滌器具於視牲習儀諸典亦胥蠲胥恪謂宮牆內事非可任之胥役於此不展其誠敬雖讀書何益其學術純正不爲異端惑郡有觀音堂仙居處前守奉祀惟謹命毀之社稷壇久圯捐貲於南北郊分立兩壇以符典制是年夏河水溢臨川下游被災竭力振卹散籽粒俾民補種雖災不害又籌建義倉以備荒歉捐千金爲倡郡民感德咸樂輸將積穀至五萬餘石就倉之廳事設義塾延師課童蒙陞任後紳民卽塾爲生祠祀焉稱曰劉公倉十四年擢河南彰衛懷道筦河務所屬爲河防要區每當黃流盛漲險工疊出體重集夫購料躬率廳營員弁往來巡行動數百里雖酷暑大雨無少息故終其任河流安瀾民無水患沁水隄由民修築體重以民隄單薄擇要築子埝並籌歲修費垂永久漳河無隄防田禾屢被淹沒體重深加疏濬水無泛濫虞道署駐武陟有安昌書院課武陟縣士體重爲三府士建河朔書院倣白鹿洞立條規於西偏祀十賢三儒附義塾訓課如撫州時以創建書院及防河功先後得

旨優敘十九年舉大計卓異尋擢江西按察使時新喻有糾衆抗漕之案巡撫令體重帶兵彈壓體重曰是激之變也單騎往諭之衆解散僅置首從二人於法二十年陞湖北布政使二十二年乞病歸尋卒於家體重整躬率屬廉平不苛尤長治獄每莅任必榜積案於堂次第清理於屬縣之案不行檄不遣差但函催解送人證至則立訊不肯須臾緩遇愬期坐堂上受牘詰數語卽灼知情僞雖險健者莫售其欺然慎笞杖每於訊鞫時引情據理多方開導俟其人輸情自屈始就斷嘗令屬吏各設循環簿二本將已結未結案刻期上聞卽於簿批示審讞當否故吏畏民懷詞訟日簡每去官士民走送數百里不絕二十五年入祀武陟名宦祠子煦 煦道光十八年拔貢朝考以知縣用分發直隸二十一年署鹽山縣知縣二十二年敘辦理天津海防功以知州陞用二十九年署武邑縣事咸豐元年署清苑縣旋補開州知州七年因辦團出力晉陞知府並賞戴花翎九年併案薦卓異仍發直隸候補十年上命順天直隸辦理團練並敕在京官員就地方情形各舉所知刑部左侍郎齊承彥等公同酌保督辦幫辦各員煦與焉旋署大名府知府十一年因在省督辦團防加道銜旋以克復濮州功命交軍機處記名遇有直

隸道員缺出請旨簡放同治元年擢大順廣道並命會同副都統撫克敦布辦理直東交界防剿事宜十月卒直隸總督文煜奏稱煦服官二十餘年歷任繁劇善政不可枚舉自黃河橫決開州適當其衝發帑賑濟煦必親歷災區清查戶口絲毫不容欺隱發帑不足必多方籌捐務令災黎均霑實惠不使一夫失所全活者數萬衆後因帶兵剿匪過開甫入境開之民扶老攜幼爭欲一見顏色爲快咸豐十一年春直東之交捻教各匪滋事圍撲大名府城是時煦攝府篆指揮兵勇統率同城文武僚屬登陴固守歷四十晝夜每乘間出奇擊賊郡城獲安六月間東匪西竄勢甚披猖畿輔震動煦奉檄督師由清豐縣之六塔集親率兵團節節進剿連拔堅壘乘勝直擣濮州老巢各縣團勇不期而會者萬餘人適大雨賊決河自衛平地水深盈尺煦激勵兵團屹立不少動賊窮乞降迨開濮水套復豎旗聚衆煦親率鄉團八千追賊於冰天泥淖之中三戰三捷水套底定辦理直東兩省糧臺當庫款支絀之時任勞任怨力求撙節卒因積勞病歿於官疏入得旨照道員軍營病故例議卹大名及原籍並建專祠

嚴如煜 子正基



嚴如煜湖南澁浦人少從學鴻臚寺少卿羅典究心輿圖兵法星卜之書乾隆五十四年以優行貢成均六十年黔楚苗變湖北巡撫姜晟聞如煜有幹濟才延入幕多所贊畫嘉慶三年舉孝廉方正時川陝楚教匪方熾制策平定三省方略如煜奏對幾萬言欽定第一次日傳至軍機詢屯政復奏上應辦事宜二十條蒙召見以知縣發往陝西五年總督長齡委赴南鄭褒城城固三縣地結寨練勇六年補洵陽縣知縣如煜勤於聽斷日坐堂皇治事或因公詣鄉有赴愬者立馬訊結又以縣宅萬山中與湖北之鄖西竹溪陝西之鎮安白河毗連官兵追賊急往來折竄皆道洵陽如煜率民築堡練勇戒勿迎擊鈔其尾擾其疲豫儲糗糧於衝寨以待官兵督寨勇生擒賊帥陳朝覲於陣又與官軍夾擊張天倫張三標熊翠兒等大敗之於太平寨經略額勒登保參贊德楞泰上其功詔加知州銜賞戴花翎八年擊斃楚北逆匪二千餘人於蜀河口斬賊帥王詳擒賊目方孝德命以同知直隸州卽用九年補定遠廳同知捐修城垣七閱月竣工復於廳之西南百餘里擇要地黎壩漁渡壩築二城置社倉三所團練武備如治洵時先後擒陳心元馮世周等巡撫方維甸奏請賞加知府銜十年丁生母憂十二年服闋仍發陝西以

同知用十三年補潼關廳同知十四年擢漢中府知府先是寧陝新軍移駐郡城民困兵驕如煜視事聯營伍立保甲朔望周歷城郭宣講科律問民疾苦農事與撤蓋行赤日中獎勤懲惰行區田法製紡車式俾民務耕織饒生計漢郡田疇向資渠堰灌溉小堰不下百餘其大者如南褒之山河堰城洋之五門楊墳二堰各灌田數萬畝如煜履勘形勢與紳耆講求疏蓄啟閉水利均沾郡城舊有漢南書院軍興改爲行館如煜首出廉俸並勸捐數千金充脩脯月米之資拓基址建講堂齋舍仿鹿洞蘇湖學規五日一臨躬親講授文風丕振所成就士以科名起家者數十人十五年巡撫董教增檄勘寧陝新舊二城是年秋雨連旬所轄鳳留等處山田歉收道殣相望如煜自寧陝返郡請展賑期十六年元旦趨撫轅請以一官易百姓命教增破例爲奏請全活無算寧羌山中有楚北王姓以飢民乞食爲名聚衆劫掠如煜星馳至州誘擒之餘衆榜示歸業十七年城固民人陳恆義習圓頓教與京師民婦高張氏通密書相勾結事發如煜往緝但治從逆釋其株連者人心帖服十九年防範岐郿匪徒供運軍餉著績得旨加道銜二十五年授陝安道會廷議以川陝楚接壤州縣添文武營廳爲綏靖邊疆計川督蔣攸銛奏委

如煜查勘建置城口白河輒坪太平四廳縣丞倅營制有差尋復請設佛坪廳移駐文武員弁三省邊防始固道光三年諭曰陝西陝安道嚴如煜在陝年久於南山情形甚爲熟悉該員任事以來地方安靜洵堪嘉尙著加恩賞按察使銜以示鼓勵巡撫盧坤以如煜素諳溝洫漢著有成效欲溥其利於全秦檄視豐涇澆渭諸川鄭白龍首諸廢渠規畫俱備五年授貴州按察使六年正月入覲調陝西按察使三月卒於任贈布政使銜陝民籲懇崇祀名宦湖南人亦請入鄉賢祠撫臣據以上聞均允之著有洋防備覽三省邊防備覽漢江南北及三省山內各圖樂園詩文集子正基 正基原名芝少隨父如煜練習吏事嘉慶十八年由副貢生充八旗教習期滿以知縣用道光六年分發河南旋丁父憂服闋仍赴原省先後署理武安禹孟息等州縣事十五年補靈寶縣知縣靈寶界萬山中地瘠民刁構怨者每自擠老幼墜崖死因詐索怨家資財正基遇其赴訴卽往相驗出俸錢勒其親屬領瘞違者懲之澆風頓止以勤學端品訓士類不善者咸斂迹縣多狼正基爲誓文告城隍神狼患竟息因拏獲鄰境劫掠首盜調取引見以知州用二十年擢鄭州知州先是州有賈魯河水漲潰史家隄田廬漂沒是年歡河口又漫



溢開塞久無定議正基相度形勢先築歡河口次修史家隄兩患皆除黑岡之決也大溜蓄開封府城勢危甚巡撫檄正基入省司防堵事時護城兵有誣河兵欲逃者縛數十人擬置重典正基廉其寃請釋之由是河兵感激併力搶護城賴以完二十一年丁母憂回籍二十五年服闋赴部補行引見上問如煜在陝西治績諭以繼志二十六年授奉天復州知州州瀕海盜甚熾民殺盜者盜家因以命案控事主轉受其累或爲盜所戕而官不爲捕民益困正基立條教行屯團且諭民遇有持械盜殺勿論盜多逃鄰境正基乃申請府尹飭所屬並依復州法鄰境亦大治復地卑溼以足疾乞去時江南督撫以正基諳習公事令起病保留江南委辦清查各屬錢糧尋簡授江寧遺缺知府二十九年補常州府時湖廣江南北皆大水正基乘舟勘災者踰月復設局勸賑常州人感其廉明輸錢至二十餘萬全活以億萬計三十年署淮揚道尋署按察使以禮部侍郎曾國藩工部侍郎呂賢基先後保薦奉旨交李星沅差遣委用三月廣西巡撫周天爵奏派正基督辦總理糧臺四月補授廣西右江道十月超擢河南布政使並諭俟軍務完竣赴任正基患賊勢披猖而將帥齟齬乃致書多方慰勸並疏言師克在和事期共濟必統

兵大帥與地方大吏定紛更不齊之勢聯疏闊難合之情布德信以服人心明功罪以揚士氣勿因賊盛而生推諉勿因兵單而務自全勿以小忿而不爲應援勿以偶疏而坐觀成敗咸修和衷之雅各致用命之忠庶逆氛可殄大功可成矣咸豐二年廣西省城圍解正基以守城功賞戴花翎因轉運糧臺隨大軍赴楚值武昌收復正基自岳州奉命馳往撫卹難民歛骸齎修城郭安集流亡勤苦備至尋署湖北布政使四月奉旨仍回廣西核辦糧臺事務七月調廣東布政使仍留廣西旋命來京以四品京堂候補十月補通政使司副使五年陞通政使七年七月足疾作遂告歸同治二年十一月卒

李賡芸

李賡芸江蘇嘉定人事繼母孝少讀書淹貫經史嘗受學於同邑錢大昕通六書蒼雅三禮慕許慎之學自署許齋乾隆五十五年進士以知縣用分發浙江旋補孝豐縣知縣調德清再調平湖邑故有陸隴其祠賡芸下車卽展謁之以隴其曾宰嘉定而已以嘉定人令平湖故一切政治悉奉隴其爲師法盡心撫字訓士除姦邑中稱神明嘉慶三年九卿中有密薦賡芸者詔詢巡撫阮元元奏稱賡芸守

潔才優久協輿論爲浙中第一良吏上以賡芸循績久彰自應格外優獎六年陞處州府同知七年調嘉興府海防同知八年調署台州府知府十年擢嘉興府先是金華處州兩府被水金華苦無錢而處州則乏米賡芸奉檄辦賑領銀二萬以其半易錢加賑於金華又以其半購米減糶於處州民皆便之是年嘉興亦被水賡芸賑以粥全活甚衆十四年丁繼母憂十七年服闋補福建汀州府知府十九年閏六月調漳州府九月陞汀漳龍道二十年八月陞按察使尋署布政使十二月入覲二十一年授布政使初賡芸守漳州時漳俗故獷悍嘗械鬪負則鳴諸官及拘犯又匿避縣必會營以捕龍溪縣有械鬪署平和令朱履中言會營則多費請獨往賡芸信之檄令去久之終不辦始稔其詐暨署布政使因改履中教職履中在任多虧累恐獲罪先揭於總督汪志伊巡撫王紹蘭謂虧帑由道府婪索督撫合詞奏請質訊解賡芸職嗣知事誣志伊迴護前奏必欲實其事委福州府知府涂以輶翰之賡芸之去漳也承造戰船工未竣留其僕督率之僕假履中洋銀三百圓詭以墊用告賡芸如數給之僕匿不以償賡芸不知也以輶阿志伊意爲增其數至一千六百逼令自承辭色俱厲賡芸以名節攸關不肯誣服旣慮爲獄



吏所辱遂自經二十二年二月事聞命吏部侍郎熙昌副都御史王引之馳往按其獄事乃白上以賡芸之死由汪志伊固執苛求而成於涂以輶之勒供凌逼遂褫志伊職以輶履中俱遣戍黑龍江紹蘭以隨聲附和革職賡芸立意刻苦廉隅自勵不名一錢其歿也幾無以爲殮百姓感其德因臚在閩時平獄止爭戢暴靖匪諸善政請建遺愛祠祀焉熙昌等據以入告上謂爲斯民直道之公特允所請

方積

方積字有堂安徽定遠縣人拔貢生乾隆五十七年以州判分發四川累勞補閬中縣知縣時達州賊王三槐徐添德等作亂梁山縣當其衝積奉檄署梁山賊犯境營白兔山守兵潰積以百人據小山爲疑兵賊不敢近築七斗諸砦二百餘所令人自爲守他邑流民依集者三十餘萬人賊至無所掠食積復出奇兵大挫之悉遁走當是時賊蹂躪連數郡縣積首行堅壁清野之法城賴以完其後遠近效倣卒以滅賊初萬縣寶靈寺賊起積由梁山越境平之以功加知府銜繼佐諸將殲伍文相於石壩山走林亮功於望牛埡殺亮功弟廷相賞戴花翎擢寧遠府知府仍留駐梁山前後凡四年嘉慶六年調夔州府賊亦以次平八年陞授建昌道

奉命討涼山生番山多妖沴白晝陰霾作雷雨連數日不得進積爲文以檄之一夕霽師進斬獲甚衆番懼乞降未幾裏塘正土司索諾木根登殺副土司奪其印阜和協副將德寧以兵入爲所困積單騎往密授意土司之舊頭目希拉工布以其衆破之歷任川北道鹽茶道十二年陞按察使馬邊前後營熟夷赤夷與峩眉嶺夷結涼山生番寇邊積偕提督豐紳由馬邊三河口鑿山深入克六拔夷巢遂由赤夷間道進攻嶺夷十二地浹旬之間每戰皆捷曲曲鳥助逆殊死拒乃潛師出其後殄滅之十四年擢四川布政使僚屬多故交積清節自勵定立程格無纖毫瞻徇十六年總督常明奏請重修四川通志積公暇咨訪商榷是非書垂成而卒四川通志積官四川二十餘年一統志馳驅殆遍山川夷險瞭然於心故措置有方用兵能獨當一面四川通志屢奉諭旨褒嘉卒後入祀名宦祠一統志著有敬恕堂詩集六卷四川通志

### 史紹登

史紹登字倬雲江蘇溧陽人大學士貽直之孫以順天鄉試挑膽錄敍布政司經歷發雲南國朝先正事略乾隆六十年署文山縣知縣雲南鹽歸官辦苛刑抑配民

不堪命紹登到官卽弛其禁釋獄中逋課者數百人民以大治閱三載配鹽之五十七州縣一日同變乃改商辦以寬民依文山式也苗匪起貴州距文山尙數郡紹登策其必至乃集吏役健者親教以打鑣期三十步外必命中以備不虞嘉慶元年四月苗匪竄鄰境之邱北又潛與文山各寨獍狽通紹登謂不救邱北則文山獍狽必不靖遂親帥三百人往人授刀一握鐵鑣三十枚既至當者輒仆復卡汛以十數廓清邱北而雲貴總督勒保剿苗失利被圍於貴州之黃草坪月餘復奉雲南巡撫江蘭檄往援至則賊圍十數重內外不相聞紹登迎陣以鑣擊之皆靡賊死如積遂奔潰逐北三四百里七戰皆捷乃返黃草坪先是解圍後三日黔滇以兵至總督德之甚比紹登上謁總督曰若文官亦遠來問我耶紹登陳解圍狀總督怒曰圍果若解何不入城一見我紹登曰入謁則賊不可盡請遣官至城外及七戰處驗賊尸係鑣傷者文山民壯所奮擊也若刃傷請伏冒功法總督初欲劾紹登覆勘得實乃已而巡撫聞紹登與總督辨大懼令自備經費不入軍需報銷以是虧帑至二萬十月兼署蒙自縣縣雖鄰文山而兩城相距三百里莅蒙未一月交趾賊目儂福連結粵匪賀成猿等數萬人文山境紹登匹馬馳一晝夜



入文山城領民壯出剿擒首從二百人硿卡悉復總督以爲能奏擢雲州知州仍留署文山默酬解圍功也三年文山大水發倉粟救民四年初彭齡來爲巡撫性好察開化故有總兵官當蒙自變時土人榜通衢曰總兵守城知縣打仗總兵銜之初彭齡詢總兵曰聞史令不要錢信否總兵曰小錢卻不要遂以虧帑劾紹登士民聞之刊章臚紹登文武政績題曰天理良心復設甌邑廟釀金至三萬初彭齡聞之甚悔以旣完虧奏留任仍餘七千金無可返乃立案存庫爲公項後任欲乾沒之士民請於臺司建開陽書院焉七年署維西通判廳民恆乍縹爲亂巢險固不可攻紹登廉得巢後巖壁斗絕阻大溪水急如箭乃以篋爲大縵募善泅者繫長繩於腰繩尾續大縵旣渡溪引縵繫巖樹對岸急引如窄橋縵套篋圈圈下繫小板可坐紹登先上板以手攀縵揉接登巖頂壯士三百人從之賊大驚亂擒馘淨盡事平賞戴花翎九年卒

### 蓋方泌

蓋方泌字季源山東蒲臺人以拔貢就州判陝西署漢陰廳通判石泉縣知縣嘉慶三年署商州州同知治商州東百里曰龍駒寨寨之東爲河南南出武關爲湖

北路四通縮商賈輸寫之會梅會亮所撰蓋君墓志又多林莽山徑易憑匿時川楚教匪亂賊屢由武關入陝西寨方泌始至民吏埽地赤立而賊酋張漢潮擁衆至乃置藥麪中誘賊劫食多死遂西走大軍乘之漢潮由是不振然且揚言曰必報若方泌集衆謀曰賊雖去必復東若等逃亦死守不得耕種亦死我文官也無兵若能爲吾兵當全活爾衆議三日而後復曰生死唯命乃築堡聚糧戶三丁抽一得三千人無丁者以財佐糧糗兵械親教之戰辰集午散曰無廢農事國朝先正事略四年賊屯山陽鎮安將東走河南迎擊敗之又擊賊於鐵峪鋪逐賊於林中矛折賊已近奪矛以斃賊時賊據山上而伏其半於溝乃分兵翦伏奪據其東山上數乘懈擊之殺傷過當賊宵遁卒不得東後賊由雒南東逸方泌馳至分水嶺間道走鐵洞溝出賊前而伏賊錯愕迎戰遂敗殺數百人鄉兵名由是大振自武關至竹林關鄉兵皆請隸龍駒寨五年知州困於賊方泌馳百九十里至北灣賊驚曰龍駒寨鄉兵至矣則皆遁是時賊屯商州西及雒南山陽各萬餘人欲東出方泌勒武關竹林兵二萬人列三大營以待賊不敢前而聞官軍自商州至卽前擊賊東西夾攻賊大敗幾殲是役枕戈而寢者五十日遊擊某誣以事解職大吏直其

謾得留任賊遂相戒無過商州八年授整屋縣知縣猶時時入山搜賊巡撫上其  
功賞戴藍翎又生獲寧陝倡亂者四十餘人境內甫定卽捐俸振飢旌死節婦及  
河灘馬廠鹽法皆區畫久遠計擢寧陝同知仁宗召見問商州事甚悉授四川順  
慶府知府大吏聞渠縣民畔屬以兵方泌曰此作會人衆客主相驚疑訛言橫興  
非畔也捕十二人而變息調成都府知府十八年岐郿有賊入川以鄉勇屯川陝  
要隘賊知爲統龍駒寨鄉兵者也卽遁歸陝就滅丁母憂歸服闋授福建延平府  
知府賊有周永和者總督欲以兵致討方泌懸賞三十金捕誅之尋調臺灣府兩  
署臺灣道所讞四獄皆千百聚羣稍激則變方泌一以理論蔽罪如法彰義縣饑  
捕劫者七十人置之法天乃雨民呼爲太守雨道光十八年卒年七十有一

墓志

梅撰





清史列傳 卷七十六

循吏傳三

劉台斗

劉台斗江蘇寶應人重修寶應縣志父世蕃兄台拱在儒林傳台斗阮元擘經室集劉君傳嘉慶四年進士官工部營繕司主事傳經學於其父兄尤究心水利凡治河得失漕輸利弊無不洞知其源流阮元擘經室集劉君傳十一年治河之役興大吏薦台斗知河事朱士彥文定集劉君傳奏留南河協塞王家營減壩重修寶應縣志時河決入射陽湖衆議有欲因其勢改建新河由射陽入海者台斗作黃河南趨議千餘言駁之上之總督曰今歲黃河漫溢自陳家鋪池下漫口數百丈將有南趨之勢蓋地勢北高南下若順其就下之性則舍舊圖新似亦因勢利導之機也然竊見新河有難成者五有不可不慮者四夫漫口數百丈耳而口門以下愈遠愈闊至四五十里六七十里不等河面太闊無以束水水寬則流緩流緩則沙停此難成者一也現行溜勢奔騰四注數十里之地或東或西十數日之

間或深或淺河無一定之形溜無一定之勢此難成者二也且漫口向南而大溜先向西南轉趨東北若因之成河則是折一大灣迎溜必生險工對灣仍致淤阻下壅上潰未見其暢流歸海此難成者三也且放新河必須築一南隄又須於清黃交界之處中間隔一橫隄乃數十里中汪洋一片人力既無可施取土更無所出此難成者四也凡言湖者皆瀦水之區非行水之道若射陽湖有出水之口則滔滔下注久當涸出五壩之水不當停積中法矣謂之爲湖必如孟如釜外仰內凹故水滿則溢水平則停蓋盈科而溢出海灘非暢流而直趨海口也現在河流南注勢似湍激者以瀕湖一帶地勢較河身爲低以河面較地勢又低故此時似暢究之湖外之海灘仍反高仰非如海口得建瓴之勢也河將入海必束之使高於海面故能敵逆上之海潮以衝突入海若今射陽湖口則河流趨湖雖由高入低而由湖赴海之路反由低入高以低就高數年之後必至淤阻此難成者五也更有不可不慮者夫五壩減下之水減入下河者也往時五壩一開雖無黃流之阻尙且淹漫數縣之地停蓄數月之久必須閉壩而後就涸未有壩未閉而先行涸出者若分射陽湖以爲黃水之道則清水去路爲黃水所奪減壩之水全積下



河不能容納此可慮者一也運河開洞之水亦歸入下河者也一爲黃流所阻去路日高水無所歸以內地爲壑此可慮者二也淮南之鹽場東南財賦之藪也沿海場垣瀕於鹽阜今若逼近黃流淡水內浸產鹽必少清水內壅場垣必淹此可慮者三也至於黃河本有南趨之勢阜寧地勢高於鹽城鹽城地勢高於興化愈南則愈低今若導之使南再有漫溢則就下之勢必入興鹽一入興鹽則不能入海而南入於江是河與江合江淮河漢四瀆合流是古今一大變遷也杞人之憂又不止淮揚二郡之生靈東南一帶之財賦矣於是南新河之議不果行阮元擊經室集劉君傳旋奉檄勘下河水利悉得要領朱士彥文定集劉君傳又上書曰山盱五壩減出之水歸入下河者以高郵各壩爲口以壩下引河爲喉以興鹽各路湖蕩爲腹以串場河各閘爲尾閭以范隄外各港口爲歸墟必須節節疏通使水不中停層層關鎖使水不旁溢方能引水歸海而保護田廬數年來各邑受淹之故以壩下引河淺窄而兩岸十餘里外卽無隄形是以減下之水不能下注先已旁流此高郵受災之緣由也壩水注之興鹽渟蓄湖蕩湖蕩雖能受水而不能消水旁無隄阻下無去路盈科而進者仍復泛溢四出在湖蕩之上者誤以湖蕩

爲歸墟在湖蕩之下者止知曲防壑鄰幸游波之不及而壅極必潰雖少緩須臾亦復同歸於盡此興鹽各邑被水之緣由也場河淺故上游之水不能驟洩海口高故場河之水不能驟出加以壩面寬而閘面窄來源多而去路少猶以斗水注升欲其暢流不得矣此范隄內外被水之緣由也誠使壩下之引河開掘寬深堅築隄防引歸湖蕩則高郵之田可保矣湖蕩之旁圈築圍圩約攔水勢仍留去路導入場河總使水有下注之路而無旁溢之門則興鹽一帶之田可保矣再於場河挑深酌添范隄閘座並挑通閘外港口則范隄內外之民竈可無虞矣惟是場河以外形如釜邊場河以內形如釜底以釜底洩入釜邊必須擡高水面方成建瓴若以挑河之士堅築兩岸之隄則地勢雖內低外仰而水面仍內高外下也如此則有溝有防表裏相應誠一勞永逸之計矣總督遑之未能行阮元學經室集劉君傳後六七年上命大學士松筠履治下河卒如台斗議朱士彥文定集劉君傳十二年以同知簡發江西阮元學經室集劉君傳署南昌府吳城同知吳城去南昌百六十里糧艘所必經十三年春江水小糧艘不得達上官命以商船剝糧台斗親步江上視有貨貨者悉釋之以虛舟應事濟而民不擾吳城商賈屬集盜

賊滋多台斗嚴捕緝寒暑不懈其地殺牛者歲進銀四百兩得不禁往往盜之農家牛值踊貴台斗卻不受犯必懲遂無訟盜牛者徽州商兄弟訟台斗勸諭之皆涕泣自悔明宸濠之亂吳城人葉景恩率其族三百人戰不勝死者四十八女九姑爲宸濠所得亦投水死三百年事未上於朝台斗以狀上遂得祠祀朱士彥文定集劉君傳吳城民多板屋居值火災燔燒千餘家台斗至爲設水龍六坊各一梯衝鉤鉞及儲水器各數百坊立役夫二十人以時習其激躍轉輸之事官給以食均勤情爲賞罰又多掘井以備綆缶立數萬算役夫以外民有擔水一石與算一官給以價以是吳城不復火巡撫下其法通省仿行之在任二年阮元擘經室集劉君傳民懷其德補瑞州銅鼓營同知未抵任謝病歸朱士彥文定集劉君傳瀕行吳城民持鏡一水盂一拜舟前曰象公明且清相泣別去其清操感人如此重修寶應縣志歸三年貧不能自存十八年復赴江西候補十九年卒於南昌朱士彥文定集劉君傳所著有下河水利說一卷阮元擘經室集劉君傳又星槎遊草一卷劉台斗星槎遊草

### 吳梯



吳梯廣東順德人嘉慶六年舉人以方略館謄錄議敘選山東蒙陰縣知縣蒙陰故瘠邑聞者色沮梯笑曰我輩志不在溫飽甫得官卽計肥瘠耶遂之官至則令鄉舉齒德士爲公正給戳記俾防盜除夕漏下忽有距城四十里某公正以巨盜驟歸來告者梯立督捕役馳詣盜所倉皇就縛嚴訊不吐實威以極刑作鼯聲蓋邪教林清餘黨也乃訊盜婦知爲他縣劇賊比移查而盜斃獄中矣縣當孔道額設驛馬每年以舊馬瘠者易新馬馬未到則以民馬換民每苦驛卒浮索多以疲駑應之往往誤差民累官亦累梯革除之復諭民種茶樹除糧催皆有實惠鄰邑蝗發獨不入蒙境民以爲德化所感旋調濰縣縣濱海圖利者欲上議開港招商梯思濰與海通時防賊擾更開他港恐後患甚鉅拒不允邑多水患浚河修隄其患頓息再調禹城禹城歲漕六千餘石用漕車六百餘輛外復創薊車名百姓苦添派梯下車卽裁革之邑故有官價梯一按市估平給聽訟鞫囚尤不敢率斷某縣嘗有劫案被獲者梯與審焉刑未加賊已吐實獄成梯獨不畫諾曰賊少而不實不成信讞上官不悅適河東解盜至賊犯全獲乃喜曰吳令真老吏也擢任膠州知州年饑穀貴梯勸捐雜糧菽一糝五稷秫各二攬和爲半價分糶復平糶倉

穀萬餘石穀罄而價愈騰適得豆餅濟飢策截留豆餅百六十萬斤敷五萬人一月食於是城鄉分廠出糶糧價頓平以所得餅值歸商民弗飢而商力亦弗耗嗣後膠州饑踵法行之民無餒者郎中某巨富卒無子妻陳氏擇族子爲嗣遠族舉人某私結郎中族叔強以己子入繼陳訟於官梯令立賢而親者爲嗣嚴諭其族紳曰陳氏母子有他故惟某舉人與族叔某是問氏母子卒無恙再擢濟寧直隸州知州州有李澍者最富上官欲彌補鹽餉牒州取澍充鹽商梯以逼勒充商必致破家自爲稿申覆力陳勒充之弊懇請永禁大吏悟據情轉奏李得免以千金爲梯壽梯力卻之去任再餽仍弗受梯凡莅任必與差役約因犯罪重輕爲賞錢多少差票限日收繳藉票毒民者革役反坐命盜案須詣勘者夫馬自辦署明於牘尾故相驗無供應之累任某縣時有犯逸爲鄰省所獲姓名籍貫案由皆符合既認狀鄰省置諸法移山東飭縣銷案梯以道遠慮有賄囑認案者存未銷數月後果於縣境緝獲本犯縣有莊丁某得罪主人變姓名逃匿其母疑子與莊主女姦爲莊主所殺因以殺子沒屍控莊主女數欲自盡梯訪無確據因思女不到案則案不結脫到案畏羞自盡汚人名節且殺人非慎憲之道乃入莊諭懸千金賞

購莊丁不數日獲之事遂得白梯在禹城時布政使朱桂植以薦於巡撫巡撫方以浮言擬撤梯任屬朱暲之朱至濰縣縣民莫不嗟歎以官之去濰爲恨遂極力保全之卒爲循吏嗣卒年八十三

### 李文耕

李文耕雲南昆明人嘉慶七年進士以知縣用分發山東補鄒平縣知縣十五年以疾去官十九年病痊仍補原缺在任五年以清訟息爭戢暴安良爲務尤盡心教化民婦陳氏訴其子忤逆文耕引咎自責其子悔悟叩頭流血而卒改行爲孝邑素多盜文耕立獲盜賞格設捕役工食釐弊剔奸窮詰窩頓盜風以息創立義學及梁鄒書院使諸生誦讀其中親策勵之二十四年調冠縣二十五年擢膠州知州所至皆有循聲道光二年陞濟寧直隸州知州三年陞泰安府知府四年調沂州府泰沂素稱難治而沂俗尤強悍文耕立屬吏課程頒示前治鄒平成法謂官不勤則事廢民受其害而勤本於仁無痾瘵在抱之心必不能殷殷於民事又本於誠無旦明對越之隱必不能懍懍於官箴官吏多化之沂地產櫟文耕勸民廣植養蠶復捐義倉備荒尤勤於捕盜掖匪鹽梟望風斂迹民風一變旋遷兗沂曹



濟道五年晉兩浙鹽運使六年調山東鹽運使時鹺商多虧累文耕分別緩徵令富商領運不得以引地滯銷賤價私賣七年擢湖北按察使未至任調山東除懸案不結之弊吏治肅然十年再調貴州按察使立紡織局使民織棉布以敦節儉家喻戶曉勞瘁不辭十八年卒入祀名宦並鄉賢祠

### 李毓昌

李毓昌山東卽墨人嘉慶十三年發江蘇以知縣用總督鐵保使勘山陽縣振事親行鄉曲鈎稽戶口廉得山陽知縣王仲漢冒振狀具清冊將揭總督仲漢患之賂以金不爲動則謀竊其冊使僕包祥與毓昌僕李祥顧祥馬連升謀不可得復於仲漢曰是無可奈何計惟死之耳毓昌飲於仲漢所夜歸而渴李祥以藥置湯中進毓昌寢後包祥至入室毓昌方苦腹痛而起包祥急從後持其頸毓昌張目叱之曰若何爲李祥曰僕等不能事君矣馬連升解已所繫帶縊之嘉慶十四年六月七日也仲漢以自縊復於淮安府知府王穀穀遣驗視之報曰尸口有血也穀怒杖驗者遂以自縊狀上其族叔李太清與沈某至山陽迎喪沈某檢視其書籍有殘藁半紙曰山陽知縣冒振以利昭毓昌毓昌不敢受恐負天子蓋上總督

書藁諸僕所未知毀去者也喪歸毓昌妻某氏有噩夢啟棺視面如生沈某以銀針刺之針黑沈某曰是有冤不可不白矣李太清走京師訴於都察院上命提王穀王伸漢偕諸僕至刑部會訊命山東按察使朱錫爵驗毓昌尸惟胸前骨如故餘盡黑蓋受毒未至死先以縊死也具聞於朝天子震怒斬包祥置顧祥馬連升於極刑官押李祥至毓昌墓所摘心以祭穀伸漢各論如法江南總督以下貶謫有差贈毓昌知府銜封其墓仁宗自爲愍忠詩三十韻命勒於墓上毓昌卒時年三十餘無子詔爲立後梅曾亮撰傳嗣子希佐賞舉人太清亦賞武舉李元度國朝先正事略

孔傳坤 徐邦慶

孔傳坤順天大興人孔子六十八世孫嘉慶十四年以從九品投效南河署江蘇宿遷縣歸仁司巡檢道光元年署桃源縣管河主簿旋授阜寧縣羊寨司巡檢調宿遷縣劉馬莊巡檢十四年陞寶應管河主簿淮水挾汝潁渦滄淝諸流由運達江恆爲淮揚患國初以來沿隄寘牯洞以殺其勢亦藉以灌民田主簿領四牯三洞北起劉家堡南至界首鎮長四十里灌溪田數千百畝當糧艘北上與栽種

同時河水淺則不能運溪水涸則不能漑牖夫洞戶往往藉利漕爲辭持緩急以徼利水盛又以護隄爲辭延不閉傳坤定法啟閉在寶應十年農運無失時每歲修必躬率徒役伏秋大汛雖風雨巡行隄上日夜不少息堡戶久圯出廉俸賃民居爲夫役止宿多給燭火以資防守發餉銀必分包按名唱給人不得虛領故夫役無多而咸得其力十九年春運河水少落揚河廳丁映南奉漕督檄令閉閘傳坤言農田待澤正殷詳度水勢閘不閉亦足以資運丁訶之傳坤曰官可棄閘不可閉也後漕船卒濟同汛多武弁與前任相齟齬傳坤以誠待之皆樂爲用又倡修義學擇紳司其事不假官吏手歲凶荒出資於城北蓋草屋城南易以瓦冬則取雞鴨羽毛蔽地上寒溼栖流民又時給絮衣散藥餌施棺木不足則人給蘆席四麻繩三錢二百作埋瘞費其於人諄諄勸以孝弟有陸姓訟子者使自答之不及十數父母皆泣下子亦痛哭悔罪凡工作屠市有官價者皆平與之未嘗私役一人私取一物暇輒計工役訪陋規徒行民間問以疾苦其任宿遷劉馬莊也有阜河武弁子橫行鄉里傳坤籍諸惡狀執而置諸法別繫其黨速縣令來撻之市一境帖然又有鬻其嫠嫂者嫠脫歸訴諸傳坤傳坤命擒送諸縣并捕鬻販者遺



婦女一舟釋歸者二十餘家河督張文浩爲郡丞時傳坤佐嘗迓之及文浩總督南河首薦之曰吾數與孔某共事嘗以爲戇然安得百執事一如孔某者今薦之已後矣二十四年以病去官家寶應三十年卒寶應及宿遷士民來弔者數千人祀名宦祠 徐邦慶江蘇山陽人官寶應把總二十餘年勤求民隱百姓德之每歲寒中夜起巡視四境烏槍之聲達旦盜賊無敢至者邑故貧民屋茅茨相接值火變往救必先至踴躍登屋火未及然斧斷其梁俾自撲滅又身從鬱攸毀下風屋宇使無延燒旣熄恐餘燼復然必率衆濡以水使滅乃已歲稔督視賑卹無絲毫入橐邑人公捐賑粥必蚤起先董事至廠所人具饌峻卻之不食日自備一舖以療飢風雨不改鹽梟潛匿菹澤中地方官不能治聞邦慶至輒俛首伏罪兩江總督鐵保欲右遷之格於例及卒家貧如洗云

張琦

張琦江蘇陽湖人嘉慶十八年舉人以臚錄議敘知縣道光三年分發山東署鄒平縣歲且盡琦閱村四百七十麥無入土者卽申牒報災明年正月四日卽赴省呈牒布政使朱桂楨面言狀朱請於巡撫破成列入奏因鄒平得緩徵者十六州

縣民失物誤訟於長山獄歸琦琦曰汝失物地大樹北抑樹南也曰大樹北琦曰若是則我界也民愕然曰誠鄒平耶卽不欲以數疋布煩父母官持牒去後權知章邱鄒平民時赴訴琦曰此於法不當受者也慰遣之章邱民好訟院司道府五署吏皆籍章邱走書請託揜撫短長無虛日琦莅任歲餘五署內無一紙至結案二千有奇亦無一翻控者五年補館陶會久旱風霾三日夜沙塵壓麥苗皆死饑民聚掠琦禱得雨乃嚴捕倡者得富民閉糶居奇狀分別按治民大悅琦因請普賞口糧人兩月館陶地褊小琦造應賑冊多鄰邑數倍大吏呵之忽有詔責問歲饑狀甚切乃按臨災區民迎訴賑弊惟館陶得實始劾罷他邑令而厚慰琦在章邱館陶鄰邑大蝗皆不入境及秋大雨雹亦皆在不耕之地士有訟者閱其辭不直則曰課汝文不至訟乃至耶試責以文不中程後乃決事士訟遂稀其仁術兼濟類如是館陶地斥鹵不宜穀又衛水數敗田琦精求古溝防及區田法試行之未遂病卒琦善醫術民有病者設局自診之精輿地之學與兄編修惠言齊名著有戰國策釋地二卷素問釋義十二卷詩文集四卷

劉衡

劉衡江西南豐人副貢生充正白旗官學教習期滿以知縣用嘉慶十八年分發廣東歷署四會博羅等縣事補新興縣知縣父憂服闋選四川墊江縣知縣署梁山縣旋調巴縣衡爲人明察敏事習文法然持大體通達下情其治愛民如子勤力有方略好爲民興利除弊誠信動人故所居見愛去見思學務經世經史百氏無不通尤嗜尋繹律義始以知縣候銓家居時其祖編修焯父歲貢生斯禧謂令最親民亦易厲民日夜與衡究論古循吏爲民實政初之粵奉檄巡河廉知巡河兵役素通盜日夜坐臥船中與卒役同勞苦俾不得逞其奸河盜斂戢所部肅然四會爲粵瘠邑盜賊往往白晝掠人官不能治反鉗繫亡家盜滋熾衡乃仿古寓兵於農之制團練壯丁連村自保盜不敢近尋奉命調捕會匪得其籍臚載人多遠近駭動亟焚之以安反側祇擒治其渠衆乃定博羅城中故設徵糧店戶數家鄉又設十站民苦繇重衡至卽撤之邑多自戕案里豪蠹役雜持之害滋甚衡察實立釋誣濫嚴懲主使者親歷各鄉多方開導自是民知自愛及官蜀一以治粵之法治之墊江俗輕生如博羅衡先事以言曉譬民知徒死無益終其任靡自戕者獲囑匪初犯者曰飢寒迫爾乃給貲使置擔具以謀生爲約再犯不宥匪聞咸



感泣改行梁山與墊江皆隸忠州衡調梁山時墊人訴於州及大府曰願還我劉公梁山民亦哀大府曰乞暫假劉公梁處萬山中距水道遠歲苦旱衡相地修築塘堰延亙數十里以時蓄洩至今利賴之倡捐置田建屋養孤貧歲得穀數百石全活無算布政使陸言下其法令各州縣照行巴縣爲重慶首邑五方輻輳訟獄繁多號稱難治倚食縣署者白役至七千餘人自衡莅事役無所得食散爲民存百餘人備使令而已值歲歉衡建議謂濟荒之法聚不如散命各歸各保以便賑恤是年雖饑不害衡初受任時積牘數千洎卸篆僅遺某舉人請咨一案移交後令而已嘗道過墊江墊人喜其還壺漿道迎歡聲雷動已而知赴他任感泣如失慈母其得民心如此衡以律例命意忠厚非聖人不能作故本之爲治以求達其愛民之心知愛民先在去其病民者故恆寓寬於嚴每謂官民阻隔皆緣門丁書吏表裏爲奸故所至不用門丁惟以官須自作四字爲宗旨設長几於堂左右分吏戶禮兵刑工爲六榻房吏呈案則各就左几之榻度之而擊磬以爲號衡聞磬自取入立即核辦旋發出置於右几亦如之吏以次承領一不經家丁之手故擁蔽悉除有訴訟者輒坐堂皇受牘親書牒令原告交里正轉攝所訟之人兩造俱

到一訊卽結無冤者嘗懸鉦署前民有急難許擊之以聞卽爲審理非重獄不遣  
句攝隸卽出牒必注役之姓名齒貌於籤又令互相保結設連坐之法蠹役無所  
施其技有事於鄉省僕從輿馬工食自給俾無擾及閭閻有兄弟爭財者反覆勸  
導動以天性卒至感悟交讓衡性素嚴重然每臨訟輒霽威俾得通其情扶不過  
十惟於豪猾則痛懲不稍假借嘗延訪士大夫周知地方利害次第舉革同城武  
營極與和衷時周其乏俾緩急可以相倚創立城鄉義學公餘輒親督課程考其  
勤惰而勸其志行其爲治大要以恤貧保富正人心端士習爲主總督戴錫三巡  
川東旁邑民訴冤者皆曰乞付劉青天決之語達天聽七年擢緜州直隸州知州  
引見蒙召對訓以公勤二字八年遷保寧府知府九年調成都府每語人曰牧令  
爲親民之官隨事可盡吾心太守漸遠民安靜率屬而已不如爲州縣之得一意  
民事也然所在屬吏化之無厲民者十年陞河南開歸陳許道所屬聞衡名轉相  
儆戒是冬使者閱河防江南河北皆以料堦不實多罷黜惟河南廳汛免未幾得  
痰疾巡撫楊國楨疏爲陳情而狀其治蜀政蹟請優之以風有位奏入賞假兩月  
調理外臣四品以下無此例蓋特恩也久之未愈遂乞歸二十一年卒卒後數年

四川墊江梁山巴縣及廣東博羅縣均請入祀名宦祠先後得旨允行同治五年四川學政楊秉璋復疏陳衡歷官循績並遺書以聞諭曰劉衡歷任廣東四川守令所至循聲卓著去官四十餘年至今民間稱道弗衰所著庸吏庸言蜀僚問答讀律心得等書尤爲洞悉閭閻休戚於興利除弊之道籌盡詳備洵無愧循良之吏著將歷任政績宣付史館編入循吏傳以資觀感衡所著治譜外又有六九軒算書五種論者謂其申明古義曲學旁通有裨後學又著有小學書爲時所稱子良駒兩淮鹽運使良駒陝西商州直隸州知州孫庠內閣中書入儒林傳

### 俞德淵

俞德淵字陶泉甘肅平羅人嘉慶二十二年進士改庶吉士散館授江蘇荆溪縣知縣調長洲縣遷徐州府同知姚瑩識小錄居官恪謹胥吏白事不衣冠不見盛暑讞獄危服坐堂皇汗浹竟日嘗有所推鞠瘡忽作舉體震悼事未竟不止也初至荆溪遮訴者百十輩閱年餘前訴者又易名控德淵一見卽識之羣驚爲神賀長齡俞君言行紀略道光八年以巡撫陶澍薦擢常州府知府尋調江寧府十年冬宣宗以兩淮鹽法大壞命尙書王鼎侍郎寶興赴江南授陶澍爲兩江總督會



議改革使臣欲罷官商鹽歸場竈科稅以德淵有心計使與議乃具議數千言大指謂鹽歸場竈其法有三一曰歸竈丁以按繳起科然其中難行者有三一在竈丁之逋欠一在繳鑊之私煎一在災祲之藉口二曰歸官場以給單收稅然難行者亦有三一在額數之難定一在稽察之難周一在官吏之難恃三曰歸場商以認繳納課然難行者亦有三一在疲商之鑽充一在殷戶之規避一在垣外之私售以上三法共有九難如就三者兼權之則招商認繳一條猶爲彼善於此苟得其人或可講求盡善顧事難圖始果欲行之宜先定章程清竈僉商改官易制諸事非行之三年不能就緒此三年中額課未可常懸也場鹽未可停售也各岸食鹽未可久缺也然則新舊接替之時非熟思審處何能變通以盡利乎至兩淮捆鹽之夫淮北則永豐向有萬餘人淮南則老虎涇不下數萬人皆無賴游民百餘年來以此爲世業一旦失所此數萬衆將安往乎其患又不止私梟拒捕已也議上陶澍深然之乃與使臣定計不歸場竈仍用官商如故惟奏罷鹽政裁浮費減窩價凡積弊皆除之澍舉德淵超擢兩淮鹽運使在任五年正課無缺運費遂充揚州俗華侈德淵力崇節儉妻子常衣布素風俗一變郡中至無優劇旣精會計

又知人善任使諸滯岸商憚往運輒遣官代之每運恆有盈利盡以充庫無私取兩淮鹽政及運使素有豐稱多以財結權貴人及四方游客又以其餘贍寒峻取聲譽皆商資也德淵謹守管鑰失望者多絕不爲避怨計受陶澍知遇而執法無所阿尙書黃鉞有子曰中民以場大使候補澍屬德淵與以優差德淵曰優差以待有功中民無功不可得澍益重之兩廣總督林則徐於時人少推許獨於德淵曰體用兼賅表裏如一姚瑩識小錄賀長齡亦言德淵學有用政有本大江南北皆食其利賀長齡俞君言行紀略十五年冬陶澍陞見數薦德淵賢謂其才可大用以地方循良久在鹽官可惜上亦嘉之將晉用而德淵病卒荆溪長洲江寧士民聞之皆流涕請祀名宦祠

朱士達 子念祖

朱士達江蘇寶應人父彬在儒林傳兄士彥吏部尙書自有傳士達嘉慶二十二年進士以知縣分發廣東告近改安徽歷署黟縣南陵霍山等縣調懷寧值歲饑發賑胥吏於粥中置石灰食者疾作士達每晨親往以粥作餐吏無敢爲奸陞壽州知州壽人強悍喜佩刀士達捐貲設里鄰義學增書院膏火舉先哲德行以誘

掖之由是壽人皆恂恂知禮讓芍陂水道五百餘處向漑田萬頃積年淤廢士達勸民修濬開三百餘門漑田六千餘頃以卓異陞鳳穎捕盜同知時宿州與徐州間有一河道彼開此塞利害適相反用是兩爭不決兩江總督蔣攸銛檄士達往勘士達謂此河當別有故道乃與鄉民步荒郊徒行一月得故道開之兩境悉利旋擢鳳陽府知府府轄鳳陽大河泗州三衛衛丁每勾通書吏指民籍與軍籍同姓名者簽縣索之中貲之家不堪其擾謂之飛軍士達察其弊取積年底冊核明鈔發所屬州縣飛軍之累遂除廬州合肥盜李三容孜者煮人於酒鑊中巡撫檄廬州鳳陽兩府協緝廬州知府猶未至士達先往盜伏牆內發槍轟及左右從者皆股栗士達不爲動卒獲盜論如法旋署廬鳳道調署徽寧池太廣道陞授廣西左江道丁父憂歸服闋起雲南池東道駐尋甸州州傍楊梅河下游會馬龍河馬龍性猛每暴漲輒激楊梅河倒流爲民田害士達於七里橋下開支河七百丈名曰靈心河復捐千金造橋梁山水發得宣洩不爲患開化府竜白寨獯民以拒捕殺縣丞巡撫檄士達統兵赴剿士達率數十人往中途先爲文告諭謂但獲拒捕者餘不株連比至寨獯民遂縛送渠魁餘安業如故師宗縣有拜香會匪據山村



索過客私稅士達多方緝捕悉就擒陞四川按察使調陝西按察使擢湖北布政使湖北當崇陽軍務後庫存銀僅五萬兩士達悉心綜核及任滿存至七十萬兩以年力就衰原品致仕咸豐四年卒入祀鄉賢祠子念祖 念祖以郎中改直隸州知州分發陝西署佛坪廳同知及鄜乾直隸州知州佛坪介萬山中崎嶇險阻念祖捐廉修鑿以便行旅廳設於嘉慶中尙無學校請設學額八名士人由是向學民風丕變鄜俗健訟初抵任日受訟牒百餘剖決如流案無滯牘比去任訟庭寂靜有巨豪某向以結交官長爲魚肉鄉愚計念祖禁絕不與通適豪家火念祖率人往救豪懷金來謝以犒從者爲言念祖正色曰救災恤民刺史之職爾將藉此要結耶嚴斥之豪惴惴不敢出一語自是益斂迹尋丁父艱歸服闋將赴陝西值粵捻賊熾安徽巡撫福濟奏調念祖赴皖營委辦盱眙天長團練和含棚匪滋事衆號十數萬然皆飢民當事欲多殺邀功念祖力請寓撫於剿脅從賴以保全寶應地當孔道難民紛沓良莠雜處念祖商之縣官行保甲清查法故南北紛擾寶應獨耕市不驚念祖力也同治四年以道員分發四川道卒

朱大源

朱大源江蘇華亭人嘉慶二十三年舉人以大挑知縣分發陝西補安塞縣城居萬山中形如井底山巔積雪每春夏間輒隨大雨奔騰而下漂沒人畜廬舍民率遷徙去大源周歷山谷揆度形勢以東北一帶多土阜鳩工疏鑿引水分洩民復還遂修黌宮增齋廡士風丕變遷知蒲城蒲城多盜有刀匪其首曰王敢鳴聚衆屯井家堡界蒲城富平臨潼渭南四邑間匪堅壁深濠備火器拒捕民與匪往來以自保巡撫議移兵往剿大源言於布政使陶廷杰曰民受刀匪累久矣剿則更塗炭請寬以圖之捕刀匪二人敢鳴黨也鞠以諸案不承廉得其母賞之酒肉其母密告其匪首處大源有僕韓確者多力而沈摯乃授以方略僞爲販玉器者往投敢鳴漸相狎一日敢鳴方踞刀噉麥餅呼確旁坐確解呈所佩小刀而請觀敢鳴刀出不意驟削其臍敢鳴起相搏時觀者千百人敢鳴攫人以揮衆衆辟易確又乘間削其臂大源率徒役及營兵四集匪黨不敢救擒敢鳴以歸民謹呼曰此方可安枕矣敢鳴知必死所犯皆承大源諭餘黨亟解散納兵器悔罪自新否則當請兵殲之翌日以事過井家堡迎者絡繹於道曰小民受害二十餘年今得見天日公之賜也大源曰匪徒盡乎曰皆散去願爲良民大源曰然則限十日各

完本年地漕銀其無缺歷年所負當爲請緩民叩首如約大源爲政慈祥公溥事無大小必坐大堂任民觀聽民呼爲朱大堂云二十二年聞父喪徒步奔里門淚盡繼以血曰爲貧而仕仍無以養何以生爲將從吾父地下耳竟以毀卒

### 費庚吉

費庚吉江蘇武進人四歲而孤母徐氏督之讀以貧育於外家嘉慶二十四年試進士第一授禮部主事庚吉自以節母之子每彙題節孝必肅容具稿時有奏請建總坊者下部議庚吉議曰定制旌表節孝每人給建專坊銀然吏胥因緣爲奸寒素不得請者十八九今請總旌子孫有力別建專坊者聽存者準定例必滿三十年殞者或十年七八年皆予旌是年之不永非節之不終其在國子監肄業生許爲親戚呈禮部請旌與在都候補候選官同禮部據呈行查原籍俾外省胥吏不得婪索壅閣奏上報可乃採訪其鄉之合例未旌者三千餘口請建總坊著爲令自庚吉始道光七年充大清通禮纂修官十七年補湖廣道監察御史五月授河南汝寧府知府朔望詣明倫堂集紳耆告以士君子居鄉當爲守土吏佐慈惠廣教化矜式後進使鄉人不爲苟且媮薄之行召諸生講明正學申義利之辨暇



則屏騶從循行阡陌與父老言農與子弟言孝作勸戒歌曉婦孺環聽若堵民忘其爲官嘗謂民風由於士士風係於官欲教士民不如先教牧令乃爲書戒曰牧令與民一體也太守與牧令猶一家也民失其德牧令之責也牧令不能使民之無失德則太守之責也汝南居豫省之中近北五邑性多剛剛則直而易感不善治之則懼其悍近南四邑性多柔柔則順而易從不善治之則懼其刁悍與刁非不可化視爲治何如耳上古官事與民事合而治道盛晚近官事與民事分而治道衰其貪酷鬪茸者無論已間有聰明強幹之吏類專心於官事以供張爲結納以掩飾爲調停其於民事漠不關心惡在與民一體也民事莫大於教養尤莫難於使之自爲教養嘗思之而知其難矣有可行者有不可行者有徑直以行者有委曲以行者假手吏胥則吏胥壞之假手門丁則門丁壞之假手鄉約里正則鄉約里正又壞之然則終不可行乎在出以虛心持以實心而已爲政者當視其事爲天下之事非一人之事爲一己之事非他人之事遏欲以清其原窮理以擴其識問之長官問之僚屬問之賓朋問之鄉大夫鄉先生問之田夫野老告吾善者從如流水規吾過者改如轉圜洗其嗜欲功利之私破其養尊處優之習出一語

質諸鬼神民自知其不貳下一令堅如金石民自知其不欺養與教並重而養卽寓於教之中教富者以睦嫻任恤而富可養貧教貧者以勤儉安分而貧可自養宣聖諭以教民不必專在朔望也當於城市村莊隨時求宣講之法嚴保甲以弭盜不必專在鎮集也當於孤村單戶隨地求聯絡之方尊禮高年則人知敬老表章節孝則婦盡懷清日坐大堂示民以公疾趨過廟使民知敬紳之賢者優崇而咨訪之則民情可通衿之劣者擯絕而懲創之則民氣可靜聽訟不可留宜持詳慎之意催科不容緩宜屬撫字之仁事上宜謹可爭是非而不可傲待下宜謙可絕情面而不可陵捐輸所以急公可勸不可罰罰則近於攘賽會所以從俗可偶不可黷黷則近於荒有時或不廢詠歌所以導民之性情不可以空文妨實政得暇則參觀經史所以資吾之考鏡不可以泥古拂今情差徭可減則減少一分科歛卽留一分脂膏糜費可省則省去一分酬應卽免一分虧累官清則役畏官健則捕精署以內毋好古玩毋進優伶毋輕宴會不惟節用自可清心境之中嚴辦訟師嚴除豪霸嚴禁娼賭不獨防姦兼堪厚俗所謂官事與民事合者如此言之非艱行之惟艱自問此心不肯以空言欺世然但可爲知者道耳努力明德以答

蒼生到任數月境內大治未嘗鞭人至百而獄訟衰息馬氏爭田三十年庚吉一訊而解族長馬賢者年八十六矣日已瞽言身年老可不到案聞太守賢是以來日不見青天得握青天手死不恨庚吉憐其老引手慰撫之賢流涕曰百餘年無此官矣庚吉母病民相率禱城隍神至數千人止之不可日出於心之不自知且恐使君去也汝寧故多火禱於神終其任不火二十二年調知開封府耆老請留四閱月及去送者數萬人生童負笈從之開封者數百人抵任七日有旨授福建糧儲道時洋船初犯境庚吉攜僕役二人往每食一簋公服外無餘衣檄辦泉州行營糧臺兼充翼長向例糧臺道員得月領鹽菜火食銀百五十兩庚吉以既有養廉推以犒士疾卒於軍祀名宦祠著有毛詩約旨三十卷歷代名臣管見錄十二卷宗廟時享次第考四卷詩文集十二卷外集一卷治汝官書四卷

吳均

吳均浙江錢塘人嘉慶二十四年舉人道光十五年大挑一等以知縣用籤分廣東十七年補乳源縣知縣二十年調補潮陽縣歷署潮陽揭陽惠來嘉應諸州縣或兼理焉二十四年署海陽縣時雙刀會匪黃悟空聚徒數千肆擾潮揭均奉檄



往辦獲悟空寘之法擒治數百人事立靖二十五年保薦卓異奉旨以同知直隸州補用二十六年署鹽運司運同旋補佛岡廳同知二十七年兼署潮州府知府因勸捐運本整頓鹽務以知府陞用咸豐二年惠州土匪沿河截劫商旅不通有司未敢誰何大吏以均往遂獲楊阿惹八等千三百餘名分別懲治惠境肅清三年福建土匪猖獗稔均有能名奏調往辦已邀允矣而廣東督撫謂潮州濱海要區官民方倚均爲保障特疏奏留旋命補潮州府知府四年湖南巡撫駱秉章復奏調均勦辦荆楚軍務廣東仍以均不可一日離潮再奏留之時江南大營撤回散勇勾結土匪謀逆三月中賊首陳娘康擁衆圍攻潮陽知縣汪政守備李從龍擊卻之而賊仍屯近郊不下分黨攻惠來普寧五月惠來陷匪勢益張援軍失利賊攻潮陽愈亟均大憤親督軍出戰手然巨礮身先士卒轟擊所部皆感奮併力衝突賊披靡均麾軍蹙之賊自相蹂躪死傷無算遂解潮陽之圍而海陽之彩塘鄉逆首吳中庶因均治軍潮陽度難兼顧郡事邀逆黨陳阿拾糾衆拜會旬日至萬餘人自稱大營元帥軍師等僞號大掠海陽東西南三面村舍偪攻郡城而澄海逆首王興順亦糾衆與中庶等窺澄城海陽令劉鎮都司金國樑大困餉道斷

絕郡城岌岌官紳皆請均回援均以潮陽粗定而郡城澄海方危密飭潮陽令汪政分兵馳援郡城而自移軍澄海政遂督諸路兵戰賊郡城下大勝殲賊數千解郡城之圍均至澄海將進兵攻外砂而連朝霖雨不絕均跪雨中禱天天忽霽遂直搗賊巢破之分飭諸路搜捕逸匪自留澄海清理餘孽旋克復惠來斬逆首陳娘康等於陣是年十二月以積勞卒於官均性清介治潮最久以養以教民畏其威而懷其恩倚如父母其任潮陽也以濱海地皆鹹鹵乃詳攷水源開渠以通溪水築隄六千一百餘丈由是有淡水溉田瘠土悉沃潮俗惑堪輿多停柩不葬均理論勢禁並捐築義塚聽民報明以瘞其任海陽也郡西南三利溪久淤不濬均倡捐開鑿西南數十里無滂旱之憂北隄爲全郡保障暴雨河溢隄垂決工役危避不敢近均植立隄上督救萬民皆奮身搶築隄以無圯而隄身少曲終有衝激之患又捐三千金固之利賴至今人因號爲吳公隄云其守潮州也州東廣濟橋久廢修復費大權設官渡濟之人終不便均捐五千金倡衆而橋以成附郭西湖山高出城上登之俯瞰全城如指掌山上舊有高墉與城相犄角年久而圯均籌資築新城百四十三丈跨濠而過圍西湖山於城內又培修舊城五百一十五丈

相連屬厥後吳逆圍攻竟不能破民咸頌之五年兩廣總督葉明琛奏均屢著戰功奉旨追贈太僕寺卿潮州府城建立專祠

吳應連 子寶林

吳應連江西南城人道光元年舉人十三年以知縣揀發四川歷署天全涪州永川安岳蒲江新津綿竹仁壽等州縣事二十八年補石泉縣三十年調補彭縣咸豐四年卒於任涪州濱江黔蜀水交會磨盤火峰麻堆羣豬各灘石縱橫江中觸船輒破應連募工鑿險水勢漸平及永州之鑿蝦蟆口灘仁壽之開石棧石泉之平曲山關皆自出廉俸以爲民利所至擴書院增膏火蒲江之鶴山彭縣之九峰安岳之龍泉石泉之西山永川之錦雲東舉其尤經意者也涪地多桑而民不知蠶應連購蠶種教以養蠶繅絲之法於石泉安岳種桑數萬株繭絲之利遂普兩縣道光十七年涪州水暴漲淹沒田廬應連捐資賑濟邑舊有浮屍會每屍給棺一錢五百舟人利其死而後救應連改爲救生艇凡獲一屍祇給棺無葬費救一生者賞錢千二十一年安岳大旱饑民洶洶欲爲變應連捐三千金賑之不及申請輒發常平倉穀分設男女粥廠日巡視散放至秋熟則自購穀補之富者感其



誠爭相轉輸不絕安岳民嘗爭水構鬻躬履阡陌爲定蓄水法令多開陂蕩浸田疇多少有程啟閉有時計修新舊塘堰三百七十餘處水足而爭鬪之風自戢在永川亦疏濬舊堰七百餘所蒲江石泉多山則度地引泉淳瀦有備田遂爲上腴彭縣水利自海子分支析爲東三河西四河夙資灌溉惟蓄洩無法非竭則溢應連籌酌形勢隨地鑿塘築堰殺漲節流無有旱潦石泉地界生番蠻族築碉而居伺間潛出殺人越貨應連擒治曉桀曉衆番以大義擇其子弟開敏者送旁近鄉塾肄業番人化之相戒勿再犯仁壽三鄉皆山盜賊窟宅其中四出爲暴大吏稔應連能檄署仁壽至三日卽獲首匪斬之餘衆驚遁涪州有兄弟五人號五虎人咸畏避之應連乘其不備執之悉論如律民爲作伏虎頌咸豐四年檄解餉赴鄂行抵漢川值武昌陷賊聞鉅餉至分道要截應連疾馳七晝夜達大營總督奏請加同知銜泊回彭縣任以鄰氛不靖練鄉團置器械定章程厥後朱藍兩逆逼城環攻皆賴鄉勇之力得保全而應連遂以是病卒易簣時猶喃喃論濬濠練勇事彭民追思遺愛援汝州民留葬劉審交故事殯應連於城內三忠祠旁執紼會葬者數千人歲時伏臘各具酒脯以獻涪州安岳永川石泉仁壽蒲江各州縣士民

亦聯名請祀名宦祠子寶林 寶林由監生捐輸軍餉獎同知咸豐六年分發四川十一年補成都水利同知修復都江堰人字隄以蓄江流溉農田一千餘頃時滇逆藍大順分股竄灌縣縣令皇怖欲遁寶林尼之而自率兵團大破賊於洋子橋城賴以完同治七年調署江北廳同知懲豪猾約吏役結疑獄培寒峻採訪節孝七百餘名教民樹桑育蠶歲獲絲利十數萬金九年丁嫡母憂旋投效四川提督周達武軍隨同收復貴州遵義府城敘功獎道員並加三品銜光緒七年復發往四川二十一年筦夔關釐務以卹商爲本有陋規辭不取而移其款建公廨或請聞大吏寶林曰局用實不敷我自奉儉故無需此若遽裁之恐將有巧立名目取盈他項者是重困商矣二十二年大水城垣半沒米商閉糴居民惱懼寶林告夔州知府開倉平糶衆心大定旋卒於差次

### 石家紹

石家紹山西翼城人柏枧山房集石瑤臣傳書後以拔貢爲壺關縣教諭實心課士學使者稱爲真教官道光二年成進士授江西龍南縣知縣發奸摘伏有神明稱調上饒再調南昌首縣最繁劇治之裕如理訟必細心勘鞠至夜分不輟時連

年水患饑民聞省會散賑聚附郭之沙井上官檄家紹及新建令辦賑務始散米令饑民自爨已而來者蝟集瀕河地幾莫能容且慮人衆滋事於是改散錢令得錢各返鄉里候截留漕米濟之閱兩旬衆漸散去而水患益棘家紹請於上官開倉平糶其力不任糶者復分廠煮粥以賑之主者循例備三千人食而就食者五萬扶老攜幼攘臂喧爭國朝先正事略聲震屋瓦柏視山房集石瑤臣傳書後大吏不知所爲或曰急檄石令家紹至諭衆曰食少人衆咄嗟不能辦汝等其速散詰朝來斷不使有一饑民無粥噉也國朝先正事略則皆迎伏跪拜曰柏視山房集石瑤臣傳書後石爹爹不欺人國朝先正事略願聽處置柏視山房集石瑤臣傳書後爹爹者江西民呼父也歷署大庾新城新建擢銅鼓營同知署饒州贛州二府所至皆得民心國朝先正事略自大吏僚友縉紳先生士民卒隸無不以爲循吏柏視山房集石瑤臣傳書後願自視常歆然國朝先正事略嘗自記曰吏而良民父母也其不良則民賊也父母吾不能民賊也則吾不敢吾其爲民傭者乎因自號曰民傭柏視山房集石瑤臣傳書後十九年卒五縣皆祀名宦南昌民尤德家紹釀金建專祠於百花洲恆沙寺之右久而奉嘗不衰國朝先正事略



徐棟

徐棟直隸安肅人道光二年進士授工部主事擢都水司郎中畿輔通志究心吏治以爲天下事莫不起於州縣州縣理則天下無不理稱州縣之職不外於更事久讀書多然更事在既事之後讀書在未事之先則讀書尤要乃匯諸家之說成牧令書二十三卷牧令書自序又以保甲爲庶政之綱法甚約而治甚廣自明王守仁立十家牌之說後世踵行每每爲弭盜設此未知其本也於是集諸家之說明其利弊別其難易審其功效成保甲書四卷略謂天下一大保甲州縣一小天下天下非一人所能理於是有省有府有州縣州縣亦非一人所能理於是有鄉有保有甲其勢異其事同其制異其道同保甲書自序二十一年授陝西興安府知府累調漢中府西安府所至行保甲皆有成效爲民福興安三面臨漢棟補修惠春石泉兩隄高其基加於舊五尺咸豐中水冒舊隄二尺民皆驩然念徐公力城外有糧卡禁糧下運棟以興安地卑溼穀屯積多霉變旣不能久儲又不能出境圖利者改種菸葉藍靛歉年每乏食乃設策弛禁小民便之二十七年大計卓異二十九年以病歸咸豐三年奉命督辦本省團練四年修直隸省城得旨嘉獎

同治元年有詔錄用以老病辭興安府舉名宦事實冊尋卒祀興安名宦祠畿輔通志

史秉直

史秉直江蘇陽湖人道光三年進士以知縣籤分甘肅四年署伏羌縣有斃於路者驗得傷而殺人無主名秉直乃微服夜訪聞酒肆人私語曰甲乙偕行乙死而甲不見何也因前叩甲名遣役獲之訊實置諸法秋荒民大飢雜木皮泥粉以爲食然例有災非時不得報秉直毅然請平糶民困以蘇六年補崇信縣地瘠民貧又適進討張格爾秉直籌餉協濟不以纖屑累民七年調渭源爲大軍往來孔道秉直供張車馬井井有條事治而民不擾朱家山有狼患傷幼孩秉直禱山神曰如傲有司之失職不應遺禍於閭閻如傲小民之無良何獨降災於童穉自是患頓息土司趙姓有田萬頃恃衆抗租役至輒毆辱之秉直單騎入山集年老者諭之曰爾等何事爲土司爭勝不知自爲計乎無論糾衆干重典卽結訟頻年亦受害不少矣我知非爾衆本意特爲一二桀黠者指使欲止而不能耳老者皆首肯至於涕泣乃曰今速完租負我當代呈上官不爾責否則家破身危所負仍不能

免衆驩然從命不三日租額悉償旋丁父憂歸會西疆凱撤敘辦理軍需功詔俟服闋後歸部卽選九年授河南西華縣兼攝扶溝村民家夜火人盡死惟少婦存言以呼救免秉直勘火自外入推得挾仇縱火狀遂抵罪邑與郟城界清水河不肯獨濬雨集則皆沮洳不可耕秉直約郟城共舉其事而躬董督之卅月而水患平乃勒碑示法後來西華糧折徵錢值銀價昂解不及額士民請益秉直笑曰吾將以清白貽子孫爾等意誠厚然非所願也十八年調鹿邑縣境有李原廠國初以匿地畝責倍賦遂成故事秉直代籌款解司有富五通捻匪黨羽千計前令不敢問秉直獲而懲之邑界安徽潁亳爲盜淵藪秉直督役毀其巢匪鄰以星術惑衆布旗帖謀不軌秉直密緝獲九人以勞晉同知二十一年祥汎河決鹿邑全境被災秉直急赴安平集時家口各地星夜築隄復乞賑銀十九萬給災戶時工程繁興大府派鹿邑麻糶四十八萬斤秉直謂邑旣被災麻又非土產乃捐廉採買以濟工嗣奉檄調辦大工正料廠河督林則徐倚如左右手尋因鹿邑災重檄回辦賑於是倡捐設廠活災民八千餘人二十二年蕭縣捻匪縱紅等倡亂橫行十數州縣秉直隨方抗禦匪不敢入二十四年調署祥符旋以隄工勞獎同知直隸



州知州二十五年補汝州直隸州魯山捐職葉世升買胡姓田斬值三之二訟十餘年不得申秉直至葉逸去屬人請獻金執贖秉直曰有此多金何不以清田價耶旋訪獲科罪二十六年卒入祀名宦祠

何曰愈

何曰愈廣東香山人道光初補四川會理州吏目州地夷漢錯處素稱難治曰愈廉己恕人民愛戴之獄積年不決者一訊卽服土司某桀驁不馴所部夷殺漢民知州檄曰愈檢驗某介紳持數百金乞免驗曰愈不受遂親往某又率衆來劫會漢民亦率衆至卒成驗而還某復以獄上控上官廉得實杖之旋捐陞知縣委辦西藏糧臺馳七千里覽窮山怒流邊風寒雪跌宕自喜還省補岳池縣知縣練保甲繕城郭庀器械迨同治初滇匪圍岳池得所遺槍礮以拒賊當時比之張孟談治晉陽云咸豐三年署屏山縣地素患猺夷曰愈捕治漢奸數人患少息旋丁母艱去六年服闋適寧遠府屬野夷出巢焚掠及冕寧各地大吏奏委曰愈參建昌鎮總兵占泰軍事西川猺夷支凡數十自雷波峽邊達滇南二十四塞頻年擾沿邊諸郡曰愈抵寧遠值西昌縣以民變告急曰愈馳至縣署見衆大譁曰夷傷

吾人乞發兵除害曰愈曰是官任也但冕寧事方亟未能分兵先安置若輩可乎衆曰諾因撫恤傷者復集紳民曉之曰若等平日欺夷如鹿豕田其地沒其租使夷無所控告釀成巨禍今且少息當爲若等乞兵於總兵旋得兵五百人又募勇三百人設營山巔分兵山下爲犄角勢出夷不意直搗巢窟於是夷皆匍匐投誠願遵條約請漢民復業民曰居無屋夷曰我山有木惟爾伐民曰耕無粟夷曰我田有穀貸爾食曰愈因諭民曰卽此見夷有天良爾等毋負德毋生釁漢夷遂相安自是日愈益悉夷番之情僞山川之險隘擬綏邊十二策請當事代奏格不得上無何會理州復有滇匪韓登鸞合衆入州境聲言欲復諸回讐回民亦疑州民接匪盡焚民居知州求援於府鎮乃檄曰愈行曰愈率一旅以往甫至城聞流言奸細內伏乃下令毋早閉城三日後按戶搜查容奸細者從軍法夜則嚴兵以待越三日城內外賊黨悉遁曰愈因吾所以不閉門不遽搜者正開其逃路耳衆皆服於是遣人持榜文往諭登鸞登鸞曰某非叛人不過與回爲讐耳當遵示解退復持諭示回民回曰何公恩主也昔時我等居大橋被水災田廬盡沒何公乃一騎渡水賑我等又爲我等疏河水至今不爲患戴德何敢忘來諭當錄以爲訓

違者誅之自是回民亦不擾事既定府鎮上其功會有攘之者曰愈不計也比歸成都粵逆竄蜀事方棘曰愈曰爲當道陳機宜不能用乃退居灌縣蒔花種竹以自娛同治元年以子璟授安徽廬鳳道迎養入皖十一年卒於家著有存誠齋文集十四卷餘甘軒詩集十二卷退菴詩話十六卷

顧夔

顧夔原名恆江南華亭人道光六年進士改翰林院庶吉士八年散館授山西靈石縣知縣縣民好訟夔清釐積案多爲解散民有訟叔逋金者廉得其情則實昔所許而後靳之者也夔斷給以半叔不承而浼人以五百金進夔受之立予訟者瓜田農夜被殺得尸於井農無妻子而有族子三夔視其一有異色鞠之不服乃誑以好語則曰祖父積不相能是夜往貸叔不應斫以鎌刀因奪刀殺叔而棄尸於井邑濱汾河山水猝發壞護城石隄夔捐廉倡築以餘資交商收息爲續修費民稱顧公隄揚威將軍有悍卒毆民瀕死夔馳馬擒之白統領懲治自是過境兵無敢譁者十三年大旱邑不產米上流遏糴價騰踊夔捐俸銀爲富民倡買米洪洞分路平糶兼賑極貧者知州某欲設粥廠夔言山民散處艱於就食拂知州意



諜大府詰責令繳所捐夔言山縣無米糴故價昂邑人捐資以救荒官未嘗收捐安所得繳且繳於何所大府無辭而怒滋甚遂撤任請歸養不許困甚民爭饋銀米以濟之河東道某之任過靈石民遮道求還賢令閱四月回任歡迎者相次九月丁母艱歸遂誓墓不出二十九年卒

### 雲茂琦

雲茂琦廣東文昌人道光六年進士以知縣用分江蘇七年補沛縣知縣判決如流每聽斷必與民談井里桑麻年穀豐歉諄諄以務本業忍忿爭爲勸懇懇如家人父子民感其誠訟頓減接見紳耆詢民間疾苦輒采擇施行出則輕騎減從酒漿芻豆毫釐不以擾民案判後民情有未盡伸者許面訴必得其情而後已葺修歌風書院暇則親往督課語諸生以身心性命之學自登降拜跪揖讓周旋皆有準的鄰邑聞風來學至庠舍不能容邑舊無鄉賢名宦祠茂琦爲集資創建復修萬壽宮以朝朔望葺吳公祠以順輿情吳公者明嘉靖時歲荒施賑而祠之者也沛地低窪夏秋水潦禾稼輒淹沒茂琦躬親相度開濬溝洫自後年穀屢登南關外有橋久圯茂琦成之境多盜賊無緝捕資益橫行茂琦迺量道里遠近給捕費

復多懸重賞賊皆屏息悍盜某久未獲茂琦訪其巢穴往捕之盜聞自殺其子欲以誣捕役及見茂琦震懼不敢欺遂擒而寘之法在沛二年每祈雨應期降九年調六合縣六合偏近江淮連年大水田廬淹沒殆盡水初至居民安土重遷水深不及避緣隄升樹號聲聞數里茂琦親雇船載餅餌四出賑救逃入城者開倉予之食水退卽親往各鄉編戶籍計口投票至期領糧去城遠者榜通衢許糧票轉相貿易民便之嗣以倉儲不繼捐金爲倡富商大戶激於義亦捐積至萬餘緡民無流亡孤貧節婦月給銀米年例符者必呈請旌表邑多淫祀飭毀之而民懾於禍福不爲動茂琦親往毀其像祝之曰如能爲厲身獨當之隨因其址建萬壽宮社稷壇先農壇改建六峯書院捐廉置田備賓興費立集善堂以掩鬻恤幼立種德堂以施藥濟貧屯田十六衛典質略盡運戶苦之復捐廉彌其缺漕累以甦十二年充江南鄉試同考官十四年署督糧同知尋署河防同知保薦卓異引見授兵部郎中轉吏部郎中以職事稀簡壹志於學與同志切劘研究晨夕不倦未幾以終養告歸立宗規十四條家勸十六條訓示家人大旨以務孝弟崇耕讀黜異端爲要建祠修譜置祭田仿范仲淹法歲計所入以資近屬之貧者別立闡道堂

備族人應試之資與弟茂瑰友愛田廬取其湫隘磽瘠者而讓爽塏膏腴者歸之弟瓊去京師遠籌二千緡息助公車費試院地卑苦雨泥淖捐資甃以石青瀾港海口爲縣要衝道光二十八年海寇嘯聚窺縣城茂琦結安全社立章程二十條守禦嚴寇不敢犯潛遁去復擇要增建礮臺捐集錢三萬緡濬池築城以備後患建文昌閣尊經閣工竣得旨嘉獎郡幕僑居瓊臺書院久遂踞之茂琦白巡道復之旋主講瓊臺書院揭學規五則以訓生徒每朝暮坐講堂殷殷督課有進質者輒喜曰學貴善疑方能有悟因指示源流同異務領解而後已夜分輒攷授天文度數證以京房崔浩諸家之說反復開誘不厭求詳平生儉以自奉官京外幾二十年被服恆如儒素性質直能習勞竟日危座無跛倚容二十九年卒入祀沛縣六合縣名宦祠

### 劉慶凱

劉慶凱直隸鹽山人道光六年進士以知縣卽用分發山東歷署金鄉歷城等縣知縣補東阿縣兼署東平州十三年調補陽穀以政績卓異十五年陞補濮州下車卽決積案二百餘訟師吏胥皆驚以爲神不敢欺州賦舊分丁漕春秋各納



其半吏率督殷富者以春全納而沒其半至秋或遇災則已否則催呼如故收漕之吏上下升斗或至倍蓰習久以爲固然慶凱至嚴禁淨收躬赴廢廠監督定爲上下兩忙完納不問貧富由是積弊一清州境跨魏河每夏秋水發輒泛溢爲害慶凱履勘舊隄令民間三十畝以上出一夫夫濬土一方厚築隄岸役均而公民皆踴躍凡十餘日成隄九千九百餘丈水患遂息十六年夏旱秋潦慶凱集紳富諭之曰有嗷嗷者非汝親戚則鄰里鄉黨也忍視其飢而死乎且彼不坐斃將爲不善以救死汝豈能保其富哉吾義不忍坐視請捐金爲倡紳富皆感動爭輸錢穀慶凱擇人而任判等級以賑之方百里中無一餓孀者民刻石頌其德尤勤於治盜州西界直隸開州東明東南界荷鄆夙號盜藪慶凱會鄰縣合捕廉知羣盜所在至輒掩獲近城數十里至夜不閉戶上官奏其能得旨以同知用嗣補兗州府總捕水利同知二十一年調署臨清直隸州二十三年署武定府二十四年署濟寧直隸州皆有聲二十七年捐陞道員二十八年署兗沂曹濟道咸豐二年再署兗沂曹濟道時粵匪竄擾省境大吏檄慶凱詰禁劉口私渡旋赴武城會剿土寇粵匪遂得乘間濟河而東巡撫李德以情近退避奏劾落職慶凱愬於朝事下

山東巡撫崇恩查覆崇恩白其枉諭令送部引見七年詔仍發往山東以同知補用旋假歸病卒入祀名宦祠

桂超萬

桂超萬安徽貴池人道光十三年進士發直隸以知縣卽用親老告近改江蘇十四年署陽湖縣知縣以潔清自矢懲訟師禁革地方宿弊攝事凡月餘巡撫林則徐見其日記謂之曰在任四十日便行出許多善政判語可入資治新書洵能以經術爲治術者丹徒有趙姓婦王氏以貞聞氏觸姑怒錐刺徧體因服鴆死超萬捕主謀道士治如律爲之請旌又陳防盜事宜略言選勇敢士僞爲商旅密巡水面或盛石盈箱爲之媒或泊舟孤岸爲之誘盜至捕獲不難追蹤巢穴亦易並藉以勵兵訓士十五年補荆溪縣未赴丁本生父憂十六年服闋循例仍赴直隸補欒城縣欒城患盜超萬以窩盜家多在交界處比知照會緝輒聞風遁乃與鄰縣約不分畛域追捕又清保甲懸賞格令城鄉客店設循環簿稽察行旅大道更鋪立傳籤護送之法城市村鎮各設更牌巡邏防守盜無漏網以農隙集民夫濬洩河金水河城河並通溝洫平道途以息水潦之患役法例計田畝分派欒城衿戶

多不應而專責之民超萬令衿戶照在官人役祇優免三十畝凡樹畜修井糞田益種薯芋備荒歉均詳示以法捐俸資興復龍岡書院四鄉設義塾勸各村推廣嚴立規條督課之有習天主教三世者從容諭以孝弟忠信之道立悔悟改行其折獄創硃問墨供法詳審得情案無留牘如攝事陽湖時二十一年調萬全縣旋署豐潤縣時英吉利犯順各海口戒嚴豐潤有澗河等兩口超萬甫下車卽馳往設備募鄉勇使習技藝演營陣親督訓練由是團練稱最又募得漁人打鴨槍數十桿以備水戰後粵匪李開芳等竄天津用打鴨槍伏水次狙擊之敗賊本超萬法也會上命各督撫保舉賢員直隸總督訥爾經額疏薦超萬持躬廉謹盡心民事惠政及人輿情愛戴特旨擢北運河務關同知二十二年奉檄赴灤州樂亭豐潤各海口勸勇建營不吝犒賞不受饋遺嗣撤防回任以同知無管轄地方責爰集生童課經義多所成就飭屬於沿河補植柳株以固隄岸二十三年檄赴張家口勘估壩工適宣化府知府缺遂以超萬代理旋得旨授江蘇揚州府知府揚州俗習浮靡超萬首以勤儉爲訓嚴示禁令自是胥吏咸布衣倡修郡城暨江都甘泉二縣學宮二十五年調蘇州府蘇郡田賦重大戶包漕弊百出糧艘幫費日增



民重困華亭縣歲終無納漕者超萬爲減幫費均賦戶之議先薄懲其豪猾者乃出新章寬舊惡予限十日無敢後尋奏定通行昭文縣有聚衆拒捕案超萬奉檄會營往辦馳諭散脅從擒首罪寘之法又糧艘佃戶萬餘與懼罪水手歃血謀亂超萬宣律例通諭之得以無事又以水陸交衝多盜患定巡緝章程得請爲通行式二十七年舉大計卓異二十八年署蘇松常鎮太糧儲道值歲歉禾傷於霧多白穰上官嚴檄徵全漕超萬摘禾穰力爭乃解首郡事繁承鞠省控諸案皆委員訊理恆致積壓超萬必親訊無留滯攝道篆數月案復積回任後窮源清釐至歲除猶聽斷弗輟二十九年擢福建汀漳龍道三十年乞病歸咸豐三年粵逆陷安慶超萬治鄉團依險戰守迨九年賊衆大至勢不敵皖境蹂躪日甚不得已避居閩同治元年福建巡撫徐宗幹以超萬年雖篤老精神強健敦樸誠實歷任皆著循聲奏請起用得旨俞允二年二月署福建糧儲道尋權按察使手治官書不假幕吏積勞成疾猶伏案治事無間晝夜八月卒於官時年八十著有宦遊紀略六卷悼裕堂古文四卷養浩齋詩藁九卷續藁五卷

王肇謙

王肇謙直隸深澤人道光十四年舉人畿輔通志二十六年以捐輸河工議敘選授福建海澄縣知縣閩浙總督王懿德等疏及行略縣貢山濱海俗刁悍喜鬪所屬馬口鄉民構讐互相掠肇謙親往理論爲陳利害積讐頓解懸重金購巨盜許罇置於法羣盜斂跡富紳某爭產累訟男婦數十人環跪堂下肇謙援引古義以譬喻之謂骨肉未可乖財產無足重廉恥不可不存更反而自責衆赧然汗下謂今日始知禮義訟以是止邑民李順發負楊茄住金一日詣楊索金楊遂留之順發兄以擄弟劫財訴於夷館夷人移誅欲嚴究衆情洶洶肇謙爲請於長官謂茄住無罪不必治夷人驕心不可長事遂寢總督劉韻珂謂可任艱鉅檄入讞局以明決稱於冤獄多平反有營弁二以緝匪被誣繫獄肇謙得其情破械出之閩縣上箠村故盜藪嘗奉檄往捕單騎就道至則寓敗寺中日出與其父老語開陳大義衆皆聳聽久之乃乘間言曰若知我來何事活若一鄉耳衆惶然問故肇謙曰若列銃拒太守大府怒議屠之尙不知耶衆環跪乞命肇謙曰某某皆大盜速縛之來限三日繕齊保甲冊吾保若無事也衆聽命立以盜獻人咸稱爲能三十年以承審洋盜陳雙喜案出力以同知直隸州陞用是冬往漳泉查辦會匪閱兩月

渠魁就獲黨與解散咸豐元年赴某府按事知府某素貪墨託某令齎重金以請肇謙婉言謝卻之二年廈門洋人因賃屋與民齟齬勢張甚奉總王督懿德檄往按交涉例據理剖決兩無所徇洋人帖服五月署上杭縣知縣邑多摺紳甲族干以私者拒之因公建言者納之行略時粵逆踞江寧福建賊林俊等應之疊陷漳州永春大田諸郡縣肇謙建礮卡儲餉粟製器械簡丁壯爲堅壁清野計上杭賴以無虞三年六月霖雨爲災且賑且治軍復率勇二千越境剿松源縣賊擒斬七十餘人十月調赴漳州辦剿撫事民詣府乞留不得乃爲建生祠四年陞永春直隸州知州林俊屯城南山肇謙慰撫城內大姓募鄉兵二萬擊破之並擒土匪邱獅辜八等九月署漳州府知府漳浦古竹社蔡全爲亂踞石堡中提鎮兵攻之弗克肇謙設方略約內應縱火焚堡生擒全奏入硃批有該府所辦甚爲妥速之褒遂以知府卽補並戴花翎府俗獷悍難治肇謙謂民不奉法由吏不稱職爰立六條以課僚屬一曰清案牘二曰勤催科三曰懲械鬪四曰嚴緝捕五曰表義行六曰振文教能奉行者優薦違者罷之政餘割俸葺朱子祠行略及題本在漳三歲人稱漳南一柱十一月署延建邵道順昌土匪跳梁令生員張承需率鄉兵搜破



賊巢獲匪陳春太等四百七十人七年二月調赴廈門署興泉永道未行而粵匪石達開自江西竄入杉關陷光澤邵武肇謙作絕命書遺其親詞甚忠切嗣按察使趙印川解建寧圍移軍向邵武肇謙亦督軍至十三戰皆捷賞加道銜八月以勞卒畿輔通志贈光祿寺卿銜蔭一子入監讀書祀鄉賢及上杭名宦祀見行略及題本

托克清阿

托克清阿滿洲正藍旗人道光十四年舉人大挑知縣籤分甘肅署環縣安化等縣及吐魯番同知二十九年以事解任三十年以辦理清查事未覈降一級調用咸豐元年丁憂服闋後捐復原官仍發甘肅除皋蘭縣時回捻橫行陝甘土匪聞風嚮應侍郎梁瀚奏請辦理團練保薦托克清阿上命陝甘總督樂斌差遣委用尋署秦州直隸州知州十一年補實同治二年回逆竄甘南州境戒嚴托克清阿厲兵募勇力籌守禦以賊竄秦安率軍迎剿屢挫凶鋒後賊糾大股至衆寡不敵力戰死之事聞以道員例從優議卹並諭秦州及本旗建立專祠四年秦州士民以托克清阿忠貞孝友慈惠廉明潔己愛民禦災捍患在秦州時民皆安業賊不

犯境遺愛餘威實足固民心而寒賊膽公懇奏請賜諡陝甘總督恩麟據以入告上諭曰托克清阿政理民孚事蹟昭著前在秦州任內辦理防剿布置嚴密賊至今不敢犯境人民安堵洵屬遺愛在民著加恩予諡生平事蹟宣付史館編入循吏傳以順輿情尋予諡剛烈恩賞雲騎尉世職襲次完時以恩騎尉世襲罔替

### 沈衍慶

沈衍慶安徽石埭人道光十五年進士以知縣分發江西署興國縣三十三年補泰和縣二十五年調鄱陽縣縣濱巨湖時有盜賊出沒衍慶編漁戶名冊仿保甲法行之增巡船以資督捕屢獲劇盜置諸法境內肅然俗強好鬪衍慶聞變卽輕騎馳往力與開導事浸息兩遇大水沒廬舍衍慶擇高埠結棚居之其不能徙者以餅餌給之四門分設粥廠日乘扁舟往來疾風駭浪閒躬親拊循始終不懈前後存活者數十萬咸豐元年舉薦卓異二年髮逆陷湖北武昌衍慶議徵兵守康山控鄱湖門戶三年正月九江郡陷城內譌言四起逃亡者不可禁止衍慶率練勇出東門見糧船內數百人譟而前行慶手刃二人餘黨惴伏城中以定五月賊圍南昌急巡撫張芾檄衍慶帶勇援省垣遂偕九江鎮總兵馬濟美擊賊於永和

門濟美力戰死衍慶會省防各軍再戰大破之時援兵大集賊將東竄衍慶恐賊犯鄱陽請於張芾馳歸爲守禦計於時樂平縣知縣李仁元攝鄱陽事七月衍慶與仁元商戰備因久雨湖漲城垣傾圮無險可守賊乘風揚帆而來官軍然巨礮碎賊艦斃賊數十賊繞偪東門衍慶迎擊殺賊十餘人復手刃黃衣賊目兩人賊稍卻卒以衆寡不敵城陷力戰而死事聞得旨加贈道銜賜卹如例賞雲騎尉世職襲次完時以恩騎尉世襲罔替並准於鄱陽縣建立專祠

黃輔辰 子彭年

黃輔辰貴州貴筑人原湖南醴陵籍道光十五年進士以主事用分吏部二十四年補官三十年陞員外郎旋遷郎中遇事侃侃持正論屢忤上官不少屈同署咸嚴憚之咸豐二年截取知府三年分發山西旋乞假回籍時貴州土匪楊鳳作亂輔辰集士紳修碉卡行保甲法撫輯清水江諸苗弭其怨隙其後賊至無叛者巴香亂輔辰馳往大會團衆縛斬亂首羅憲章王登學姜洪三人事以定復勸諭商民捐穀建義倉三十廩備緩急巡撫蔣蔚遠上其功得旨仍發往山西以道員用並賞戴花翎山西患餉緝議抽釐以濟輔辰謂晉人皆賈於外又山程非他行省



比不宜以病民爭之不得則請蠲苛細取大宗及不切民生日用常需者戶部設寶泉分局於平定州就鐵鑄錢既滯不行則請分銷各府州縣歲收息銀三萬兩解部輔辰謂京師用鐵錢以濟銅幣之乏也山西銅幣數而用鐵故弗便今如通行各縣必令交納錢糧銅少鐵多司庫必絀以三萬之微利妨數百萬正供是謂利一而害百卽專行平定州然鼓鑄不息日積日滯患滋大且州在萬山中工匠蝟集諸亡賴混迹藝趨不可稽禁奸民煽之害胡可言巡撫英桂用其議入告分局遂罷兩署冀寧道加鹽運使銜九年直隸總督恆福以防務需員奏調輔辰差遣允之旋復請留直隸補用格部議仍回山西尋至四川依總督駱秉章會回逆擾陝中地荒殘無耕者陝西巡撫劉蓉疏請興營田蓉爲四川布政使時知輔辰賢以書詢屯田事宜輔辰爲陳十二難又採錄官私書爲營田輯要三卷大旨在用民而不用兵與民興利而不與民爭利書中言成法者十有七言積弊者十有四至制田物土之宜皆博採而詳說之於用人得失尤三致意焉蓉因奏調輔辰到陝聽候簡用同治五年鳳邠鹽法道缺蓉密陳輔辰心術正大吏事精能與湖南岳常澧道劉達善並堪其任有旨特畀輔辰蓉卽委以西安同州鳳翔延安乾

州邠州鄜州七屬營田事輔辰建議謂關中土曠人少非招徠客民事末由濟然墾荒所需耕牛籽種農具棚舍之屬官不能給民不樂趨也則莫若卽以地畀之薄收其租畝二斗爲差六年屆滿則給券使世其業然慮田無限制賦無定則吏得以意高下爲民患當先正經界略如古井田法量地百畝爲段編列次第書賦額多寡於券視土肥瘠別等則上下授之凡領墾者以先後爲次自一至十毋越其序十段爲甲十甲爲里置長焉里長總十甲租課歲輸之官凡移徙更替事皆責之別授田六畝俾食其入爲庶人在官者之祿而官總其成因詳定章程十一條令下民稱便復定考課舉劾章程四條以策奉行不力者基年凡墾田十八萬餘畝時回捻交訂援兵雲集賴有營田租麥軍食無缺又編查保甲嚴辦省防奸宄不得逞民獲安堵長安咸寧舊有義學四所亂後久廢輔辰捐廉倡復之親臨勸課撥公產給關中書院米薪士林競勸復修養濟院育嬰堂種痘局以至壩岸隄渠各工次第具舉尋卒劉蓉以輔辰積勞病故遺愛在民列上其事諭曰已故陝西鳳邠鹽法道黃輔辰歷官中外二十餘年其忠君愛民之忱亟宜嘉獎著准其入祀陝西名宦祠並將該故員政績宣付史館編入循吏傳子彭年 彭年道



光二十五年貢士二十七年改翰林院庶吉士散館授編修歷充武英殿協修國史館協修功臣館纂修本衙門撰文咸豐初年乞假侍親歸黔過白茆灘舟破於石彭年偕婦劉氏各負其父姑以出於險俱得無恙到籍隨父辦理貴州團練長寨等處苗漢積不相能下游清水江猜怨尤深彭年親入苗寨勸諭盡得漢民侵欺狀爲蠲除之使合團苗民翕然聽命同治初元四川總督駱秉章延之幕中俾贊戎機平劇寇石達開與有功力辭保薦陝西巡撫劉蓉聘主講關中書院兵燹後士鮮知學彭年講明實學廣置書籍嚴定課程學者漸盛尋直隸總督李鴻章聘修畿輔通志成書三百卷於星躔分野水道源流州縣沿革考證尤確足補舊志所未備其主講保定蓮池書院置書定課一如在關中時人給以筭使爲日記月考其得失而高下之選刊蓮池肄業生日記三十二卷光緒八年授湖北安襄鄖荆道調署督糧道旋赴本任襄鄖界連陝豫會匪未靖民多逃亡彭年首以除暴安良爲務得劇盜卽寘之法其誘脅者悉予自新流民皆復業購書數萬卷儲之鹿門書院暇輒與諸生討論武當山香火最盛住持僧歲供本道八百金彭年卻之並封禁其山九年遷按察使絕屬僚餽遺屏新關津貼停工程局攤捐湖北



獄訟繁候審所積案數百彭年督承審官悉行斷結往時諜訴臬署者書吏索費二三十緡或委員提案被訟者輒傾家彭年皆禁罷復以牧令多不諳律例幕友吏胥得因緣爲奸利特設學律館人給律例定期會講詳爲指授又以游手無恆業或偶犯偷竊設遷善局處之使習一藝成貸資釋出其人多改行又立待質所絕胥吏擅押罪人之弊設戒煙局以拯困於煙而貧無資者有獄犯田萬青自縊彭年例應鐫二級調用上官囑減囚罪冀免之彭年不可然竟得留任時大吏議裁綠營餉兵洵洵思變彭年開誠告誡營伍咸奉約束彭年治獄明決終楚臬任平反鉅案十數起結京控案四十餘起十一年調陝西按察使權布政使創博學齋延宿儒主講席購補關中書院書籍比履本任其建置如治楚憫愚民不知法摘律例中民間易犯各條刊布簡明告示使知儆懼陝省亂後會匪游勇潛相勾煽彭年整頓保甲明連坐之法嚴窩賊之禁詳定就地正法章程擒誅巨魁張鐵梅等數十名又以城中失火易致延燒捐置水桶水缸令居民數家共穿一井有警則通力撲救由是少火患長安縣西北馬營寨等六十餘村地濱灃渭十三年秋水決隄堰淹四十餘里壞民田廬彭年捐廉集款賑撫修復民賴以安尋擢江

蘇布政使建學古堂以課士設學治館以課吏會大旱減漕價明年大水州縣以米值二千七百而漕價二千二百請增之巡撫謂彭年可石增二百彭年曰漕米一石定例收水腳費一千其實所費不過數百獨不可將有餘補不足耶今水旱連年若增漕折民必重困且以江蘇百萬漕計之則民間多出錢二十萬緡此錢上不在國下不在民獨歸州縣中飽耳困民以利官不忍爲也因力持之未幾護理巡撫以懲貪墨敦樸儉爲先風氣爲之一變會有水旱災籌賑百數十萬緡全活甚衆事歲餘錢三十萬緡則請修吳淞江及白茆河蘆藻浜等處工程未舉調湖北布政使後任巡撫剛毅竟其志一律開濬吳民便之十六年抵鄂任甫兩月卒彭年邃於學著有陶樓詩文集東三省邊防考略金沙江考略歷代關隘津梁考存銅運考略

### 徐台英

徐台英廣東南海人道光二十一年進士以知縣用籤分湖南二十三年補華容縣華容俗好訟台英謂訟獄糾纏由於上下不通若官日坐堂上與胥吏相見則聞者不能積留日與紳士耆老往來則胥吏不能壅隔因與民約傳卽到案到卽

審審卽結差役需索者痛懲之又念士爲四民首勤接見諸生勉勵之一日閱呈詞不類訟師筆翰之果諸生也拘之至課以詩文文工而詩劣諭之曰詩本性情汝性情卑鄙宜詩之劣如此也吾念汝初犯姑宥汝汝其改行其人感泣去沱江書院久曠廢台英按月立課之每云陸清獻作今日與諸生講學吾雖不曉講學若教人作文由作文而誘之讀書立品是吾心也華容地濱江湖有圻田坳田山田之分山田苦旱坳圻苦潦瀕湖之地旱少潦多坳圻例得請蠲請緩而田無底冊影射恆多屆徵收則書差代墊官給空票凡花戶姓名糧石多少任其自注差指爲欠者拘而索之所徵銀米官不知其數漕米有保戶包納歷任皆以爲便挾制浮收無過問者自道光十一年後帶徵銀欠十六萬米欠萬餘石官民交病台英知其弊旣履任清田列底冊注花戶糧數姓名住址立碑坳上使冊不能改應緩應徵者可親行勘驗而影射之弊絕並申明糧隨業轉之例使買賣卽時過割而飛灑之弊絕收漕期至縣分設四局俾升合小戶就近輸局民免保戶之加收多輸正供而包納之弊絕華容瀕湖坳田舊有隄修隄之費向派諸隄內田主日久弊生有挪坳田作圻田冀免隄費者有賣田留稅派費貽累者有賣稅留田派



費不至者而催收隄費之值事半屬抗費之人一人抗則相率效尤隄費不充一  
塊潰決他塊皆藉希豁免凡借帑修隄者久無所償亦相率亡匿台英迺先爲丈  
量以田均費其低窪者許減派不許匿畝人戶俱絕歸宗祠管業承費而罪巨族  
之抗法者一年之間隄工皆固逋賦盡輸旋調補耒陽耒陽錢糧皆櫃書里差收  
解所入倍於官刁健之戶酌量輕收僻遠良善之家則多方扣折至鬻田宅完糧  
不足有楊大鵬者因民忿以除害爲名欲揭竿釀亂事平後檄台英辦善後事宜  
議者以里差悉糧戶姓名住址欲仍循舊章用里差台英曰里差不可不革也收  
糧之籍里差雖能紊亂之至櫃書則掌催收過割者欲稽花戶有櫃書終不患無  
藉手處遂盡革里差時收糧未有定章巡撫陸費瓌偕衡州府知府高人鑑親詣  
耒陽諭台英命鄉紳舉甲長以代里差仍守包收包解議台英以甲長之害與里  
差同上書布政使萬貢珍詳爲剖晰貢珍頗然之而重違巡撫意台英因集鄉紳  
問之曰巡撫命汝等舉甲長已舉齊否曰無人願充猶未也台英曰我知之矣甲  
長所慮不知花戶住址耳爾等所慮恐甲長包收耳吾今當併戶於村村若干戶  
戶若干人人若干糧田在某處人居某村分村立冊以各村糧數合一鄉以四鄉

糧數合一縣各村納糧者就近投櫃糧入串出胥吏不得預甲長亦祇管催科無從前包解包收之害此可行否衆皆拜曰諾台英曰隱匿何由核衆曰取清册磨對有漏補入可耳曰虛糧何由墊曰虛糧無幾如有之按畝勻攤可耳議遂決數月而清册成錢糧大定大鵬之亂誘脅者多仇家紛紛告訐大吏欲概置諸法台英保耒陽民不生事出諭禁告訐一縣獲安先是前任有革職去者存漕規二千餘兩應歸知府高人鑑人鑑懼爲所挾存耒陽庫中未受亦未辭也台英以之作公帑人鑑銜之會台英丁艱遂以虧空雜項揭參革職駱秉章巡撫湖南知台英冤爲補苴清款開復原官同治元年奉旨起用分發浙江交閩浙總督左宗棠差遣宗棠爲捐陞同知委署台州府知府未赴任卒

吳祖昌

吳祖昌廣西桂平人道光二十一年進士以主事用籤分兵部咸豐三年補主事歷遷員外郎郎中五年除山西道監察御史六年掌四川道監察御史八年俸滿截取記名以繁缺知府用十一年授江西撫州府知府時當髮逆蹂躪瘡痍滿目祖昌勞來安集次第撫循民氣以蘇先是寇至時鄉民往往被裹脅寇退其狡黠

者輒誣陷良善或指使婦女控官藉以恫喝罔利祖昌廉其實凡以通賊告置不問誣控之風遂息俗多溺女祖昌稽舊牘知向有育嬰遺產半爲強豪侵沒悉追復之不足捐廉爲之倡並勸商民行六文會法復立育嬰局全活甚衆又念書院灰燼士人肄業無所乃撥各廢寺田產立講堂養生徒潔己修禮期年之後風教大洽然後浚城隍富倉儲簡器械凡前此之蕩然無存者稍稍仍舊觀焉同治初年賊氛復熾祖昌部勒鄉勇授以兵法沿城築兵房馬道鄉民則令堅壁清野以備不虞三年逆首李世賢等果率潰賊十餘萬徑薄城下併力猛攻祖昌督衆登陣誓以死守相持七閱月城卒無恙初巡撫沈葆楨曾疏保祖昌治行爲江西第一才堪大用命交軍機處存記至是又上祖昌力保危城功得旨加道銜並賞戴花翎六年調補南昌府七年巡撫劉坤一保薦江西循吏首以祖昌名入告尋護理江西督糧道是年保薦卓異並補行上年卓異八年併案送部引見奉旨以道員回任候陞九年丁父憂光緒元年卒於家

### 李元度

李元度湖南平江人道光二十三年舉人大挑二等選黔陽縣教諭咸豐三年曾



國藩調理營務四年以克復湘潭功保知縣加內閣中書銜從攻半壁山奪田家鎮賊巢保同知賞戴花翎是冬曾國藩率水師入鄱陽湖爲湖口賊所阻別股由小池口襲我軍而大風復壞戰艦數十事急不可支元度彊掖國藩渡江五年正月入南昌整水陸各軍曾國藩遣元度會攻湖口僞翼王石達開僞北王韋昌輝挾全力來爭元度力戰卻之獲僞帥譚友盛袁蕃邦八月遂復湖口六年二月賊分竄進賢等縣元度率水陸諸軍大小五十餘戰復進賢縣城進扼貴溪以固浙東饒道十一月因宜黃崇仁失守以知縣降補七年二月賊糾衆三萬自安仁來犯大戰於鷹潭斬首數千級賞還花翎給同知銜九月以力解貴溪城圍復原官加知府銜八年正月捐陞道員二月湖北巡撫胡林翼疏調援浙七月以分兵解衢州圍記名遇有江西道員缺出請旨簡放旋移防玉山會賊大至守卒僅七百元度列陣堵剿礮傷左頰不少動賊砌壘與城齊架礮轟擊堅守兩晝夜詢知賊穴城令小西門至北門每二丈穴一洞橫出城根下選壯士持短兵晝夜蹲伏眠食悉更代衆莫喻其意元度曉之曰賊穴城必橫長十餘丈我先伏隧以待其至是隧十丈而與吾值者五賊至接以短兵可立斃也隧穿及洞伏兵殪二賊隧隘

爲尸所壅餘賊不能出灌以水殲焉賊知術敗西竄德興尋福建浦城大股賊北竄廣豐元度派兵力卻之時曾國藩奉旨援浙疏陳元度獲勝情形謂能以孤軍支持東路力保兩城有裨大局得旨加按察使銜賞色爾固楞巴圖魯勇號九月命以浙江道員缺出請旨簡放十年閏三月敕元度赴浙江交巡撫王有齡差委六月授溫處道會曾國藩移駐祁門疏調元度會剿改元度徽寧池太廣道八月至祁門時僞侍王李世賢陷寧國守將周天受戰死元度至徽州未十日徽城繼陷革職拏問十一年十二月杭州將軍瑞昌浙江巡撫王有齡合疏調元度援浙詔如所請其應得失守罪名仍著曾國藩查辦時元度已回籍募勇名曰安越軍三月僞忠王李秀成擾江西湖北元度駐軍瀏陽以保湘境五月賊逼湖北省城總督官文巡撫胡林翼檄元度進剿元度報稱連復通城崇陽蒲圻通山自駐崇陽以七營留通山分軍進克義寧官文據以入奏命賞還按察使原銜元度又稱克江西新昌奉新瑞州等城再加布政使銜九月元度始入浙江李世賢糾衆撲江山瞰衢州元度率九營會左宗棠分兵肅清江山常山同治元年正月授浙江鹽運使兼署布政使二月擢按察使以道梗均未抵任三月兩江總督曾國藩疏



劾元度獲咎後擅自回籍在義寧瑞州並無打仗克城之事又節節逗遛援浙不力有旨卽行革職免其治罪仍交左宗棠差遣委用十一月浙江省城陷以御史劉慶論劾諭左宗棠查辦尋疏言杭州失陷非元度逗遛所致惟元度由平江通城尾賊而來並未與賊接仗賊去後輒飾報勝仗克復城池迨經曾國藩奏劾落職後悻悻求去逼索欠餉失人臣體得旨下部議罪發往軍台效力旋以前功免其發遣五年貴州逆苗及黃號白號等匪構亂蹂躪思南石阡思州遵義銅仁五府巡撫張亮基疏調元度入黔時賊已擾及湖南沅州而老巢在荆竹園大小壘居其前白號賊踞秦家寨黃號賊踞覺林寺四月元度率十二營以往六月攻大壘破之小壘賊乞降元度以大小壘河道上通石阡由兩江口入牂牁江遂造戰船創立水師扼江面以拊荆竹園之背又立貴新營以處降衆分軍剿平大園子廣家山馬鞍營三寨命賞還原銜頂戴九月荆竹園賊竄石阡元度破之於石灰坡連克饒鉢頂等六寨六年四月白號賊安雷鉢以五十一寨降覃德徵以二十寨降五月賊攻尖山壘以千餘人犯三道水以三千人犯棗子坪及大頂寨元度分兵夾擊賊敗走入園時癘疫流行弁兵病亡相繼巡撫劉琨以頓兵日久奏劾



元度降三品頂戴十一月克官塘十二月克八寶營七年正月克荆竹園老巢斬首逆蕭桂盛等乘勝平羅家巖賞復原官並頂翎嗣分軍進薄秦家寨燬高固巖安家坨班鳩頂七星關各壘擒秦崽崽正法先後克三十六寨招降百一十一寨安撫萬八千餘戶四月遣將攻覺林寺克之誅僞英烈侯田修德金堡廟二十五寨牛頭灘五十三寨悉降又克偏刀水僞黔王何繼述伏誅出難民八千餘人貴東肅清旋授雲南按察使以終養開缺回籍光緒八年丁母憂十年法越構亂彭玉麟以兵部尙書督辦廣東海防延元度贊理營務乃建議堵塞虎門海口又定沙基洋行案遂歸籍終制十一年六月授貴州按察使疏陳籌餉之策十籌防之策十其減漕運略曰唐初漕運歲不過二十萬石其後兵日多漕米亦日多裴耀卿劉晏所講求半爲養兵計也宋都汴京去江淮不遠勞費尙輕元行海運初止四萬石後至二百餘萬亦無甚勞費勞費自明始永樂九年會通河成引黃河以濟運勞民傷財幾竭天下之全力聖朝定鼎北京仍沿明代舊制歲漕南米四百萬石二百四十餘年帑項之耗於漕與河者不可以數計設官旣衆丁役且繁其給漕費也非四十金不能運米一石入京倉視秦之三十鍾漢之十餘鍾古今一轍

而米在京城每石不過值二千餘文其餘皆成虛擲況漕之利病在河河不治則漕不能治國家經費以黃運兩河爲漏卮而又無十年不決之河故漕與河嘗交受其敝今黃河北徙天意旣析河與漕爲二應請敕議改章除直隸之通州天津二所山東之濟寧東昌臨清任城德州五衛濮洲東平二所密邇京畿無虞阻隔照常運米徑解通倉計共六十五萬三千二百二十九石其餘江南江西浙江湖廣歲額三百三十餘萬石並隨漕耗米概行折色照見定折價每石一兩四錢或酌加數錢共折銀五六百萬責成各糧道徵收解部由倉場總督酌設招商局奏定時價陸續採買麥石仍儲京倉凡官俸兵食願領銀者照折價給銀京東產米海船多販往南中間都城需米自必源源而來自購亦易其需米者尙有六十餘萬石以給之俟十年後官民交便則直東漕運可一律改折於倉儲民食兩無所損而裁員弁汰標兵罷運船免丁夫省挑濬所節省者歲約數百萬可以充海防經費造船鑄礮練兵矣查湖廣江西各漕久經折色其納米者惟浙江及江寧四府之百三十餘萬石江安糧道之十萬石而已然則因勢而利導之概行折色實亦非創舉也其辦屯田略曰漕法旣改則兩江兩湖浙江共三十七衛八所請照

湖南三廳屯田章程改衛爲屯卽認耕所受之屯田屯租照入官地畝勘報大約每畝收租穀一石折銀五錢計兩江兩湖浙江各衛所應有田五百萬畝歲可得銀二百五十萬其通州武清寶坻香河東安永清六州縣共六千餘頃每頃收租十石歲可收麥六萬石此外山東直隸凡曾給地畝者均照麥租章程辦理是改漕法卽以興屯田也其裁員弁略曰河運旣停則漕督自可不設此外凡與總督同城之巡撫亦皆可省查總督巡撫昉自前明因事設官事定則罷中葉始爲定額國朝因之然督撫多不並設如川陝川湖總督所轄亦時有分合直隸初設巡撫後改總督浙江曾設總督後改巡撫甘肅舊有巡撫後以總督兼之皆因時制宜之道也督撫權位相埒同城者意見每多不協屬吏亦無所適從應請敕議將同城之湖北廣東雲南三巡撫裁併而各以總督兼之以一事權其關臺疆略曰臺灣在明爲日本所踞荷蘭奪之鄭成功又奪之康熙中始入版圖其地土產繁盛可富可強沈葆楨開闢一府四縣未竟其功其實生番之地可盡闢也今法人曾踞雞籠日本狡焉思逞則臺灣實必爭之地應請敕議令福建巡撫專駐臺灣將臺北一律開闢可爲東南重鎮其修礮臺略曰各要隘皆築礮臺矣而合法者



少惟廣東虎門新造者衆稱堅固凡築臺必兼顧上下流敵船來則迎擊之過則背擊之西法有作饅頭形者曰圓礮臺作弧角形者曰尖礮臺作磨盤形者曰旋礮臺作偃月形者曰彎礮臺作之字形者曰曲折礮臺礮壘中作隔堆使敵礮橫擊不得礮位行列宜疏礮門宜外小而內大礮房宜前高而後低架宜靈活基宜堅實頂宜覆釜前宜交角上宜挖孔以透煙旁宜分倉以儲藥前有垣宜堅厚後有徑宜紆曲放礮則宜準算數勿輕糜子藥此其大要也其添公使略曰通商諸國既各有使臣駐之然華人之經商傭力寄寓外洋者計呂宋噶羅巴一島約十萬人美國舊金山及其近埠約十四萬人越南之西貢河仙及暹羅等處約三十萬人古巴祕魯各十餘萬人皆遵用國朝正朔衣冠而洋人因其勢孤路遠輒肆欺陵前者閩中兵船游歷東南洋客居呂宋之華民鼓舞歡呼一處如此他處可知應請敕議凡華民寄居之地人多者設公使少者設領事遇有欺陵等事照會該處有司遵公法以判是非華人有滋事者亦照例懲之更宜就地取才令其團練壯丁協同操演擇其尤者咨給頂戴則人爭自奮更有無形之益也疏入命下所司擇要議行元度既履任執法無所屈撓先是正安胡先科普安胡瑞廷皆由

降賊保官充練長恣睢殺人以百數計瑞廷尤殘虐有司莫敢詰元度擒治之論如律貴筑令以賄脫死囚仁懷令納役女爲妾而斃役夫婦元度均從嚴劾抵綏陽遵義教民擅殺人激衆怒毀教堂問官庇教元度謂無論爲教爲民殺人者死勒教士交凶徒寘之法十二年署貴州布政使清查丁糧將及九成下部優敘十三年二月陞貴州布政使籌立蠶桑局議辦清溪縣鐵礦九月卒初提督孝順署貴西道于鍾岳綏陽令崇璟先後殉難及其他宦游死者二十餘家皆厝柩省外貧不能歸葬元度籌資返其喪及子女而請建十忠祠以孝順崇璟于鍾岳佟攀梅桂林鹿丕宗石均戴鹿芝石虎臣江炳琳合祀焉元度在軍幾二十年未嘗妄殺人凡縛賊必親鞫解釋者十嘗七八各省州縣上控株連待質者久羈多死元度在籍議設候審所貴州巡撫黎培敬以其事入告得旨通行平江界湖北江西爲長沙門戶元度仿唐府兵法立合防局有警丁壯咸集無事則歸農光緒四年會匪將犯長沙元度率鄉練堵截擒渠魁數十人散黨萬餘人十四年附祀曾國藩祠

趙秉貽

趙秉貽江西南豐人道光八年以布庫大使分發四川二十三年借補重慶府經歷兼批驗大使時川鹽漸漏楚境運商捆載而下舳舻相接秉貽體恤商艱開放以時不苛不擾或說以川商浸灌淮鹽引地可作私販論若持之將得鉅金秉貽笑謝曰汝意誠厚然非所以愛我吾惟以清白遺子孫耳歷攝壁山綦江合江榮昌知縣所至卹刑獄懲豪猾而勤於培植寒峻壁山郭紹芳家貧恆負薪佐讀秉貽首拔之命入署肄業且時卹其家紹芳感激劬學卒以成名三十年保薦卓異咸豐三年以擒治要匪晉知縣旋復辦理川東團練功加知州銜五年署南江縣知縣邑地瘠而民悍土豪李某挾其羽黨殺人越貨愍不畏法役隸悉其耳目縣令一言一動彼率先知故無有能逮治之者秉貽至陽謂人曰李某義士也聞有任俠風丁茲世變正英雄建樹之時會寄以干城耳某喜不爲備秉貽一日託巡縣攜丁役出城曰東東之曰北北之及其居乃宣捕拏之令遂擒歸置之法闔縣稱快焉又推廣書院課額提倡文風建義倉七所備民間災歉在任年餘百廢俱興七年署崇寧縣事境毗邛蒲故多盜秉貽設法緝捕盜賊斂跡八年髮逆石達開竄擾川境邊圉戒嚴大吏稔秉貽才且在川東久特委辦涪防糧臺兼理防堵



事宜秉貽內籌轉運外固疆圻躬親巨細秩然有法遇疾病亦不肯少息僚友以節勞勸秉貽曰大敵在前而滇匪藍大順復由富榮下瞰川東一隅有腹背受敵之憂我今併力支持尙虞不給敢儉安以誤事機耶聞者歎服十年十月竟卒於防次同治八年四川總督吳棠奏請照軍營病故例賜卹尋贈知府銜予祀昭忠祠

### 蒯賀蓀

蒯賀蓀順天大興人道光二十四年舉人由謄錄官議敘知縣分發河南咸豐三年巡撫陸應穀檄令製礮甫成三百具而粵匪竄撲省城應穀卽以礮勇屬賀蓀賀蓀督之守禦賊不敢前賞戴藍翎七月攝祥符縣事旋署固始固始與皖北接壤捻氛方熾巨憝胡金斗等揭竿樹幟圖犯縣城賀蓀築垣鑿濠請兵助剿援未至而賊萬餘逼城下賀蓀督勇迎擊大捷乘勝攻賊巢賊勢蹙遣人僞爲難民請賀蓀往襲將毒之農民有知其謀者祕以告賀蓀欲走賊已合圍舉火勇丁左右之乃得出旣賊衆渡淮謀南竄賀蓀禦之朱皋集胡金斗乘機糾合霍匪袁三鳳等擾石佛店張曜者賀蓀妻姪也時相隨賀蓀知其才可大用令同軍功蔡天祿

吳俊基督隊擊敗之又敗逆日薛小於華家岡賊懼遁入三河尖賀蓀復命曜由冠山臨水扼其前天祿由嚴渡湯岡搗其後而自率勇丁躡擊斬首百數十級賊自是不敢渡淮曜言於賀蓀曰賊雖畏我不敢來然亦必料我不能往掩其無備潛師夜襲可立破也賀蓀然之遂約參將慶喜掎賊後而親與曜及天祿銜枚宵濟竟獲李鳳蘭等七人焚其巢追擊之於阜陽境突逆首李士林句結李鳳岐丁心田分三路來撲賀蓀亦三路並攻斬其目許士讀等五名於陣士林窮蹙乞降而鳳岐心田等仍負嵎自雄賀蓀與拒於徐家灘青皮淺王家大灣各地屢戰屢捷賊陰通胡金斗等聲言復仇麇聚於吳家草寨賀蓀與紳民陳廷獻等設計離間之賊果互相猜疑隨令張曜蔡天祿領隊截擊擒李鳳岐丁心田十數賊魁並誘擒胡金斗等於吳家樓四境稍稍肅清商息阜霍無賊蹤矣縣東南鄉龍潭舊有壩蓄水灌田後漸湮廢賀蓀重加修築以瀦河水民田復資灌溉會歲歉開倉平糶其鄰封流民之至境者亦必親加撫卹給資散糧並設棲流所以備止宿病者爲延醫儲藥死則施棺木設義塚俾之咸得其所縣有臨淮書院兵荒不舉賀蓀捐資整頓並於城鄉創設義學推廣養濟院育嬰堂諸善舉孤獨亦賴以自存



以比歲兵災民不堪命申請緩徵上官疑其沽名不報賀蓀爭之再三有拚此一官爲民請命早已置身家於不顧尙何名之可沽等語削牘萬言娓娓動聽上官察其誠摯允之四年補永寧縣未之官丁父憂大吏以軍事日棘奏留河南軍營差遣旋錄剿辦擒匪功命俟服闋後以直隸州知州用並換花翎尋奉旨奪情攝光州事適擒匪易天幅等陷光山息縣徑攻州城固始亦同時告警賀蓀慮固始再被蹂躪分兵赴援而自督勇練力解城圍匪不得逞七年巨擒張落刑復圍固始張曜時攝邑篆賀蓀率軍馳援內外夾攻圍乃解八年固始又被圍曜用賀蓀防禦策堅守七十餘日賊穴隧道火攻城堞三陷三復之賀蓀亦同李孟羣大軍馳擊斬馘萬計敍功以知府仍留河南補用州屬角子山綿亘二三百里谿徑崎嶇擒匪踞之分黨肆擾汝南間人皆畏之賀蓀選敢死士數十人披荆斬棘冒險深入陣擒逆首管紹堂餘黨悉平乘勢會南陽鎮各軍追剿竄匪於霍邱之八里塚旋丁母憂團練大臣毛昶熙重其才奏調總理營務處積勞晉道員同治元年再奪情擢南汝光道時信陽州土匪蔓延賊圩林立道梗不得前賀蓀密遣人約各圩良民爲內應民詭作奸細來謁賀蓀面授機宜立捕明港匪首陳玉林陡溝



匪首蕭汝信等悉寘諸法連破賊圩數十驛路始通二年補南汝光道並加鹽運使銜擒首陳大禧等又悉衆薄信陽州州人大恐賀蓀亟率勇士縋城擊之賊大潰旋知官爲賀蓀皆引去而其黨張鳳林盤踞汝光間欲設計詭降以陷賀蓀賀蓀單騎入其寨諭以順逆利害張逆懼不敢發嗣奉僧格林沁檄辦大營糧餉督催轉運往來楚豫間源源不匱而淮湘各軍之至信陽者亦資以飽騰直隸總督李鴻章謂其力顧大局奏請賞加布政使銜毛昶熙旋檄充翼長剿辦息縣土匪七年署河南按察使八年回汝光道任十年補浙江按察使以積勞卒於官

李朝儀

李朝儀貴州貴筑人原湖南清泉籍道光二十五年進士以知縣卽用分發直隸二十八年補平谷縣知縣時總督訥爾經額以饒陽多盜先令試署朝儀設梭巡法每夜遣營汛丁役四出分捕而自以輕騎周履暗緝盜爲屏跡三十年調補三河縣創建書院獎拔寒畯三河文風之振自此始咸豐元年陞補大興縣知縣三年署南路廳同知時髮捻北竄朝儀整飭團練民有恃不輕去南苑官軍強買物白其帥繩以法由是相戒無敢犯四年晉東路廳同知五年畿內旱蝗朝儀令分

捕購買搜除蝻孽略盡又隨科爾沁親王僧格林沁在寧河營城北塘大沽各處  
修築礮臺用帑近百萬出入旬稽無絲毫假借有平餘銀鉅萬皆入之官會英兵  
迫通州土匪嚮應衆情惶惑朝儀取通倉積穀練團或謂正供不可擅動朝儀曰  
此何時尙可拘常格耶脫有處分朝儀獨承人心始定尋以稽察漕運先後加知  
府銜並以知府在任候補九年僧格林沁擊退大沽口敵船朝儀在事出力歸知  
府候補班儘先補用十年奉旨分辦直隸團練十一年賞加道銜尋署順德府知  
府時捻匪張錫珠擾直隸境至沙河朝儀募勇五百身先督禦賊衆逾萬人勢張  
甚軍士以衆寡不敵請退守沙河不許請回保郡城亦不許突飛礮折大旗衆皆  
失色朝儀屹不動結方陣自固使遊騎於後路揚塵賊來則施槍礮擊之退則寂  
然相持六時之久賊疑有伏引去同治四年調署廣平府知府直境梟匪蠶起所  
屬雞澤肥鄉平鄉威等縣竄擾殆遍朝儀率團軍駐防曲周馬疇橋四路策應獲  
賊無算匪黨遠遁又念捻逆張總愚必圖北竄亟修城垣儲軍火以爲之備及賊  
衆十餘萬偪城下知有備不敢近先是賊將至求入城避難者不下數萬人朝儀  
悉納之故賊雖恣焚掠民無所傷五年補大名府知府清豐縣有殺人者逸去縣



令王學乾逮良民鞠之堅不承乃嚴責捕役役苦拷掠因以賄屬囚使承之並僞爲血衣兇器鍛鍊成獄獄上朝儀反復研訊得其寃卽以囚械械縣役並劾治學乾而另緝殺人者抵罪清豐團紳馬學孟孫懷珍二人相構巡道以學孟由捻黨投誠恐有反側而懷珍曾任山東知縣當可信遂諭使圖學孟學孟善撫士卒滑濬內黃之民多附之因挾衆入城殺懷珍黨數人遠近傳學孟叛三府震驚朝儀請於巡道往平其寨是時大名屢有戕官事巡道恐或不利於朝儀固不許朝儀卒私往比至寨門學孟果列兵以待朝儀單騎入其帳曉以利害學孟伏地請罪呈繳軍械夷所居爲平陸後朝儀管帶練軍擊賊頗資學孟力云旋以扼守黃河堵剿捻逆功擢道員又以辦團功賞戴花翎八年總督曾國藩奏陳朝儀才具政績溫旨嘉獎八月授永定河道九年以河溢革職留任嗣報漫口合龍復原官十二年復以河決革留旋開復原參處分並加按察使銜光緒三年署直隸按察使尋回永定河道任每遇汛期險要督率廳汛兵弁躬往搶護未曉赴工所日暮始回員弁相率從之驗收料垛必親爲丈量有不如式者責令賠償盡除架井虛空碎料攙和之弊永定河沙多於土迎溜之處潰埽崩隄所在皆然因購儲麻袋盛



士耨護遇有險工墜柳壓埽悉如前法又念大汛時農民多失業迺通飭撥夫州縣告諭村民春初農隙挑積土牛如數大汛卽無庸上隄鄉民稱便又以種植隄柳課兵弁勤惰工用有資隄防亦固焉五年四月陞山東鹽運使永利場積鹽三百餘包歷任皆恐歲久耗失不敢動朝儀以帑項所關久則益耗迺擇幹員授以機宜不兩月積鹽盡銷九月署山東按察使十一月授順天府府尹朝儀知順天吏治玩泄屏絕請託期年吏治一變良鄉土棍挾制官吏莫敢過問朝儀至皆閉門自斂屬境多馬賊朝儀飭各屬開報幹練捕役名及訪得盜魁窟宅則委員弁率幹役掩捕無或脫者七年四月卒固安縣建專祠

### 陳崇砥

陳崇砥福建侯官人道光二十五年舉人咸豐三年大挑知縣籤分直隸八年署東光縣知縣適海口有警大吏檄沿河州縣捐辦礮臺木植崇砥以東光初罹兵難民力不勝自出俸餘採買士民間之相率輦木至堂下酬以值不受兩月得千五百株如數報解九年調署赤城是年冬補獻縣知縣縣經兵燹馬賊充斥劫獄搶犯城中一夕數驚崇砥擇健役購線緝捕渠魁多就擒命城鄉練團選正紳爲

之長具資糧器械立團十六合丁壯千五百人每月每村三班輪值值五百人行之期年邑亦有備瀛渤間地多平曠每值夏秋賊伏田禾中爲劫奪崇砥令於集鎮要害掘塹築垣添設屯鋪以爲守禦燈相望柝相聞由是盜賊不得入捻逆張錫珠寇近畿距獻五里崇砥先期調練勇入守開門納逃亡婦女集紳民誓於神復出俸增餉衆皆感泣願以死效賊知有備遂東遁方賊之西竄也日馳數百里民之避地河間者守令閉門不納且飛書崇砥令拆臧家橋橋爲寧津吳橋阜城東光景州五邑入都通衢崇砥得書力阻之謂正宜安集難民遙爲聲勢豈可夷險塞阻更示以弱方今滹沱水生五路羽書日數十至此橋拆文報不通且委東鄉百姓於賊非計也知府悟議乃寢賊果無所掠而逸縣有天主堂其黨徐博里嘗干以事崇砥斥之曰敎事爾自主之民間獄訟有國典爾無包庇以累和好博里氣沮禮部尙書祁寯藻奏舉循吏以崇砥名上擢保定府清軍同知同治四年署定州知州五年辦軍需局務西捻平賞戴花翎八年直隸總督曾國藩檄崇砥辦水利崇砥以保定府河港汶分歧淤淺難稽請令沿河汛官編字分段循隄安牘每月水長落分別開報并添置夫役器具淤塞者隨時淘汰以河勢不能均平



商舶打壩致爲河累議設壩船遣河兵視守酌給閘板椿木繩索遇淺搭橋以便行旅復以沿河鹽務爲大請蘆綱撥款備運送鹽船諸費所論皆切要九月署大名府知府大名亂後民多築寨堡自衛崇砥恐易藏奸飭屬查明所轄團寨開具里數及寨長姓名繪圖貼說官自履勘收存軍械擇公正紳耆經理聚衆抗差之風以息畿南久苦旱河南巡撫錢鼎銘邀崇砥襄賑事崇砥乃議擇災重之區郡抽以邑邑抽以村村抽以戶戶抽以口地在十畝外者不賑極貧者大口給制錢千小口半之壯者不給始委員編查保甲繼造應賑細冊復查無異則告以貸每十戶立借領一保結一每戶給貸票一注村居姓名丁口錢數十戶揭一榜散錢之日先期設局令出驗貸票加戳記然後赴賑所驗領事畢奏請蠲貸民皆欣悅南樂鄉民以差徭聚衆抗官令飛章告變崇砥輕騎往謂曰爾等反乎皆曰不敢惟苦徭重耳崇砥曰徭當輸否皆無辭乃曲陳利害平其輕重曰是吾民當不犯上衆歡然卽日輸納無敢後有副將某駐兵獻縣某村兵不戢衆疑其僞爲官軍者移團掩殺戕副將既而知誤恐逮不敢散縣令出捕則大譁抗大吏以崇砥舊有聲於獻檄往治衆喜曰好官來矣崇砥召團長曰國法戕官干重典況又拒捕



與逆何異事已至此惟舉首禍者吾當爲若解衆感泣縛爲首數人以獻崇砥請免脅從者遂無事屬當他調士民將赴省乞留直隸總督李鴻章寓書崇砥曰執事多善政百廢俱舉惜以特簡有人不得借寇望將治績告新守俾吾民留去後思也七月回本任十二月署順德府十一年補授河間府河間詞訟甲通省崇砥申清訟之令刻期審結所屬有疑獄皆代裁決東光爲崇砥舊治有來訴者或不鞠而服期年案清人謂五十年所僅見者河間當漳沱下游水潦爲災崇砥請以本年賑項築古洋河隄自獻縣至肅寧六十餘里於蔡家橋以上作隄以防支流池西開溝六千餘丈以資宣洩於馮家村至高日口買地疏濬造橋建閘防子牙河暴漲由是古洋河通流高下之地皆大稔采古今捕蝗成法刊爲治蝗書尤善治獄東明人郝延齡女先許字周敬止之子周以子殤辭婚郝復受周慶雲聘後慶雲家中落婚書又失欲娶女郝不可而以女送敬止家聲言守節敬止拒之郝乃詭稱敬止子被擄未死遂涉訟崇砥判曰敬止以子殤辭婚女與周恩義已絕慶雲婚書雖失有媒灼可證不得以貧寒萌他念命慶雲刻日與郝女成禮延齡父子並爲生員如予褫革令其女愈難自安且失兩姓好宜薄懲示警獄遂定長

垣人薛玉成其父爲聘李姓女爲養媳年十四未成婚玉成屢挑女女拒之後竟殺女鞠者以夫毆妻至死律定讞大吏檄崇砥親訊知女曾納段姓聘段子爲賊擄女至薛家猶不忘段薛之父母欲子成婚以絕女望屢挑屢阻至於被殺崇砥謂女不許聘則父母凍餒而心未忘段抵死不悔以待之旌之宜也薛子以父母命而得妻照前律亦宜也必以君子之道責村農小兒女則過矣時躉其議積年重案平反得雪多類此光緒元年卒於任

### 朱次琦

朱次琦廣東南海人道光二十七年進士分發山西咸豐二年攝襄陵縣事縣有平水與臨汾縣分漑田畝居民爭利構獄數年不決次琦至博詢訟端則強豪壟斷居奇有有水無地者有有地無水者有地無水者向無買水券予之地弗予之水有水無地者向有買水券雖無地得以市利於是定以地隨糧以水隨地之制又會臨汾縣知縣躬親履畝兩邑田相若稅相直也迺定平水爲四十分縣各取其半復於境內設四綱維持之曰水則曰用人曰行水曰陡門實得水田萬四百畝有奇邑人立碑頌之繫囚趙三不稜劇盜也越獄逃次琦未抵任先出重貲購

知其所適亟假郡捕前夕疾馳百二十里至曲沃郭南以俟盜衆方飲酒家役前持之忽樓上下百炬齊明則赫然襄陵縣燈也迺伏地就縛比縣人迎新尹尹已尺組繫原賊入矣遠近以爲神河東歲患狼次琦募獵戶捕之無獲乃檄禱西山神祠天忽大霧旬日人得跡獸所出沒攢火槍擊之無脫者半月得狼百有七患遂絕每行縣所至拊循媁媁老稚迎笑有遮訴者索木倚在道與決能引服則已恆終日不答一人其他頒讀書日程創保甲追社倉二萬石禁火葬罪同姓爲婚卓卓多異政在任百九十日民俗大化其去也攀留萬人至門阨橋折爲立主祀之鄧伯道祠後別建朱使君祠春秋報祀弗絕先是南方盜起北至揚州次琦猶在襄陵謂宜綢繆全晉聯絡關隴爲三難五易十可守八可征之策大吏不能用途引疾去歸則講學九江鄉生徒百數十人晉省弟子亦有來學者足不入城市有後朱子之稱時稱說浦江鄭氏江州陳氏諸義門及朝廷捐產准旌之例由是宗人捐產贍族合金數萬次琦呈請立案爲變通范氏義莊章程設完課祀先養老勸學矜恤孤寡諸條刊石世守之同治元年與同邑徐台英奉旨起用次琦竟不復出光緒七年兩廣總督張樹聲巡撫裕寬疏其學行特賞五品卿銜逾數



月卒次琦生平論學平實敦大嘗論漢之學鄭康成集之宋之學朱子集之朱子又卽漢學而精之者也宋末以來殺身成仁之士遠軼前古皆朱子力也然而攻之者互起有明姚江之學以致良知爲宗則攻朱子以格物乾隆中葉至於今日天下之學以考據爲宗則攻朱子以空疏一朱子也攻之者乃矛盾嗚呼古之言異學也畔之於道外而孔子之道隱今之言漢學宋學者咻之於道中而孔子之道歧果其修行讀書漸至於古之實學無漢學無宋學也凡示生徒修行之實四曰敦行孝弟曰崇尚氣節曰變化氣質曰檢攝威儀讀書之實五曰經學曰史學曰掌故之學曰性理之學曰詞章之學一時咸推爲人倫師表云著有國朝名臣言行錄五史實徵錄晉乘國朝逸民傳性學源流蒙古聞見等書疾革盡焚之僅存手輯朱氏傳芳集五卷撰定南海九江朱氏家譜十二卷大雅堂詩集一卷燔餘集一卷橐中集二卷

### 李仁元

李仁元河南濟源人道光二十七年進士以內閣中書用呈改知縣咸豐元年選授江西樂平縣樂平民俗剽悍以禮讓化之民多感悟有素習械鬪者仁元曰民

不畏死然後可以致死今天下多事正此輩效順之時也募驍健得六百八日加訓練土匪皆畏之三年髮逆圍南昌鄱陽縣知縣沈衍慶奉檄助剿仁元移攝鄱陽初衍慶宰鄱陽治行爲江西最及仁元攝縣事政聲與之埒時人以漢召信臣杜詩方之未幾賊東竄衍慶馳歸仁元以瓜代請衍慶曰鄱陽之在君猶在我也旣因仁元父母妻子皆在樂平亟從索印趣仁元回仁元曰賊旦夕且至臨敵易令是謂我不成丈夫也印不可得衍慶爭之力斬不予議併力戰守乃予之饒州府城被水衝圯無險可據於是審度地勢衍慶軍南門仁元守北門爲犄角勢經營一晝夜而賊帆大至官軍然巨礮碎賊艦斃賊數十賊繞而東登岸入城衍慶迎擊之賊稍卻又繞而北仁元率樂平勇巷戰頗有斬獲卒以衆寡不敵爲賊所困仁元猶張空拳奮擊髮指眦裂勇氣百倍適一賊橫衝而過矛刺其背刃出於胸遂踣地羣賊斃割之樂平勇猶與賊戰踰時死者過半卒得仁元屍以出初樂平土匪度仁元去必復來伏不敢發及聞殉難賊又將至乃倡議迎賊仁元母顧謂其婦女曰禍將及矣曷早自計皆死之城陷仁元父及弟並遇賊不屈死事聞得旨加贈知府銜賜卹如例賞雲騎尉世職襲次完時以恩騎尉世襲罔替並准

於樂平縣建立專祠仁元父子予墀母陳氏妻金氏弟誠元妹三人妾楊氏及使女僕婦等均得旨准其附祀

### 錢德承

錢德承浙江山陰人由監生捐從九品道光五年分發湖北試用歷任漢川麻城巡檢以捕盜功陞縣丞十九年補石首縣丞二十三年改發江蘇二十四年攝吳縣丞二十六年補上元縣丞葺先賢祠墓修義塚有暴棺不葬者出俸錢掩埋之復捐修屋三楹歲收租以資善舉禁書役毋得苛索一切陋規悉罷之二十八年權知高淳縣事縣境地分七鄉附城者四其三鄉遠且阻湖德承下車先清附城四鄉宿案卽詣三鄉假廟宇判決兩月盡結邑患蝗德承令寅午二時捕之旬餘蝗盡二十九年以整理鹽政功陞知縣咸豐二年補金匱縣知縣三年調署青浦青浦當周立春亂後民輒日所惡爲餘黨德承下令捕黨惡十三人誣告者以其罪罪之時上海猶爲賊踞距浦不百里邑民被脅者多德承以鄉團法箝束之令自歸免罪並教以聯絡應接之術於是民情固而匪勢日衰大吏以軍儲孔亟議開徵浦民環署泣訴德承善言遣之已而檄下令徵錢漕十之四乃具牘力爭謂



官可去事不可辨卒得請四年復金匱任有鹽梟械鬪久未成讞德承一訊而結金匱紳士完漕恆減民戶數倍德承令紳民畫一諸不便者百計撼之不爲動上海克復紘防堵績賞戴藍翎加同知銜六年丁母憂去官旋以常州府屬團練得力保以同知直隸州用並留辦常州軍務十年奉文回籍補行守制同治元年攝元和縣事尋調崇明崇明濱海民鮮由禮德承採節義可風者旌獎之遇貧乏無告者撫卹之復廣置義阡掩骼埋胔行不數月風氣丕變邑故爲海賊逋逃藪黃六郎者劇盜也黨羽實繁德承以計捕誅之餘黨乃散邑素健訟德承定傳審之法禁胥役需索道里遠近給以資久之民以見官爲恥故事邑田環海恆有漲沙三年一均有餘則以償賦之不足官斯土者多取以自給德承舉所得五千緡悉以濟軍巡撫李鴻章上其治狀得旨以知府用二年署松江府知府時蘇省兵民交鬩德承與統兵官力解之免民軍中樵蘇之供兵民以安松江漕賦最重亂平方議規復德承徧勘屬邑酌定科則陳請均漕減賦者數四松蘇漕額視前得減十之三乃刊勒成書俾爲定法府屬蘆洲久未定賦民糾結爭訟德承冒烈日履度之感熱咯血不少休息嘗飲水味鹹意海塘必有傾壞者察之海寧塘果圯卽

日補葺沿海田畝得以無患又修黌宮建試院續纂府志若干卷皆精心規畫力爲其難三年調常州時府城初復窮民無所歸德承於城南北設粥廠二日再食之其去城遠而艱於就食者計口授以錢冬則製棉衣衣之城鄉安然無凍餒者於是禁遊勇招商買勸耕織濬水道百廢並舉手扎下屬吏累千百言雖疾弗少懈其奉行不力者聞於上官黜之撫臬兩署燬於賊修復工貲當七萬金德承任其事費減半五年兼督海運事六年權蘇州府吳中風尙奢靡肆市往往男女雜坐德承錄大清會典並節鈔律例揭於市嚴加禁止風氣頓改江北州縣訟獄積滯德承定發審新章並令各屬增設月報弊遂除七年海運事竣保以道員用旋署鎮江府事郡治華洋雜居勇匪混迹六七濠等處會鹽臬約期爲變德承出不意掩之獲犯數人事卽定先是府城設有留養所普仁堂育嬰堂恤嫠會各有廬舍田畝兵燹後漸多侵沒德承詳加清釐得田一萬一千餘畝房舍數十楹手訂章程概復舊觀鎮俗多溺女懸爲厲禁并增育嬰堂以收養之距城遠者由近鄉寄以資郡濱大江多風濤患德承令救生船時出拯濟並開江口淤河以資停泊行旅賴之八年以前督海運出力加三品銜旋署江寧府事初德承之幸高淳也

以地處江之下游民圩易決乃預令典肆儲絮並市蒲包藏之庫秋大雨湖漲德承巡視各圩或以蒲包實土填之或塞以絮圩皆得全時永豐圩將潰馳往救之至則水與隄平風雨狂急德承令健者五百人負絮背水坐於隄隄內下木椿實以土自巳迄申風雨不已負絮者戰慄無人色德承溫語撫循戒毋動而自往來雨中水流而如注督迫工作蕺事乃歸及守江寧又值大雨爲災山水下注江流暴漲冲上元江寧沿江各圩房舍半沒德承冒雨周視力爲捍禦擇高阜棲止流民又於近省之虎賁倉設廠收養上元七里洲圩民貧不能自修德承籌資三千餘緡興築之江寧每屆隆冬有散棉衣之舉水災而後德承假款豫爲購製並勸集五千餘緡以羨餘爲掩埋棺木之用又設當牛局官爲收牧來春聽其贖歸九年西捻肅清錄功換花翎是年冬再莅鎮江尤加意水利郡城河北水關至甘露港出江南水關至便宜橋達運河計長一千四百丈有奇自乾隆中開濬歷百數十年日就淤塞德承集資修之河流乃暢十年二月以病去官卒於籍祀松江青浦名宦祠

穆其琛



穆其琛四川華陽人道光二十九年舉人選巴縣教諭咸豐十年湖北巡撫胡林翼咨調入營十一年兩江總督曾國藩又調赴安徽參佐軍事同治元年署無爲州逾年國藩以其琛識力堅定心地樸誠有過人之才奏請破格錄用遂改實任時州治陷賊收復未久而金陵悍賊復由九洑洲渡江上竄踞含山巢縣去州僅數十里居民逃徙一空其琛力扼孤城靜待援師表裏合擊城汜以完次年賊酋李秀成再犯州境又擊走之當是時金陵大軍雲集以無爲素產米兵食倚之爲命其琛籌畫鈎稽饋餉不竭金陵之平與有功焉其治州事也首籌善後設保衛局延公正紳耆董其事招撫流亡以闢荒土嚴詰奸宄以杜亂萌采報貞孝節烈以勵薄俗厚餼無告窮民以培元氣境內壩隄自土橋至柵港延袤二百四十里有奇爲上下七州縣保障自罹兵燹土功久荒其琛督率士民慮事量功培修完固又以田糧冊籍經亂散失荒熟地淆察覈爲難令鄉各繪一圖上之按圖履勘疆理秩然胥吏無所售其奸聽訟則先榜全案於門與民約有愆隨訊隨結如應傳鄰證牒內注明飯食數目以路之遠近時之久暫爲衡妄索者懲時人爲之語曰穆如清風方州治之陷也文廟燬於賊因卽繡溪書院舊址籌建數十楹以崇

祀事別購屋爲書院置田二百餘畝租入充膏火其課士必親爲講說讀書門徑以道義相勸勉志行之士莫不宗之五年以積勞卒於官所著有海航文彙

許瑤光

許瑤光湖南善化人道光二十九年拔貢朝考二等以知縣用籤分浙江歷署桐廬淳安等縣咸豐六年署常山縣以支應兵差迅速奉旨俟補缺後以同知用七年署諸暨縣九年補寧海縣十年調署仁和縣再署諸暨以署仁和時防守杭城立解其圍奉旨俟同知補缺後以知府用十一年髮逆攻撲縣城瑤光帶勇堵剿力盡城陷瑤光誓以身殉頭額頤項皆刀傷縣民爭救之擁之以行乃由紹興繞道赴衢州大營同治元年浙江巡撫左宗棠疏言瑤光歷任均著賢聲禦賊受傷請免治罪留營效力奉上諭著革職免其治罪准留營差委二年浙東肅清宗棠以瑤光隨營不避艱險並克復龍游縣城請開復原銜又帶勇克復諸暨辦理善後搜斬著名多匪請併案開復原官仍留浙補用上均允之三年署嘉興府知府宗棠特疏奏保上諭有廉幹樸勤輿情愛載之褒並准免補同知以知府留浙補用四年授嘉興府知府瑤光初莅嘉興也兵燹瘡痍公私廬舍蕩然人民流離滿

目乃延集紳士創善後撫卹各局振興庶務安輯流亡不期年而商賈交通士庶復業凡學宮壇廟書院考棚驛路橋梁之被焚毀者先後籌款建復遂設育嬰普濟諸善堂朔望躬率僚屬宣講聖諭廣訓又令教官講生周歷鄉鎮發明其義以定民志浙江既經大亂奉恩詔將該省漕糧量予減免瑤光就七縣之科則通籌核減計嘉屬減免正米十餘萬石得部議三十分之八復減浮耗數萬石酌留辦公耗米每石二斗五升紳民一律完納嘉屬年解絲貢亂後絲值綦昂咸苦例價不敷瑤光據情籲請竟減其半郡治賦稅甲全浙嘉善尤重向有嵌田一項善田爲嘉秀兩縣嵌去者二百七十餘頃其嵌於兩境者僅九頃有奇而錢漕仍照原額起科徵收所缺產額攤之通縣瑤光詳請入奏得旨准永遠豁免按年計豁除銀三千九百餘兩米三千二百餘石民困大蘇卜路年成潤得盛毛卜小六陳南山陳順大者皆匪之餘孽也瑤光悉數緝獲置之典刑而折平民之獄尤晰平湖舊有陸隴其祠向取東門外莫字忘字兩圩淤地租息以供祭祀祠生因貧轉售亂後則侵入民間新淤地指爲祠產連歲訟繫纍纍瑤光精研舊卷所斷盡得其情士民交頌全浙肅清賞加道銜光緒元年以海運出力晉道員二年關隴肅清



敘籌解協餉功加三品銜八年十一月卒

尹耕雲

尹耕雲江蘇桃源人道光三十年進士改禮部主事累遷郎中咸豐三年粵逆北犯上命惠親王綿愉爲奉命大將軍僧格林沁參贊軍務王檄耕雲入幕府耕雲上書論京師形勢及巡防利弊卓卓五千言八年補湖廣道監察御史署戶科給事中時前大學士訥爾經額以四品京堂起用耕雲首劾之請授曾國藩爲欽差大臣以援湖北疏言湖北武漢二府地踞上游自古南北用兵皆出死力爭之咸豐三年武漢再失前兵部侍郎曾國藩忠義奮發簡練鄉兵重復武漢乘勢東下圍攻九江克復在於日暮五年賊復由北岸上遊實擊虛督臣望風奔潰武漢旋爲賊有非克之易而守之難也蓋黃梅廣濟興國大冶居省垣肘腋賊躡斬黃則武漢危如累卵故欲擣金陵必先經營武漢今羅澤南胡林翼等先後濟師崎嶇數載僅收殘局而賊用其故志窺伺楚北分擾廣濟黃岡逼近省垣撫臣胡林翼兵勇數千衆寡懸絕江路綿遠首尾不及兼顧萬一蹉跌封疆豈復堪問曾國藩忠勇樸誠用以急難斷不敢辭惟用人而不盡其用與不用同曾國藩比在江西

應請授爲欽差大臣統兵赴援湖北必能事半功倍又疏言定遠失守全淮震動上自懷遠下自五河沿淮處處可渡西北達宿徐而趨曹兗東北近睢泗而趨兗沂順洪湖東下又達清淮而趨青齊粵捻將爲北竄之計河淮並無勁旅恃山東爲屏蔽而金嘉魚單郟費蘭蒙諸邑無不爲捻匪蹂躪撫臣幸其不據城邑賊退捏報勝仗百姓流離怨讟欲其保衛京輔難矣況粵捻合勢北來翁同書隔在賊後傅振邦偏在西路不能斷南北之衝山東勢如破竹可爲寒心我朝所定官制各直省承流宣化責成布政使若督撫原以寄將帥之任今概謂軍旅未學請別簡大臣帶兵堵剿此省之兵調之他省此任之官移之別任兵皆客兵官皆客官平日恣睢偃蹇臨事畏葸張皇故臣以爲任將帥不如任督撫請於洪湖多募水師集礮船溯流而上直達五河臨淮使賊不得由鳳陽以下逕渡其懷遠上下百餘里夾岸皆賊宜飭傅振邦全軍移紮固守使賊不得長驅而北再於淮徐曹兗適中之地調撥馬隊三千與德楞額合爲一軍益以青德駐防馬隊派重臣在彼駐紮賊竄何路卽由何路截擊再合各路之兵追剿然後步步進逼以收復皖北庶山東得以堅固屏翰矣時京師米貴耕雲究極事理疏籌本計四條曰平糶曰

采買曰調恤曰蓄積又請改河營爲操防略言黃河改道下游已成平陸無工可修淮運各廳亦以河運未復閘壩隄身久不葺治大小文員無所事事應請將河督及黃河各廳悉行裁撤酌留數員以司啟閉其官弁兵勇一律改歸操防汰其老弱加以訓練卽以歲撥之銀爲饟復簡大員專司統帶於邳宿扼要地方分屯南北兩營以爲門戶會二議改設淮揚鎮河工兵弁均歸陸路操防耕雲慮總兵材不勝任上五難三便四利疏略曰淮揚各武弁本爲修防戰陣非其長技故他營僅止選兵而淮揚鎮則先選選兵之官偏裨有人主將乃能出號施令其難一凡提鎮所轄某處駐某官某官管兵多少星羅棋布若網在綱淮揚鎮汛地北至山東河南南至瓜洲江口其中何爲門戶何爲藩籬兵少則單兵多則擾從前河工二十餘營緣隄而居今旣改爲操防不得仍前散漫故淮陽不僅選兵尤須選屯兵之地川原險易臆度無憑其難二河工習爲欺罔由來久矣近因堵禦賊氛舍兵募勇惟是兵有檔冊可查多寡不能捏報勇無丁口可計出入任其冒銷假令此次練兵仍如從前粉飾錮蔽久而發覺無由其難三至於槍礮刀矛衣甲鍋帳本無舊存之件安免製造之煩監製非人弊端百出語云兵不銛利與空手同



甲不堅密與袒裼同至用時始悔器械之劣亦已晚矣其難四兵民雜處易啟爭端鎮標駐紮清江其地甫經兵燹使不堅明約束則人人存一畏兵之心人人遂無復業之日不獨哀鴻罄鴈轉徙可傷而市井爲墟營制何能孤立其難五知此五難可言三便按簿而稽其人具在祇須汰其老弱不必別事招徠其便一淮揚鎮之饑原係南河應領經費此時練有用之兵而不費他籌之饑其便二淮揚人士著出門咫尺已近疆場日習旌旗耳熟鉦鼓驅以出戰罷卽歸家其便三及至訓練既精則其功效尤著豐沛之師進圖蒙亳淮海之衆俯控江湖傅振邦李若珠之兵可以漸減則省征調之利也出高寶之西則埽天來而窺浦六道通泰之左則襲江靖以震蘇常彼備多而力分我遠攻而近取則圖規復之利也果其戰守兼資烽烟稍息河湖一帶本有營田但使經理有人不至與民田相擾假以籽種教之耕耘收穫既豐饑糈可節則興屯之利也剿賊以來征調半天下一旦事竣遣散爲難或有變出非常受禍必在淮泗得此重鎮足懾狼心則善後之利也宜令袁甲三曾國藩各舉所知奏請簡放庶智勇足期勝任而訓練得以有成矣先後疏凡數十上皆關軍國大計上嘉納焉會洋兵北犯津沽告警耕雲剴切陳

詞封章疊進最後與御史陸秉樞合詞會團防大臣名進疏奉命與軍機王大臣九卿科道會議時鄭親王端華專政惡耕雲懣直厲色詰難耕雲抗辨數百言不少屈嗣巡視北城清積牘以千計津事亟京師戒嚴耕雲剋立水火會以兵法部勒編察保甲奸宄無所容旋以科場失察鐫級去官十年上將幸木蘭肅順實主其謀耕雲以書抵之危言悚論慷慨數千言亦竟不能挽救大學士文祥時提督九門見耕雲於東城相持而哭因爲創置留守事宜數十則湖北巡撫胡林翼以耕雲胸有權略疏請起用會副都御史毛昶熙爲團練大臣奏調耕雲襄辦河南軍務值髮捻交訌饑匱兵單其勢岌岌耕雲入治軍書出援桴鼓從容展布轉危爲安同治元年耕雲以步卒五千人隸僧格林沁部下從攻金樓寨教匪與總兵圖塔納議用古人距闔法近寨爲營掘地爲道賊始困僧格林沁毛昶熙親至督戰命耕雲駐前敵會黑夜大風賊隊來襲耕雲覺之自以手槍轟擊衆兵繼發大礮賊驚遁遂乘勢會諸軍合長圍平之復偕提督張曜攻張岡捻寨血戰數十日斬獲首逆霍廣玉蕭文信等敍功命以道員記名簡放並賞戴花翎三年署河南河陝汝道時陝回方熾征調絡繹民苦供億將軍多隆阿西征購糧陝州斗斛倍

市肆靈闔盧三屬責賠小麥數百萬斤追呼迫切耕雲言於巡撫咨免之撤遣楚師過境橫恣不法耕雲捕其尤者斬以徇餘皆斂戢又以境多刀匪出沒且偪回焰緩急無以應請得節制河陝兵饟需不繼自爲籌給兵益感奮擒首張總愚北竄畿甸震驚耕雲從巡撫李鶴年進軍磁州建策築長圍斷賊歸路賊果窮蹙就滅六年署鹽法水利糧務道佐巡撫經理善後事既辦治則濬惠濟河消省城積潦澹農田水災武陟沁河漫溢奉檄堵決口三月歲事費省而工固敍勞加布政使銜十三年補河陝汝道故事河陝民歲出車馬供支差徭漫無稽考吏胥因緣爲奸所用金錢按糧畝攤派幾亞常賦鄉民莫可申訴耕雲飭州縣嚴定章程凡遇差至置籍申報月計歲會無可容奸歲省不可勝計光緒三年大旱耕雲以救荒七事上大府尋卒

### 劉秉琳

劉秉琳湖北黃安人咸豐二年進士以知縣籤分直隸時髮逆北竄秉琳奉檄解餉防營冒險速達大吏壯其膽委署大城縣事持躬清苦約胥役恤孤寡摘豪猾小民稱之五年補寶坻縣悉去邑中雜派及權酷贏餘者僧親王駐兵天津有索



倫兵伐民墓木縱馬躪田禾詭誣村民繫其馬翼長索村民甚急秉琳聞之單騎赴營陳於翼長時敵礮過頂上秉琳屹不動民始得直兵亦自是不敢肆縣境蝗秉琳飭民自捕而已與紳富集資購之得蝗二十餘車於是有蝗之田皆得藉錢以代賑而捕蝗不由地役亦不至踐民田九年調補宛平革票規禁私押除差役之需索煤窰者十年英人至京師大吏檄秉琳赴營議犒具秉琳納刀韉中慮以非禮相加義當不受辱遂往與抗論無少屈犒具皆如議敍勞加運同銜以直隸州知州陞用十一年引疾歸同治元年因密保調取引見以原官發往直隸會剿擒匪總督劉長佑檄令襄治軍書擢知府三年署任邱縣境多盜秉琳募勇緝捕獲渠魁鄭大毛寘之法縣有驛傳車向由里民折錢歸役役以車應名曰班車民苦其科派秉琳爲籌款招雇民累永息五年補深州知州七年擒匪張總愚至人謂秉琳眷屬可出避秉琳曰吾家人皆食祿者義可去哉遂授兵登陴嬰城四十餘日鄉民及鄰境聞者咸挈孳入保至十餘萬人城守益固賊七圍之皆不破秉琳數上書統帥言賊入滹沱河套勢已蹙宜兜圍急擊緩將偷渡東竄卒如其言事平賞戴花翎補缺後以道員用寇亂既定乃清學田之被占者取其歲入設塾

以課子弟時鹽梟之禁甚嚴凡爲梟所脅者秉琳必詳陳請釋又念衡冀地多斥鹵民以鹽爲恆產課與地糧埒水旱無從報災非濫鹽出販無以應正供因陳請設法官銷以杜私販民服其允九年補正定府知府滹沱河爲災秉琳查有存儲兵米若干石請於上以米爲賑並築曹馬口迴水斜角三隄水不齧城民用安集郡接壤山西平定州之固關守關武弁頗苛歛煤鐵商販以加稅故委物塞關道將聚衆以控秉琳奉檄往曉諭解散除其重征正定鎮總兵獲盜三人併劫賊送府將定讞秉琳以其輸服易疑之更詳鞠始廉得其情乃營兵以負博起釁刑逼三人誣以爲盜其所劫賊悉博場富家子物兵挾來以飾僞者亟釋三人而重懲其兵光緒元年簡授天津河閒道所轄南運河爲重寄因規險要培隄埵請增歲搶修已減額銀河兵口糧旣足於是無偷工減料者又補築文霸中亭河北隄水有所洩涸腴田千餘頃歲穫雜糧十萬石時方旱飢民流集於津郡秉琳設粥廠十餘所分居男婦給以衣食事必躬親災黎得活者甚衆嘗太息曰哺飢衣寒救荒末策也本計當於河渠書農桑譜中求之津俗尙械鬪擒其魁繩以法暴民皆歛戢四年以海運功晉二品銜旋引病乞歸八年卒常論兩漢吏治最盛但潁川

近名渤海近術我所願者其召父杜母乎故每遷一官民多攀轅臥轍以送云

清史列傳卷七十六終



清史列傳 卷七十七

循吏傳四

楊榮緒

楊榮緒廣東番禺人咸豐三年進士改翰林院庶吉士六年散館授編修己未辛酉兩充順天鄉試同考官十年補授河南道監察御史時戶部尙書肅順導駕幸熱河意叵測榮緒與同官抗疏力請迴鑾又劾參贊國瑞飭法營私風裁大著十一年掌四川河南等道御史幫辦五城團防事歷署京畿廣西兩道御史刑禮兩科給事中同治二年授浙江湖州府知府時府治甫克復荒墟白骨闐無人煙榮緒安集流亡閭閻漸復乃置善後局規畫庶政各屬糧冊無存榮緒招徠墾闢試辦開徵數年銀漕加於疇昔湖蠶利甲天下亂後桑株盡伐榮緒課民復種貧者給以桑苗苑然成林絲業復盛府故濱湖匯天目諸山之水舊設三十六澗以資宣洩榮緒以經亂多淤設法疏濬又淘汰城河北塘河碧浪湖並立歲修章程著爲令復府城育嬰堂令南潯長興荻港皆次第創設又飭各屬立留嬰公所全活

者萬餘人重葺學校建考棚舉賓興修書院積倉穀造橋梁編保甲諸事井井初莅任時歸安興漕縣令奔府署榮緒親往勸諭糧戶見知府至皆拈香跪迎事竟帖然遇鞠獄堅坐詳問吏胥立侍相更代而榮緒無倦容放告坐堂皇告者入無阻訟牒有虛謬語則指示之曰汝倩人爲耶如此使汝訟不得休徒爲吏役利耳曷持歸細思訟者如其言往往不復至其受理者卽手書牘尾恆數百言剖析曲直觀者咸服之由是訟愈稀或兼旬無一至者刑具朽敝隸役坐府門賣瓜果自活素性廉儉爲郡守如布衣時客坐無供張每出門僕人皆步從年終輒無以卒歲上官知其匱乏稍稍助之布政使蔣益澧欲師禮之遇屬吏尤謙厚所上公牘疵繆者教之使改莫不感服十年舉卓異嗣爲人所譖遂求去格於例不得請迺捐陞道員解任尋卒入祀名宦祠著有十三經音義考左傳博引讀律提綱諸書

陳建侯

陳建侯福建閩縣人咸豐五年舉人援例籤分戶部主事十年乞假回籍行至河南巡撫嚴樹森奏留襄辦營務時捻逆勾結會匪合犯開封官軍由老君塘進剿殲賊頗多附省郡縣一律肅清敍功獎直隸州知州同治元年隨河南巡撫鄭元

善督師杞縣防兵四出賊驟至合圍環攻城垂陷建侯率死士百人夜縋垣突圍乞師於科爾沁親王僧格林沁連戰皆捷圍解力辭保獎旋以前在籍練勇守城勞晉知府十月湖廣總督官文湖北巡撫嚴樹森奏稱建侯辦理營務著有成效請以知府發湖北差委詔如所請二年官文奏稱建侯行軍多所建白深中機宜尤於民生疾苦地方利弊纖悉周知篤實光明有爲有守請留湖北補用允之六年署安陸府知府會捻匪由東路回竄建侯請調水師巡岳口陸師扼白口防賊渡潛江而南而自率勇丁城守賊知有備別竄以力保危城加鹽運使銜襄水驟發民垸潰鍾祥隄穿漏建侯督民夫搶護屹立隄上水及其犇誓死不去隄賴以完乃分遣吏役乘小舟攜糧食救災黎役有乘危索民錢者立擒斬之終事肅然旋調署漢陽府湖廣總督李瀚章保薦人才奏稱建侯潔己愛民循聲卓著於中外交涉事尤能悉心講求經權互用請予簡擢十年三月奉旨俟補缺後以道員陞用七月署德安府知府十一年實授府屬之應山有劫盜未獲大吏切責令懼聽捕役誣指他竊三人成讞獄具援新章解府請正法建侯研訊得實平反之光緒三年保薦卓異六年調補武昌府因晉捐出力保俟陞道員後加二品銜母憂



服闋以道員仍留湖北十二年署荆宜施道設因利局以贍貧民十三年河決鄭州河南巡撫倪文蔚奏調赴工差委從之建侯聞命迂道清淮察勘下游形勢以勞致疾至商邱卒建侯敦尚志節能勝艱鉅其佐戎幕也熟習輿地夙究心兵家諸書山川險易賊蹤出沒無不周知軍書旁午中草檄恆數千言動中機要其爲政以清積案懲健訟安良善爲先以察屬吏興文教培元氣爲本少隨其祖官南河久故練習河事既經文蔚調工以黃河全溜入淮欲諮訪故老博求方略跋涉風雪中精考變通盡利之法每遺文蔚書常連數十紙內竭思慮外中積寒歿後倪文蔚爲請敕部優卹並將事蹟宣付史館立傳尋賜卹如例

鐵珊

鐵珊姓徐氏漢軍正白旗人咸豐初以筆帖式考充國史館校對官五年補理藩院筆帖式本紀書成議敘知縣十年統兵大臣勝保調赴軍營十一年以直隸山東防剿出力賞戴藍翎濮范一帶捻首劉占考等恃衆負嵎勢張甚奉檄諭降者多被害鐵珊躬冒矢石抵其巢力陳順逆占考等降解其黨數萬敘功以直隸州知州選用並換花翎旋仍回國史館供職同治三年揀發甘肅以實錄黃綾本告

成賞加知府銜四年署通渭縣知縣邑當孔道回氛四塞期月被圍者九鐵珊登  
陣守禦城卒以完時軍需浩穰日供糧萬斤民大困鐵珊規畫減其半及去任父  
老攀轅不令行乃單騎夜從閒道去五年代理平番縣事六年署皋蘭縣所至輕  
賦役輯流亡除蠹胥修城堡以次畢舉經陝甘總督楊昌濬保以知府仍留甘肅  
補用穆圖善奏請破格錄用均報可未幾丁父憂復經穆圖善奏留攝中衛縣事  
督辦南路糧臺九年二月服闋時左宗棠奉命西征大軍雲集鐵珊運籌飛輓經  
畫裕如十一年補寧夏府知府未蒞任調蘭州府創津貼法民德之舊制甘肅鄉  
試併於陝西舉行士子遠涉爲艱鐵珊議建貢院於蘭州條析分闈事宜上之左  
宗棠據以入告得旨下所司議行光緒元年署甘涼道所轄武威永昌鎮番三邑  
毘連中有一渠資以灌溉民爭水械鬪或傷或死不可究詰鐵珊爲開支渠別子  
母水設厝其中立均水約輪日灌溉並勒碑紀其事民大悅爲立生祠渠上鐵珊  
又備工牧羊三千取息給窮民之無告者府經歷受其成著爲例六年敘籌餉功  
加按察使銜八年俸滿命以道員選用十二年授河南河陝汝道問民疾苦擒巨  
盜李改李復歧等寘諸法陝州文教陵夷鐵珊建書院定課程士氣以振闔鄉北

濱黃河南臨澗水鐵珊擬築石壩以殺水勢而運費無所出忽水發闔底鎮激湍中得巨石無數因以施工十六年夏五月大雨河水漲陝州南城不沒者數版居民大恐鐵珊乃以陝州石隄之役與闔工同時並舉晝監役作夜治簿書既歲事十月遂卒於官十七年建專祠

金國琛

金國琛江蘇江陰人附貢生成豐五年粵匪竄擾江西國琛杖策謁統軍羅澤南澤南深加器異委以營務每出戰部伍嚴整雖倉猝犯之屹然不亂軍興以來湘勇創自曾國藩統之者羅澤南李續賓李續宜而國琛襄贊其間爲羣帥所倚任是年隨羅澤南克復江西之弋陽廣信保以縣丞選用嗣克義寧州賞戴藍翎六年隨克湖北武昌黃州興國大冶瑞昌保陞知縣七年李續賓接統湘軍以國琛謀勇兼優使總理營務是時九江賊酋林啟榮與湖口縣梅家洲僞城首尾援應國琛率師會襲湖口克之進復彭澤及小姑泐泰坪關等處援賊麕至擊退之論功保同知直隸州知州並賞換花翎八年四月隨克九江府卽率師入皖攻太湖潛山桐城舒城未幾三河變起李續賓殉難將士死者甚衆國琛至黃州與續宜



招集散亡勞徠撫慰激厲軍心重申紀律閱月軍勢復振九年夏劇賊石達開攻湖南寶慶水陸諸軍赴援與賊相持湘軍至布置甫定國琛從山背襲之各營繼進遂毀田家渡壘卡城圍立解又敗賊於賀家坳斬擒甚多逐賊出粵西邊境由是勳名日著奏入奉旨以知府遇缺卽選並賞加道銜陳逆玉成以安慶爲巢穴曾國荃諸軍圍之久勢在必救冬間勾結捻匪十餘萬自廬州等處分道上犯圍鮑超軍於小池驛救兵皆失利皖鄂震動國琛素悉皖北險要地勢繪圖于湖北巡撫胡林翼請出賊不意間道赴援時歲暮大雪國琛統十四營自潛山疾趨天堂鎮攀援險阻依山而行閱十日乃出高橫嶺仰天庵從萬山深處俯視賊營賊驟見旗幟大驚十年正月賊衆緣崖上撲我軍國琛初堅持不戰忽奮擊大破之生擒悍酋藍承宣復與山外各軍夾擊又大敗之遂克太湖潛山胡林翼奏稱非鮑軍之堅忍不能久持非國琛出奇致勝之師亦不能轉危爲安請免選知府以道員用從之時匪攻杭州急國琛上書胡林翼略言浙省被圍勢甚岌岌吳越爲東南全局關鍵非擣虛不能制勝非出奇不能圖功夫逆黨兇悍者不過此數彼注意於浙池太蕪湖一帶勢必空虛若分一枝勁旅取道南岸輔以水師循江直

擣則各路之守賊金陵之老巢未有不震而驚者竄浙之賊勢必回顧此擣虛之兵也由華陽鎮至京口水程不及千里由京口至錢塘六百餘里若再分一枝勁旅載以民船多帶行糧軍火而以水師護之江流奔駛乘風利不泊之勢不出四五日可達京口由京口改乘小舟不過七日夜可達錢塘水陸並進較之僅由陸路馳援遲速有閒且兵出浙之上游蘇松嘉湖可以保全此出奇之兵也果若是風行雷厲大軍自天上飛來賊之氣燄已先爲我奪將皖中竄賊有畏首畏尾之虞金陵渠魁有入穴傾巢之患庶江浙可以輓回而大局不致危墜不然江浙事壞而賊勢益張將挾其全利以分擾南北其禍患不僅爲東南憂且爲天下憂豈獨大江南北處處宜防鄂之藩籬節節宜回哉或曰征皖之師數僅四萬有奇合則厚而分則單若分兩枝以救江浙則力有不逮似也獨不思賊有巨股以竄江浙皖北之賊數月內必以堅守爲得計我師進薄堅城將有頓兵之勢迨至江浙糜爛由是而江右而閩而粵四出蹂躪補救爲難將有不堪設想者無論征皖之師未必能遽下堅城卽懷桐舒廬漸次恢復而得殘破之皖北與失完善之江浙其輕重不待智者而知況海運所關財賦所出爲天下安危轉移之機而顧可不



先其所急耶胡林翼深韙其言部署諸將已定旋中止十一年二月逆匪由皖入鄂連陷郡縣國琛以官軍自下進剿賊必直趨武漢因建議請以大軍渡江爲迎頭截擊之舉遂以戈船載勇七千人南渡逕趨武昌既抵省城復北渡擊賊於澠口楊店獲勝進攻孝感賊守禦甚固國琛乘夜督水陸夾擊克之再擊德安賊負嵎死守國琛添築礮臺開挖地道久不能下七月分軍擇要設伏誘賊出城截其歸路我軍奮擊遂復其城追至隨州擒斬幾及萬人先後以克復孝感功加按察使銜以克復德安功交軍機處記名簡放並加布政使銜九月補授湖北安襄鄖荆道仍兼統勇營襄樊爲鄂省門戶髮捻時來窺伺國琛於樊城建立土城以資防守嗣因捻匪西竄秦中上以陝西軍務亟須得人整頓以保關陝重地浹月中七奉諭旨敕國琛帶兵赴陝經湖北督撫以賊竄鄖西防務喫緊奏留同治元年七月髮逆馬融和由鄖糾衆五六萬圍攻南陽國琛率十二營星夜前進賊知援軍將至上施雲梯下挖地道以圖必克郡城內外消息不通國琛分兩路進軍以馬隊直擣中堅鏖戰三時賊始敗退越日乘勝追剿賊衆大奔圍遂解南陽官民莫不感泣官文奏稱宛郡爲南北關鍵設有疏虞不特秦豫有肘腋之憂楚邊亦



無安枕之日南北隔絕大局不堪設想國琛此役厥功甚偉得旨優敘旋因鄂撫嚴樹森劾國琛赴調遲延遂以同知降補後張之萬奏調赴豫毛鴻賓奏調赴粵皆以傷病舉發辭遂請假赴湘調養二年秋曾國藩奏調赴皖接統義從等營防剿皖南髮逆賊由浙江入皖延擾徽郡國琛截擊於豹嶺佛嶺黃備口復要截於小溪剿除殆盡以功開復原官十月補授甘肅鞏秦階道四年皖南撤防國琛因母老請開缺終養雲貴總督劉嶽昭奏調赴滇以母病力辭八年丁母憂九年冬湖南巡撫劉岷奏調赴湘嗣因籌餉出力部議復還布政使銜光緒元年補授廣東督糧道督辦釐務剔除弊端句稽精密三年署廣東按察使四年奉旨補授國琛於署內設立積案局勘覈州縣詞訟有賭案盜犯皆親往密拏五年四月辦理秋審悉心勘覈事竣將遵旨陛見六月因勞傷復發卒年五十有八兩廣總督劉坤一奏聞奉旨賜卹如例國琛居家孝友任卹鄉閭嘗勸建西郊書院及試館開濬江陰之丁桃利三大支河以興水利鄉人至今利賴之

鍾謙鈞

鍾謙鈞湖南巴陵人道光二十四年報捐從九品分發湖北旋丁父憂服闋仍赴

湖北候補咸豐元年署沔陽州鍋底司巡檢五年以團練功陞用府經縣丞六年  
籌辦軍需擢知縣七年丁母憂湖北巡撫胡林翼奏留辦理膏井鹽茶事宜八年  
湖廣總督官文以謙鈞潔己奉公民情服悅保奏得旨以同知直隸州補用九年  
檄辦牙帖釐金鹽釐等務勞勩最著經胡林翼奏獎補缺後以知府用先換頂戴  
十一年隨官文等克復黃州府城命免補本班以知府補用並賞戴花翎同治元  
年補漢陽府知府漢陽舊有晴川書院燹於兵謙鈞增齋舍捐田以助膏火並籌  
資生息爲經久計漢沔頻遭水患災民流徙輒十數萬謙鈞於大別山麓設廠散  
給糜粥加意撫恤寒暑靡閒流民無一失所者時漢陽攔江大隄潰以工代賑全  
活無算漢口商市所萃向無城郭爲羣盜所瞰謙鈞倡修堡垣集資十餘萬逾兩  
歲工成崇墉綿亘十餘里賊由黃麻來犯不得入市塵賴以安堵復倡修育嬰敬  
節兩堂嚴立條規保全甚衆參將成大吉統軍駐漢口因索餉未得幾至譁變謙  
鈞單騎至軍曉以忠義軍心翕服無敢於境內滋事者二年官文以謙鈞廉正勤  
明總理湖北糧臺接濟鄰省諸軍月餉綜覈精密任勞任怨洵屬才能出衆之員  
疏請獎勵得旨賞鹽運使銜四年調武昌府知府舉卓異尋署漢黃德道八年擢



廣東鹽運使廣東濱臨大海六門內外私鹽出沒靡常謙鈞巡緝嚴密梟匪斂迹省城粵華書院向有運司衙門支給膏火銀兩謙鈞覈實發給不假吏胥之手復捐菊坡精舍經費肄業者均沾實惠九年敘前在湖北籌辦陝西捐餉加按察使銜十一年署按察使以捐直隸賑加二品頂戴謙鈞歷任所至務飭風化民有以細故爭訟者每婉轉勸諭發其天良兩造往往感泣不終訟而去暨署臬司尤留意京控發審案件日必親臨讞局悉心研鞫判結最多案無留牘創建候審公所爲待質人證棲止處籌備資糧調其衣食鮮有疲斃者南海番禺兩首邑每多羈囚謙鈞命立積案局酌定章程派員推鞫用能剖決平反悉成信讞積牘爲之一清十二年因病乞休十三年卒

俞澍

俞澍直隸天津人監生以從九品分發安徽咸豐五年助剿粵匪兼管理糧臺有功保縣丞六年擒匪滋擾懷遠宿州壽春鎮總兵鄭魁士檄澍隨營襄治軍事獎補缺後以知縣陞用旋署蒙城縣知縣適擒匪竄渡沙河攻蒙城澍集團兵晝夜防守捕斬內應三人賊圍攻不克遂遁去敘勞擢知州並賞戴藍翎七年賊踞鄆



墟澍又率團勇攻之擒酋日徒成德等進逼賊巢俘獲無算八年攻龍元賊壘遏其分竄之路乘勝圍剿連克十餘處擒首孫葵心乘隙犯蒙城澍出奇兵擊走之圍解加知府銜並換花翎九年借補蒙城縣以歷次防剿績保陞同知直隸州十月卒奉旨照知府例議卹同治三年安徽巡撫喬松年疏言澍潔己愛民勤勞備至衆心感戴追念不忘詔追贈道銜於蒙城縣建立專祠

### 婁詩漢

婁詩漢浙江山陰人道光二十二年以從九品分發江蘇署沛縣典史迴避改發陝西補褒城縣巡檢丁母憂服闋陞縣丞分發直隸北河六年署涿州州判同治四年署景州州判詩漢久任河職究心水利督治隄埝皆有法度懲吏役爲奸利者民爭赴功田漕交利六年畿輔大饑委辦天津粥廠別男女分老幼以旗鼓進退之凡五閱月就食者日萬計終事無雜亂濫冒之患論功爲諸廠最七年擒匪北竄天津戒嚴吳橋奸民以八卦會惑衆鎮道慮其爲捻內應議戡以兵時詩漢與巡防之役懼其株累也自請微服往按奔馳兩晝夜抵其境掩捕渠魁數人餘衆解散不數日而事定先後以海運及防捻功保陞知縣並補用同知十年署永

年縣視事百日清滯獄三百餘票傳人證務從核省至則堂審略無積留因事開誠勸導訟者往往悔悟自咎或至感泣縣豪高姓謀奪寡婦某產訐以奸詩漢察其誣治豪如反坐律光緒二年權成安縣四年署安平縣詩漢爲政以通民隱爲首務所至必召請紳耆詢民間疾苦利便汲汲如痛癢在己時以事詣鄉輕騎裹糧不受民間餽獻婦孺聞其至亦歡呼迎拜如家人父子焉嘗製勸善俚歌刊布鄉里刁猾莠民必先以情理曉譬如怙惡不悛則於廣衆加之罰百姓咸畏而愛之境內被水前令以災輕報詩漢甫下車卽棹小舟躬赴四鄉巡視被災凡百餘村田廬蓄聚半淪巨浸惻然閱之力請上游得陳准緩徵復達書江南善士籌及鉅款運糧及綿衣以賑並分飭紳董廣開粥廠架席爲棚以栖宿尤貧者徵收旣停官無所潤而辦賑費又不貲或勸索錢大戶藉以集事詩漢堅不肯而自貸錢數十萬繼之兼籌以工代賑法募民濬溝洫創翻水車以消積潦壯者得雇值自活而水患亦除恆往來災區冰天雪窖中匹馬馳驅未嘗少逸有以節勞勸則曰吾民方在水火爲之父母者忍卽安乎故安平雖遭鉅災而人無凍餒死者以積勞致病在任踰四月而卒部民聞喪如失慈母相率入城哭奠歸葬之日爭爲更

迭昇樞者以千數士民稟懇奏請優卹旋贈知府銜

### 段起

段起湖南清泉人由監生捐輸軍餉獎道員弱冠卽爲廣西左江道王普相記室數陳兵事動中機宜普相薦諸巡撫勞崇光俾部百人首解全州圍別賊鄧正高等思乘虛襲永州進窺衡州起先後單騎馳諭降其衆貴州苗亂擾及廣西之懷遠縣境起奉檄討清江高峯二苗平之廣西事定崇光檄令赴援江西謁曾國藩於行營國藩初不納時建昌有賊三萬久不克起率所部四百人夜撲其壘一鼓下之乘勝復德安國藩乃收爲護衛軍易軍名爲衡字營咸豐七年從劉騰鴻李續宜普承堯攻瑞州騰鴻戰死起亦重被創卒克瑞州吳楚饒道始通八年援浙解衢州圍賞戴花翎復還攻景德鎮浮梁縣克之九年逆首陳玉成由皖南竄江西景德鎮起力扼其衝賊以數萬死爭裨將樊俊沒於陣起裹創衝突賊竟不得南竄浙撫王有齡請援起輸家財募勇遣別將率以行江寧賊之繞侵浙西者以次就殲有齡奏調起赴浙總領水陸全軍而江西亦倚起爲重巡撫毓科以起復景德鎮浮梁縣成功請加鹽運使銜交部優敘並以道員留江西補用允之十一



年李秀成逆衆飢疲思就食廣豐遂圍其城并分兵圍廣信起星夜赴防嬰城固守賊不得逞偵其將遁開壁馳擊賊大潰並解廣豐圍而去民間倉穀手自封題故賊退而民食無匱以先後捐資募勇敕部按數核給獎敘又以玉山兩次解圍及追擊廣豐廣信竄匪加布政使銜十月敗匪復竄廣豐起督師擊敗之下部優敘時起駐防廣豐十二月兩江總督曾國藩疏請將所部各軍均歸左宗棠就近節制調度同治元年江西巡撫毓科奏起約束堅明輿情愛戴奉旨交軍機處存記九月授江西督糧道二年收復鄱陽彭澤各縣賞給瑚松額巴圖魯名號九月巡撫沈葆楨奏請將候選道屈蟠所部營勇歸起兼統三年飭赴本任起慮賊平凱撤兵勇難以安置條陳事宜獻之葆楨據以入奏諭令各直省妥議近年武職借補及收標考課各章程率本起議金陵初平餘匪分竄江西起薦精毅營將席寶田添軍兜剿擒僞小天王洪福瑱四年霆軍駐江西因饑譁噪起疾馳曉諭前隊不識伏矛直刺洞頤及股既有識者大呼曰糧道也皆棄兵羅拜起反覆開譬變遂定尋兼署江西按察使先是江西閩浙之交有山蜿蜒千里夙爲盜藪久封禁賊熾時居民避亂多匿其間生息日繁至是有指爲江南餘寇者廷旨敕三省

會剿起疑之輕騎馳其地周歷詢訪盡得其避亂匿居狀遂據情上請奏懇弛禁民感再造惠爲建生祠護署巡撫孫長絨奏起沈毅有謀賞給一品封典六年以疾歸出祿俸所餘贍宗族立義莊別設育嬰補卹二堂賑孤寡周乏絕九年邑大饑計口授食全活逾萬家十三年沈葆楨奏調赴江南差遣光緒二年復授江西督糧道三年調補江蘇徐州道徐屬椎埋攻剽自漢爲然起行保甲興學校民風丕變微山昭陽兩湖涸出墾田貧民墾闢成熟結者輒爭奪之獄訟不休起躬親履勘爲剖別人服其平六年兩廣總督張樹聲奏調廣東差委始至屬夷警方急籌防備邊靡役不從十月授廣東鹽運使卻苴餽禁姦私期年課入增倍八年卒張樹聲奏請於立功地方建立專祠

### 姚國慶

姚國慶廣東番禺人監生以同知銜知縣分發河南試用咸豐七年隨營剿賊克復方家集三河尖賊巢歸候補班補用是年因防河賞戴藍翎十年捻匪竄踞河南之黃園國慶隨官軍追剿殲俘略盡豫省肅清換戴花翎十一年八月皖捻西竄國慶隨官軍截擊於鄭州立解城圍又擊殄山東會匪之攻撲鄭州者保以直



隸州用同治元年正月丁母憂河南巡撫鄭元善奏請留營差遣旋隨汝寧官軍攻克陳逆老巢並擒獲逆首之弟保侯服闋後以直隸州歸候補班補用四年署陝州知州時徵兵過境往來如織國慶威鎮理論居民安堵無驚八年署光州知州旋以代去十一年三月補光州因攻克賊巢以知府用光緒三四年間晉豫奇災道殣相望國慶捐廉賑濟全活無算光故夾潢水爲城疊石成岸歲久水嚙石頽國慶召紳耆籌巨款興修躬自督勸工以速成七年七月息縣奸民徐中義糾合頽亳太和匪徒約期舉事國慶偵知密約防軍掩捕中義見事急不待期而踞寨豎旗恣爲劫殺國慶乘賊衆未集督勇進薄其寨中義倉皇遁餘衆奔潰乃懸賞購首惡越七日中義伏誅州境以安巡撫涂宗瀛保以道員用光州自遭兵燹士女多以身殉國慶設局採訪著忠節志六卷復勸積穀以備荒歉增號舍以惠士林輿論翕然八年十月以積勞卒於官

沈錫華

沈錫華浙江海寧人咸豐七年以巡檢分發江蘇初任吳縣光福巡檢後署吳縣典史及縣丞代攝吳縣吳江知縣兩江總督曾國藩江蘇巡撫李鴻章以守潔才



優習勤耐苦保奏遂授吳江縣知縣尋因承緝盜案鐫級時江蘇巡撫丁日昌以錫華勤苦耐煩奏請開復疏再上允之再任吳江調常熟以勞疾乞歸其任光福巡檢也革除規費約束吏役徒步巡行村落勸息爭端懲治土棍居官如家頌聲四起其署吳縣典史縣丞也時省垣巡防募漕艘水手爲團勇強橫多不法知府遣員掩捕輒被毆辱錫華立執拒捕者寘之法全部肅然咸豐九年震澤鄉民抗糧聚衆萬餘環伺城外銜接十數里臨以兵益譁勢且岌岌巡撫徐有壬知錫華有循聲檄令往諭錫華請速撤兵遂單騎馳入衆中大言曰爾等皆安善良民乃作此不顧身家事耶剴切導以利害衆皆感悟齊呼明白清官即日解散其攝吳縣也值蘇垣久陷洞庭東西兩山孤懸太湖錫華激勵沿湖各鎮村民團與水師統領江南福山鎮總兵王之敬湖郡團紳福建糧道趙景賢聯絡聲援互相犄角保全實多其攝吳江也駐邑之章練塘地逼賊巢界連三邑錫華招撫槍船曉以禍福結以恩信晝夜躬率巡防與民相親民賴以安分轄青浦屬之金澤鎮孤注泖澱之間賊蹤靡定十室九空錫華移駐鎮中不數旬市廛復業時大軍進規吳中錫華旋補吳江兼署元和元和各鄉故多槍船陽爲保衛潛與賊合聞錫華名

悉投册受撫爭爲之用後皆殺賊立功甘肅涼州鎮總兵孫金彪卽錫華所識拔者也吳江克復錫華入城治事又兼攝震澤內堅城守外防要隘而蘇湖嘉興各逆糾合數萬人不次環攻一夕夜將半賊直撲東門外縱火焚掠錫華慷慨登陣督防軍鼓譟迎擊大敗之吳江爲蘇浙咽喉孤城危如累卵左右皆駭散錫華獨誓以死守凡一切安民之諭乞援之文皆手自草繕三閱月如一日城卒得完於是集流亡事掩埋招墾荒編保甲籌辦善後事宜日不暇給吳江東門外垂虹橋南臨具區北達吳淞橋欲久淤閒多傾圮而具區東下之水邑爲首衝錫華謂匯將洩之水以一百數十丈之橋欄阻之上游湍勢驟殺下游波流遞緩芟蘆塗泥之屬因之停壅利在宣暢濬洪修橋非僅關一邑利害遂首先舉辦疏濬城河便利舟楫而文廟書院養濟育嬰諸所次第修舉經費不足捐廉繼之復清盜產入書院厚給膏獎添設義學垂之久遠養濟院例有定額錫華於額外割俸收養故同城隸震澤之民有求隸吳江者以錫華有以恤之也吳江經徵錢漕向有經造之目小戶糧賦不能自納皆由經造代輸包攬抑勒久相把持往往官未催科而民已先困錫華諭其弊請於大府一律革除勒石永禁會減賦恩旨初下釐定新



科斗則按畝細核銀米實數勒石昭示吏胥不能上下其手每屆啟徵之前復按科則分別應完銀米若干合錢若干徧給簡明文告銀洋悉如時價不得短估高擡布政使丁日昌取其示式頒行各屬及日昌撫蘇復飭通省一律遵行永爲定章此則錫華便民之政惠及全省者也錫華嘗言州縣之弊半由吏胥而吏胥之得售其奸以官與民疏耳官勤則民逸官苦則民樂故嘗徧歷村鎮口講指畫傾心化導務在與民休息行保甲十家牌事舉而民不擾有訴曲直者片言剖判民自無冤各鄉圩甲每假祀神賽會之名按田科錢爲肥家計錫華曰是旣妨農又耗民財且不免奸人混跡嚴禁止之去任之日攀附如歸父老多泣下者再任吳江士民服教旣久幾於臥理其任常熟課士愛民一如任吳江時光緒四年卒

### 朱靖甸

朱靖甸河南安陽人咸豐九年進士以知縣卽用分發直隸海運敘功獎同知直隸州旋補正定縣知縣同治二年以地糧額征全完加運同銜調清苑縣十一年權灤州擢深州直隸州知州光緒六年以卓異薦九年授保定遺缺知府署保定府尋補授在任十餘年兩舉卓異十五年籌辦豫賑加三品銜二十年權清河道



旋授湖南岳常澧道先後捐貲助賑議敘花翎加二品頂戴二十一年擢直隸按察使陞署布政使是年十月卒於官其洫正定也值山東馬賊宋景詩等北竄靖甸方就道聞賊已薄城日暮且陷人或尼之慨然曰吾奉檄視事與城存亡分也將焉避兼程進以夜至縣遲明巡城守陴者驚問則縣官也衆心大定於是具守備徧樹幟堞間賊知有備遁去前知縣鄒灝創練土勇靖甸復勒以兵法旌旗改色總督劉長佑追賊及境歎曰賊蹤飄忽兵苦不及使團練皆若此大可輔兵力之不逮是宜褒之以勸能者靖甸辭曰此非某功鄒前令力也僅舉首事者四人以應正定西北七十里有地孤懸鄰境奸人穴地作室爲博場伺隙竊掠渠魁爲同知署役捕至則逸捕去復聚靖甸廉得之思掩其不備一日出城策馬疾驅果獲十餘人治其罪內逃軍某巨憝也由是縣境獲安宰清苑日究心水利府河源出滿城一畝泉地勢建瓴水苦直瀉前總督方觀承濬泉建閘居民利之道光後舊閘漸廢民截水灌田泥壅泉枯下流益淺重載商艘又每於船尾攔河作壩河身愈高阻滯愈甚靖甸勸商衆集資先決下游淺阻然後從事衆源事未及行以丁憂去官於是益考求河流衰旺之故自城西靈雨寺至一畝泉往返履勘悉得

要領服闋總督曾國藩知靖甸賢語清河道以治河事委之乃次第疏濬諸泉源於舊設五閘外上游添蠻子營齊村響閘石閘三下游添蓮花橋新橋扇馬廟清河村石閘四手定啟閉章程節節停蓄水以不匱漑運交利清苑爲保定附郭咸同間三輔席太平餘業官民習爲侈靡知縣率終日奔走伺上官顏色轉無暇治民事靖甸則日坐堂皇獄至剖決如流未嘗壅滯安州南北隄同治間霪雨爲災河水潰防屢修屢決靖甸偕知州丁文俊協謀修葺採土人議以葦泥砌隄根葦長而隄益固隄成斥壤悉變上腴闢水田四千餘頃歲出稻值錢二百餘萬緡民大悅立生祠祀焉其署灤州也馬賊日肆劫掠州境大擾賊巢窟關外得利輒逸鮮有弋獲靖甸懸重金置堂上書賊魁名選幹捕告之曰能致若輩者賞此否且重罰未旬日皆就擒悉寘諸法蓋靖甸精於治盜其所設方略爲使民自衛以輔官力之不及者有三一曰團練局通衢大鎮稅往來驟馬卽以其錢募勇察奸宄一曰青苗會俾村民據高阜更番守禾稼兼護商旅一曰冬令支更村人集粟熟食餉更夫有警則鳴鑼立集不至者罰獲賊者賞在深州八年以此法屢獲巨盜所下青苗示州人至刊爲碑碣誌弗緩焉深州城南歲以春大會數百里市驟馬



者咸集董其事者例賂官千金或以騾獻靖甸悉禁絕之因事赴鄉豫戒里正毋治候館至則宿學舍招父老歡談凡土地種植之宜稼穡收歛之豐嗇津津然如老農也而盜賊祕跡胥役弊竇亦藉以覺察無遺靖甸嘗謂親民之官必官民一氣能於親字做得切則好官也深州向有積穀倉歲久廢弛布政使任道鎔議復舊規下各屬銳意興行舊例建倉廩城內以胥吏司之抑勒之費且倍蓰所出靖甸下令曰無貧富畝捐一升而儲穀於本村富戶慮富者有時貧且侵蝕也設鄉長月頭稽查慮互相諉也飭交替時驗視鄉長以里正爲之月頭者月以一人職村事其十一人助之皆歲易者也穀不出鄉無一錢費咸以爲便而月竣事故光緒四五年深州旱蝗八年地震皆恃積穀爲賑撫民無流亡者其他規復義學廣植蠶桑民皆利之先是曾國藩總督直隸時頒清訟事宜十條有所謂議獄者兩司首府以時率局員至總督所相與討論當時上下惕厲積案一清靖甸知保定府筭發審局事遂仿議獄遺意一案至先閱卷宗兀坐繙視疑則繞室走思其款要既閱以屬委員訊得情或否復相與考覈證明之時都察院奏各省京控案不以時結獨直督奏交咨交各件無留牘咸靖甸力也後陞任按察使及權布政使



孜孜以甄錄人才爲急務到官卽諭屬吏不得妄有乞請及持書札關說終日見寅僚訪政治得失唯恐弗及服官幾四十年無一隴一椽之產歿後餘財僅足治喪其果毅樸誠卓然有古循吏風

### 陳佐平

陳佐平安徽宿松人咸豐九年舉人歷署宣城教諭當塗訓導嗣入淮軍襄贊戎幕保知縣留山東候補加同知銜旋辦鄆城侯家林工賑獎以同知直隸州補用同治十一年署德平縣德平界直隸多盜佐平力行保甲以清盜源又整興書院使人知嚮學公餘則孜孜校士論文邑人二百餘年少登科名者自是鄉舉不絕而盜以漸息光緒三年再署城武治亦如在德平時五年補朝城朝地低下上游與直隸清豐接壤積水傾注比年爲災佐平相度地勢按段分疏合直東兩省上下游河道三百餘里閱三月而工竣夾岸田廬遂免淹沒六年調署蘭山瘠壤鮮蓋藏民艱於食遂相聚爲盜佐平憫之仿朱子成法建社會儲積穀定借還章程選識大體者經紀其事不假胥吏手民善其法爭輸穀恐後甫兩月積穀至一萬二百餘石由是每歲春借秋還民食有賴皆各安其業焉七年回朝城任以母老

乞養歸遂不復仕

秦煥

秦煥江蘇山陽人咸豐十年進士授戶部主事同治元年湖北團練大臣晏端書奏調煥襄辦軍務敍功賞加員外郎銜二年回京五年赴通州驗收漕糧事竣詔俟補主事後以員外郎卽補並加四品銜九年辦理捐銅局事務加道銜歷充捐納房豁免處總辦則例館纂修十一年恭辦穆宗毅皇帝大婚禮得旨優敘十三年補主事光緒元年遷員外郎以籌助貴州軍餉賞戴花翎二年京察一等三年擢郎中五年再舉京察一等記名以道府用旋充工部寶源局監督兼辦理京捐敍勞詔俟補道府後加三品頂戴是年授廣西桂林遺缺知府六年補桂林府所屬臨桂縣以糧賦缺額請院司設局清查操之過急奸民煽惑爲亂大吏檄煥以兵往捕煥曰彼民素德我必不忍以刃相向遂單騎往懇切諭之民皆感泣服罪八年調署梧州府法人專以行教張其國力議建教堂梧州民議家出一人束縵火之張其約於衢煥陰戒民姑恫喝之勿果爾恐兩傷法使至衆擁而譁礮聲四起使大懼問曰吾以通商衙門知會來此紛紛者何爲煥曰是將從教彼意奉

教則贍其家其數不可計使者諾之自退太守不能禁之不從教也使語塞乞援  
煥遂躬導水次使急起碇去法越構釁邊圉戒嚴南北洋調兵饜精軍械絡繹道  
途不絕舟楫纜夫之費煥均捐廉應給不以絲毫累民九年敍捕除積匪並援剿  
越南邊賊功以道員在任補用十年回桂林任十一年兼署鹽法道以援剿諒山  
加二品銜是年靈川大水省河暴漲漂沒居民煥言於大吏奏請蠲緩糧賦並出  
資收埋骸骨十二年歲大饑煥設廠食餓者開倉平糶飭人赴全州一帶購米由  
陸路星夜趨運或慮費奢煥曰民命爲重若慮開報之難願傾家以濟未幾米至  
活災民以數十萬計是年冬大計保薦卓異十四年補鹽法道煥慎於刑獄恆誠  
屬吏曲求其情無鍛鍊有不承者親鞫之案輒定十五年陞授按察使煥生平精  
力過人任桂林時巡撫李秉衡遠駐鎮南關外署布政使凌彝銘復病煥兼鹽道  
善後保甲釐金並布政按察司事案牘紛如悉心剖決洪纖畢舉在官勤求民瘼  
所至勸蠶桑設書局平權課通溝渠卹孤寡牧令有片善必深贊之以養其才尤  
以文風士習爲己任在粵西行郡試者七凡試卷皆手披目校士論翕然巡撫倪  
文蔚李秉衡沈秉成先後薦爲循吏第一十六年奉旨入覲桂人獻慈雲遠戀圖



勒碑建屋顏曰望來亭舟次黃州傷足陳情歸籍養疴十七年卒著有劍虹居感舊集行世

李孟荃

李孟荃河南光州人咸豐四年以候選知縣投效皖營十年髮逆踞鳳陽我軍進攻屢勝復府縣兩城孟荃在事出力敘功予補缺後以同知用十一年定遠匪張落刑謀北犯其兄張闖王方盤踞亳州雉河集等處率黨數千至渦河北岸聯絡聲勢蔓延數十里落刑乘機趨長淮衛之南岸與闖王隔河而軍孟荃會諸軍進剿賊分三隊迎拒我軍亦分三路衝之獲賊大蠹擒斬無算賊潰遂復定遠是時西捻乘虛擾固鎮我軍又大挫之以功加知府銜同治元年復會楚軍克廬州督兵大臣袁甲三疏稱孟荃約束嚴明臨敵制勝得旨以同知直隸州用四年補亳州知州九年委辦廣德州墾務兵燹之餘遺黎凋敝客民恃衆占墾田主不能禁爭端大起孟荃至因時立法鋤強扶弱主客以安十一年署州事修黌宮振文教百廢俱興民得其所積勞成疾十三年春卒於任所孟荃所至有聲蔬食布衣宦橐蕭然無以爲殮百姓哀之

李炳濤

李炳濤河南河內人咸豐十年就職州判遊湖南主候補道劉建德建德隨曾國藩東征炳濤與俱謁國藩國藩命總辦明興營務治軍書晝夜不息能通蒙古語軍中或有詬誶卽作察哈爾語調和之聞者笑而解十一年以軍功賞戴藍翎同治元年以同知留安徽補用二年明興營凱撤炳濤假歸四年國藩奉旨北征炳濤於揚州上書言四事一專責防堵以嚴分竄一聯絡民團以孤賊勢一設局開荒以資解散一多備火器以奪賊長又言中原平行利在騎兵然賊馬一匹翼步賊二人請以步兵之習藤牌者當賊騎騎兵之習洋槍者當賊步如賊騎多則以炸礮轟其中堅必無所逃避豫東不靖賊氛必及兩淮宜權收兩淮釐金以濟北征之用保豫東卽保兩淮也國藩頗採其言八月委查亳州圩炳濤微服遍游民間盡得諸匪徒姓名及蠹役胡采林通匪虐民不法狀歸卽夜繕密札遣急足呈大吏誘采林誅之竿其首一州大驚州民酹酒禱神者數百家自是訟獄者咸取決於炳濤呈詞日數十立時批發不累守候日率親兵十餘人按圩查閱爲立條教別良莠戮悍賊二百人予限自新者三千期年而俗變無盜竊者五年捻逆大

股竄州境炳濤親督各圩捍衛曉以大義諸圩雖有親故無敢出援捻懼遁去旋擢知府並換戴花翎六年攝蒙城縣事蒙亳接壤風氣相同而瘠苦尤甚炳濤鋤梗強撫良懦勤於聽斷復書院捐膏火絃誦聲大作捻匪餘黨解散歸里及各軍凱撤還鄉人數千炳濤彈壓安輯民用晏然時有馬賊劫營兵於途兵負傷訴縣乃傳諭詰旦城但啟一門呼營兵同往稽其出城者適有馬奔出窰而無轡炳濤心疑命役羈之俄頃一人手持一封至將出門回顧者再縛發其封則轡與劫物皆在焉其人請死論如律解巨盜赴郡其黨中途欲逃渠呵止之曰無累官皆就法八年巡撫英翰疏言炳濤篤謹廉明久著循聲百姓愛之如父母治行爲皖省第一疏入諭以勉爲循吏用副朝廷之厚望十年調署亳州興利剔弊如治蒙時旋補廬州府知府廬故皖北劇郡元勳宿將多出其中豪猾者藉倚聲勢時爲不法官吏不敢捕甚有帶刀而博者炳濤親緝之賭風盡息郡屬無爲州江壩隄工向例爲官督民修胥役索陋規甚鉅工程草率潰決時聞炳濤釐定章程刊諸石由是工料堅實澇不爲害府東門外施河口爲商旅要途隆冬水涸船必需數牛輓行時合肥被旱炳濤乃請款修河以工代賑河身深通運賑者皆至糧用大減



商民便之西洋人欲於城中買地立教堂成有日矣炳濤諭地主曰爾不聞寧國之變耶他日民教有爭端爾家首禍矣其人懼不敢賣事遂寢光緒二年大江南北訛言有妖術翦人髮者民情洶洶奸民因藉名稽查立卡倡團多方苦行旅路幾無行者炳濤乃徧示城邑無妄動時有縛送官究者數百人僅誅真匪一餘皆不問人心大定廬素乏蠶桑乃設局採買桑秧訂譜勸課至今蠶利大興炳濤倡之也尋以擒匪功賞加鹽運使銜三年丁母憂去任值皖南將辦保甲墾荒事宜兩江總督沈葆楨巡撫裕祿合疏乞調炳濤部議不允適皖南紳士崔澄等四十餘人又聯名稟請葆楨等再以聞特旨可之五年赴皖南旋卒於寧國差次炳濤善斷獄一言剖析莫不鑿心而去巡鄉時就地聽斷民省往返吏無需索人悉稱便其攝亳州也有田父報其子口角夜投井死炳濤驗其屍無傷痕井旁有汲水器二因念夜間非取水之時既尋死何暇持汲水器傳尸婦詢之貌不甚悍而實無戚容偵其平日與鄰婦往來曰獄其在此矣拘鄰婦鞫之果得其狀蓋田家子與婦素不和鄰婦有弟與婦通欲害其夫而妻之事未發值田家子忤其父鄰婦邀至家醉以酒與其婦布裹而投之并置汲器者欲人信其取水投井也於是皆

伏法炳濤持法嚴而宅心甚寬嘗獲巨捻孫狗者以一子自隨狗臨刑曰某虐人多矣子恐不可保奈何炳濤曰爾子善良當令充吾親兵以活之狗感且泣子亦泣後當兵服役倍常人身後家如寒素耐衣皆取諸質庫士民無不流涕者

朱根仁

朱根仁江蘇常熟人咸豐十年由州判投效臨淮大營同治元年道員馬新貽治軍廬州辟根仁參戎幕廬州克復以功保陞知縣留安徽補用並加同知銜二年叛練苗沛霖授首敘績賞戴藍翎會科爾沁親王僧格林沁駐軍蒙城令根仁研訊潘四潘凱從逆狀潘賄求緩頰根仁嚴拒之鞠實悉寘諸法三年署定遠縣時兵燹初定兵差絡繹閭井囂然前令已辦試徵矣根仁以民不堪命牒請緩之復先期籌備芻糧供億應時民無所擾巨猾雍秀春久爲鄉里患根仁督役往擒至已先逸從人於密室中得一冊備書黨羽姓名吏役喜以聞根仁曰我何忍興大獄以博能名況喪亂初平民氣未固激而生變可勝誅乎遂火其冊人聞爲改行站雞崗周姓聚族而居其一從逆死矣里人利其田廬致周族人於獄株連者衆根仁一訊雪之五年委清理庶獄遂單車詣盱眙天長五河最後至泗州州俗健

訟獄囚纍纍根仁反復推勘多所平反六年復署定遠縣事邑有金李二姓皆圩長也各樹黨尋仇築砦自固及金氏子斃於李根仁往驗金揚言李且抗官麾衆昇根仁而馳將挾以襲李謙從駭伏根仁從容出輿斥金曰若敢爾是先抗我也如國法何衆乃散走驗畢詣李李反縛長跽自投獄論如律毀其砦嗣捻逆逼長淮淮民驚恐根仁修城壘浚重隍聚材石積鹽米匪不敢侵暇輒輕騎巡四鄉講求水利陂塘就堙者勸民修濬十家則治一井田二頃則闢一塘凡耕耨之務種植之宜恆與父老口講指畫娓娓不倦是年夏積三月不雨鄰邑苦旱定遠猶得中稔民始知陂塘之利其他建文廟繕城垣行保甲葺昭忠祠埋露骸卹孤寡禮高年採訪忠孝節烈捐廉給書院膏火皆行之不遺餘力丁憂服闋署阜陽十一年署貴池十二年調署懷寧十三年補全椒仍留署任光緒元年再署阜陽有程黑者捻惡爲皖豫害且饒拳勇出入嘗以刀楯自隨捕者不敢近根仁一夕偵黑張飲密領健役乘醉掩捕黑方格鬪而刃已割其股遂就擒遠近快之二年赴全椒任歲饑根仁相地勢倡修水利以工代賑輸金建龍神廟雨隨禱降民與災忘四年卒於任



林達泉

林達泉廣東大埔人咸豐十一年舉人江蘇巡撫丁日昌悉其留心經濟延之幕府每論古今輿圖武備及外洋各國形勢歷歷如指掌日昌雅重之同治三年髮逆擾廣東達泉歸里練鄉勇籌防禦大埔得無患敘績以知縣選用七年隨剿山東捻匪有功晉直隸州知州分江蘇補用並賞戴花翎旋以辦理江蘇機器局暨通商交涉海運各事宜保補缺後以知府補用八年署崇明縣知縣崇邑四面環海地方疲敝達泉革陋規清積贖增修城垣疏濬河渠又勸諭士民建橋梁置義塚籌書院膏火設同仁育嬰堂其後兵部侍郎彭玉麟巡閱水師過崇明遇老者飢踣於道與之食泫然曰若使林縣主久任於此吾邑豈有餓夫哉其所去民思如此十一年署江陰縣城西申浦舊有延陵吳季子墓兵燹後祠宇蕩然達泉以季子開南國文教之先出廉俸建祠墓歲時致祭籌賓興經費以作士氣邑有內外城河歲久淤廢集資開濬又挑東橫河灌田十餘萬畝縣向無義倉擇地興建並擬積穀章程十條勒石以垂久遠光緒元年補海州直隸州知州先是海屬被災達泉奉檄查勘海沅鹽河工程卽請以工代賑及抵任次第興辦開濬城外甲

子河並挑玉帶河四百餘丈修復橋路增築隄防民咸稱便州治地瘠民悍爲盜匪淵藪歲歉則乘機肆劫達泉以時出巡擒巨憝置之法土宜棉達泉設局教民紡績並廣植桐柏雜樹於城外錦屏山麓人比之召伯甘棠云時臺灣新設臺北府漢番雜處且有中外交涉事船政大臣沈葆楨以達泉器識閎遠潔己愛民奏請調署臺北府知府部議以隔省調署例不符擬駁特旨准其試署達泉抵閩卽上治臺諸策旋赴署任議興建減徵收整頓防營設法招墾因地制宜有條不紊以事屬草創經畫尤難積勞得咯血疾四年丁父憂哀毀逾恆疾增劇遂卒

### 儲裕立

儲裕立湖南靖州人咸豐七年由文章投效軍營剿辦貴州銅仁教匪獎從九品旋克復古州廳永從縣以府經縣丞用並賞戴藍翎積勞洊陞知縣十一年奏調援鄂復來鳳縣城保選缺後以同知直隸州用同治二年貴州苗氛益熾復率靖軍回黔三年收復天柱晉同知直隸州換戴花翎七年克復清江擢知府十年署理古州廳同知時初經兵燹彫敝萬狀而苗匪伺釁出沒靡常裕立率所部扼守要隘外修戰備內籌教養民氣漸復旋接統靖字各營先後收復台拱丹江凱里

各城加鹽運使銜以道員用光緒二年論下游肅清功賞穿黃馬褂七年督辦下游善後事宜建義塾百三十九築城堡百二十七文教武備一時並舉民苗咸畏而愛之八年辦理思南各屬賑務徧歷災區存問疾苦一錢一粟皆日計其出入無稍假借故實惠及民全活者十數萬計是年遵義府民教構隙焚毀教堂法使借端要挾人情洶洶幾釀大變大吏檄裕立馳往查辦與法使往覆駁詰卒就範圍旋辦理全省營務處防剿雲南昭通竄匪功最加二品銜十一月署貴西道十二年署貴東道十三年署糧儲道所至興利除弊潔己奉公雖無赫赫之名而民情愛戴無間遠邇歷經貴州巡撫潘蔚崧蕃先後保奏得旨嘉獎並交軍機處存記十六年復署糧儲道十八年再署貴東道二十一年四月以積勞卒二十三年湖南巡撫陳寶箴疏懇優卹尋賜卹如例

丁壽昌

丁壽昌安徽合肥人咸豐三年粵匪擾安徽壽昌集勇築寨自保旋從安徽巡撫福濟剿賊廬州敍勞以典史選用並賞戴藍翎九年隨官軍克復六安州擢縣丞十一年攻克巢縣含山和州及銅城閘雍家鎮裕溪口西梁山各要隘陞知縣同



治元年署江蘇巡撫李鴻章督師援上海檄壽昌帶淮勇剿賊克奉賢柘林南匯川沙金山等城晉同知換戴花翎二年解常熟昭文圍並克復福山太倉鎮洋崑山新陽吳江震澤以知府留江蘇補用十一月隨道員潘鼎新克復乍浦尋攝乍浦同知乍浦降衆數千皆悍黠鴻章聞其將爲亂飭壽昌遣之壽昌與衆期令於某日繳軍械易新者至期爭繳壽昌悉收之乃各給資使歸業衆莫敢譁又收復海鹽並攻毀海鹽十三里之璵城賊壘三年隨官軍克復嘉興府城斬僞榮逆廖發受洊陞道員駐軍湖州南潯鎮六月官軍攻湖州壽昌直擣中堅填河拔樁破其兩壘遂克晟舍加按察使銜並賞給二品封典十一月移駐松江府之塘橋改練洋槍兼辦洋務六年直隸提督劉銘傳檄壽昌領隊剿擒敗賊於黃安紫屏鋪追至陡山又敗之鄧州匪遂南竄分擾流陽海州宿遷時霖雨平地水數尺東捻任化邦越水西渡沅河壽昌追之解衣率將弁徒涉比達河岸舟楫皆爲賊掠乃伐木造橋頃刻立成軍旣濟窮追及之一戰而捷十月擒匪東竄躡擊於安邱濰縣之交又追之贛榆城下斬任化邦於陣得旨遇有江蘇道員缺出請旨簡放加布政使銜十一月擊賊濰縣擒擒首李芸牛卸孜等於陣七年劉傳銘因病乞假

壽昌代統其軍值西捻張總愚擾河北壽昌渡黃河防守東省長牆賊攻之急壽昌隨方抗禦自周家店至七級阿城布置嚴密賊未能撲總愚勢窮蹙他竄銘傳亦病愈回營壽昌合諸軍馳剿飢則於馬上啣餅餌歷八晝夜及之高唐州陶家橋殲焉先是壽昌以剿捻功賞給西林巴圖魯名號至是復以按察使記名遇缺題奏八年直隸總督曾國藩奏調壽昌赴直隸分統銘字馬步全軍兼駐紮保定之八營會天津民教構釁國藩奏以壽昌署天津道旋補實以承辦海運漕糧賞給一品封典十三年丁父憂御史李桂林奏言壽昌潔己愛民清廉自矢莅任以來興水利練兵勇辦海防籌賑濟立學校諸惠政次第舉行今以丁憂開缺合郡士民如失所依乞破格留用以裨地方奏入上命俟百日孝滿後准其留直隸差遣委用是時太常寺少卿周瑞清御史游百川先後奏言持服終制禮之常經臣下奪情原屬萬不得已之舉如因天津係畿南重地壽昌留津乃爲破格之舉則請明降諭旨嗣後不得援以爲例得旨俞允壽昌固請歸葬終制由總督李鴻章代陳情詞懇切優詔許之光緒二年寄諭安徽巡撫裕祿促壽昌北上壽昌泣涕固辭乞裕祿奏懇終制三年服闋奉特旨調赴天津總理營務兼充海防翼長四



年署津海關道嗣以轉運山西賑糧飢民全活甚衆下部優敘六月補直隸按察使五年署布政使十月回按察使任六年五月卒壽昌以粵匪之亂投筆從戎迭著戰功其遣散降衆收撫捻黨均能恩威並用約束嚴明署天津道時值民教不和事機棘手壽昌操縱緩急措置裕如天津頻年患水設法籌賑全活甚多光緒初年直隸旱荒晉豫尤甚壽昌統籌兼顧不分畛域其在臬司任時適有清豐縣民謝光玉叩閩一案上命壽昌提訊先是捻匪竄清豐光玉之祖及父避地弗及賊至其家勒供酒食賊去後同里有隙者誣以通寇糾衆殺其家十餘人光玉時僅九歲逃匿獲免及成立申訴大吏以案鉅年遠事無左證懸不能給壽昌細心推鞠盡得其情沈寃昭雪聞者稱快又以直隸刑案甲天下督所屬清理痛除延宕之習歷數月而積案一空卒後李鴻章爲之懇恩優卹奏入諭曰直隸按察使丁壽昌在安徽帶練剿賊復隨李鴻章剿辦粵捻各匪轉戰江蘇浙江湖北河南山東各省克復城池擒斬賊目運籌決勝所向有功嗣於天津道任內辦理賑撫諸務實心實力遺愛在民旋經陞任臬司亦能勤慎供職茲因積勞病故殊堪憫惻丁壽昌著照按察使積勞病故例從優賜卹並將戰功宣付史館立傳天津府



城建立專祠以彰勞勩尋賜卹如例贈太常寺卿銜

方大湜陳豪

方大湜湖南巴陵人咸豐五年由附生投效湖北巡撫胡林翼軍營浠保知縣旋補廣濟縣莅任以後清保甲設團練盜賊屏息築盤塘石隄下游各縣均無水患十年斬廣土匪何致祥等謀結皖賊襲攻官軍於蘄州河岸大湜知之先期偕員外郎閻敬銘馳往嚴拏立獲首逆置之法敍功以同知用十一年皖賊由英霍竄擾楚疆黃州德安所屬州縣先後爲賊踞廣濟地界蘄黃無城可守賊衆竄入境大湜以未能扼截褫職留任後調署襄陽飛蝗徧野大湜持竿躡屣躬率農夫撲滅三日而盡城南舊有襄水故道年久湮塞水漲則淹沒田畝以數萬計大湜力籌開濬渠成而田復舊同治二年湖北巡撫嚴樹森奏稱大湜貞廉沈毅潔己愛民上恩予開復並以知府歸湖北補用六年拏獲教匪劉漢忠及其黨李心寬等加鹽運使銜七年浙江巡撫李瀚章遵保兩湖賢員以大湜廉靜明達循聲卓著奏聞得旨俟補知府後以道員留於湖北補用八年補宜昌府知府九年夏大雨江水暴發難民避高阜絕食已逾二日大湜急捐貲作糜又購麪粉爲餽飪數萬

分途賑濟而諭米商招鄉民負米日得數十石計口散給其沿江被災之處亦請帑按戶賑卹使無失所十一月攝荆宜施道十年調補武昌府光緒元年舉卓異武昌屬之樊口有港蜿蜒九十餘里外通長江內則重湖環列周五百餘里統名樊湖當盛漲時水卽由港倒流入湖近湖居者苦之僉請築壩樊口以禦江水大湜謂閉塞樊口僅附近居民可免於水而湖水無所洩環湖數州縣受災尤廣上下江隄亦岌岌可危力持不可五年湖廣總督李瀚章又以大湜廉正樸誠諳練吏治入奏五月再署荆宜施道九月補安襄鄖荆道六年擢直隸按察使七年署直隸布政使八年遷山西布政使是年八月開缺另候簡用九年行抵天津因病請假回籍爲言者所劾部議降調十年兩江總督左宗棠疏稱大湜有守有爲體用兼備命交軍機處存記大湜生平政蹟多在牧令時所至必培學校興蠶桑事皆親理胥吏無所容其奸嘗終日坐堂皇門內外設鉦柝各一鉦以達民柝以召吏百姓親而信之或周歷民間以一吏一擔夫自隨有訟者卽田隴間坐判之守武昌日以勘隄過屬縣日暮投宿民舍已去而其縣令猶不知也平日尤嚴義利之辨嘗云以利誘者初皆在可取不可取之間偶一爲之自謂無損久則顧忌漸

忘自愛者當視之爲鴆毒卽飢渴至死不可入口又云居官能廉如婦人貞節不過婦道一端若恃貞節而不孝不敬不勤不慎豈得謂之賢乎性惡逸居公暇輒讀書所著有平平言六卷蠶桑提要六卷捕蝗纂要二卷隄工摘要二卷修防芻言二卷農桑提要八卷農家占驗一卷區種水稻法區田法各一卷堂諭十卷直隸省駁案一卷歷任駁案八卷歸里後閉戶養疴種桑數百株出其廉俸所餘置義田以贍宗族立學田以惠士林嘗語所親曰官至兩司曾不如府州縣之與民相親而措置自如也十二年九月卒於家 陳豪浙江仁和人同治九年優貢以知縣發湖北光緒三年署房縣勤於聽訟每履鄉恆提榼張幕憩息荒祠與隸卒同甘苦會匪柯三江謀亂立禽寘之法置甌縣門諭脅從自首杖而釋之徵米斗斛必平不留難不挑剔民大悅刁紳感而戢訟禁種鴛粟募崇陽人教之植茶咸賴其利歷署應城蘄水授漢川頻年襄河溢修築香花垸彭公垸天興垸潰隄疏濬茶壺溝縣河口以工代賑新溝者毗漢陽冬涸舟澀江口奸民輒恃衆索詐捕治諭禁之因病乞休沐將去任有淹訟久未決慮貽後累畀胡牀至廳事判定兩造感泣聽命值年饑發賑大吏知豪得民心強起力疾往民夾道懽呼賑未半復



以疾去尋署隨州素多盜豪如治房縣時置甌令自首選賢紳行保甲盜風頓戢俗多自戕圖詐豪遇訟實究虛坐不稍徇澆風革焉立輔文社選才雋者親教之多所成就治隨二年瀕行聞代者好殺竭數晝夜之力凡獄情可原者悉與判決免死後因養母乞免歸浙中大吏輒就諮要政多所匡益家居十餘年卒在隨州重修季梁祠去後隨人思其德於西偏爲建遺愛祠祀之

### 何金壽

何金壽湖北江夏人同治元年進士殿試一甲第二名授編修充國史館協修起居注協修功臣館纂修九年簡放河南學政光緒二年充日講起居注官山西荒旱奏請特簡清介強直大臣巡察賑務庶不致中飽吏胥而災黎多霑實惠即可隱消亂萌上復因災象可憂詔羣臣言事金壽上儲糧平糶策均優旨俞行四年又應詔上言比以災荒不雨皇太后皇上下詔自責哀痛懇切讀者感泣往代遇天災則策免三公三公亦自請罷斥今新疆平則樞臣受賞腹省災而樞臣獨不受罰晉豫之人流亡過半畿輔赤地數百里道殣相望流民數萬闕集京師萬一聚爲明季之流賊則樞臣等微特謀國不臧卽自謀亦拙矣疏入詔責軍機大臣

以下革留有差五年京察等記名以道府用六月復瀝陳時弊上以所奏爲破除情面特予宣示九月簡授江蘇揚州府知府六年到任值甘泉西北各鄉旱春盡不雨金壽請於運庫撥款借給窮民兼籌賑撫民困大蘇設典牛局次年聽照本取贖牛悉得全郡城地闊宵小溷迹金壽籌款立新柵一百六十餘道更棚五十座募丁監守盜賊屏迹民舍數不戒於火而城內市河狹淺水龍艱於取水金壽撥款購大甕七十餘置新舊兩城間分段儲水以備不虞七年郡城典鋪火金壽曰於法鄰火半償自火全償而收其息今火自肆中起熄而復然是自火也且法直十當五今當不及五而息或過五是當還本不許責息援東臺縣故事力請於上官并揭償法於通衢莠民不服者捕治之旋因防築運河隄岸經漕督黎培敬保奏賞加三品銜八年七月步禱求雨得疾遂卒

方瑞蘭

方瑞蘭河南禹州人同治元年副貢選寶豐縣教諭捐陞知縣九年分發安徽十年委辦廣德建平墾務瑞蘭招撫流亡皖豫之衆聞風偕來分田授廬規畫盡善十一年署盱眙縣事時常兵燹之後百事填委瑞蘭日坐堂皇手批口答鉅細無

遺暇則微服訪民疾苦牧豎皆識其面又以縣境多盜嚴行保甲風雪出巡輒撲被宿村堠禽割巨猾餘按遣之以故民得肆力農殖瘡痍漸蘇縣故有湖田民歲納錢於里魁謂之災費胥利緣爲奸利上戶竄籍者衆下戶大困瑞蘭躬往履勘盡除其弊湖田之籍乃定飛蝗入境督民搜捕以蝗至者衡其輕重計值與之蝗不爲災縣署燬於亂常平倉與祠廟之載在祀典者率不能蔽風日瑞蘭次第葺治悉復舊觀光緒二年去任三年再署盱眙五年補石埭八年調署阜陽九年署泗州直隸州十年真除適歲饑瑞蘭賑之全活甚衆州無社倉歉歲無所賴十一年十二月大稔瑞蘭喜捐俸以爲倡紳民繼之不數月款大集乃建倉儲粟用備不虞州故澤國港汊堙闕時有水患瑞蘭鳩工修治西自老鶴脖南至潼東引汴北達安河節節疏濬注之淮汎濫以息瑞蘭又留意於文教嘗謂紳耆曰養而不教民俗且偷故在盱眙修敬一書院在泗州修夏邱書院皆延名宿主講優給諸生膏火又采訪故實續修泗州志州學五十餘年無撥科者自是踵相接焉先是盱眙有劇盜糾黨盤踞吏不敢詰瑞蘭至捕而誅之長淮以南稱神明迨莅泗後聞匪首陳爾富等尤惡泗徐桃宿之間咸有戒心瑞蘭密偵其巢在宿遷之金鎖



鎮乃檄清淮馬隊宿邑丁役往捕而親督練勇拊其背遂獲爾富並黨衆置之法及論功愀然作色曰寇盜充斥有司之過幸而就誅民害已深愧且弗遑曷敢言賞力辭弗受屢以河防出力保陞知府補缺後以道員用安徽巡撫吳元炳漕運總督李瀚章先後密疏保薦均得旨嘉獎十六年秋以積勞病卒

### 曾紀鳳

曾紀鳳湖南邵陽人附生以軍功歷保知縣同治元年粵逆石達開竄踞四川敘州府之雙龍場李福獻陷高縣紀鳳以營官隨臬司劉嶽昭馳援十月抵黃縣之黃水口賊據橋力拒我軍奪橋而進直逼城下賊出西門迎戰紀鳳揮軍直前北門復出賊數千我軍乘勢奪門入賊棄城遁遂復高縣餘賊回竄羅家坳將與弔黃樓賊合紀鳳等率隊截擊而弔黃樓之賊已列陣出我軍緣山直前立破弔黃樓賊巢進至對山賊憑高崖反拒且以數千人出我後紀鳳等由羅家坳越山併力衝擊賊潰竄沙溪十一月我軍將攻雙龍場取道丁水寨筆架山賊分數千人拒我師紀鳳涉水先進斬馘數百各營繼至賊驚潰奪賊卡二十二月又擊走巡司場滇匪新場賊亦剿除殆盡石逆知我軍漸逼乃於雙龍場增設三十餘營而

橫江賊壘亦復林立匪黨郭集益有離心紀鳳遣人爲間揮軍繼進連破二十餘卡燬西岸賊巢及張窩賊壘疾撲雙龍場破其二十餘營郭集益率衆內應賊棄巢狂奔乘勢燬捧印村賊壘石逆率餘黨奔燕子灘渡橫河半渡擊之賊遁滇境三年四月隨雲南藩司劉嶽昭剿逆匪朱大亡復正安州四年十月進規綏陽破天台山賊巢陣斬僞朱元帥擊走上坪洪江四面山等處股匪遂圍綏城明年二月克之降逆首吳元彪紀鳳積功遞保知府十年苗沛霖羽黨踞貴州麻哈州賊巢林立紀鳳會總兵鄧千勝潛師薄城下賊據關迎敵我軍奮攻立克之生擒逆首楊阿保餘賊竄各寨悉剿平之以功晉道員留貴州補用十一年紀鳳會各軍剿貴州各路苗匪破甕東富朗楓香同干四寨十一月由下司渡河攻銅鼓諸寨復順流趨擺仰破其木城斃賊千餘人十二月僞元帥吳阿賽等犯馬鞍山總兵宇文秀殲之餘黨復竄擺仰紀鳳渡河擊敗之餘衆遁去下游驛路疏通奉旨賞勳勇巴圖魯名號並加按察使銜時鑱廠山有匿賊阿馬紀鳳令參將劉金貴擒之貴州巡撫曾璧光奏紀鳳總理川黔各軍營務平定苗疆功最加二品頂戴十二年十月古州苗四出裹脅清江八寨清平都江苗皆響應紀鳳率礮兵會清平

黃平防軍取道凱里由開懷平塞進剿擒逆首顧講清等力保丹江廳城撫良苗百數十寨全省肅清璧光再上其功賞穿黃馬褂光緒元年補授貴州貴西道四年署按察使六年大計保薦卓異七年調署糧儲道兼充營務處旋補按察使署布政使十一年真除十三年調雲南布政使以剿猺黑及木憂寨夷匪功賞頭品頂戴石屏地震傷亡者衆紀鳳極力賑卹民以全活猺黑張登發就擒紀鳳請改土歸流地方以安紀鳳又以文學爲政事之本擴充書院增膏火設同通以下月課吏治大興十五年以母疾乞終養旋丁憂十七年病卒

蕭世本

蕭世本四川富順人同治二年進士選翰林院庶吉士散館授刑部主事手輯秋審事宜四卷七年以督辦京師西城粥廠獎員外郎銜八年改直隸知縣先是咸豐初年川匪竊發世本會在籍紳耆編保甲築寨堡堅壁清野以逸待勞寇不敢犯嗣滇匪李短辮倡亂陷夾江掠峩眉樂山威遠丹稜青神而北進逼省城全蜀震動四川總督駱秉璋布政使劉蓉聞世本名延詢戰守機宜世本條陳利弊皆中賊平力辭保薦及是曾國藩總督直隸延入幕府九年天津民教相鬩焚教堂



傷領事幾肇大釁國藩以世本精明練達不避艱險疏請署天津縣事以辦治遂補授天津民悍好械鬪鍋夥匪徒動爲地方巨害世本嚴懲其尤寬以濟猛刁風頓戢而地爲通商巨埠訟獄之繁甲通省世本嚴約胥役自定程課二十餘則手批口鞠獄決如神丁憂服闋光緒元年直隸總督李鴻章以世本愛民勤政實本至性奏請再補天津縣時方比歲旱荒災黎就食者萬數世本飢給粥病施醫心周體勤不遺不濫二年城北軍械所災延燒三庫世本預移開花礮彈水雷火箭等物於河干得不燬三年六月旱蝗世本親督捕治復捐貲購蝗災不爲害調署蔚州知州刊節婦孝子之碑建卹嫠社保嬰局請復宣化府舉額人心瞿然械鬪者自懲博徒徙業五年調補清苑縣旋陞遵化直隸州知州丁母憂八年以知府仍回直隸候補辦理守望局務大盜王洛八謝昆等久患民間爲海道之梗世本悉擒斬之天津世有水患世本倡修單街隄工四閱月而功成遂疏瀦龍河故道開范家隄及石碑河宣惠河金沙嶺下水道四十餘里以工代賑民氣蘇而河道大治九年敘海運功補用道員十年署廣平府知府十一年又因海運加二品銜十二年署天津府知府旋署正定府十三年卒

鄒振岳

鄒振岳山東淄川人同治二年進士改翰林院庶吉士散館授湖南桂陽縣知縣親老告近五年改選直隸懷安縣八年直隸總督曾國藩以賢員保薦得旨嘉獎九年丁繼母憂服闋仍發往直隸補用十二年永定河漫口合龍賞戴花翎光緒元年補清苑縣知縣敍前辦海運功以直隸州知州在任補用三年丁父憂八年遷易州直隸州復以查辦張獨多三廳各旗官荒廠地保以知府在任遇缺題奏先換頂戴甫下車卽捕治大猾趙老尙餘匪斂迹十二年舉卓異十四年擢宣化府知府十五年調補天津府清釐積贖嚴察屬吏民皆安居樂業焉津郡爲北洋總匯華洋交涉動多牽掣振岳遇事持平中外翕然至於接辦清泉公所則嚴禁毛帖整理守望局則重懲窩盜商民交頌遂綴嫉惡若仇愛民如子之語播爲歌謠其實惠感人類如此十八年再舉卓異十九年山西奇災振岳勸諭紳商捐集銀三萬餘兩以濟之查辦子牙河搶護南運河奔走烈日中昕夕無閒病暑卒於官

潘治

潘治浙江山陰人由監生捐輸軍餉獎從九品分發安徽歷署六安馬頭司巡檢天長典史咸豐六年入戎幕以克復鳳陽壽州暨剿平定遠泗州靈璧各郡縣功洊保知縣並加五品銜同治二年苗逆蠢動隨道員馬新貽赴剿蒙城設防籌餉動合機宜旋委署盱眙縣縣境屢遭兵燹人民寥落田地荒蕪治首請撥款招集流亡給散牛種民始復業閱一年而市廛輻輳大吏嘉其功卽奏補盱眙治以學校久廢捐俸建試院修文廟整理書院聘耆儒教授其中廣設義學慎選館師公暇必親詣書院義學與諸生講說勉以忠孝節義宣講聖諭十六條巡行鄉里見父老與之討論清溝渠殖蠶桑等事肫肫如家人父子焉尤精聽斷案無留牘有因亂後田房失據構訟者必確訪其界址所在持平剖決民感其誠相戒讓畔邑有孀婦素健訟治初憫之溫語曉譬使歸更尋思而婦訟不止乃集其牘一一撻發其奸婦知不敢欺一訊而服盱人稱歎在任五年風教大洽有盜者獲之則曰本不忍犯盱境實係誤入刑罰自甘無怨言也其德之感人有如此者同治七年卒

周秉禮



周秉禮湖北漢陽人咸豐四年以縣學生從湖北巡撫胡林翼軍五年攻克漢陽獎訓導嗣隨道員金國琛襄辦營務屢有功十一年自皖桐回援克復孝感德安保以應陞之階卽選並戴藍翎同治二年隨福建按察使張運蘭辦理營務運蘭每戰必令秉禮從一日拔隊行突有巨股賊至全軍大震運蘭手令箭授秉禮曰事急矣汝助我秉禮應聲出馳馬突賊陣官軍乘之斬其渠遂大捷兩廣總督毛鴻賓上其功以知縣遇缺卽選運蘭旋奉調援閩慮官道迂回難猝達議出夾谷直擣賊巢秉禮度山徑狹阻賊必有伏力爭之不得果大敗連蘭死之秉禮單騎走還嗣擒匪躡楚湖北巡撫曾國荃調總兵郭松林沈俊德會剿而檄秉禮總堅字營營務處遇匪於天門安陸間三戰皆捷旋爲大股賊所乘敗於白口松林軍潰俊德陷重圍食且盡求計於秉禮曰無恐第假吾令可轉敗爲勝也俊德諾之乃下令軍中曰敢有虛發槍礮擊賊不中者死敢有掠賊所縱牛馬者死固守七晝夜卒以計突圍出馳赴國荃大營七年陝西布政使蔣凝學調秉禮辦湘楚軍營務扼守山東以剿平巨捻任柱賴汝洸各逆保分省補用知縣加同知銜換戴花翎九年捻匪肅清敍功陞知州留山東補用加運同銜光緒二年辦荷澤縣買

莊堵口大工及修築兩岸長隄保以直隸州知州用時昌樂有疑獄久不決按察使陳士杰委秉禮往讞一鞠而定四年署郟城縣知縣教民植桑隙地獎勤懲惰蠶絲之利大興郟故多盜恃練勇爲巡緝會部議裁撤秉禮持不可上狀力爭乃止盜爲斂迹邑當衝途饑差絡繹悉取給民車民不能堪秉禮捐製小車六十輛代之著爲令邑素不嫻女工秉禮導之紡織或編帽苴履以補男耕之不足五年補莒州知州州素鮮蓋藏秉禮按朱子社倉遺法變通舉行積粟八千餘石分儲城鄉而地瘠賦重申請大府覈減之巡撫陳士杰閱牘嘉歎謂造福無量也州有刼案盜未獲懸重金購之一日忽報獲盜三不刑而服自供鄰邑巨案悉所爲秉禮疑之徐察盜有榜掠痕意必捕役利重賞以私刑拷服游民所僞爲者訊之信將釋矣旋慮爲鄰邑所得乃署爲練勇徐訪其所親領去而重懲捕役焉十二年兼署蘭山縣事十三年調署濮州濮亦盜藪聞秉禮至皆徙去歲薦饑三請賑皆報可全活甚衆銅瓦廂之決也溜傍金隄行後稍南徙始築臨黃埧蔽之當流大至埧溢劉柳村地方州治適當其衝民大恐秉禮豫於城外築高隄護城水至督役搶救城得無恙又於劉柳村築小埧暨新埧三千餘丈自是居民無水患十六



年卒巡撫福潤奏請從優賜卹尋贈太僕寺卿銜

任蘭生

任蘭生江蘇震澤人由俊秀投效安徽軍營咸豐八年拔姚鄧等圩獎藍翎從九品旋捐陞同知候選同治三年充皖軍前敵營務處四年隨安徽布政使英翰駐宿州會捻首張總愚糾粵逆賴文洸毫捻任柱等巨股齊趨皖境英翰移壁雒河集賊進攻其營英翰屬諸將守壘自率二十騎突圍至西洋集調軍赴援時蘭生守南門與知府史念祖等縋兵出伺隙擊賊糧且絕乃空倉粟分置四門以示充積力持四十餘日最後至削榆爲粥激厲士卒固守不懈泊英翰率軍赴援張總愚從龍山率悍匪突戰蘭生等聞槍礮聲麾守軍分路衝賊後陣賊潰圍立解敍功以知府留安徽補用並換花翎六年督兵大臣李鴻章建策蹙賊膠萊河於運河設防賊忽撲渡濰河潰防南竄郟城英翰分皖軍三千人馳往迎剿水陸皆捷蘭生功尤著晉道員並加鹽運使銜任柱就殲賴文洸自贛榆南奔圖撲運隄爲皖軍擊敗折回沈陽由六塘鳧渡闌入揚州東北灣頭英翰檄蘭生偕參將奎光等督飭運防各軍星馳攔剿諸路之師合力併進賊窮蹙逆首李允牛遂子任三



厭率衆乞降賴文洸就擒事聞加布政使銜七年六月西捻張總愚竄臨邑窺伺運防蘭生等赴魏家灣沿河探剿賊竄清河以南轉而西蘭生等分三路迎敵賊北走皖軍別將橫擊之迴竄東南蘭生等前後夾攻賊大敗總愚伏誅西捻平捷入命交軍機處存記凱撤師旋將達南樂有部卒十一人先至爲寨民所殲諸將欲屠其寨蘭生請於英翰率二千人往距寨里許令曰止妄動者斬獨從一騎呼寨中人數以擅殺罪遂縛獻首犯八人治如律馳白英翰免其餘全活甚衆旋駐防壽州兼筦淮北牙釐督兵大臣曾國藩巡撫英翰先後上蘭生戰績八年奉旨以鹽運使交軍機處存記十一年河南固始匪首李六李昭仁竄安徽霍邱攻葉家集蘭生聞警派隊進剿並約總兵牛師韓合擊賊潰獲首逆斬之光緒二年皖北旱遠近土匪蠱起宿州之曠同句結席小猴陳駱駝聚黨劫蕭縣水堦砦掠百善汛河南永城之李玉龍肇亂南昌廟而渦陽諸匪應之鳳臺之胡志端亦糾黨竊發懷遠則趙爽與苗沛霖餘黨劉四巴子等圖撲縣城蘭生先後會同總兵郭寶昌簡精銳迅擊破之全境旣平於是有查圩之請又誅捻惡二十餘名地方大定三年署鳳潁六泗道率屬興保甲嚴緝捕奸宄斂迹山西河南大饑流民相率

入皖蘭生倡捐廉俸募賑銀十數萬設廠穎亳壽三處以兵法部勒之明年春資遣回籍全活無算臨淮故孔道各行省轉饒過境歲數十百萬率役西土壩官莊鋪民往往廢時失業蘭生備驢三十頭牛車五輛使供支應無事則聽民受雇取值別籌錢二千緡生息以飲飼畜民得不困鳳穎道兼督鳳陽鈔關額徵外舊有辦公款日以狀上巡撫汰十之二餘悉作興利之需四年當受代總督沈葆楨巡撫裕祿合疏留之裕祿復上言蘭生治行爲安徽最五年授鳳穎六泗道鳳陽南北關鍵城故無池蘭生督防軍鑿壕一千四百餘丈築垣之圯者千丈治鳳滁間驛路自臨淮至江蘇江浦袤二百餘里均成坦途洪澤湖多覆舟設救生船拯之沿淮要津造官渡船以濟修復朱龍大東等橋梁數十處盱眙臨淮當水道之衝淮水漲時彌望無際帆檣夜泊風濤險惡創開船塘各周百餘丈建宿州靈壁定遠鳳陽諸驛賓館設因利局貧家得貸錢於官以治生計設育嬰堂牛痘局以保赤子設歸藏局助殯葬以厚其終設戒煙局誘不肖者以自新其綜理不遺類如此兵亂後水利失修蘭生刊壽州人夏尙忠芍陂紀事民灼然知利病所在於是籌買濬安豐塘經營各屬塘渠閘壩凡二十餘所蓄洩以時旱澇有備復仿制江



南水車教民厚水以助灌溉創設課桑局刊行蠶桑摘要購種桑秧雇江浙工匠教民育蠶繅絲開衣食之源郡故有淮南書院前任胡玉坦募白金二千有奇取息以助膏火蘭生益廓其規贏餘至萬餘緡購四部書二百餘種令士人得寓院讀書靈壁書院廢爲興復之又於鳳陽壽州盱眙各試院側築屋爲赴試士子避雨所添置義塾使貧民子弟不失學士民大說六年以籌濟山西等省賑銀出力下部優敘八年署按察使九年舉大計卓異先是三年夏旱蝗蘭生飭屬收捕因籌救荒之策創豐備倉積穀數千石又檄州縣各建倉廩至是濱淮十四州縣大水亟檄屬吏便宜發倉粟並請款募捐工賑並舉無流亡者十二月回本任仍兼管牙釐事十年內閣學士周德潤劾蘭生盤踞利津營私肥己上命戶部尙書崇綺內閣學士廖壽恆往按之十一年正月解任候處分旋查所劾皆不實惟留用革書屠幼亭爲知情徇隱部議革職十三年山東巡撫張曜以蘭生歷年募捐山東賑銀數逾十萬罷官後仍日與諸紳廣集賑款並自捐棉衣一萬件爲奏請開復原銜允之尋鳳穎六泗紳士孫家懌等二百餘人臚列蘭生在營在任有益地方事實公呈巡撫陳彝並籌銀八千兩願代遵例報捐道員陳彝會同兩江總督



曾國荃入告得旨任蘭生著准其捐復發往安徽交陳彝差遣委用是年河決鄭州安徽被水蘭生奉檄辦皖北賑撫十四年四月卒於潁州陳彝具疏奏請優卹並將事蹟宣付史館立傳十五年陳彝復以士民感念不已奏懇將蘭生附祀英翰專祠均詔如所請

### 李金鏞

李金鏞江蘇無錫人同治三年捐同知投效淮軍以功賞加運同銜並戴花翎光緒二年淮安徐州饑金鏞首倡義舉與浙紳胡光墉等籌集十餘萬金前往災區散放並繪圖徧告同志所濟者博嗣後如山東之青州武定兩屬十餘州縣直隸之天津河間冀州三屬二十餘州縣水旱各災金鏞均親莅查放用款至五六十萬金五年捐陞知府調赴直隸六年承修西淀之千里隄長一萬二千六百餘丈百日而畢事七年吉林奏調金鏞出關辦理琿春招墾事宜時琿春界外蘇城溝隸俄屬華民在溝墾種者數千戶常苦俄人侵掠金鏞與俄反覆辯結嚴申禁約溝民相率來歸則勞徠安輯俾得奠居從事墾闢海參崴既已通商俄人援設領事例擬於東三省要地設官金鏞據約力辯謀遂沮八道河地方有華民王純依

窩棚被俄官焚掠殺八人金鏞往驗屬實責俄官抵於法八年吉林將軍銘安疏請留吉委用旋委勘圖們江口界址初中俄界約由瑚布圖河口順琿春河及海中間之嶺至圖們江口嶺以西屬中國距江口二十餘里立土字界牌地圖以紅綫爲界地曠而界畫未詳遂致嶺西之罕奇毛琛歲等處海口鹽場均畫置綫外已與條約不符俄人復於中國界綫內黑頂子地私設卡倫距江口幾百里金鏞按圖據約迫令俄官退還占地卒重立界牌以符前約八月署吉林府知府嚴禁抹兌以整錢法攤丁於地以甦民困九年攝長春廳通判廳屬爲廓爾羅斯公地光緒七八年間丈量加租員役因緣爲奸旗民不堪其擾金鏞兩詣廓爾羅斯公府籲懇求緩並援道光舊案瀝情上陳卒蒙奏准永不加租民慶更生又創建養正書院同善堂所至與民講孝悌力田老幼環聽親如家人父子焉廳屬周圍八百里盜風素熾劇寇苗青山高福黨羽甚衆金鏞設計擒斬青山福因畏罪偕其黨投首屬境遂安嘗遣人運布三萬匹至高麗易牛以給耕者中途水涸舟膠盜劫其布後知爲長春官運之物悉數送還並以車代運曰吾不敢負李青天也凡在任裁革陋規清理積訟除盜安良興利剔弊事事求實廳以大治關東稱循吏

者競言李高謂金鏞及前署昌圖府知府高同善也十二年以獲盜功晉道員十三年查勘精奇里河四十八旗屯地地在黑龍江東岸俄人侵占四十餘里金鏞與俄員據約抗論挖濠定界由補丁屯至老瓜林一百七十餘里悉數取還旋調辦漠河礦務五月由墨爾根入山勘道裹糧露宿行無人之境千五百餘里三十日始達礦地在萬山中披荆建立局廠共設漠乾洛三廠歲出金至三萬兩有奇嗣是練勇招商屹成重鎮十五年敘吉林設電功賞加二品銜十六年以積勞咯血病歿於漠河差次直隸總督李鴻章奏聞得旨下部尋賜卹如例

蒯德模

蒯德模安徽合肥人咸豐間諸生以團練隨大軍攻克定遠廬州兼理籌餉事積功遞保至知縣留江蘇補用並賞戴藍翎同治三年署長洲縣知縣是時蘇城新復游勇降匪聚而爲盜日數十發德模偵其所在率丁役迹之輒獲有盜匿鎮將營倚衆拒捕德模親往立擒以歸一營環視莫敢動遂論如律車渡地方與新陽縣民聚衆抗租上游令德模督礮船往按德模曰是激之變耳扁舟入其境治首惡散脅從事立平縣治舊有天主堂雍正間鄂爾泰撫吳改祠孔子寇亂燬焉泰



西人伊宗伊以故址請督撫令與德模謀德模不可呵曰某官可罷此祠不可得也卒弗許有奸人誘買良家女侍勢豪庇德模挈其親屬往出之勢豪亦屈服蓋德模天性沈毅疾惡如仇故能不畏彊禦如此有因飢寒爲竊者爲設化莠堂給以衣食督其習藝藝成各令歸知長洲四年所判八百餘牘皆愜民意常乘馬日行數十里與田夫走卒相酬答周知民隱一旦坐堂皇莅事人皆驚以爲神馭下嚴而能卹其私胥役輩爭自濯磨不敢爲溜蠹首邑訟獄繁限日傳提隨時判決閒用俳語粲然成章讞獄思無不入能虛中察辭氣或故支離曼衍其詞而忽得其情會所在發摘若神豪猾屏息然執憲平不爲礪刻多得法外之意上官賢之凡疑獄悉移鞠治淮陽水師在江面巡徼被盜格傷副將捕役於通州獲張開大等五名坐以盜德模鞠爲寧波護商船立釋之懲誤獲者丹陽呂郁文訟嚴家正盜絲團董黃寬袒家正郁文舅貢元良恚憤上控詞及寬寬亦控元良喜訟元良匿他所妻高氏堅指老郎橋下溺尸謂爲元良又有貢士斌指爲伯父秉錫皆控寬主謀並誣大眼孫三以爲加功德模觀貢高氏雖號泣訟寃其意若不甚戚者搜得元良書知死者實秉錫驗之無傷又於其懷得已溼詞則在縣控人有案者

先是寬患貢高氏許士斌埋葬銀證非元良獄竟斬不與故士斌亦誣以謀殺情  
既得按律分懲而孫三獲免其他平反多類此高郵清水潭決災民南下德模請  
於大吏酌派各縣按圖分養三萬餘人無一失所吳門遭兵禍百廢待舉壇廟倉  
庾書院清節堂卹孤局昭忠節孝名宦等祠及先賢祠墓之在境內者德模率先  
修舉不足則割俸資之又爲泮墅關營籌芻秣費永免比閭供役修望亭塘爲橋  
二十八以利行者吳中向章徵收錢糧有淋尖踢斛花邊樣米捉豬諸色日納糧  
一石須米兩石餘又往往差追嚴切不堪其擾德模稔民疾苦壹皆革除不事追  
呼而輸租相屬惟大小戶均一頗有不便之者御史朱鎮以浮收奏劾事下督撫  
推治總督曾國藩巡撫郭柏蔭奏雪之奉旨以是非倒置申飭原奏官德模前已  
彙保至直隸州知州換戴花翎復絨分援浙閩皖功晉知府加道銜又以海運出  
力陟補用道員旋署太倉州知州蘇州府知府其治一如長洲時治獄精審或不  
得廢寢與食力思誠索幽明響應在太倉遂有因風擊鼓而獲豆腐店謀殺親夫  
一案小民演爲謠諺初亦不盡誣也未幾調署鎮江府時天津豐大業事方棘沿  
江設烽燧或有緩其行者德模毅然曰臣子避難不忠上游知我不義趣裝往鎮

江有外城粵逆增築也德模至規度形勢知城包北固瓦子山據險宜葺甘露港不通則城河塞宜濬而士民間警遠徙城爲之空乃馳書召紳富責以大義不數日輸金至巨萬工未竟調署江寧旋擢四川夔州府夔城瀕江屢圯於水承修者以竹籠盛石子築之隨築隨圯糜金數萬而工不舉不得已議建木城德模自出方略築保坎十三道登以方丈餘大石層累而上先捐萬金以倡其役不二年遂成附郭有臭鹽磧盛漲時沒水中水落貧民相聚煎鹽嗣爲雲陽竈戶所持奉有永遠封禁之旨然每至冬令私煎如故煎戶恆至數千人或執械以抗捕者官無如何德模以貨棄於地爲可惜請弛其令而由官購買運至宜昌一帶銷售既不奪奉節之業又不侵雲陽之岸遂定爲例然浮舟東下釐金水腳費殊巨德模志在利民獨力任之歲累萬金亦不計復刊蠶桑實際一書分給保甲勸民種桑又遣委員董理之不二年奉節一縣種桑二十二萬有奇他邑稱是在夔州四年卒於任長洲太倉及夔州各紳民咸祠祀焉

### 金福曾

金福曾浙江秀水人附生成豐九年隨祖父衍宗温州教授任所適粵逆陷處州



福曾與籌團練城賴以完後從官軍肅清金華處州等府浙江巡撫胡興仁保奏賞戴藍翎十年協守獨松關解杭州圍並克復臨安保以訓導選用江蘇巡撫李鴻章視師上海見福曾論事公牘器之檄至營隨克蘇州委辦善後事宜遣散降虜撫恤流亡勞勩漸著旋報捐教諭同治三年以收復蘇州功保陞知縣留江蘇補用四年從克嘉興常州等處保以直隸州用五年從克湖州等處加知府銜並換花翎是年捻匪事起福曾往贊徐州道張樹聲軍務兼行營糧臺十二月捻衆北竄復隨直隸總督劉長佑駐軍大名防堵丁憂服闋到蘇歷署婁縣南匯吳江等縣知縣所至興學校課農桑理冤獄禁溺女勸墾沙田開濬河道善政卓著民有去思光緒元年捐陞知府歸部選用四年河南大旱吳中紳士謝家福等倡辦義賑集資親往散放各省聞而興起前後得銀四十餘萬公舉福曾董之福曾遂挈蘇浙諸紳赴豫分賑新安澠池洛陽登封嵩縣偃師宜陽孟津汜水陝州靈寶闔鄉各州縣自冬歷春躬親其事新澠被災尤重福曾創立善堂舉恤糞收埋等事以縣當孔道徭役殷繁官多浮斂民以重困乃置車馬代應諸役並存款生息爲久遠計自是役不及民而官無廢事又以兩縣爲澗水所經可興水利乃開渠

鑿井購南省戽水之具以便灌溉一渠灌田數頃收穫倍蓰又以洛陽宜陽舊有廢渠貫通伊洛可灌田二十萬頃遂因其遺址濬而深之先是飢民乏食鬻及妻孥奸僧因以爲利展轉掠販福曾於開封歸德陳州設局收贖留養有家者資遣之所贖婦稚以千百計時福曾已報捐道員事竣河道總督李鶴年河南巡撫涂宗瀛奏請獎敘奉旨加三品銜五年復赴山西分辦虞鄉永濟芮城平陸垣曲沁水陽城石樓蒲永和等縣賑務活飢民七萬餘口又於平垣兩縣籌備羸馬代應差徭如新澠故事復值疫癘大行錢米之外兼施藥餌又設立種痘局於蒲解二州以全嬰兒是時畿輔頻年水旱晉賑旣畢諸紳移局而北福曾議行以工代賑之法遂開大清河自文安左各莊至台頭三十里並濬中亭河培千里隄使飢民就役受食卽以消文大保霸頻年水患七年五月工竣直隸總督李鴻章奏請存記給獎並調赴直隸差遣疏再上允之是冬奉委清丈文大霸靜東淀無糧地畝福曾謂淀池淤塞爲清河受病之原因議清釐葦地規復埽船舊制將以疏淤導滯使水有所歸八年疏濬東淀河道自文安縣台頭以下至天津縣韓家墅以上舊皆淀地年久淤墊蘆根盤結福曾剋期歲役費省工堅天津縣三河頭隄所以



障遏永定河不使灌注大清河者也故謂之格淀隄亦於是年興築福曾窮究受病之源施治有法工竣後歷經伏秋大汛淀路疏通河流順暢直隸總督張樹聲奏保以道員分省補用九年督修子牙河隄福曾嘗論子牙河自獻縣臧家橋以下合水愈多狂瀾益漲從臧橋至河間縣境百餘里兩隄夾峙水勢已不能容從河間過大城至青縣百餘里大隄漸遠而民埝相逼束縛愈甚每遇盛漲民埝一開大隄卽不能保西淹文安東注青靜欲留埝則礙水道欲廢埝則拂輿情欲移隄遠水則又以成規難改衆志不齊乃於王家口開支河以消盛漲十年畿東大水爲災河隄衝決福曾籌理賑撫兼辦薊香寶寧等處工程十一年復濬饒陽縣境內滹沱河以清來源十二年山東河溢李鴻章檄福曾前往賑濟行抵齊河值橫流汎濫車阻不得進福曾乃改乘小舟徧歷災區屢瀕危險卒賑飢民二十餘萬嗣卽振濟陽等九州縣十三年修南運減河是河發自山東恩縣四女寺至德州九龍廟入鬲津經直隸之吳橋寧津南皮鹽山慶雲山東之樂陵海豐直至埕子口入海福曾酌度地勢於四女寺壩基子東減河身內移進三十丈別築新基又在壩之北引水南入新閘門略作紆回之勢以避溜衝並規復減水閘舊制啟



閉以時酌修埽段用資保護自上年冬福曾卽周行風雪中遇疾幾殆仍力疾畢  
勸而返及期興工往來上下游躬親督率五月工竣由是分流通暢盛漲疏消埕  
子口進海一帶可通舟楫矣工竣部議加二級七月署永定河道適南岸七工西  
小隄漫溢成口福曾籌築早占水占壩埽晝夜搶鑿艱苦萬狀兩閱月合龍隄外  
水涸地復可耕李鴻章上其功得旨加二品銜十四年五月再署永定河道七月  
水勢盛漲盧溝汛南岸三號石隄及南二工北上汛大隄均溢奉旨革職留任福  
曾剋期搶堵河流仍歸故道旋開復原官時房山縣山水暴發淹注田舍山中煤  
道橋梁均壞福曾捐集巨款修復如舊十五年山東復災鴻章再檄福曾往福曾  
親振濟南青州武定各府屬又以齊東各縣頻年沈浸議遷民於大隄之外款不  
足用迺赴蘇滬各處多方籌畫事賴以舉旋因病乞假回籍時浙江大水巡撫崧  
駿奏請會同辦理賑務福曾施粥平糶因地爲用仍持以工代賑之議於是海寧  
備塘杭州長安鎮以上塘河嘉湖各屬經流支港凡淤淺壅塞皆次第疏濬會廷  
議濬復餘杭縣南湖敕崧駿勘估興工崧駿復奏令福曾督同在事員紳經理十  
七年七月功竣是年順直東水災亦見告福曾時已臥病猶力疾籌捐銀二十餘

萬兩十八年閏六月卒於浙江平湖縣差次十九年直隸總督李鴻章會同浙江巡撫崧駿山東巡撫福潤合詞奏稱福曾歷辦工賑十有餘年無日不在勞身焦思之中尤非他人一時一事之勞動可比其規畫各端成效昭著疊經各省專案奏陳四蒙特旨嘉獎功能治行卓然可傳懇敕部照各省辦理河務積勞病故人員例議卹並將事蹟宣付史館得旨俞允嗣贈內閣學士銜

毛隆輔

毛隆輔江西豐城人由監生捐輸軍餉獎知縣分發四川咸豐九年因勸辦江西紳商捐輸以同知直隸州陞用先換頂戴同治三年署新都縣知縣甫下車延訪正士詢民間疾苦邑有正因寺富於田僧無行豪猾爭侵蝕之互控數十年不決隆輔改寺爲桂湖書院聘耆儒教授其中訟遂息新都民愿樸隆輔政尙慈惠有諷以立威者謝之曰立威必嚴刑嚴刑則民無所措手足吾弗忍也四年補丹稜縣知縣邑故瘠屢陷於賊蹂躪無完土隆輔至滌除煩苛與民休息舊有戶首之役支應差徭吏因緣爲奸民益累隆輔禁革之善聽訟不輕用刑每從容開導使之省悟前令積案數百一一清理日坐堂皇投牒者立予判結胥役無所庸其需



索雖不設鈎距而洞見情僞奸猾慝伏鄰境民有冒丹稜籍投愬者隆輔卻其詞則稽首曰公青天也特來求直耳隆輔用片辭剖解懽感而去有骨肉爭訟以天倫至性之言反覆婉導皆泣且悔因手其牒還之曰毋使若有相訟名爲政務持大體培養元氣好爲民除害興利不憚艱劬以要其成邑多盜隆輔舉行保甲酌古準今定條目三十有二籌畫周密保長甲長牌首以次遞相保薦有犯連坐首者免鄉里有小忿令質於保甲爲調息之每甲造循環冊二凡山川道路橋梁渠堰村落各繪一圖載冊端每六閱月置酒召保長更番呈驗人無敢欺且樂爲用因以稽覈戶口之貧富民情之善否胥瞭如指掌一年規制始備境內盜戢有一民被竊次日盜知爲丹稜境悔甚及夕潛還其物置戶外鄰境苦盜往往乞附丹稜保甲得無恙隆輔念團練本足衛民行之不善反爲民厲因刊布程式編二十八團擇殷實士紳爲衆推服者充團總於農隙教習技藝月游巡二次申明禁約屆期親臨點驗風雨無間事未竟雖日昃不退食又令團首保送壯丁每三十戶出丁一米八斗練鄉兵七百餘人分爲武毅中左二營以楚軍營制部勒之孟冬調城操演仲春撤遣歸耕會馬邊逆匪宋侍傑勾結洪雅賊日尹一山等竄距八



面山與丹稜毗連民情洶洶隆輔示以鎮靜調集民團營南北兩山爲犄角而自率鄉兵星馳出境會援軍合剿旬日卽就撲滅事聞賞加運同銜後寧遠府請兵防猺夷督臣諭之曰曷不仿丹稜辦團徒紛紛乞兵何爲也乃下其法於邊郡邑城卑久未修葺嗣復爲賊平毀殆盡隆輔履任亟圖修復屬紳耆籌款躬度形勢以城北枕山兵法所忌增建敵樓月池以制之因運石車輛皆雇自鄰邑卽飭局製造給值令民推輓仍爲本境窮黎之利隆輔戴笠督工雜處徒役間歷兩寒暑無間城高二丈厚一丈八尺周六百餘丈費數萬計民不知役然隆輔卒以此致疾士民相率以節勞勸曰吾民日以肥我公日以瘠矣將奈何隆輔曰吾惟未能盡職之懼何敢言勞且不知勞也隆輔治事精敏嘗言一官繫萬民之命苟有未盡未周卽爲病民卽爲曠官何以自解縣山多田少水利不足隆輔勸民依山開溝引至平岡鑿塘瀦水以防亢旱教民種桑先於郊外隙地植數千株爲之倡社倉存穀久虧歷任徒事追比社首或至傾家隆輔集社首於庭開誠布公分別新舊久暫諭以秋收償還皆感泣如期輸納無爽者舊存穀九十餘石越二年積至一千四百石值夏旱米價騰踊開倉平糶全活甚衆邑有丹山書院故事官止季

課隆輔割俸加獎按月一課講舍向無藏書購買經史子集千餘卷藏學宮資多  
士搜討寒畯艱於鄉試置田取租以備卷資設義塾九所慎選館師巡鄉之便入  
其塾稽課程正句讀重刊孝經小學諸書詳爲講導其悉心教養不遺餘力如此  
隆輔素清介布衣蔬食淡泊自適顧喜捐廉爲利益事如設矜恤會以祀無主墳  
塋設同善會以給貧民棺槨皆定章程垂之久遠常循行田野與鄉民詳諮風土  
人情誨以孝敬忠信忍讓之言肫肫如家人父子民亦忘其爲官長之尊有窮民  
道拾五十金追其主還之咸以爲德化所感云七年調署德陽縣士民涕泣攀轅  
道路爲塞因勒去思碑於白崖山德陽地遼闊盜多於丹稜稔隆輔名咸遯跡去  
屆歲暮無報竊者八年卒隆輔博覽經史尤潛心於先儒語錄著有自治官書十  
一年入祀名宦祠

袁垚齡

袁垚齡安徽泗州人由文童投效湘軍同治元年隨復江岸各城隘敍從九品職  
二年解金陵雨花臺之圍晉縣丞三年官軍攻克江寧擢知縣並賞戴藍翎五年  
湖北巡撫曾國荃調赴鄂省六年進剿捻匪復雲夢應城天門等縣加同知銜換

戴花翎十年劉錦棠治軍甘肅奏調辦理營務攻破小峽要隘堅壘數十座徑薄西寧府城克之陞同知十一年平西寧府屬回逆復大通縣城肅清邊境安輯回番光緒二年關隴底平以知府補用又攻拔古牧地堅巢復烏魯木齊等城以知府仍留原省候補並加鹽運使銜尋署迪化州知州招集流亡倡辦保甲拊循勞徠遺黎漸蘇五年以剿辦安集延布魯特陝回金山股逆獲勝併案保獎晉道員加二品頂戴並賞給那爾琿巴圖魯名號十年以新疆六載邊防出力下部優敘十二年補授阿克蘇道至則統籌全屬利病凡農桑學校有裨教養者具舉事必躬親經理通商事宜尤能力持大體十四年調補喀什噶爾道十五年三月署新疆布政使未赴任七月以積勞卒護理新疆巡撫魏光燾疏請照道員軍營立功後積勞病故例優卹附祀新疆省城左宗棠專祠允之

劉含芳

劉含芳安徽貴池人咸豐初年粵匪擾江南曾國藩督師祁門含芳往謁條陳戰守方略甚器之延入幕府同治元年以從九品從署江蘇巡撫李鴻章剿賊東下積功洊保至知縣補缺後以知府陞用五年李鴻章奉命剿捻檄含芳督辦清江



蔣壩張秋濟南軍械所精器練材綜理有法七年東捻平擢知府並加道銜八年西捻亦平以道員用加三品銜九年李鴻章移督直隸含芳從究心製造各學購泰西新式利器省覽機括默記冥會久之悉通其業凡某國某廠所製皆能洞燭奧窾以戎器宜豫儲於是議建北洋軍械局購地西沽修大小庫屋二百餘楹實槍礮其中號曰武庫以將士宜教練於是與宿將演習槍礮復遴選武弁出洋分赴德國斯那道軍營烏里治克鹿卜礮廠學習回華轉相教授以軍械自製可塞漏卮於是擴充機器製造兩局增廠庀材募工仿造以海口設防始固藩籬於是創設電氣水雷學堂於大沽編立水雷營以固北洋門戶凡鴻章所建樹含芳皆贊成之厥後日韓法越之役協濟各路軍火及應付海軍大閱操演之需隨時取攜無稍匱乏光緒七年李鴻章以含芳應保薦人材之詔奉旨交軍機處存記旋彙案請獎加二品銜八年以援護朝鮮下部優敘是時海軍初立北洋防務旅順爲最要旅順者奉天金州濱海形勝也與山東威海衛南北對峙中隔海汊二百餘里控扼渤溟爲畿輔天然犄角含芳議置重兵戍守互爲聲援復議造大船隄於旅順備修治戰艦之用立海軍公所於威海爲操防停泊之區一力經營者十

年海墾荒島屹然成重鎮焉先後奉檄總辦威海衛魚雷營充北洋沿海水陸前敵營務處兼總辦旅順船塢工程局凡屯防營築礮臺設機器廠造子藥庫並開醫院學堂皆手定章程躬親履勘聯絡諸將督率華洋工役剋期並作一歲往來海上風濤跋涉無閒寒暑他如設津滬保定電綫立天津武備學堂亦力任其難成效大著十四年署津海關道十七年授甘肅安肅道李鴻章奏請暫留旅順辦理海防未及赴任十八年調山東登萊青道監督東海關十九年視事卽以整頓吏治輯和華洋爲己任至於裕課卹商惠工懷遠稽稅則嚴保甲凡有便於民者莫不實力舉行又以其時濬溝渠修街道興醫院創廣仁堂皆捐資獨辦中西商民交口頌之二十年日本犯遼東我軍失利運兵輪船遂爲敵所襲擊含芳聞警卽密商各國領事託其兵輪在仁川救護陣傷弁勇三四百人資送回津時敵船遊弋口外譌言數驚含芳一示以鎮靜手書慰前敵並調所部東海營練兵設卡防護稽查奸宄親出巡閱嚴申號令凡有劫船挾資遠遁者悉捕獲置之法旣兵事日棘金旅繼陷敵近逼威海煙臺益危含芳仍料量軍儲籌備防務昕夕無暇晷及海軍艦隊沒於劉公島敵進踞寧海州城其邊隊至竹林寺礮聲達煙臺防

兵單且新募居民商賈遷徙一空含芳獨併力死守誓與煙地爲存亡各國領事暨稅務司咸勸暫避租界含芳曰此吾死所退一步不忠矣與妻郝氏公服坐堂皇置鴆酒兩盃於側敵見官不去民不亂部伍不失憚而引退私相謂曰自進兵中國獨有煙臺守固無隙可乘西人商於是者亦曰使領兵盡如鄧世昌守土盡如劉含芳日本豈能倖勝耶威海之陷也有潰勇五千趨煙臺勢將譁亂含芳單騎往諭曰汝等失伍罪當斬今姑赦之其聽我約束皆俛伏曰諾先處之空營日與薪米居數日則簡其槍枝未失願復爲兵者編爲四營餘悉資遣其難民留者給餼糧去者給船票一無失所費至數萬金皆出私錢無稍吝山東巡撫李秉衡深嘉許之二十一年和議成含芳奉檄渡海勦收至旅順見向所經營摧殘略盡遂以是病假歸二十三年卒

### 王寅清

王寅清河南上蔡人由拔貢知縣分發安徽初攝鳳臺經苗沛霖之亂伏莽未清寅清巡行四鄉十日九出土匪徐光山句捻酋任柱任時意等圍城寅清督團勇迎擊擒斬時意等數十人任柱他竄追獲徐光山等斬之移攝太和值黃水橫流



飢民徧野寅清請款賑撫捐廉飲助躬親施放復捐散棉衣設立粥廠活災黎無算霍邱經擒匪蹂躪最甚元氣未復而客民轉多於土著奸宄出沒無時同治八年寅清署縣事治盜賊撫流亡善後諸務擘畫井井有富民胡氏被劫寅清督練勇周巡荒陬不踰月首從悉獲並請上官屯重兵於縣南葉家集設守汛於縣東隱賢集由是盜賊潛蹤在署日坐公堂有訟立斷赴鄉勘驗懷餅而食苞苴盡絕丁役不敢索一錢縣有翠峰書院寅清禮延名師捐俸以佐膏火暇則躬履畎畝召父老詢疾苦如家人父子焉公差來往向撥民夫苦妨農業寅清改僱夫供役民困始蘇九年安徽巡撫英翰以循良薦得旨嘉獎旋調宣城宣城土客雜居又值教匪猖獗寅清禽渠解從撫慰良善民氣遂平更調英山前令積案悉結之獄無滯囚再權壽州州素稱煩劇苗逆餘黨猶不時游弋爲鄉民害寅清緝而懲之盜風頓戢並裁養勇費數千緡其他宣講聖諭廣訓採訪貞孝節烈捐牛種建義倉築城池培學校立保甲以及地方工程如修城垣建壇廟治道路葺橋梁各事靡不因地制宜興廢舉墜歷各任如一日旋授望江以病假歸光緒八年卒於家

曹秉哲

曹秉哲廣東番禺人同治四年進士改翰林院庶吉士七年散館授編修十年充會試同考官十一年以襄辦慶典加侍講銜十二年記名以御史用光緒元年充實錄館總纂官八月充順天鄉試同考官旋充國史館功臣館纂修本衙門撰文二年京察一等記名以道府用三年補江南道監察御史尋掌本道巡視東城並署戶科給事中數上章言事皆切時務嗣以實錄告成奉旨專以道員用加二品頂戴五年署甘肅蘭州道八年署按察使九年丁憂回籍十三年服闋補河南彰衛懷道奉檄履任甫抵境值沁河陡漲小楊莊大隄漫決西南百數十村盡成澤國護城隄不沒者尺許城形如釜人心惶懼秉哲冒險渡河入城集幕僚籌守隄拯民之策城隄歲久失修又值大雨危險益甚秉哲亟購棉衣數百塞其罅漏並覆鐵鍋數十於上溜始斷而雨仍不已漲與隄平勢且漫溢秉哲泣禱曰守土官義與城存亡脫不守誓先葬魚腹以謝黎庶大溜旋減萬衆歡呼又多備船隻攜餅餌分赴各鄉拯救萬人堵築漫口日夜奔馳風雨中無少休息其督理賑務也銀米棉衣皆令官紳會同散放不假手胥吏調署開歸陳許道紳民聞之不期而集者數千人攀轅臥轍輓不使行奔訴上官堅請留任巡撫倪文蔚允之衆乃散

十五年夏在祥河廳監防大汛聞河內縣王賀莊沁河大隄疏防星夜馳回拯難民議賑濟堵塞漫口十餘日而工竣力辭獎勵而優保在事員弁人樂爲用秉哲素有暈眩之疾至是加劇嗣以黃河兩岸修防得力下部優敘在任四年愛士若渴才俊者拔入致用書院加給膏火期爲有用之學又刻前人治河諸書以備當事採擇嗣調署按察使釐定保甲並緝捕章程十六年補山東按察使十七年卒

冷鼎亨

冷鼎亨山東招遠人同治四年進士以知縣卽用分發江西十年署瑞昌縣知縣瑞昌故瘠邑民尤健訟胥吏高下其手鄉愚每因之破家鼎亨至捕訟師及猾吏數人繩以法或因事詣鄉爲巨牌嚴禁供張使人持於前胥役各隨輿後反則令役居前而已殿之未嘗以杯勺累民瑞俗悍時有抗糧事及是並宿逋無負者期滿將去任百姓爭具牘乞留不能得則垂涕相弔其治德化績尤著德爲九省通衢又多屯防軍每倚勢凌民鼎亨於諸軍有所侵犯必按法懲之境內肅然驛里隄塘者瀕江險障也前令請萬金而功不就鼎亨莅事數月告成費僅四千金旣植柳江壩用護隄根民間遂以冷公名其隄德鄰瑞昌黃梅民因爭淤地蘆洲累



歲相鬪殺官不能制鼎亨諭紳民建臺於鬪所官吏誓不私三邑民皆悅服而德化人尤樂道冷公樹一事初白鶴鄉人叔姪爭田久不決鼎亨卽樹下諭解遂悔悟如初今呼爲冷公樹云邑旱蝗徒步烈日中掩捕彌月不倦露宿禱諸神翌日而雨蝗皆死越三歲鄰縣蝗復作至德化輒不復前民以爲鼎亨德化所感焉又嘗攝新昌故事凡投稅者必先以資購籤始能上納鼎亨設籤櫝堂下聽民自執籤投稅並刻石嚴禁弊政遂絕其移彭澤也地界三省瀕大江夙多盜而報盜者特稀突有一老儒以竊聞者鼎亨詰其狀詫曰此盜案也何第竊乎老儒泣曰前令多諱盜報輒重懲故相戒勿以上今公愛吾民若此忍累公耶鼎亨令易其詞捕護盜首寘諸法其黨相率逃走戒勿犯又設禁鴉片煙會賞罰嚴明期年而俗一變院司知其能奏補新建新建爲附省首縣令此者大都昕夕奔走冀博上游歡轉不遑治民事獄訟則付諸委員鼎亨請於上官簡酬應親聽斷民歌頌之又置酒會諸紳釀金七千增書院課產士林戴德祀之於講堂訟獄旣清益嚴保甲奸民無所容隱鄰縣有大盜助獲之而散其黨鄱陽爲濱湖劇邑衝繁號難治大吏以鼎亨調補未及下車而蛟水大作漂沒田廬鼎亨急馳往不俟報輒發官廩

賑給先是辦賑者但按糧冊吏遂得因緣爲奸鼎亨獨刊印票酌重輕親填散給終事無侵蝕已復請巨金爲長隄使飢民藉傭以得食逾年災復作賑如前嘗朝夕跣足露立炎天沮洳中溼疾徧體前後凡十月嘗乘小舟行駭浪間桅再折幾死返署雖深夜聽斷不休其堅苦卹民如此在官食無兼味公服外無玩具鮮衣妻子衣履皆自製購食物嚴禁官價市買於民兵部侍郎彭玉麟巡閱長江水師嘗寄書巡撫曰某所至三江五湖數千里未見堅剛耐苦如冷知縣者也歷任十餘年所至以身率下吏胥幾無以爲生暇則築塘隄興水利建津渡設義學義倉育嬰諸政無不捐廉俸以爲倡尤留意教育增修書院加益膏火親督課講日以文章氣節相勉勵鄱陽俗好鬪鼎亨曰化民有本未教而遽殺之非義也乃取孝經證聖諭爲淺說婦孺聞之亦泣下在鄱三歲民以不爭辦理教案尤能持平兩無冤抑鼎亨任瑞昌德化新建時咸有民教齟齬事桀黠者藉以鼓衆約毀教堂終恐遺禍好官而止蓋其素行誠篤有以感服之也歷任江西巡撫劉坤一李文敏皆以賢能薦光緒九年舉卓異十年陞補南昌府同知巡撫潘蔚遵保人才疏稱鼎亨老成練達悃悞無華實惠及民循聲遠播奉旨交軍機處存記十一年引

見乞假修墓歸卒於家

陳文黻

陳文黻湖南長沙人附監生捐輸軍餉獎通判同治間投效陝甘軍營克復西寧晉同知尋指分陝西光緒二年充善後局委員四年大軍克復烏魯木齊紱關中饋餉功擢知府六年筦白河釐務裁串兒錢銀錢折易必平其值商人費省十二三而權收轉增倍七年署鄠縣知縣旋補留壩廳同知文黻之治鄠也朔望必宣講聖諭廣訓反覆譬喻以暢其旨聞者多感泣凡告期坐堂皇受牒訴立予判決舊任積案兩月悉結公事不由閹人關白亦未輕遣鈎攝之隸九年莅留壩本任治行亦如在鄠時十年伊犁收還以文黻舊日籌餉加四品銜留壩向有棗茨經費用以葺獄解囚歲徵之民兩倍正賦文黻下車首革之境內無質肆貧民緩急稱貸盤剝者要重息甚或子母相埒文黻捐廉爲倡設裕民公所貸錢者以衣物質贖以期息以十一紳綜其事而官歲會之取其贏以抵棗茨費並備地方公用民困大蘇廳治山多於田又無他物產可資養生文黻憂之先是攝鄠縣時嘗課民種桑數十萬株會去任而利未溥及至是乃周歷山谷辨其土宜作種橡說及



山蠶四要徧諭鄉民因頒給樹秧蠶種募蠶師樹工導之絲成則製機教之織復慮民不樂趨設收買絲紬局重其值以招引又購給紫陽茶種課之藝茶於是地無棄利民無遺力留壩俗素陋樸嚮學者鮮歲科兩試附鳳縣額每試或不得一人文獻爲建紫柏書院置書籍立課程兼設義塾拔書院高才者爲之師閱數年饗舍彬彬稱盛遂請奏設廳學建官置額初文獻見廳治有谿河歲久壅闕往往橫溢爲患因陳開河數十事大府聽之而不果發及猝被水時已逾報災限立以便宜開倉賑之督同紳士赴鄉查放跋涉沮洳侵尋成疾不少已並令妻子雜作糜粥賑近郊全活無算明年春鄰境流民全集公款不足則罄廉貸資繼之復謀以工代賑迺申開河議不得請則因其衆除道路濬溝渠出私囊給值負累至數千緡而民大稱便廳介萬山中林谷深阻奸民狙伏劫行李或掠婦孺販賣境外文獻密圖其處示捕役時復微服親迹之卒皆就擒寘之法其治保甲也於民戶職業田產丁口年歲及已未婚嫁所聘字姓氏悉書於冊或譏其煩碎及振撫事起稽之冊乃如家至戶覲且從前戶婚田土之案日有所聞至著籍在官咸莫敢欺訟益簡民有殺媳匿其屍者母家以無左驗不得直文獻偶行經山徑羣鴉噪

於前索而得之一訊具服十八年二月初次邊俸期滿部議入卽陞班陞用旋調署潼關廳未赴任閏六月卒二十年陝西巡撫鹿傳霖臚陳文獻歷官政蹟奏請宣付史館列傳允之

### 桂中行

桂中行江西臨川人咸同間天下多故中行以諸生赴皖從軍兩江總督曾國藩見而器之積功獎知縣歷任合肥蒙城阜陽諸縣事國藩奉命北征擒寇以擒黨多蒙城人其地特巖阻令中行清查蒙城圩寨便宜從事中行單騎歷各圩曉以利害擇良幹者作正副圩長爲堅壁清野之計村民皆入堡糧食輜重悉移置焉寇無所掠復時時禮接耆老賢士使人皆得進見言方略因詢通捻奸民簿記之誅其渠桀數十人豪猾武斷者悉繩以法歲餘威化大行蒙人在捻中者聞許自新多逃歸以功保知府光緒三年宣城民焚教堂外人責言日至兩江總督沈葆楨檄中行往治中行察事本末諭教士曰倡亂者固當論如律顧汝先侵民地何哉今令民償汝財汝必還民地也教士初不肯承中行援公法及條約婉譬而嚴詰之相持數月卒如中行議案遂結旋丁母憂服闋安徽巡撫裕祿委辦皖南墾

務先是皖南遭寇亂民多流亡事平鄰省游民相率占墾田賦十不報一以中行得民心委使清丈中行先莅宣城與民約剋日丈量無問客主至期客民聚者以萬數譟而毀其輿吏請緩之中行不可立捕爲首者十餘人面數其罪斬以徇衆皆駭散卒丈而還他縣聞之俱不敢動事竣見裕祿驚曰汝爲國家歲增賦鉅萬鬚盡白矣九年補徐州府知府時初罹水患飢民流離邳宿尤甚中行以工代賑修沿運官隄民埵二百餘里濬邳州艾山河築宿遷六塘埵民獲其直以自贍水患亦除府界山東河南安徽三省犬牙相錯素多盜中行廣設方略嚴治窩戶奸宄爲之衰止徐故貧瘠兵燹後士風尤不振中行爲條教勸民務農躬至郊野獎勵力田又建彭城書院廣置圖籍擇其師士貧者資給之數年文風大起尤留意社倉以裕民食故徐州倉儲爲列郡之最治郡十二年徐人愛之如父母嘗臥病士民爭禱城隍願減算益其壽及以卓異薦調蘇州旋授岳常澧道耆老相率攀留不可得則繪其像祀之遷湖南按察使光緒二十年卒附祀徐州府城曾國藩專祠

沈鎔經



沈鎔經浙江烏程人同治七年進士以知縣分發江西八年署長寧縣九年補貴溪縣十年以獲盜出力下部優敘十二年調上饒奸民以喫齋爲名煽聚徒衆出沒九龍山謀不軌鎔經廉得狀擒治爲首者亂源遂塞召健訟諸生讀書官舍士咸感愧知自愛焉光緒三年調署新建縣保薦卓異旋選授安徽太平府知府四年以賑捐獎花翎八年調補安慶府時皖北水災鎔經收卹老弱民安其生九年二月擢安徽安廬滁和道六月陞授廣東按察使粵人輕犯法積贖數百鎔經悉清釐訊結十年兼署兩廣鹽運使會法蘭西構釁越南彭玉麟以欽差大臣治軍廣東檄鎔經總理營務處兼任餉需十一年二月授雲南布政使四月調廣東布政使於是防海之師自成軍以至資遣胥由鎔經總理方軍事填委時司署銓序仍爲手訂章程兼籌修廣州肇慶圍隄以勞致疾十月卒彭玉麟會同兩廣總督張之洞廣東巡撫倪文蔚先後疏陳鎔經廉明勤幹爲守兼優所至皆有循聲歿之日布被蕭然一如寒素其才識爲官民信服使之久任必能轉移窳俗整飭官常懇將生平政績宣付史館立傳爲以死勤事者勸從之

### 章洪鈞

章洪鈞安徽徽州人同治十三年進士改翰林院庶吉士散館授編修光緒七年直隸總督李鴻章奏調赴天津辦海防並中外交涉事十一年李鴻章以洪鈞明習吏事保勝道府之任奉旨以知府留於直隸補用十二年補宣化府宣化爲口北通衢有蛇腰厓右洋河左巨崖諸險夏秋泛溢爲害洪鈞集貲興修治別道三以避其險居庸屬大行山八陁之一前代利其險阻資以備邊不加修治我朝中外一家內外蒙古藩王貢使及西北兩路邊防臺站轉運皆取道於此洪鈞平治其途行旅稱便又以山多土洞爲盜賊藪洪鈞飭所屬將遠年舊洞無居人者悉堵閉之游民遂無所溷跡蔚州民武進昌被誣州牧以爲積匪例擬軍洪鈞察其寃爲平反焉他如購經史柳川書院以培植士類整理義倉平均糶糴巡行縣邑屏絕餽儀關心士民類多可紀

馮德材

馮德材湖北興國人同治九年優貢由教習知縣軍功遞保至直隸州知州嗣因捐賑獎補用知府旋以知府留廣西補用光緒二十五年署思恩府府屬廳一州縣四土司七縱橫五百餘里而武緣那馬及各土司之地叢雜萬山中向爲匪穴

是年十月隆安游匪黃大馬二黃特康等糾衆數百劫那馬廳署戕官奪獄所過村堡恣行焚掠郡城震動德材聞報卽單騎馳往懸賞嚴緝旬日之間擒匪首馬二周特二等數十名斬之二十六年三月武緣匪首周治國及蘇任臣等聚黨千餘人潛匿寺墟脅民入會豎旗滋事其附近之仙湖寺墟各土匪亦乘機騷動百色廳屬之那色平色復有游匪數千盤踞江河兩岸遙爲聲援石塘墟者出入賓州遷江上林及各土司要道也向設關推稅至是商旅裹足郡縣岌岌不可終日德材亟督同那馬武緣賓州遷江各廳州縣分領鄉勇擇要設防迨援軍旣集復親歷各地擒斬匪首周治國黃玉新蘇任臣李特達韋天成蘇加珊及著名悍黨二百餘名各屬股匪悉平德材恐萌蘖未盡久且潛滋復飭各州縣編查戶口嚴保甲連坐之法雖瘴癘惡鄉亦必間月周視惟欲革犷獷之俗必修文學習禮儀乃建遷善學堂捐給膏火督習經史由是人知嚮學思恩府志久經散佚復搜輯採訪捐廉纂修並增建忠義孝悌節孝等祠以端風化思恩地瘠民惰偶遇歲歉貧者遂無以爲生德材籌款購買桑秧棉種松杉茶竹之屬相其土宜招民墾荒種植歲增錢數十萬緡利賴至今治思恩二年卒於官廣西巡撫丁振鐸奏請照



軍營立功後病故例從優賜卹旋贈太常寺卿銜

孫叔謙

孫叔謙山東榮城人同治十二年舉人光緒十四年選授河南虞城縣知縣改補  
闈鄉既受事創築石壩禦瀕河泛溢之患民生祠之調補武陟武陟當沁水入河  
處數潰決壞民田廬叔謙先事設防水不爲患二十一年舉大計卓異調補祥符  
旋署杞縣二十四年陞補光州時渦陽飢民爲亂息縣土寇謀掠光州州既富實  
而武備又虛居民大擾叔謙捐金治城募勇敢士剋日討練嚴舉鄉村保甲清奸  
宄之源屹然有備賊竟不敢犯則大購書弋陽書院以課士置扶光閣縱人入覽  
焉而城鄉義塾之虛糜者至是主以文行之士學風淳然貧者施棉衣錢米以裕  
卒歲之謀民遂無凍餒憂陳許饑鄉人挈老幼來州就食奸民多誘買其孥叔謙  
嚴禁之籌賑以濟晨起則聽訟堂皇人自謂不冤二十六年京師有聯軍之難款  
議未集而州境息縣商城邊楚皖故多伏莽欲乘間作亂叔謙單騎赴二縣巡行  
村落諭以利害所至民聚觀之皆曰吾父母來矣雖夙號桀驁者亦感其誠由是  
奸徒皆竄逸二十七年卒

涂官俊

涂官俊江西東鄉人光緒二年進士歸班知縣七年截取分發陝西九年署富平縣十一年調署涇陽十二年再調長安十三年補宜君縣十五年調補涇陽縣十九年舉卓異二十年十月卒官俊兩莅涇陽在任最久其初任也甫遭兵燹百端廢弛官俊則先清釐積訟一千餘案其當沿襲者亦以次規恢不期年而仍復舊觀龍洞渠者卽白公故渠爲縣境水利所關自經回亂屢費鉅款迄少成效遂棄置之官俊詳勘倡言開濬衆議難之獨毅然不爲所撓由梯子崖疏淪而下水量頗增三分之二以利農田後復於清冶河畔修復廢渠二水所不至者則勸民鑿井以濟之先後增井五百餘以是無荒旱憂又喜振興文教立賓興堂購置前賢性理經濟有用之書日與諸生講習復增設義塾手定課程親爲考校而其尤繫人思者則在積穀一事先是涇民多逐末不重蓋藏舊日義倉空無實恃官俊謂積穀所以備荒莫善於年出年收莫不善於有出無收或有收無出於是躬詣各鄉查驗反覆諭導令民間輸穀填補嚴定章程以時收放百姓感其誠依限交納倉廩充盈故十九年饑卒以有備無患全活凡數萬人自餘編聯保甲勸課農桑

治盜賊以靖地方增膏獎以培寒峻凡有利於民者知無不爲爲無不力十餘年如一日然竟以積勞致疾疾篤時猶強起治民事遺命捐俸銀一千兩購棉衣散給孤貧遂卒民因先建生祠持斗酒隻雞歲時奠焉

夏敬頤

夏敬頤江西新建人同治十二年由監生捐輸軍餉獎主事光緒二年改官同知四年分發廣西以前在貴州克復下江廳永從縣各城保以同知歸候補班補用又敍剿辦全州匪黨功保俟補缺後以知府用九年署鬱林直隸州知州鬱俗强悍夙健訟積案多至百數十囹圄爲滿敬頤悉出之然皆各盡其曲直無一倖免者惟其地有溺女風敬頤捐金爲之倡勸紳耆亦量力出資不建育嬰專堂但就各鄉社廟置公所凡無力養女者給資畜育其中陋習漸除州地故宜桑而未諳紡織法獲利不溥敬頤爲廣植桑秧并製備機器募蠶師教之組織期月成效大著十年補百色直隸廳同知以籌辦越南邊防獎俟補知府後以道員用百色處萬山中多瘴癘官斯土者相戒不敢出城闔吏胥遂得因緣爲奸鄉里患之而無可如何敬頤知其弊凡訟者至遠近皆躬履其地面爲剖決然亦未嘗病疫廳境



屬邊徼土壤磽薄不任種植小民苦無以自給半多流亡所墾山田隨種隨廢及廳境改流當事貪陳地利未察民艱故多有田本荒蕪依然計畝造冊者上官不詳其實但責催科敬頤視事設法招墾借給牛種銀約俟墾熟分歲攤還請於大吏豁免荒田歷歲欠糧并展限陞科以紓民力人心大快流亡者亦稍稍復業焉又創設義塾以恤寒畯建造義倉以補荒歉嚴整保甲以安商民皆次第施行邊圉大治十四年廣西巡撫沈秉成十六年巡撫馬丕瑤兩舉循良皆奉諭傳旨嘉獎復因蘇浙賑捐賞戴花翎十七年擢補潯州府知府以勸辦順直賑捐加鹽運使銜又以邊防出力保俟歸道員班後加二品頂戴潯郡西北萬山環峙苗獠雜處不逞之徒輒依險完屯四出剽掠敬頤以爲此輩捕之則無名激之則生變非使各有恆業無以消其桀驁不馴之氣廉知郡城西北荒山廣袤三百重乃購發藍靛包粟薯芋松杉桐茶諸植物俾與居民雜處耕鑿其間復檄屬縣編戶口冊凡山居寺觀一一備列地方有積匪咸得按籍而稽時大烏之蒙亞養等方以散財聚黨盤踞堅巢爲負嵎計敬頤不動聲色伺隙捕治隱患遂除二十年以巡撫張聯桂薦命以道員記名簡放旋調署桂林府二十一年再以巡撫馬丕瑤薦得

旨交軍機處存記是年五月回潯州任六月以剿辦來武各縣土匪擒獲首逆賞給精勇巴圖魯名號當是時廣西屢旱盜賊蜂起武宣來賓之韋老恩貴縣之李春華興業之劉亞丁等皆號召莠民肆行暴掠勢蔓延不可制大吏知敬頤能檄使剿捕至則誅其首亂者餘悉縱不問事遂平二十三年正月卒八月巡撫史念祖奏請照軍營立功後病故例從優議卹尋賜卹如例贈內閣學士銜

王仁堪

王仁堪福建閩縣人祖慶雲工部尚書自有傳仁堪於同治十三年由舉人考取內閣中書光緒三年一甲一名進士翰授林院修撰五年俄羅斯更定條約索我伊犁要求無厭使臣崇厚專畫諾未奉旨遽回京仁堪偕修撰曹鴻勛等疏劾之六年提督山西學政十一年充貴州鄉試副考官十三年命在上書房行走十四年充江南鄉試副考官十一月太和門災上有遇災修省之諭仁堪復偕修撰曹鴻勛等上疏曰天人感應之理著於聖經備於諸史明示警戒斷非無因非有實政應天必不能弭此災異自琉球滅越南失緬甸亡日謀朝鮮以伺我東英擾衛藏以窺我西法擴商務覬覦滇粵俄增戰艦現造鐵路自彼得羅堡直達瑣春逼

我東三省羽翼盡翦將及腹心外患浸深財力窮盡天下臣民深望朝廷愆後懲前厲精圖治乃仰窺朝政若以爲已治已安臣下希風相率粉飾治具紀綱廢弛中外愉嬉泄泄悠悠成爲錮習自去冬河決不塞蕩析流亡不啻億萬今年江淮苦旱每縣飢民率數十萬夏秋之間京師地震大風拔木近畿山傾水溢摧壓漂沒斃人無算盛京大水被災者十三廳州縣南中紳民繪圖募賑慘不忍聞今又值太和門之災官吏奔走悚動震駭臣等備員禁近日擊涕零中夜傍徨不能自默因陳時政數端其請罷土木語尤直切略曰本年二月初一日奉諭旨擬修頤和園以備慈輿臨幸大慶祝嘏之所此誠我皇上不匱之孝思也臣等謂孝以養志爲大皇太后愛民之心率土普天同深欽仰故庀材鳩工之費指明不動正款夫出之筭庫則有正款雜款之分至朝廷責之督撫督撫取之釐徵竭蹶以應雖非地丁之正供仍是小民之膏血在計臣可執未動正款之說以告朝廷在朝廷何能執不動正款之說以謝天下臣等以爲頤和園雖極壯麗在皇太后所處不過一室之間所覽不過一山一水之勝若因此而民生愈蹙皇太后雖日居勝地未必不戚然不歡也況值非常之災罷不急之務非惟聖慈所必許抑亦臣民所



同諒伏願聖明將此項工程停止自今以往垂念政治力節游觀庶恭儉爲心而孝思亦大矣十五年正月大婚禮成奉懿旨賞加五品銜並因恭辦大婚事宜保以應陞之缺儘先陞用五月充廣東鄉試副考官十二月充會典館繪圖處幫總纂官十六年十月改總纂官以十四年京察一等授江蘇鎮江府知府十七年三月莅任不十日而有丹陽教堂之案起於邑人創見孩尸仁堪驗得孩尸七十餘具請兩江總督劉坤一專疏入告其略曰旣名爲天主堂卽不應有死孩骨卽曰兼育嬰局更不應無活嬰兒且教堂兼辦育嬰雖各省間有此案而徧查歷年條約傳教條下並無准外國人在中國育嬰之約該教士等旣於約外兼辦育嬰復不遵光緒十五年兩廣總督奏行章程使地方官得司稽察禍由自召請於結案之時曲貸愚民之罪以安衆心別給撫卹之資以謝彼族庶不致積憤日甚爲禍愈深坤一迂之嗣獲犯卒擬罪軍徒有差案旣結外人屢移書督撫保護教堂仁堪請奏定保護律例言和約保護教堂祇言從嚴懲辦并無若何懲辦明文故每出一役使臣任意挾動增條款宜明定保護之律將焚毀教堂作何賠償殺教士作何論抵以及口角鬪毆等事定明律法人心旣平訛言自息時洋人梅生交

通匪首李鴻爲購軍火事覺郡民洵懼仁堪親出巡防達旦不寐以安民心又以英領事坐梅生罪僅監禁九月復上書總理大臣論之詞極剴切有洋人忻愛珩者持簿籍來謁稱欲捐建中外義學並列沿途地方官銜名捐款仁堪詰之並無游歷護照乃商之關道咨送該國領事查辦並請兩江總督照會各國總領事令公議章程凡洋人無護照卽屬流氓私至各處爲非經地方官查出應按照中國律法科罪庶足清游匪全邦交太平湖者當四郡五縣之交萑苻藪也仁堪創鄉團設局員以鎮攝之又建荷花蕩船隲商賈無風濤患郡爲商埠奸人誘拐民子女窟穴其中悉捕鞠置之法又狡黠朋比擾市塵者建悔過所禁錮之駐防旗兵多倚勢爲虐密達當事拘最無賴懲之商民以安城中有善堂五曰育嬰曰恤嫠曰普仁曰救生曰留養積久弊生則易輟而更張之仁堪嘗謂民爲邦本親民之官當知民之利病乃巡行鄉里無險阻窮僻皆躬到慨然以設渠塘備荒自任念官款無可請又不欲擾民乃馳書乞諸親舊復捐廉以益之商富聞而感愧咸踴躍輸將得錢三萬餘緡十八年春率邑人度地高下開塘二千三百有奇溝渠開塲以百計積數十日因勞得疾猶強起視事會蝗生督捕於野病幾殆伏枕絮



絮作捕蝗議日召丹徒縣知縣王芝蘭於署口授方略在野則以手書教之是年秋丹徒丹陽大稔陳災狀蒙恩旨截漕濟賑又勸紳商捐助於是清查戶口分別大小極貧次貧放賑日嚴察司事無敢疏濫者全活二十餘萬人民有售牛者假官錢使芻牧之名曰牛振益用工振法擇丁壯治水道所開濬河渠若太平港沙腰河練湖越瀆蕭河香草簡瀆之屬凡二十有五自餘支溝別渠二百三十有奇皆引大江及運河水使深入以溉民田又鑿塘四千六百以蓄高源之水東西百餘里水利畢舉地高不宜禾豆者爲購桑榆松柏諸種給民栽植又買荒山十餘頃以儲種足材木之用金壇溧陽亦量發倉穀振之取溧陽絲捐款修縣城濬金壇薛埠舊閘灌田數萬畝皆以工代賑十九年續舉丹徒丹陽春振一如前法餘銀四萬兩發商生息爲積穀貲以備不虞收丹徒民所借牛振錢仿社倉法立社錢按區分儲生息爲民間修溝洫廣義塾之用使城董掌收區董司發互相箝制以遏弊源先是郡之西鄉僻陋不知書仁堪立榛思文社教之郡城無學舍於府署前建南濡學舍爲藏修地又清寶晉書院膏火積弊悉復舊章七月調蘇州府仁堪積前後勞至蘇卽病猶力疾入發審局清結積案冬防夜出巡感寒卒耗至



鎮江士民皆欷歔流涕乃列仁堪政績呈督撫二十年三月總督劉坤一巡撫奎俊據以上聞謂仁堪以愷悌之心行仁義之政其治獄平法似于定國發奸摘伏似趙廣漢講求水利似召信臣恤災黎則富弼之於青州也興文教則文翁之於巴蜀也以實心行實政視民事如家事卓然有古循吏風焉

### 何慶釗

何慶釗河南固始人由優貢知縣分發安徽以克復六合功獎知州並賞戴花翎歷署壽州及東流來安渦陽等縣及廬州府事所至有聲光緒三年署宿州知州逾年補授宿州自兵燹後益彫敝慶釗見文廟殿廡傾圮亟倡議興修閱歲工竣朔望會學官率諸生宣講聖諭暨御製訓飭士子文勉諸生以敦品力學邑舊有正誼書院慶釗聘名宿主講其中手定章程令邑紳經紀並於濉口鎮添建古濉書院初宿州兵亂歲科兩試應者寥寥及是增至二千餘人試院不能容乃於書院東添建西棚又捐俸爲春秋試賓興費後沿爲例宿之北閔鄉先賢閔子故里祠墓存焉舊列祀典寇亂後祭田質於他族饗祀遂廢慶釗飭其後裔贖還並爲申請大吏立奉祀生二人春秋由學官分往致祭濉口子路湖相傳爲先賢仲子

負米處亦集資建祠爲立奉祀生凡列入祀典各祠宇及驛路橋梁之應修復者靡不捐金爲之倡勤於緝捕有席小猴者巨盜也先與匪日曠同豎旗滋事曠同伏誅而小猴獨逸慶釗購綫懸賞卒獲之保以直隸州知州在任候補當慶釗之莅任也值晉豫直東連年歲歉皖境亦不登宿稍完善飢民聞而屬至慶釗皆撥款賑濟復令紳耆設粥廠餌之病者加致醫藥流亡咸慶更生宿素患蝗歲設局收買螬子蝗入境卽率衆撲滅終任蝗不爲災州治當孔道餉差絡繹舊設額夫運送或添僱之民乾隆間易民夫爲牛車遂成車徭鄉民苦之慶釗悉其弊以山東南運鹽局歲送巡費錢九百六十緡撥充車價不足者以私財補之永免車徭而別籌巡鹽費宿困大蘇民無葬地者爲置義塚髻年失學者爲設義塾又與寅僚士紳共捐貲生息爲恤嫠保嬰惜字饋藥施棺掩骼六事各立條規以資遵守遇訟事片言解釋兩造輒涕泣而去州志閱六十餘年未修慶釗以中歷髮捻殉難節烈者久恐湮沒因禮延名人續修之志成得忠義貞烈數千名並爲請於朝咸旌卹有差十四年補廣德直隸州知州其治一如在宿州時十八年州試卒於考舍

張華奎

張華奎安徽合肥人父兩廣總督張樹聲自有傳華奎由分發四川道員中式光緒十五年進士奉旨仍發原省以道員補用旋加二品頂戴十七年四川總督劉秉璋檄辦滇黔邊引鹽務鹽務素稱弊藪華奎悉心釐剔事治而商不擾遂署理川東道先是大足龍水鎮教民倚勢虐鄉里大激衆怒焚教堂五斃教民一毀其房舍百餘部民余棟成託義憤煽聚多人數百里洶洶騷動華奎至先別良莠以解其勢會營調圍捕斬要匪餘黨悉散時主教方挾此恫喝索債甚奢華奎酌予卹銀五萬兩據約力爭教士則斥逐回國五教堂永不准復修卒定議因照會主教曰民教不和由教素欺良善之民積忿成讎遂一發而不可遏也自今須約束教士不得干詞訟而縱教民又通飭地方官吏有平毋頗於是羣猜漸釋教士亦心服其公終華奎之任民教不復滋事重慶新釐舊釐創自同治之初由紳議收愈久愈蝕華奎首裁署中陋規者數千減浮支款三萬餘設報釐之票嚴偷漏之罰歲增解銀十餘萬時值大足教案之後重慶新通海關訛言岌岌華奎曉譬紳商躬勘設關及停泊商埠採長江各關章程斟酌損益事汔大定秉璋嘉其能遂



薦華奎心精力果有體有用廉正幹練材可大任得旨交軍機處存記十八年補建昌道飭所屬興文教出署中歲入三千餘金爲書院膏獎籌學田以贍教官除考試需索之弊所駐城市狹隘火易延燒華奎置水龍汲器親爲條教使民知所豫備諸葛亮論治蜀宜嚴嚴於治蜀官非嚴於治蜀民而酷吏不學每以此藉口酷烈示威告訐株連瘐死相藉華奎嚴禁非刑刊布前大學士曾國藩及其父樹聲所撰清訟章程飭屬遵行違者詳參年餘平反冤獄甚衆十九年調署按察使旋改署成縣龍茂道二十一年回任適鹿傳霖督川以華奎長於交涉檄署川東道與各國領事主教在重慶定結成都教案日本通商重慶馬關新約也華奎預與稅司勘租界定王家沱爲商埠以待之日本總領事珍田捨已至別索江北廳地華奎以非原約拒之捨已復爭場界管轄權並援各國城居之例華奎於人數行棧堅持以限制而城內製洋貨川江行輪船阻之尤力其論行輪船也曰川江峽曲而灘長流急重船下灘惟中流一線路民船上灘依岸行故無礙輪船上灘必中流行若遇民船下灘峽曲則不及見灘長則不及退流急則不及避觸沈民船溺中國人當奈何曰人與五十金曰觸沈輪船溺外國人當奈何捨已語塞遂

定合同而去是冬保薦卓異旋奉旨調補川東道川東既設子口稅奸商販運土貨每藉偷釐華奎遇事公行其罰英領事爭之不爲動先後川東數年凡交涉皆智在事先力維大局餘所興除尤多積勞咯血於二十二年八月卒

### 馬嘉楨

馬嘉楨江蘇吳縣人光緒十五年進士以知縣卽用分發河南十六年補西華縣知縣二十年調新野縣二十一年回西華任以卓異薦二十四年署柘城縣二十五年四月積勞卒於官其履西華也民苦水爲災乃設仁濟堂加孤貧糧額隆冬訪極貧予之錢兼施襦袴時癘疫盛行多死亡復創設善局購地置棺以待掩瘞遇棺無主者次第標號以爲識縣故隋鴻溝唐箕城地也樸陋相仍民未知學嘉楨廣立義塾歲延師教導月必親歷各塾考其勤惰而高下之縣人由是欣欣嚮化焉又作勸戒四民歌分示城鄉學塾擇曉人爲之反覆講解期於化莠爲良書院向無儲歷任率捐廉以獎諸生嘉楨踵行之優者加致膏火歲以爲常縣西南鄉尹家坡地窪下患積水遂成荒蕪嘉楨將於旁地之大郎溝二郎溝除濬渠道使水直達沙河有所歸蓄議未及行調權柘邑屬之代者卒歲厥事新野據豫鄂

之衝民刁俗傲訟獄尤繁嘉楨視事懲訟師一二人餘皆斂迹有械鬪者則集其鄉公正紳耆曉以大義令轉相告戒不朞月而風俗一變其署柘城時值歲儉嘉楨首令停徵並請全將常平倉穀價作賑不足以俸錢益之本邑米貴則赴近縣亳州購運復達書蘇滬多方募集先後請賑銀凡八千兩放倉穀錢九千緡募集義賑銀五千餘兩躬巡災區按戶散給不假胥吏之手民困大蘇又於城鄉分設男女粥廠別立醫廠居病者嘉楨夙知醫公暇輒親療之觸惡臭弗顧或勸善自保衛嘉楨蹙然曰是皆吾赤子忍坐視其斃耶然卒以是病遂歿嘉楨作令十年起居服食如寒士卒之日家無餘財士民咸哀之

趙以煥

趙以煥貴州廣順人父國澍自有傳以煥初以父廕襲騎都尉職旋中光緒十五年進士次年以知縣即用指分江蘇十九年補丹陽縣知縣明年視事時邑界頻旱以煥出巡鄉里視溝澮率至穢堙塞乃召集耆老諭以興修水利備災禔因爲指示地勢及先後緩急之宜出入阡陌間口講手畫娓娓不倦所至民聚觀聽皆曰官愛我厚互相勸勉荷鍤負畚從事疏濬不期年而役竣由是蓄洩以時弗憂



旱潦丹陽城內故有渠河可通舟楫歲久淤廢以煥欲治之同官以費鉅諫阻以煥自捐廉俸剋日程工旬月而復舊觀運舟達於闌闌又以舊時書院湫隘乃創設講舍數十楹選士肄業其中躬自訓誘其尤良者時引入便坐賜酒食或獎以文具貧則量給膏火資俾瞻其家後生感奮咸自力學其怠鷙者往往藉他故重懲之明示好惡士習爲之丕變以煥內敏足智長於御變二十一年日本款議旣成東南解嚴散兵游勇所在爲患縣濱大江地尤衝要於是齊豫流民盤踞縣境者千數加以游匪扇誘遂相聚掠劫號稱夸子持械公行越貨殺人肆無忌憚團防汛弁不敢究詰士民不獲已亦聚衆與抗所在騷然以煥念相持無已時終且釀禍乃躬率營勇馳往鎮撫至則衆勢謹譁諭以資遣回籍皆不應以煥誘擒魁桀數人拘回署中餘衆惶駭莫敢動然亦不遽聽命惟環跪乞釋其魁始惟令是從以煥知若輩難以理喻也適見道周有空曠佛舍乃揭榜於門曉之曰亂民聚衆於法當重治念汝曹飢餓流離爲姦人所脅姑寬恕汝有願歸者可皆入此廟中候給川資還汝於籍頃之入者大半亦有逃散者餘數十人尙喧逐以煥曰此眞亂民也縛而重笞之已乃具舟分道遣復鄉里事遂定院司多其才調補吳縣

旋以武進繁劇檄令署理時本境米價翔貴以煥會商陽湖令籌款萬餘金販米平糶適日本亦告飢商人趨利轉運出洋於是奸民藉遏糶爲名結黨掠奪官局富戶城鄉囂然以煥時臥病聞變力疾出署立捕其渠數人諭散餘衆各鄉匪徒擬俟城中有警卽起響應聞城匪被逮乃瓦解而以煥竟以積勞病卒

許祺身

許祺身浙江仁和人以知縣分發山東歷署章邱朝城等縣知縣旋陞膠州知州光緒十五年山東巡撫張曜保薦循良奉旨嘉獎調署東平州知州歲饑盜起祺身募兵緝捕常單騎夜巡以示不測李官屯者盜藪也祺身親往諭獻其魁屯人不敢匿卒獲盜首而還期年擒盜四十餘次巨盜如龐黑龐四長駁張渭林等皆就獲餘聞風遠颺州境以清東平仍歲水災祺身周歷災區拯濟無算其行荒政也先之以平糶復集捐廣設賑局寒則衣之疫則藥之災黎無失所者又修築運河北岸官隄并民埵五百餘丈南岸民埵五千餘丈涸出民田數百頃東平與汶上鄰汶上楊家隄屢決灌東平汶民以水有所歸不肯塞漫口祺身曉以利害羣情悅從遂會同汶上縣修復兩境獲安祺身有惠政聽訟明決獄無冤濫尤留意

於文教廣書院名額增生童膏火公餘集生童於署課以詩文優者獎之寒賤赴府院試者伙助之士論翕然署東平三年回膠州任道卒

### 李景祥

李景祥浙江鄞縣人光緒二十一年進士以卽用知縣籤分奉天二十三年補廣寧縣縣民之豪者往往挾奉教爲鄉人害積怨不能平幾釀鉅禍景祥至按條約告諭遠近教士不得干預地方事有民教涉訟者以理定其曲直無所偏倚人心大快以是庚子拳匪起他縣教民多罹害而廣寧獨全城內水道久湮塞夏秋恆雨潦無所洩將成澤國景祥思疏濬之徧訪土人不得故道因考盛京通志載廣寧城內東隅有經濟橋橋南爲會流橋長春大惠二水至此合流然長春橋遺址尙存而大惠橋無聞迺於水落雨霽詳察長春之水東流大惠之水西行會此以達於河捐廉倡修循流疏鑿復其故道水患遂除廣寧士習樸陋景祥接引生童勉以德行文章諸生由是知敦品立行二十六年閏八月俄兵入縣境潰勇土匪四出劫掠人咸不自保景祥與其長子士藩幕友宋世清誓與城存亡團結鄉勇勵以忠義匪首金壽山范廣全趙璧等先後攻城聞景祥名皆就撫餘衆亦相率



遠避俄人之入城也土匪孔憲邦實勾引之景祥廉得其情執憲邦寘之法俄員肅然二十八年七月城內有六和拳復起之謠法國教士照會俄員請領兵數百按戶搜查城中大恐幾激變景祥力爭其妄俄教士夙知其平日治行事遂得寢在任六年積勞成疾二十九年正月卒奉天將軍增祺府尹廷杰等以照軍營立功後積勞病故例奏請尋賜卹如例

清史列傳 卷七十八

貳臣傳甲

劉良臣子澤洪

劉良臣直隸人明遊擊守大凌河本朝天聰五年隨總兵祖大壽等來降八年敕投誠功授三等輕車都尉隸漢軍鑲黃旗順治元年授三等參領二年遷山西寧武關副將三年擢甘肅總兵加都督同知四年二月疏言甘肅軍餉向例本折各半折色仰給蘭州今州庫空虛須赴西安關領計鎮標歲支折色銀十六萬二千餘兩現餉久缺甘肅至西安幾三千里往返數月非早給不能應用又向例銀七錢三搭放更多腳費請敕部議免搭制錢將餉銀早發再鎮屬自河西達嘉峪邊長二千餘里兼之海番松番西番等衆納貢番回所至盤踞分布未周查經制合鎮官軍二萬六百五十近又增西協兵千名分駐城堡臣自莊浪涼州至甘州相視地勢見有官兵駐守不合機宜者如莊屬河霸等營涼屬鎮番等營昔衝今緩應移防衝要不必加兵增餉防守皆得實用下部議行五年甘肅逆回米喇印作

亂良臣被執死之八年特贈右都督雍正八年入祀昭忠祠子澤洪明副將順治二年隨其伯父良佐投誠五年授二等輕車都尉世職九年襲其父所遺三等輕車都尉併爲二等男爵康熙三十四年卒子俊德襲

### 孫定遼

孫定遼遼陽人明副將守大凌河本朝天聰五年隨總兵祖大壽等降賜銀幣鞍馬囊韃器用諸物尋授副都統隸鑲紅旗漢軍七年大軍克松山詔大凌河諸降將有兄弟妻子在松山錦州者俱給完聚定遼初降時其從役二人私逃人謂定遼遣歸明上不問至是諭及之定遼疏言臣奉諭始知十二年來負此大罪荷恩不問今松山錦州旣克正臣心可白之日逃去二人未曾在臣家如他處察獲亦可嚴鞫實情上慰答之順治元年隨征山西取太原府尋隨豫親王多鐸征江南取揚州江陰三年五月敍功予騎都尉世職七月授湖廣提督初流賊張獻忠裨將王光恩降明爲鄖陽總兵大兵定湖北光恩投誠卽以原官留鎮至是以鄖襄道李之綱劾其結連土賊陳蛟恣行貪暴事逮問其弟光泰遂叛自稱明鎮武伯偕弟昌糾黨掠襄陽四年五月殺荆南道甘文奎守道劉開文襄陽知楊擴推



官李實發襄陽知縣潘朝佐副將楊文富參將漆向友都司袁捷劫倉庫縱獄囚返踞鄖陽殺知府董有聲同知劉璇張有芳推官孫揚聲鄖陽縣知縣趙承禎竹山知縣童士勤保康知縣薛溥典史雷之縉勢益猖獗結陝西叛鎮賀珍武大定等爲援定遼在武昌聞變率兵援鄖陽遇賊安陽口力戰賊追至河灣定遼且濟且戰中流矢馬蹶沒於河遊擊李顯功趨援不及並爲賊害總督羅繡錦巡按曹協卜先後疏聞自文奎至顯功十七人贈廕有差定遼贈左都督賜祭葬如例晉世職三等輕車都尉以其兄之子登高襲雍正三年定遼及奎等入祀昭忠祠

### 孔有德

孔有德遼東人初與耿仲明爲明總兵毛文龍部校文龍善遇之及文龍爲督師袁崇煥所殺副將陳繼代領部衆有德謂不足共事偕仲明走登州巡撫孫元化官遼久謂遼人可用奏授步兵左營參將大兵圍大凌河急元化令騎八百赴援行數日兵乏食肆掠村堡有德繩以法兵益譁小校李應元參將李九成之子也九成爲元化齎金市馬耗其金懼誅遇應元於吳橋欲倡叛有德與合謀還掠陵縣臨邑商河齊東德平青城新城遂趨登州圍之約仲明及都司陳光福內應城

破以元化素有恩勿殺釋之去收遼人三千餘會旅順副將陳有時廣陸島副將毛承祿亦叛明來合兵勢益壯衆推有德爲王有德曰今方起事何敢遽膺王號衆強之乃自稱都元帥鑄印登壇署官屬九成爲副元帥仲明有時承祿光福爲總兵官應元爲副將四出攻掠明以保定天津昌平諸鎮兵會剿逾年弗能制議用遼人之在寧遠者使總兵祖大弼吳襄督之圍登州九成有時出戰死有德慮不支遣部將來我朝納款集戰艦突圍出泛海過旅順口明總兵黃龍以水師截擊應元死於陣承祿光福被擒朝鮮兵復邀之於鴨綠江天聰七年四月命諸貝勒統兵駐岸受降明兵及朝鮮兵不及追有德偕仲明攜人衆輜重來歸給田宅於遼陽六月召赴盛京上帥諸貝勒出盛德門十里至渾河岸行抱見禮親酌金卮勞之賜敕印授都元帥尋隨貝勒岳託證明旅順破其城黃龍自刎死有德收遼人數百自屬及還有德墜馬傷手留遼陽詔慰之曰都元帥遠道從戎良亦勞苦行間一切事宜實獲朕心至於贊襄招撫尤大有裨益不謂勞頓之身又遭銜蹶之失適聞痊可大慰朕懷又傳諭曰卿所攜紅衣大礮已運至通遠堡矣卽付卿令軍士時時演習八年正月御殿命與八貝勒同列第一班行禮遣官爲營第

宅有德疏辭曰臣自歸附以來蒙恩賜資服物田宅已極周渥今更勞睿慮爲臣治室宇臣心實切不安惟願皇上勉圖進取俾中原底定民庶康寧斯時以華屋賜臣臣乃受之無愧也奉旨進取之事難以預料惟仰賴上天之垂祐耳若得如所言天下底定更有酬庸之典今爲營第宅聊示優異其勿辭三月詔定有德軍營纛旗之制以白鑲皂別於滿州及舊漢軍號天祐兵四月因有德於朝臣往來遼陽者悉躬迎款宴諭止之並令禮部凡有德遣使詣盛京給館餼八月從上征明由大同入邊擊敗敵騎於代州城西俘斬甚衆九年有德以新附人民日衆偕仲明輸糧助餉上以歸附人民糧已足用卻之崇德元年四月封恭順王十二月獲大礮及輜重從上征朝鮮敗其援兵二年隨武英郡王阿濟格攻克皮島賜蟒服銀幣先是旅順之役諸貝勒疏言有德仲明所屬將士當投誠時爭占官廩及富家宅藉稱戚屬多取俘獲人戶上以來歸未久置勿問至是復有言其部衆違法妄行者諭令申嚴約束毋蹈故轍三年上征明錦州有德偕仲明及智順王尙可喜都統石廷柱馬光遠等以神威將軍礮攻克錦州城西臺戚家石家諸堡又招降大福堡賜所俘獲四年從征松山礮擊毀城堞明守將金國鳳乘夜葺城拒



益力有德議鑿地道攻之明總兵祖大壽自錦州遣蒙古兵三百入城多方防禦不能鑿我兵遂還六年率兵更番圍錦州破明兵於杏山七年賜服物及降戶時漢軍始分八旗有德請以衆部隸漢軍於是隸正紅旗八年從大軍取中後所前屯衛順治元年四月隨諸王貝勒入山海關擊敗流賊李自成追剿至望都十月上御皇極門宴賚之尋以豫親王多鐸爲定國大將軍有德率兵從二年破自成於潼關遂定西安移師下揚州江寧分克江陰縣乃班師賚蟒服良馬黃金百兩白金萬兩命鎮遼陽操兵馬俟調遣三年授平南大將軍征湖南並可喜受節制初自成棄西安走襄陽武昌竄死九宮山其黨李錦高必正郝搖旗王進才閻養成牛有勇袁宗第劉體純等衆數十萬走長沙常德爲明巡撫何騰蛟招降請於桂王朱由榔授總兵與舊將黃朝宣楊國棟李茂功黃晉吳興蕭曠姚有性張光璧劉承允董英曹志建分據湖南由榔以武岡爲奉天府自桂林徙居之有德至岳州進兵長沙擊走進才殲其衆下湘潭敗朝宣兵克衡州斬朝宣及其四子取祁陽進克寶慶斬茂功晉興及步騎萬餘遂薄武岡由榔與騰蛟走桂林承允英降光璧集沅州萬餘衆拒戰副都統藍拜等破之取沅州分兵克靖州斬曠有性

五年克辰州湖南諸郡邑底定進平廣西全州並招降興安灌陽銅仁苗峒二百餘奉詔班師宴勞賚黑狐紫貂冠服彩帛鞍馬黃金二百兩白金五千兩六年五月賜金冊金印改封定南王命統兵征廣西攜家駐衡州先是有德自湖南班師南昌總兵金聲桓廣東提督李成棟相繼叛湖南郡邑復爲錦搖旗進才宗第等侵據上命鄭親王濟爾哈朗順承郡王勒克德渾統兵討之恢復長沙衡州寶慶諸郡而馬進忠猶據武岡進忠者明季流賊十三家之一自稱混十萬明將左良玉招降之良玉死歸由榔爲總兵至是與其黨曹志建鄭恩受劉祿胡光榮林國瑞黃順祖向文明等寇擾靖州永州郴州窺寶慶十月有德至衡州遣副將董英何進勝斬恩受於燕子窩自督兵永州擊走賊衆數萬俘斬過半七年正月攻武岡陣擒祿光榮等進忠負創遠竄武岡靖州俱復志建踞龍虎關有德移兵永州分布攻圍大破之擒國瑞順祖於興寧文明率衆五萬降捷聞得旨嘉獎十二月有德拔桂林由榔先遁擒斬其王侯官屬四百餘桂林平樂二府底定八年正月有德奏移藩屬駐桂林尋遣總兵馬蛟麟等進克郴州梧州二府象州馬平雒容柳城融縣懷遠蒼梧藤縣容縣岑溪懷集北流諸縣悉平復遣總兵線國安馬雄

全節分三路進取有德赴廣州廉州策應恢闢思恩南寧慶遠諸郡九年四月有德疏言臣荷先帝節錄微勞錫以王爵恭遇聖主當陽正四海永清之日南粵東西八閩尙未全歸版圖臣謬辱廷推駐防閩海同時有固辭粵西之役者蓋因其地最荒僻民少山多百蠻雜處諸孽環集底定難驟期也臣自念受恩至渥必遠關巖疆始敢伸首邱夙願故毅然以粵西爲請受命以來道過湖南伏莽猶蔓延六郡拮据一載咸與埽除乃進征粵西仰藉威靈所向克捷賊黨或竄或降雖土司猺獠狼獾古稱叛順靡常者亦漸次招徠受我戎索粵西業已底定臣生長北方與南荒煙瘴不習每解衣自視刀箭癢痕宛如刻劃風雨之夕骨痛痰湧一昏幾絕臣年邁子幼乞聖恩垂鑒卽敕能臣受代俾臣得早覲天顏優游綠野疏入奉旨覽王奏悉知功苦但南疆未盡寧謐還須少留以俟大康先是有德以黔賊孫可望附桂王窺伺楚粵請敕剿撫將軍續順公沈永忠撥重兵駐防沅州以扼楚粵門戶復令線國安全節馬雄分守南寧慶遠梧州未幾桂王將李定國白文選陷沅州靖州武岡永忠自寶慶告急有德遣兵赴援至全州永忠已棄寶慶退湘潭七月定國由間道逼桂林時城中守兵無多賊晝夜環攻有德登城禦爲矢



中額仍指揮擊賊及聞城北山嶺已爲賊踞令家衆舉火焚室曰城亡與亡大義也遂自縊事聞上震悼謚武壯大兵復桂林女四貞以櫬歸京師賜祭葬立碑墓道給四貞白金萬兩並視郡主食俸復諭禮部曰定南武壯王孔有德航海來歸屢建功績迨朕平定天下有德剿巨寇靖南服開闢廣西勤勞懋著不意桂林之役衆寡不敵精忠自矢竟以身殉義烈允彰應立祠致祭於是部議立祠春秋致祭以其妻白氏李氏陪祀皆殉節桂林者也一子名廷訓當桂林陷時爲定國掠去十六年大兵定雲南隨征總兵李茹春舊爲有德護衛訪知廷訓於十五年十二月爲定國所殺乃收其骸骨乞歸葬奉旨定南王子久陷滇中尙冀大兵克取來京有日據奏慘遭逆害深可憫惻下部議卹特予祭葬

### 王鼇永

王鼇永山東臨淄人明天啟五年進士累官鄖陽巡撫崇禎時張獻忠犯興安鼇永防江陵大學士楊嗣昌督師好自用每失機宜鼇永嘗規之不聽遂奏罷鼇永鼇永上書於朝曰嗣昌用兵一年蕩平未奏此非謀慮不長正由操心太甚天下事總挈大綱則易獨用萬目則難況賊情瞬息更變今舉數千里征伐機宜盡出

嗣昌一人文牒往來動踰旬月坐失事機無怪乎經年不戰也臣愚以爲陛下之任嗣昌不必令其與諸將論功罪但責其提衡諸將之功罪嗣昌馭諸將不必人人授以機宜但覈其機宜之當否則嗣昌心有餘閒自能辦賊疏入不報後嗣昌敗授鼇永戶部右侍郎時有主事蔣臣請行鈔法歲造三千萬貫每貫價一兩歲可得銀三千萬兩鼇永贊行之特設內寶鈔局未幾復出爲通州巡撫流賊李自成陷京師鼇永被拷索輸銀乃釋本朝順治元年五月投誠六月睿親王令以戶部侍郎兼工部侍郎銜招撫山東河南鼇永請以井陘道方大猷員外郎張愼學主事胡之彬潘臣等偕往疏言重兵屯集京畿籌餉維艱自畿南山東河南要地有八宜各移兵駐鎮俟秋爽大兵進剿闖賊就近調度可北控潼關南扼武關得旨允行鼇永至德州同都統覺羅巴哈納石廷柱等擊走自成餘黨尋赴濟南遣官分路招撫疏言東省士民願歸附特以盜賊充斥無由達請簡巡撫司道各官以慰僉望又薦明大學士謝陞並得旨如所請尋命方大猷爲山東巡撫巴哈納等移師征陝西鼇永同大猷及登萊巡撫陳錦沂州總兵夏成德膠州副將柯永盛等綏輯山東郡縣剿餘賊八月疏報濟南東昌泰安兗州青州諸屬邑俱歸順

復遣官由廣平大名招降彰德衛輝懷慶開封歸德五府齋明德王朱由弼衡王朱由楸降表以聞是時明福王朱由崧據江南以劉澤清爲東平伯鎮廬州澤清嘗任山東防海總兵其舊部將楊威踞登州萊州自稱前鋒恢剿副總兵肆焚掠鼇永請敕大兵進剿上命副都統和託李率泰討之師未至鼇永先赴青州備芻餉會土賊張輿僞稱總鎮大元帥踞高密作亂永盛率青州駐防兵往剿有趙應元者自成裨將也敗竄長清縣窺青州兵少十月率衆僞降既入城遂肆掠蜂集鼇永官廨縛之鼇永罵賊不屈遂遇害和託等至斬應元事聞得旨王鼇永招撫著勞盡節死難宜予旌卹於是贈戶部尙書賜祭葬如例授其子樛騎都尉世職隸鑲藍旗漢軍後以襲次滿停襲乾隆十五年特予恩騎尉世襲罔替以鼇永四世孫作亮襲

### 王正志

王正志直隸靜海人明崇禎元年進士累官戶部左侍郎本朝順治元年大兵定京師授原官二年五月改兵部右侍郎巡視延綏疏言榆鎮幅輦遼廓素爲賊窟較他鎮傷殘更甚聞標兵二千餘已無存請急撥餉招募部議於西安庫支銀二



萬爲募兵糧餉十二月疏請蠲膚施米脂二縣本年錢糧詔如所請三年正月四  
川降賊賀珍復叛應逆賊孫守法出棧道陝西總督孟喬芳檄榆林總兵王挺帥  
本鎮兵撲剿正志疏言延安土賊劉文炳現聚衆千餘窺伺鎮兵一出恐賊乘隙  
請先令挺殲文炳然後往剿得旨土寇盤踞自當速剿聽相機便宜行事九月疏  
奏綏德州安塞米脂清澗洛川各縣冰雹蝗蝻爲災籲恩蠲卹得旨免本年額賦  
之半十一月疏言延綏鎮東西千二百餘里南北千餘里舊設東西中三協分統  
營堡各有專責自順治二年議裁中協查中路自雙山至清平共堡十舊時保寧  
清平皆參將今俱設守備與守堡各官並無副參遇警統馭無人且各堡與套人  
止隔一邊牆刻須嚴防請仍設中協副將駐波羅堡另募兵千名卽擇地方將領  
熟練者任之以資保障下部議行六年二月大同總兵姜瓖叛正志遣參將王永  
強赴河防堵永強密通賊陷延安榆林等處執正志不屈禁之尋被賊絞死並其  
子王麟巡撫王爾性以聞八年二月特贈都察院右都御史賜祭葬如例

徐一范

徐一范江南高淳人明崇禎二年進士官南京吏部郎中本朝順治元年投誠授

禮部郎中五年九月授大同左衛兵備道將之任聞總兵姜瓖據城叛兼程進趨馬邑欲與從子馬邑縣知縣明弼謀討賊至則賊黨環匝一范以大義諭居民賊怒挺刃交加至死罵不絕口七年六月宣大總督佟養量疏言姜逆倡亂雲鎮時一范殉難可憐請賜卹典以慰忠魂章下所司贈光祿寺少卿廕一子入監讀書八月賜祭一壇乾隆二十九年入祀昭忠祠

### 徐勇

徐勇遼東人初爲明巡撫何騰蛟裨將後隸寧南侯左良玉部下官總兵本朝順治二年英親王阿濟格追流賊李自成下九江勇隨左夢庚迎降王令署九江總兵旋調鎮黃州時土賊黃拐子李縱馬等聚掠九江自成餘黨踞黃州東山四十八寨陰結商城固始諸賊煽亂勇授策副將徐啟仁合九江總兵金世忠擊九江土賊遂率兵剿白雲寨賊首王光淑拒戰勇令諸將東西夾擊而自簡精銳由中路進剿光淑下馬擒之其黨易道三率衆降移師剿斗方寨擒賊首周從勛降其衆並招降劉婆等九十五寨三年正月叛將鄭廉齋明唐王朱聿鍵及騰蛟書招勇勇執斬以聞五月僞總兵歐應衢周文江寇黃安麻城勇率兵援至塔子山擊

敗之追擒文江復與總兵祖可法張應祥會剿降鄒墩大佛等三十二寨應衢授首命勇以署總兵鎮長沙五年正月叛鎮金聲桓據南昌使約勇應援勇斬之五月加都督僉事銜實授長沙總兵十月安仁耒陽賊犯攸縣勇遣參將李如龍擊之擒僞總兵謝如香等斬級三千餘自成餘黨一隻虎降於騰蛟糾衆窺長沙勇沿江列礮擊沈賊舟稍退復來犯勇方督戰中流矢仆復甦裹創戰愈奮我兵以礮擊賊斃其渠三人日暮收兵令將士銜枚守城賊潛薄城下甫樹梯礮矢齊發乃卻走賊復掘濠穿城丈餘幾墮勇令增築木城守禦益固別鑿地道掩殺賊千餘造懸樓十餘飛矢以斷賊往來密遣兵駕輕舟布列江濱賊遂驚潰會騰蛟亦遣將分襲永州寶慶衡州諸郡勇疏言長沙東西受敵臣以兵三千當賊數萬卽嬰城固守尙虞不足請速益兵數千以資攻戰旣而一隻虎復集衆寇長沙都統佟圖賴率兵赴援一隻虎遁去六年正月勇遣人迎鄭親王濟爾哈朗軍赴長沙會剿擒騰蛟於湘潭五月加都督同知銜調辰常總兵駐辰州復疏言辰常界連黔粵苗徭雜處賊寇出沒不常前賴親王奮揚威武騰蛟就擒而一隻虎尙漏網今親王旣奏班師都統佟圖賴兵亦北調賊黨牛萬才馬進忠王進才等猖獗無



忌蓋賊畏禁旅而不畏南兵請敕發八旗兵剿賊湖南疏下所司議行八年五月  
敘功授一等輕車都尉兼一雲騎尉九年六月流賊張獻忠餘黨孫可望附明桂  
王遣黨掠沅州靖州武岡寶慶突陷桂林定南王孔有德死之楚粵騷動九月桂  
王由荊州與僞侯張光翠總兵張景春窺辰州屯荔溪距城四十里勇督將士渡  
江戰約曰成敗利鈍在此一舉倘有不測勿復渡此江於是參將張鵬遊擊吳光  
鼎等奮勇殺賊陣斬景春及其衆數百生擒其將王忠闇之美姜祚昌吳起順馬  
佩曹運期等捷聞諭曰爾屢奏拒斬賊使多有擒獲同道府縣將領各官誓死固  
守忠壯可嘉昨覽奏以孤軍迎擊巨寇殲戮無算生擒僞官及賊衆甚多獲僞印  
僞箭並器械馬匹朕心嘉悅已諭部從優議敘爾宜益奮忠勇誅渠殲黨保固疆  
圉以膺殊恩十月加左都督銜晉爵三等男賜冠服弓矢鞍馬是時敬謹親王尼  
堪奉詔率禁旅剿可望未至可望黨分踞寶慶武岡沅州四出攻掠勇以兵三千  
守辰州聲援絕餉且匱可望屢遺書誘降勇輒斬其使十一月桂王將軍白文選  
糾衆五萬來犯勇方督戰北門城樓文選列象陣突陷東門勇率數騎巷戰中創  
墮馬復手刃數人遂遇害既死猶握刀不釋或斷其手以去妻曹氏子祚泰及親

屬遇害者三十九人十一年八月經略大學士洪承疇疏陳其事得旨徐勇屢著戰功忠節殉難闔門受害深可憫惻下所司議優卹贈太子太保晉爵二等男賜祭葬諡忠節建祠江夏以其兄之子自貴襲爵入籍武昌衛乾隆三十二年上念國初以來綠旗官弁致命疆場折衝闔外者甚多命核實具列以聞於世職襲次滿時照入旗之例賞給恩騎尉世襲罔替徐勇與焉

### 郝效忠

郝效忠遼東人明副將隸左良玉部下本朝順治二年英親王阿濟格追流賊李自成至九江效忠隨左夢庚迎降王令署原官與同降總兵惠登相入山搜剿招撫僞都督王復遠萬餘人隨大軍進取湖南復武陵縣尋隨總督佟養和鎮武昌英親王班師隨入京隸漢軍正白旗五年充湖南右路總兵加都督僉事尋殺投誠功命授三等輕車都尉世職七年孫可望糾滇黔賊衆肆擾效忠遣參將馬如松擊敗之於托口擒僞總兵李應元等八年可望等陷沅州效忠遣守備吳進功等堵剿復親率兵進克黎平屯四衛所可望窺我兵少突來犯效忠力戰馬蹶被執不屈遂遇害事聞詔贈都督同知雍正七年命入祀昭忠祠子爾德襲世職

馬得功

馬得功遼東人明總兵本朝順治二年豫親王多鐸下江南明福王朱由崧遁蕪湖護軍統領圖賴邀其去路得功同總兵田雄縛福王及其妃來獻王令以原銜從征尋授鎮江總兵隸漢軍鑲黃旗時江寧初定明瑞昌王朱誼泐潛據城外花山龍潭一帶糾衆散筈三年九月與其經略韋爾韜總兵楊三貫王朗生謝宏之姜雲甫等謀犯江寧事洩遁鎮江得功追獲誼泐於王巷爾韜等均就擒斬之十一月以濫收劫賊姚翼庭入伍降一級調用四年五月大學士洪承疇奏請得功署副將赴閩防禦八月隨浙閩總督張存仁剿建寧邵武山賊復松溪政和建陽崇安光澤等縣駐防松溪十一月明魯王朱以海巡撫劉中藻陷慶元縣得功同副將李榮援剿復其城六年正月復永春縣擒魯王總師兵部顏昌儒提督鄭瑛總兵鄭岳等平三百餘寨進取虎豹關復德化縣平建寧府五月授右路總兵加都督僉事十二月復南安縣擒魯王將陳已斬之陳奇竄入海時有逆首林忠結寨於雙坑等處奇帥海賊援之七年五月得功擊斬奇忠遁九月海賊鄭丹國據興化仙游惠安等處得功擒丹國並其黨趙子章俘斬無算八年巡撫張學聖乘



海賊鄭成功他出令得功取廈門賊巢賊奔回復奪廈門乘勢圍漳州破海澄得功敗退守泉州九年同都統金礪解漳州圍尋以得功前克廈門貪取財物致敗命拿交刑部鞠實坐失守汛地罪援赦免十一年三月敘前功賜一品頂戴八月出鎮泉州得功自陳功冊三十餘次且與田雄同投誠今雄已授一等子懇求世襲下部議授一等子爵加都督同知十三年二月擢福建提督七月林忠復據永春德化尤溪大田等處巡撫宜永貴令得功赴山進剿閱十餘日甫抵賊寨聞海賊乘虛破閩安鎮圍省城甚急得功星馳與城內兵夾攻圍解時賊已分兵陷連江縣得功乘勝進剿敗分圍羅源之賊復連江賊退據閩安十四年同浙閩總督李率泰等攻克之十五年四月成功統賊衆近泉州登岸得功整兵衝殺賊遁乘潮北犯六月得功疏言賊出沒無常今連艘北犯勢必近寇温台遠及浙西巢穴在閩定屬空虛宜上擊白沙下略汭洲分其北逞之勢七月克白沙以捷聞十六年二月賊將黃昌統大艦百餘來犯洛陽內港據長橋得功奪橋敗其衆賊於廈門集礮臺拒敵復敗之賊黨黃邑卿率衆據湄州犯峯尾得功擒之十七年以病乞代上慰留之十八年三月晉爵三等侯剿平泉州諸賊林順沈彩王貴等六月

土寇楊意嘯聚同安要截行旅密令營兵改裝匿械誘斬意七月逆賊余思始張  
普等連海賊犯南安調參將王承印撲剿至彭溪斬僞先鋒李鵬降張普等康熙  
元年遷濱海居民於內地擊敗阻遷海賊二年大兵進剿廈門金門得功攻克烏  
沙追賊出洋南風陡發賊乘上流來戰得功奮勇衝殺歿於陣總督李率泰以聞  
得旨優卹賜葬地四年恩賜一等侯諡襄武雍正七年入祀昭忠祠子三奇襲爵

### 李永芳

李永芳遼東鐵嶺人明萬曆四十一年官遊擊守撫順所時葉赫貝勒錦台什布  
楊遣蒙古人愬於明曰哈達輝發烏拉三國滿洲已盡取之今復侵我其意卽欲  
侵明矣明於是令遊擊馬時楠周大岐率練習火器者千人爲葉赫守東西城且  
遣使詣我朝言毋相侵當修好罷兵太祖高皇帝以書與明曰昔葉赫哈達烏拉  
輝發科爾沁錫伯卦勒察珠舍哩訥殷九姓之國於癸巳歲合兵侵我我是以興  
師禦之天厭其辜我師大捷斬葉赫貝勒布齊擒烏拉貝勒布占泰仍遣之歸國  
逮丁酉歲刑馬歃血以盟通婚媾無忘舊好詎意葉赫渝棄前盟將已字之女悔  
而不予至布占泰吾所恩育者反以德爲仇故伐之而殲其兵取其國今布占泰

逃奔葉赫此吾所以征討葉赫也與明國何嫌何怨而乃欲相侵耶既作書遂親往撫順所永芳出城三里外迎導入教場太祖以書予之乃返未幾明總兵張承廕立碑於我屯田界內之柴河三岔撫按不容刈穫巡撫李維翰又執我使臣剛古里方吉納等脅償越界採瀆受戮之人四月本朝天命三年是爲明萬曆四十六年太祖書七大恨告天始興師征明以書諭永芳曰爾明發兵疆外衛助葉赫我乃興師而來汝撫順所一遊擊耳縱戰亦必不勝今諭汝降者汝降則我兵卽日深入汝不降是汝誤我深入之期也汝素多才智識時務人也我國廣攬人才稍堪驅策者猶將舉而用之結爲婚媾況如汝者有不更加優寵與我一等大臣並列耶汝降俾汝職守如故恩養汝汝若戰則我之矢豈能識汝也必衆矢交集而死旣無力制勝死何益哉且汝出城降則我兵不入城汝之士卒皆得安全若我兵入城則男婦老幼必致驚潰亦大不利於汝勿謂朕虛聲恐喝而不信也汝思區區一城吾不能下何用興師爲失此弗圖悔無及也其城中大小官吏兵民等獻城來降者保其父母妻子以及親族俱無離散豈不甚善降不降汝熟計之毋不忍一時之忿違朕言致債事失機也永芳奉諭知大兵至冠帶立城南門上



令軍士備守具不移時大兵樹雲梯登城守陴者驚潰永芳遂乘騎出降我管旗大臣阿登引之謁上命收降城中人及東州馬根單二城臺堡塞五百餘守備王命印不降就戮張承蔭自廣寧同遼陽副將頗廷相海州參將蒲世芳遊擊梁汝貴等率兵萬赴援皆歿於陣上命毀撫順城編降民千戶遷之興京仍如明制設大小官屬授永芳副總兵轄降衆以上第七子貝勒阿巴泰女妻之是年七月從上征明招清河副將鄒儲賢降儲賢不從同參將張旆率兵萬人戰死城遂拔四年上統師取明鐵嶺城六年取瀋陽遼陽永芳俱從征有功擢總兵官明巡撫王化貞及邊將累遣諜來誘永芳執其人并書以聞上嘉獎賜敕免死三次天聰元年因明將毛文龍結朝鮮踞海島命貝勒阿敏濟爾哈朗內大臣揚古利納穆泰等與永芳率師征朝鮮諭以朝鮮理宜聲討然非必欲取之凡事相機度義而行於是先攻克朝鮮義州分兵征鐵山擊走毛文龍進克朝鮮定州安州俘斬無算師次平壤城其官民皆遁遂渡大同江朝鮮王李倬遣使齎書來迎諸貝勒得書歷數其不恭之罪許以遣親信大臣謝罪誓盟卽班師師次黃州李倬遣人馳告卽有親信大臣來盟貝勒阿敏仍欲進攻永芳言於諸貝勒曰我等奉上命秉義

而行前與朝鮮書已言若遣親信大臣謝罪誓盟班師今若背前言不義盍暫駐於此待之諸貝勒皆是其言獨阿敏怒叱永芳曰爾蠻奴何得多言我豈不能殺爾耶遂進次平山李倬所遣親信大臣及其弟原昌君李覺至阿敏謂諸貝勒曰吾常慕明朝皇帝及朝鮮王所居城郭宮殿無因得見今既近朝鮮國都豈可不至而歸當前往爲久居計耳貝勒岳托濟爾哈朗阿濟格杜度皆以爲不可卒如永芳前議遣副將劉興祚等往盟而還八年五月分別諸臣功次以永芳歸誠最先予三等子爵世襲罔替是年卒子九人隸正藍旗漢軍均授官次子率泰官至大學士總督第三子剛阿泰官至總兵第五子巴顏襲世爵官至都統別有傳

### 孟喬芳

孟喬芳永平人明副將罷職家居本朝天聰四年大兵克永平喬芳降詣御營朝見上以金卮酌酒賜之令以原官領降兵隨諸貝勒駐永平遣人往陽和偵探明總兵祖大壽亦遣人至喬芳所偵我兵多寡喬芳縛以獻尋隨大軍歸遼陽隸漢軍管佐領事五年授刑部承政予二等輕車都尉世職崇德三年更定官制改刑部左參政四年兼正紅鑲紅兩旗漢軍副都統七年隨大兵圍明錦州同都統金

礪等克塔山城是年分漢軍八旗喬芳改鑲紅旗副都統後遂爲漢軍鑲紅旗人  
八年有以貝勒羅洛渾家人奪金事訴者喬芳置弗理坐瞻徇降世職一等十月  
隨大兵征明攻前屯衛中後所二城並克之敘功加一雲騎尉順治元年從大軍  
入關二年四月授陝西總督長安妖民胡守龍等造僞印倡亂喬芳遣副將陳德  
擒斬之閏六月疏言秦省沿明陋習各官莅政俱有鋪設繁費累百姓請嚴禁詔  
如所請時流賊張獻忠尙據四川喬芳請於興安駐重兵漢中增設巡撫以扼其  
衝疏下部議行三年寧夏兵變殺巡撫焦安民喬芳授計總兵劉芳名斬首惡王  
元馬德別遣副將任珍陳德王平等剿賊賀珍劉二虎胡向宸於興安挫賊衆追  
斬向宸敗孫守法於椒溝降平天青嘴諸寨復遣副將張勇劉友元擒賊賀宏器  
於安家川五年四月流賊一朵雲馬上飛等犯西鄉縣喬芳遣任珍會漢羌總兵  
馳剿斬僞監軍許不惑及賊衆千餘生擒一朵雲馬上飛尋河西逆回米喇印丁  
國棟作亂渡河而東連陷郡邑薄鞏昌喬芳率兵駐秦州遣副將馬寧援鞏昌合  
副將趙光瑞軍與賊大戰於廣武坡逐北七十里遂解鞏昌圍時賊據內官營及  
岷洮河三州衆數萬喬芳遣軍三路進張勇敗賊於馬韓山光瑞敗賊於梅嶺擒



偽將丁光射等直抵內官營岷洮河三州皆復逆回退踞蘭州喬芳與侍郎額色督兵攻下之喇印國棟皆受撫逾兩月復踞甘州叛甘肅巡撫張文衡西寧道林維造參議張鵬翼總兵劉良臣副將毛鑛潘雲鵬等俱遇害喬芳自蘭州渡河馳赴甘州與提督傅喀禪協領羅畢大總兵齊陞等四面合攻不下深溝堅壘以困之賊食盡援絕乃宵遁喬芳遣兵馳剿斬喇印於水泉國棟復與纏頭賊土倫泰等踞肅州出掠武威張掖酒泉地喬芳遣張勇馬寧等攻破肅州擒倫泰國棟誅之六年八月大同叛鎮姜瓖黨虞允韓昭宣等糾衆三十萬陷蒲州及臨晉猗氏等縣喬芳同額色奉命赴山西會剿自潼關渡趨蒲州殲賊略盡遂進兵臨晉猗氏斬偽帥白璋擒偽監軍道衛登方復遣協領根特參領都敏副將狄應魁趙光瑞等分剿敗賊斬虞允韓昭宣猗氏解州榮河等城俱復乃還十二月興安賊何可亮踞箭峪階峪出入剽掠喬芳遣任珍剿平之七年遣趙光瑞等剿賊於合水縣斬賊渠劉宏才擒其偽軍師苗惠民八年遣遊擊陳明順敗賊何柴山於商州雒南縣時賊渠孫守全糾川湖諸孽踞紫陽山寨喬芳先令遊擊仰九明偵防復遣光瑞往會興安鎮兵合剿擒斬偽將軍翹興寧趙定國謝天奇等埽其巢九年

八月入覲加太子太保詔馳驛還西安先是敍平回賊功加兵部尙書銜晉世職爲一等輕車都尉至是兩遇恩詔晉三等男十年二月命兼督四川兵馬錢糧疏請以重兵鎮守保寧漢中分步兵五千興屯廣元昭化之間俾兵食有賴又請於陝西四鎮分步兵二千給帑備牛種墾荒田下部議行五月疏言大軍進取全蜀宜隨在留兵駐防以樹干城而謀生聚至進征之兵請每名給馬三四件丁一攜甲仗以利攸往得旨悉心籌畫具見爲國忠誠深可嘉悅十月西寧孫家寨回民謀不軌喬芳遣狄應魁馳剿擒賊渠祁敖牙固子等餘黨悉平十一月引疾乞休詔以原官加少保馳驛回京十一月卒遣內大臣奠茶酒加贈太保賜其家白金千兩第宅一區予賜祭葬如例諡忠毅雍正十年詔入賢良祠子熊弼襲世職

### 張存仁

張存仁遼陽人明寧遠副將守大凌河本朝天聰五年隨總兵祖大壽等來降召見仍授副將崇德元年擢都察院承政尋授一等男世職三年更定官制改都察院右參政四年分漢軍四旗存仁隸漢軍鑲藍旗五年正月疏請屯兵廣寧扼寧遠錦州門戶先是大壽降請歸錦州爲內應縱之去旣而我師次錦州大壽仍拒

戰四月存仁疏言臣覩今日情勢圍困錦州實爲上策但略地易以得利圍城難以見功必積日持久截彼偵探禁我逃亡自有可乘之機兵以全城爲上蓋貴得人得地不貴空城也我師壓境彼必棄錦歸寧再急必棄寧歸關今祖大壽背恩失信人皆以爲無顏再降臣知其本無定見一當危急束身歸命矣況彼所恃者蒙古耳今蒙古多慕聖化來歸彼必疑而防之防之嚴則思離離則思變伏願以屯糧爲務布諭蒙古多爲間諜再以所擒土人縱之招撫未有不相率來降歸者此攻心之策得人得地之術也十二月又言兵事有時有形有勢三者變化無定而用之在人松山杏山塔山乃錦州之羽翼寧遠之咽喉也取其一城則羽翼削而咽喉塞矣六年大軍屢敗明兵於松山杏山間存仁復疏請相機度勢速行攻取悉採納之七年疏言今松錦旣破明督臣洪承疇就擒鎮臣祖大壽歸降凡明之將帥孰不惶懼惟總兵吳三桂尙在觀望宜頒御筭於寧遠城中詳示逆者必殺順者必生有不動其心者乎上旋頒諭三桂及守寧遠諸將存仁亦遵旨遺三桂書言明氣運已衰救錦圍而松杏受困守一城而三城俱失重臣大帥就俘投誠將軍係祖氏甥欲逃罪而責無可諉欲明心而蹤有可疑大廈將傾一木難支



縱苟延歲月迨智竭力窮終蹈舅氏故轍何若未因先降勳名俱重幸速爲裁審  
是年編漢軍四旗爲八旗授存仁鑲藍旗副都統八年隨鄭親王濟爾哈朗取前  
屯衛中後所二城敍功加雲騎尉順治元年大軍定京師命同都統葉臣招撫山  
西攻太原拔其城又隨豫親王多鐸征河南江南二年六月大軍下浙江存仁隨  
至杭州遂管浙江總督事城中居民逃避幾空存仁集紳士慰諭撫綏民復其所  
七月疏言近有因薙髮思反順爲逆者若俟形迹顯著必勞大兵剿捕莫若速遣  
提學開科取士免積逋減額賦則讀書者可希仕進而逆志自消力農者不苦追  
呼而亂萌自戢得旨開科以取士薄歛以勸農誠安民急務歸順各省準照恩詔  
事例一體遵行十一月授浙江福建總督是時明魯王朱以海稱監國於紹興令  
方國安鎮嚴州福王閣部馬士英率兵依之屢窺杭州嘗擁兵渡錢塘江距城十  
里立五營存仁同總兵官田雄等進擊斬五百餘級後士英偕國安復來犯存仁  
同副都統濟寧哈等奮擊敗之溺江死者無算又昌化賊聚衆抗逆推姚志倬爲  
首結國安據城爲患三年存仁遣副將張杰等進剿志倬敗走昌化復平會端重  
親王博洛統師進證明魯王遁國安士英就擒伏誅浙閩漸以底定十一月存仁

疏言錢塘要地宜設水師五千以備海寇下所司議行是年敘功晉三等子四年海寇周鶴芝據福州鎮東衛遣副將滿進忠等攻下其城賊黨岑本高犯浦城遣副將李繡等擊敗之復遣副將馬成龍等據處州大敗賊衆復景寧雲和龍泉三縣尋疏請解任存仁莅浙後屢以疾乞休至是得旨俞允五年二月因代者未至遣將收復連城順昌將樂三縣擒斬魯王侍郎趙士冕總兵黃鍾靈等六年起授直隸山東河南總督有榆園巨寇爲害大名諸邑存仁平之七年詔督撫按臣考校守令文藝存仁躬莅各郡其居官廉幹者有一二語通曉卽注上考其餘文雖佳亦抑之監司請其故存仁曰文有僞實難欺專以文藝爲短長恐灰能吏心耳是年至九年三遇恩詔晉一等子兼一雲騎尉未幾卒贈太子太保廕一子入監以其孫珽襲爵賜祭葬如例諡忠勤入祀直隸山東河南浙江福建名宦祠

劉武元

劉武元遼東人明遊擊守大凌河本朝天聰五年隨總兵祖大壽出降命至盛京贍養之崇德六年授刑部參政七年分漢軍八旗武元隸鑲紅旗漢軍順治元年改任參領予三等輕車都尉世職二年授天津兵備道三年擢南贛巡撫四年武



元遣副將劉伯祿徐啟仁等分剿瑞金石城興國龍安上饒等縣土賊擒斬僞都督葉南枝僞軍門劉志諭劉飛等翦平魚骨蓮花丁田鈎刀嘴諸寨五年正月江西總兵金聲桓副將王得仁據南昌叛糾黨犯贛州武元率諸將守城閏三月糧盡鼓勵士卒奮戰得仁中創遁聲桓聞大軍已復九江謀退保南昌武元出奇兵襲其後敗之太湖港斬獲無算時廣東總兵李成棟亦叛自惠州陷南雄以廣東郡邑附明桂王朱由榔結洞蠻土賊號百萬於十月朔犯贛州武元授計諸將乘賊方鑿壕分兵東西南三門出戰大破賊成棟以數騎走事聞得旨嘉獎加銜右都御史兼兵部侍郎賜紫貂冠服甲冑佩刀鞍馬六年征南大將軍譚泰旣克南昌遣副都統覺善等會武元剿成棟克信豐成棟宵遁墮河死武元分遣副將徐啟仁參將鮑虎遊擊左雲龍等剿成棟餘黨於瑞金雩都崇義等縣進征梅嶺破賊木城五擒僞總兵劉治國七年平南王尙可喜奉命由南安進征廣東武元遣副將栗養志以兵會克復南雄韶州二府先是金聲桓倡叛土賊彭順慶踞寧都僞稱軍門窺伺郡邑及武元遣將往撫順慶負固不下至是遣副將高進庫遊擊楊繼洪起元等攻克寧都斬順慶流賊羅榮自明季倡亂楚粵間號閻王總至是



猶聚衆數萬踞大庾縣之雲山結寨二十餘僞稱五軍都督劫掠上饒崇義南康信豐龍南諸境武元遣副將楊遇明劉伯祿賈熊董大用等分布伏兵截其去路乃合兵擣賊巢斬榮及僞官百餘其脅從皆就撫敘功加太子太保兵部尙書三遇恩詔晉世職爲一等輕車都尉加一雲騎尉十年以疾乞罷者再諭獎其撫贛多年勞績茂著命還京調治十一年卒贈少保廕一子入監賜祭葬如例諡明靖長子瀆襲世職康熙三年瀆疏述父武元於賊犯贛州時率衆禦戰保全危城未邀優敘詔下部議予騎都尉合現襲之職爲二等男仍以瀆襲後官至副都統次子誥康熙十三年於桂林殉節

祖可法

祖可法遼東人總兵祖大壽養子初爲明副將崇禎三年隨大壽復灤州四年隨大壽築城大凌河未訖工太宗文皇帝統師圍之城中食盡大壽欲降令可法冒親子遣遊擊韓棟送我軍爲質與貝勒濟爾哈朗岳託等相見諸貝勒詢以死守空城何意可法曰恐屠戮降民是以人皆畏縮上於貧困者賑給衣食富饒者秋毫無擾寬仁愛民之德遠近聞之然我國人猶不信也諸貝勒與語畢仍令入城

明日隨大壽暨副將劉天祿張存仁祖澤潤祖澤洪韓大勳等率衆來降命大壽仍還錦州可法偕諸降將隨諸貝勒赴盛京諸貝勒更番日給供饌五日一大宴以客禮優待之是爲本朝五年十一月也明年五月從征明歸化城敍錄大凌河降將予爵一等男與存仁並爲都察院承政大勳爲戶部承政三年大勳爲其家人首告盜取庫貯金銀等物下法司鞠實論死上命追贓入官革職免死可法同存仁疏言大凌河官員困阨已極蒙上矜全撫養賜以宅舍田園豐且足矣妻妾奴僕衆且多矣輕裘肥馬榮且貴矣乃大勳縱情聲色妄費不貲致盜用庫銀上念恩養日久所費巨萬今所盜爲數甚微未忍遽誅然恐開新人爲盜之門乞敕正典刑以警將來並諭戶部速立文簿分晰舊管新收開除現在四柱之數年終再令公明官員稽察庶倉庫無侵剋弊疏入命部如所奏行大勳仍免死是年七月更定官制可法同存仁並改都察院右參政六年上以睿親王多爾袞肅親王豪格貝勒阿巴泰等圍錦州離城遠駐縱敵出運糧草下部議罪降罰有差命停其辦事不令人朝可法同存仁疏言上智勇天錫算無遺策兵戈所指卽見成功前者諸王貝勒大臣領兵疏略退步安營使敵得暇大失機宜今俱已知罪愧悔

交集臣等伏思明關外各城下在旦夕正我軍奮力之時諸王貝勒大臣既蒙恩宥自必黽勉立功以贖前愆況大勳在邇宜與大小臣工朝夕議論以期有成不當隔越弗見望上開宥過之仁容覲天顏俾得力圖報效疏入上從之七年四月遵旨遺明總兵吳三桂書云茲者松山錦州已下天運人心悉歸新主有識者宜熟爲審處及早投誠則分茅裂土超出尋常毋至勢窮力竭搖尾乞憐也六月分設漢軍八旗授可法正黃旗副都統後遂爲正黃旗人初上屢遺書與明議和可法疏言講和之策利於彼而不利於我彼惜名之君在上懼殺之臣在下口雖和而心則否倘乘此時募訓練修防禦多出金帛收攬蒙古十數年間牢不可破之勢成矣我業已與和無征伐之事將壯士忘其勇猛逸其志氣誰復以甲冑爲樂事方今鐵騎如雲加以蒙古之衆取天下有餘力或慮明地廣民衆未能一旦帖服不知勘定中國如理亂絲未得頭緒尺寸難分急切割斷竟成棄物既得頭緒則千尋億丈可經可緯卷舒自由明之百姓甚苦官吏貪酷誅弔民伐罪我軍行不驚擾慎擇寬廉長吏撫綏之則人心莫不向順至進取之計譬之去人一手一足而其人猶生若斷喉刺心則其人立斃明雖大國勢已極弱我軍直搗燕京斷



其通津糧運西山煤路彼勢將立困不能如大凌河之持久此刺心之著也先取山海關則關外諸城可唾手而得此斷喉之著也至是復同都統李國翰疏言錦州松山杏山塔山一時俱爲我有明人心搖動燕京震駭惟當應天時順人事直取燕京控扼山海上曰爾等建議直取燕京朕以爲不可取燕京如伐大樹須先從兩傍斫削今不取關外四城豈能卽克山海耶若取燕京必俟彼精兵已盡國勢日衰然後可圖也八年隨鄭親王濟爾哈朗證明中後所前屯衛克其城敘功加一雲騎尉順治元年四月隨睿親王入山海關擊走流賊李自成五月同張存仁啟於王謂吏兵二部務在得人宜以通達治理者暫攝事務山東山西乃財賦所出急宜招撫從之八月命以右都督充河南衛輝總兵至則削平原武新鄉二縣土賊時李自成黨賊二萬餘劫掠濟原懷慶總兵金玉和戰歿可法赴援力戰賊乃退二年晉左都督充鎮守湖廣總兵駐武昌三年以疾解任還京遇恩詔晉爵三等子十三年卒賜祭葬如例諡順禧子永烈襲爵官至都統

尙可喜

尙可喜遼東人父學禮明東江遊擊戰歿於樓子山崇禎初可喜爲廣鹿島副將

值皮島兵亂總兵黃龍不能制可喜率兵入皮島斬亂者龍鎮島如故及龍以旅順之戰死沈世魁代部校王庭瑞袁安邦等構可喜誣以罪世魁檄可喜赴皮島舟發廣鹿風大作不克進世魁檄愈急可喜心疑偵得其情歎曰吾家世捐軀報國媚嫉者反欲擠之死地耶遂還據廣鹿遣部校盧可用金玉奎赴我朝納款時天聰七年十二月也上遣使齎貂皮賚之八年正月可喜舉兵略定長山石城二邑擒明副將二合衆數千戶攜軍器輜重航海來歸命安輯於海城贍給糗糧牲畜並以我兵征旅順時所獲可喜親黨二十七人與之四月詔至盛京賜敕印授總兵軍營纛旗以皂鑲白號天助兵尋從證明由宣化入邊至代州俘獲甚衆崇德元年四月封智順王十二月從征朝鮮明年朝鮮降可喜乘其戰艦取明皮島斬世魁賚蟒服金銀帶幣有家僮計其私得人戶金帛牲畜法司以奏諭曰此豈王自得必散於衆兵耳其勿訊三年從證明錦州屢攻臺堡更番駐牧遇敵輒敗之七年錦州下賜所俘及降戶可喜奏請以部衆歸隸漢軍於是隸鑲藍旗八年隨鄭親王濟爾哈朗證明取中後所前屯衛順治元年四月隨睿親王多爾袞入山海關擊敗流賊李自成追至望都斬賊將谷可成等十月上御皇極門宴賚之

尋隨英親王阿濟格討流賊出邊趨綏德二年二月英親王駐師米脂時自成兄子錦踞延安可喜議令諸軍分攻旁邑斷賊援應獨簡精兵攻克延安城錦竄遁會豫親王多鐸已破潼關定西安可喜奉詔與英親王追剿自成分兵攻克鄖陽荊州襄陽諸郡降賊將王光恩苗時化等復與英親王合兵下九江聞自成竄死九宮山乃班師賜朝服良馬還鎮海城三年八月同恭順王孔有德懷順王耿仲明征湖南自成之竄死也李錦與其黨郝搖旗王進才等擁衆數十萬走長沙常德降於明桂王朱由榔分據湖南郡邑可喜至岳州擊走搖旗於道州有德仲明分克衡州擊敗錦至長沙擊敗進才復攻取桂陽寶慶武岡諸郡邑湖南底定五年九月凱旋賚黑狐紫貂冠服彩帛鞍馬黃金二百兩白金二千兩六年五月改封平南王賜金冊金印統將士征廣東攜家駐守時廣東尙附由榔可喜至南雄破其城斬守將楊傑等三十餘員兵數千七年正月克韶州府及清遠縣桂王總兵吳六奇等迎降二月師次廣州守者於城外密布礮臺城西樹木城濬河三道通海路泥淖我兵不能攻擊深壕築壘困之值暑雨鬱蒸弓矢解膠久相持招降其紅旗水師總兵梁標相及黨千餘增造戰船別募水師二千參列以供調遣桂



王總督杜永和國公陳邦傅伯馬寶等糾衆萬餘迎戰敗者再復招降其總兵郝尙久黃應傑於潮州惠州分遣將士守其地十月江西諸路兵赴調者踵至可喜令軍士舍騎徒行步泥淖冒矢石奮戰毀其城據城西樓堞以礮擊城西北隅城圯軍士畢登斬守將范承恩及兵民萬餘追剿餘衆至海濱溺死者無算奏捷得旨嘉獎八年遣總兵許爾顯徐成功攻克肇慶羅定高州雷州時流賊張獻忠遺黨孫可望李定國降由榔自貴州雲南侵廣西九年桂林梧州南寧平樂潯州橫州俱爲定國所陷東犯化州吳川可喜遣兵赴援同提督線國安總兵全節以次恢復十一年定國以萬餘衆擾高州雷州廣州薄肇慶可喜統兵至三水縣聞定國圍新會結營山巔設伏沿江要隘自率精銳合靖南將軍朱瑪喇所部禁旅涉險進攻定國弗能抗引衆遁伏兵邀擊之斬殺過半復遣副都統畢力克圖等追剿至橫州所過郡邑悉復十三年賜敕記功歲增藩俸千兩是時粵地皆隸版圖而土賊閒作且遙結海賊鄭成功爲海濱郡邑患十七年僞將軍鄧耀入踞海康可喜發兵剿之耀遁走交趾僞寨長蕭國隆旣降復叛糾其黨洪彪周祥方泰陳期新等分據恩平開平陽春陽江之山寨劫掠廣州肇慶可喜遣兵剿平山寨擒

斬彪祥泰期新及賊衆千餘國隆窮蹙投水死有周玉者番禺蟹戶也黨甚衆其  
繪船數百三帆八棹衝浪若飛玉糾之習水戰助海寇可喜募從征署玉爲遊擊  
十八年議遷沿海居民於內地俾避寇擾大吏令盡撤繪船泊港汊遷其孥於城  
邑玉遂糾黨爲亂自稱恢粵將軍以林輔邦爲軍師所至焚掠殘破順德縣可喜  
發兵剿之斬級二千餘擒玉及輔邦餘黨譚琳高黃明初等竄據東涌海島可喜  
檄水師進剿琳高就擒亂乃定康熙三年碣石衛城敍功復加歲俸千兩四年三月諭曰近聞  
海豐陣斬之殲賊衆數千復碣石衛城敍功復加歲俸千兩四年三月諭曰近聞  
廣東人民爲王屬下兵丁擾害失其生理此皆將領不體王意或倚爲王親戚以  
小民易欺唯圖利己恣行不法之故自今務嚴加約束以副委任十年疏稱有疾  
請令長子之信代理軍事詔如所請十二年三月疏請以兩佐領甲兵及藩屬孤  
寡老幼自隨歸老遼東海城奉旨覽奏具見恭謹能知大體朕心深爲喜悅疏下  
戶兵二部議令率諸子藩屬十五佐領悉移歸十一月逆藩吳三桂反詔停撤藩  
仍留鎮三桂以逆書誘叛可喜執其使以逆書呈奏十三年三月逆藩耿精忠據  
福建反廣西將軍孫延齡亦叛踞桂林可喜獲延齡檄有三藩並變之語上疏言



臣與耿精忠爲婚姻今精忠反不能不踧踖於中惟捐軀矢志竭力保固嶺南以表臣始終之誠又言吳三桂遣賊兵二萬屯黃沙河若與孫延齡兵聯合勢益猖獗請就近移師同臣剿賊諭曰王累朝舊勳性篤忠貞朕心久已洞悉覽奏披瀝悃忱深爲可嘉其益殫心進剿以副倚任命大軍之駐江西者分遣會剿四月潮州總兵劉進忠叛附精忠可喜令次子都統之孝討之疏言臣衆子中惟之孝堪繼臣職至軍機事宜雖衰老尙能指揮調度不致有誤封疆十月諭曰王爲國抒忠厥功懋著當茲軍興之際督提撫鎮以下俱聽王節制文武官員聽選補奏聞一切調遣兵馬及招撫事宜亦聽王酌行十四年正月封可喜平南親王之孝授平南大將軍是時簡親王喇布統師江西因三桂精忠結連爲寇未能以重兵達粵粵東之連州惠州博羅河源長寧龍門增城從化土賊蠢動可喜發兵征剿屢奏捷劉進忠求援於海賊鄭錦遣賊萬餘助之勢猖獗叛鎮祖澤清踞高州引廣西賊衆連陷雷州及德慶開建電白諸邑可喜連章告急詔趣簡親王遣兵速進十五年正月復言臣病日劇臣子之孝出兵潮州恐省城或有不測請遣威望大臣駐鎮疏入諭曰王實心爲國計慮周詳朕與王情同父子誼若手足覽疏未竟



朕心惻然但王駐鎮日久措置咸宜軍民依賴若必遣大臣恐事未週知王可於諸子中擇才略素著者遣赴潮州理軍務大將軍尙之孝回省城侍王左右扞衛封守王其加意調護以慰朕念諭未及至粵三桂驅賊逼肇慶誘之信從逆可喜臥疾弗能制憤甚自縊左右解之甦遂不起十月卒十六年之信歸順迎大軍入粵襲父爵之孝還京敕部議可喜卹典諡敬二十年五月諭廷臣曰尙可喜當闔城皆叛矢志不移臨歿猶被服太宗文皇帝所賜朝衣言死後必葬於海城魂魄有知仍事先帝其忠誠之心始終無二今尙之孝往迎骸骨俟至都門卽以奏聞九月櫬至丁字沽遣內大臣學士侍衛各一員往奠諭曰王素篤忠貞人盡如王天下安得有事朕又念王至老懷誠克殫忠盡殊傷悼之賜白金八千兩葬海城立碑墓道之信尋論罪除爵家屬俱歸旗詔以可喜昔年海城田宅賜其第七子之隆設佐領二以其一爲可喜守墓之隆官至領侍衛內大臣之信之孝各有傳

洪承疇

洪承疇福建南安人明萬曆四十四年進士天啟時任浙江提學道遷布政使參議又遷陝西督糧參政崇禎二年流賊王左掛掠宜川城堡承疇剿之俘斬三百

餘人遁去三年授延綏巡撫王左掛既降復叛承疇誅之尋與總兵杜文煥敗流賊張獻忠於清澗縣四年擢陝西三邊總督五年同總兵曹文詔賀虎臣等剿賊慶陽平涼擊斬賊渠可天飛等降其將白廣恩文詔復蹙賊耀州錐子山賊黨殺獨行狼等以降承疇戮四百人餘皆散遣七年監督河南山陝川湖軍務加太子太保兵部尙書時賊聚陝西至二十餘萬高迎祥最強自稱闖王李自成屬焉蹂躪鞏昌臨洮及隴州承疇檄總兵賀人龍左光先合擊破之賊衆竄陷靈寶汜水滎陽八年承疇出潼關討賊次信陽諸將畢會賊見河南兵盛復分路奔還陝西張獻忠亦掠鳳翔與高迎祥合副將艾萬年柳國鎮戰死文詔請行承疇謂曰非將軍不能滅此賊吾兵已分無可策應將由涇陽趨淳化爲後勁文詔乃自寧州進真寧參將曹變蛟敗賊於湫頭鎮乘勝逐北不及顧文詔遇賊伏轉戰數里聲援絕自刎死承疇方追賊涇陽三原間未至淳化賊勢益熾時有言承疇統轄太廣勢難兼顧者乃以盧象昇總理江北河南山陝川湖軍務督理關外兵而承疇專督關內兵值高迎祥掠武功扶風以西李自成掠富平三原以東承疇率兵躡自成大敗之渭南臨潼別遣將擊迎祥亦敗蹙東走尋爲巡撫孫傳庭擒送京師

營於松山城北屢出兵戰輒敗卻旣而伺我大兵歸營復來犯望見太宗文皇帝張黃蓋親督大兵布陣皆披靡退遁大兵遵上方略度明兵乘夜出犯分路堵截奮擊遂窮追悉殲殪之曹變蛟率步騎犯鑲黃旗汛地者一犯正黃旗汛地者四復夜突御營連敗卻身中創奔還松山王樸吳三桂唐通馬科白廣恩李輔明相繼走大兵由杏山西邊及高橋發伏衝潰自海濱至桑阿爾齊堡又爲分駐大兵掩殺諸總兵僅以身免張若麒匿漁船遁承疇先後喪士卒五萬三千七百餘人太宗文皇帝以敕諭承疇及所屬將士曰朕率師至此料爾援兵聞之定行逃遁遂豫遣兵圍守杏山使不得入自塔山南至於海北至於山及寧遠東之連山一切去路俱遣兵邀截又分兵各路截守爾兵逃竄爲我兵斬殺者積屍遍野投海溺水者不可勝數今爾錦州松山救援兵已絕朕思及此乃天意佑我也爾等宜自爲計如以爲我軍止圍松錦其餘六城未必卽困殊不知時勢至此不惟六城難保卽南北兩京明亦何能復有耶朕昔征朝鮮時圍其王於南漢山朕詔諭云爾降必生全之及朝鮮王降朕踐前言仍令主其國後圍大凌河祖總兵來降亦不殺之爾等所素聞也朕素以誠信待人必不以虛言相誑爾等可自思之九月



承疇謀突圍出悉出城中步騎夜犯鑲黃旗驍騎營正白鑲白兩旗漢軍營敗還傷斃千人十二月聞關內援兵三千赴援將至復出兵六千夜犯正紅旗護軍營正黃旗蒙古營爲矢礮所殪者四百二十人從杏山遁伏發截殺者五百七十餘人敗退城下因門閉不得入投降者三千餘人關內赴援兵竟駐寧遠終不進承疇欲戰則力不支欲守則糧已竭欲遁不敢成隊而出與曹變蛟王廷臣巡撫邱民仰兵備道張斗姚恭王之楨等坐困城中越一月副將夏成德遣人赴大軍通款以其子舒爲質相約內應大兵夜樹梯登城破斬曹變蛟王廷臣邱民仰等生擒洪承疇送盛京贍養之祖大壽知承疇就擒因率錦州諸將以城降明訛傳承疇已死予祭十六壇建祠都城外與邱民仰並列莊烈帝將親臨奠俄聞承疇降乃止本朝崇德七年四月都察院承政張存仁上言臣觀洪承疇欣欣自得僥倖再生是仰慕眞主思效用於我國者宜速令薙髮酌加任用五月召見崇政殿承疇跪門外奏曰臣將兵由松山援錦州曾經數戰冒犯軍威聖駕一至衆兵敗沒臣坐困松山糗糧罄絕人皆相食城破被擒自分應死蒙皇上矜憐不殺而恩養之今令朝見臣自知罪重不敢入上曰彼時與我軍交戰各爲其主朕豈介意朕

之擊敗十三萬兵得松錦諸城皆天也天道好生善養人者斯合天道朕故恩沾及爾爾但念朕撫育之恩盡心圖報可耳尋命隸鑲黃旗漢軍順治元年四月睿親王多爾袞征明承疇從師次遼河聞流賊李自成已陷京師洪承疇因陳進兵策曰我軍之強天下無敵宜先布號令示此行特埽除亂逆不屠人民不焚廬舍不掠財物其開門歸降及爲內應立大功者破格封賞法立令行此要務也向見流賊遇弱則攻遇強則走今聞我軍至必遁而西宜從薊州密雲疾行而前賊若走則以精騎追之若仍據京城以拒我則破之更易至入關路隘我兵皆不便履險恐賊伏精銳邀我宜改騎爲步從高覘之俾步前馬後比一邊則步卒皆馬兵也抵京之日連營城外以斷西路諸援兵則賊可一戰而殲 天五月大軍擊走流賊定京師承疇奉旨仍以太子太保兵部尙書兼都察院右副都御史原銜入內院佐理機務遂爲祕書院大學士二年閏六月豫親王多鐸定江南明福王朱由崧就擒上命承疇往駐江寧鑄給招撫南方總督軍務大學士印賜敕便宜行事承疇既至疏列降順之明南京翰林科道卿寺部屬等一百四十九人請令赴部錄用是時明唐王朱聿鍵自號隆武據福建其大學士黃道周引閩兵出浙江開



化明御史金聲家居休寧受聿鍵部院職募鄉兵十餘萬屯績溪明魯王朱以海據紹興高安王朱常淇據徽州蘄水王朱術體次子常棗冒族兄樊山王舊稱結寨英山潛山間又有朱由樞冒稱金華王據饒州朱誼石冒稱樂安王朱誼泐冒稱瑞昌王分據溧陽興化金壇鄉村聯結江南北黨與謀犯江寧承疇檄提督張天祿總兵卜從善胡茂楨等分路進征擒金聲於績溪擒黃道周於婺源先後解至江寧諭降不從斬之明故官荆本徹李守庫徐君美等據崇明承疇檄總兵李成棟征之斬守庫擒君美降其城本徹竄入海三年正月承疇查知江寧人有叛應朱誼石朱誼泐者於距城五十里之西溝池捕斬萬德華等五十餘人又閉城搜捕五十餘人鞠實郭世彥尤琚等三十一人誅之未幾朱誼石朱誼泐合衆二萬來犯火攻神策門我兵先分出朝陽太平二門堵截乃啟神策門衝擊大敗之追至攝山擒斬無算尋檄總兵馬得功卜從善等剿潛山司空寨斬守寨頭目石應璧等生擒朱常棗搜婺源嚴杭山擒朱常淇及其監軍道江于東職方司許文玠等復擒朱誼泐及其經略韋爾韜總兵楊三貫夏含章等於句容丹徒擒朱由樞及其族人朱常涪朱常泚朱常涓於饒州鄱陽湖擒朱誼泐之弟朱誼貴及瑞



昌王下軍師趙正於宿松縣之洿池並請旨斬之明給事中陳子龍家居華亭潛結太湖潰衆遙附朱以海承疇遣參領索布圖往捕子龍投水死四年四月駐防江寧總管巴山張大猷奏柘林遊擊陳際可擒賊謝堯文獲明魯王封承疇國公及其總兵王斌卿致承疇與巡撫土國寶書有伏爲內應殺巴張二將則江南不足定語上獎巴山等嚴察亂萌而諭慰承疇國寶曰朕益知賊計眞同兒戲因卿等皆我朝得力大臣故反間以圖陰陷朕豈墮此小人之計耶十月巴山等以察獲遊僧函可金臘等五人攜有謀叛蹤跡牒承疇鞠訊承疇疏言函可乃故明尙書韓日纘之子出家多年乙酉春自廣東來江寧印刷藏經值大兵平江南久住未回今以廣東路通向臣請牌回里臣因韓日纘是臣會試房師遂給印牌及城門盤驗經笥中有福王答阮大鍼書稿字失避忌又有變紀一書干預時事其不行焚毀自取愆尤與隨從之僧徒金臘等四人無涉臣與函可世誼應避嫌不敢定擬謹將書帖牌文封送內院得旨下部議以承疇徇情私給印牌應革職上以承疇奉使江南勞績可嘉宥之承疇以江南湖海諸寇俱削平又聞其父已卒於閩請解任守制乃調宣大總督馬國柱爲江南江西河南總督命承疇俟假滿仍

回內院任事五年四月至京六年充太宗文皇帝實錄總裁官充會試正考官遇恩詔加少傅兼太子太傅八年閏二月命管都察院左都御史事尋甄別諸御史分爲六等擬差用魏瑄等二十二入內陞陳昌言等二人外轉張煊等十一人又王世功等十七人外調降用革任有差五月張煊疏劾吏部尙書陳名夏植黨行私諸款有囑承疇庇其門生李嵩陽留任御史及太僕少卿黃徽元因承疇姻戚驟陞正卿等語並劾承疇不請旨私送其母回閩又屢與名夏及尙書陳之遴聚集火神廟屏左右密議逃叛下王貝勒大臣集質名夏辯釋承疇以送母回閩未奏明自引罪至火神廟會議數次則皆御史因甄別商酌應差用及陞調革降者也吏部尙書譚泰坐煊誣陷逃叛絞死未幾譚泰以他罪伏法上鑒煊由譚泰黨庇名夏冤死優予贈廕革名夏任詳見名夏傳承疇復自引罪得旨聚議不必懸揣送母回閩未奏爲親甘罪其情可原仍留任以責後效九年五月丁母憂命入直如故私居持服賜其母祭葬九月欽天監奏太白星與日爭光流星入紫微宮時大臣議請駕往邊外迎達賴喇嘛承疇同大學士陳之遴疏言日者人君之象太白敢與爭光紫微宮者人君之位流星敢於突入上天垂象誠宜警惕且今年

南方苦旱北方苦潦歲饑盜起處處入告非聖躬遠幸之時達賴喇嘛自遠方至則遣一大臣接迎已足見優待之意亦可服蒙古之心何勞聖躬親往疏入傳諭曰卿等諫朕勿往迎喇嘛此言甚是朕卽停止嗣後國家一切機務詳明敷陳毋有隱諱十年正月調弘文院大學士五月調國史院大學士時明桂王朱由榔居安隆流賊遺黨一隻虎郝搖旗孫可望李定國等俱假封號以招集散亡聯結梟健踞黔滇掠楚粵上命承疇經略湖南廣東廣西雲南貴州特晉太保兼太子太師兵部尙書都察院右副都御史諭之曰湖南兩廣雖漸底定滇黔阻遠尙未歸誠朕將以文德綏懷不欲勤兵黷武而遠人未喻朕心時復蠢動必得夙望重臣曉暢民情練達治理者相機撫剿方可收寧朕徧察廷臣惟爾允當斯任前招撫江南已有成效茲命綏靜南方聽擇要地駐劄俟滇黔既定善後有人卽命還朝以慰朕眷想承疇奏言臣年逾六十理宜退休乃荷特授經略之任伏願時諭吏戶兵三部仰承聖意俾臣得竭力展布剿撫中機上卽命內院以特假便宜條款詳列敕書傳示內外遵行並允承疇奏薦以原任大學士李率泰爲兩廣總督與平南王尙可喜靖南王耿繼茂駐守廣東改撥土賊未靖之江西省屬承疇鑄給



經畧湖廣江西雲南貴州內院大學士印十一月承疇疏言湖廣有孫可望抗拒於南郝搖旗一隻虎等肆毒於北彼或由澧州而犯常德或截岳州以犯湘潭則我腹背受敵廣西有李定國眈眈思逞距桂林二百里惟附郭之臨桂縣與靈川興安二縣及全州未爲所踞我兵若由桂林進剿而彼自靖沅乘虛潛襲則我首尾難顧宜防守嚴密乃可隨機援剿上命寧南大將軍陳泰率八旗兵往湖廣與承疇商駐要地又詔繼茂移鎮桂林以聯聲援十三年二月上諭兵部日前以湖廣寇氛未靖殃及生民曾有言增遣滿洲兵攜家口駐防武昌今念沿途水陸居民及驛遞必至騷擾所駐之地又須撥給房屋田土其爲民累更有不可勝言者近聞五省經略輔臣洪承疇在彼操練兵卒軍威殊壯招徠撫輯民情安悅無須增置攜家口兵前所遣兵仍照常更換六月可望遣其黨劉文秀盧明臣馮雙禮等分犯常德岳州武昌承疇與大將軍陳泰遣兵邀擊大敗之明臣墮水死雙禮中創遁文秀竄貴州八月詔頒賞承疇及所統將領有差十二月承疇以寶慶府震雷徹夜具疏自劾上慰諭之十三年二月諭曰日者賊渠孫可望等猖狂犯順夜襲常德爾同大將軍陳泰遣發官兵水陸追剿大獲全勝良由籌畫有素調度

合宜用能張捷伐之偉略杜窺伺之狡謀已頒懋賞仍賜特諭彰朕嘉悅之意是年考滿晉太傅仍兼太子太師廕一子入監十四年十月孫可望率所屬官百餘兵數千自貴州赴長沙納款上命承疇同寧南大將軍貝子洛託相機收取貴州十五年二月疏言貴州地勢情形及三路進取雲南機宜尋與洛託會師常德由辰州沅州進征檄偏沅巡撫袁廓宇招降靖州並苗兵赴鎮遠西二十里山口堵禦沿途擒斬收降甚衆四月抵貴陽城中文武官俱先遁承疇疏言自常德辰沅至鎮遠貴陽重關高嶺石徑尖斜大雨將及半月泥濘三尺滿洲兵謂從來出征未有如此之難馬匹疲斃未有如此之甚然皆不顧艱險奮勇當先漢軍綠旗兵緊隨而進不五十日剿逆撫順貴州全省底定皆皇上德威遐暢之所致也上命信郡王多尼爲安遠大將軍率師之貴州與四川廣西兵會期進取雲南六月承疇疏言臣前有三路進取全局一疏冀不致兵衆擁集爭糧乏食及至貴州見各府州縣衛所僅留空城卽有數百數千石米穀八旗兵陸續經過二三日輒罄盡惟省倉存米七千餘石稻穀四千餘石足供一月食用臣所統兵皆分布鎮遠偏橋興隆清平平越等處各自買米并尋野菜和米充飢投誠官兵暫駐三四日卽

改發天柱會同黔陽等縣及沅州以就糧貴州山深地冷收穫皆在九月臣遣官勸諭軍民土司苗民預納本年秋糧之半接濟滿州兵月米今四川一路兵駐於遵義烏江休息有舊日遺糧處廣西一路駐獨山州兵亦可就近購糧又聞信郡王大兵自六月初旬自荊州進發所需口糧尤多數倍臣已檄催沅州糧米速運鎮遠積貯令隨征各官分路採買令長沙常德各道府製備布口袋二萬餘并棧套木架繩索解送鎮遠又於天柱思南石阡思州平越各府州縣衛所及土司苗人募夫役給工食逐站遞運至平越及新添衛所可不誤師期矣九月改內院爲殿閣授承疇武英殿大學士是月承疇奉詔赴平越會議信郡王由中路過關嶺鐵索橋抵雲南省計一千餘里解餉銀三月攜糧十五日運礮漢軍攜糧二十五日平西王吳三桂由遵義過七星關抵雲南省城計一千五百餘里先中路兵十日起行征南將軍卓布泰因南寧有賊屯踞離遠難以兼顧議沿貴州廣西邊界平浪永順鎮遠繞出安隆所直趨黃草壩羅平州抵雲南省城計千八百餘里先四川兵十五日起行既定議承疇還貴陽遵旨同大將軍洛託駐守遣經略右標提督張勇等隨信郡王進征擊走由榔鞏昌王白文選於盤江十六年正月初三



日三路兵並薄雲南省城由榔與李定國白文選等竄永昌餘衆以城降承疇疏言臣前料理湖南廣西幸皇上俯鑒愚忱有請俱允俾得地方支持今雲南新關係臣經略管轄之內必親往相度乃能區處得宜故不待詔諭卽日就道貴州有一大將軍洛託彈壓巡撫趙廷臣綏輯可無他慮惟雲南尤爲險遠土司種類最多治之非易故前元朝用親王坐鎮明朝以國公沐英世守乞敕議政王貝勒大臣爲久長計留兵駐鎮俾邊疆永賴敕寧閏三月又疏言臣自黔赴滇經過白水文水曲靖馬龍楊林等處於二月二十六日抵雲南省城信郡王先於二月初二日令貝子尙善領兵同平西王吳三桂征南將軍卓布泰等追剿至永昌騰越及南甸土司李定國沐天波等擁由榔奔緬甸其國公賀九義伯李成爵李如碧廖魚將軍鄒自貴馬得鳴等收集潰兵分遁沅江順寧雲龍瀾滄麗江諸處邊外雲南池西及池東在在虞窺犯民間遭兵火殘毀飢餓載道死無虛日在永昌一帶更爲慘烈週圍數百餘里杳無人烟追剿大兵因無糧不能久駐而省城糧米以湖南官斗市糴每石需銀十三兩有奇是以分駐宜良富民羅次姚安賓川臨安新興澂江陸涼等處就糧臣知皇上明鑒萬里自有宸斷碩畫俾邊臣得以遵奉

疏入上已命吳三桂駐鎮雲南又諭戶兵二部曰雲貴新入版圖百姓皆朕赤子念十餘年來逆寇李定國等竊踞南服民多在水火之中困於誅求生計日匱疾痛莫告今大兵所至羣黎歸命歡若更生但聞兩省地方生理未復室廬殘毀田畝荒蕪俯仰無資衣食艱窘朕每念及不勝惻憫至南征大兵閱歷險阻長驅深入糧餉恐有時不繼今特發內帑銀三十萬兩爾部卽遣官刻期齎往經略軍前以十五萬兩賑濟兩省窮民其十五萬兩令經略臣收貯現今三路大兵如有需餉甚急者宜行接濟八月承疇疏言兵部密咨大兵宜速進緬甸以靖根株令臣相機布置臣受任經略日擊凋敝景象及土司降卒觀望情節不可謀迫須先安內乃可剿外李定國等竄孟艮等處山川皆極險遠兼瘴氣爲害必霜降後方消明年二月青草將生瘴卽復起計自出兵駐兵回兵僅閱四月恐亦未能窮追遠剿况屢聞李定國等勾連土司覬由景東沅江復入廣西各土司私授箭印歃血爲盟伺隙起釁若一聞大兵西進勢必共思狂逞避實突虛大兵相隔已遠不能回顧而留駐省城之兵亦未及堵禦致定國等縱逸所關匪細臣審度時勢權量輕重謂今年秋冬宜暫停進兵俾雲南池西殘黎稍藉秋收以延殘喘盡力春耕

以圖生聚而數萬大兵又得養銳蓄威居中制外俾定國等不能窺動靜以潛逃土司不能伺罅隙以狂逞絕殘兵之勾連斷降兵之反側則飢飽勞逸勝算皆在於我料定國等潛藏邊界無居無食瘴癘受病內變易生機有可俟是時兵餉芻糧糗備土司苗蠻漸服殘兵降卒已安并調撥將兵次第齊集責成防禦然後進剿庶爲一勞永逸固內剿外長計疏下議政王貝勒大臣會議如所請暫停進兵十月以目疾乞解任得旨還京十八年聖祖仁皇帝御極承疇乞休允致仕命察敘招撫經略功予三等輕車都尉世職准襲四次康熙四年二月卒賜祭葬如例謚文襄子士欽由順治十二年進士官至太常寺少卿兼襲世職

### 劉芳名

劉芳名寧夏人明柳溝總兵本朝順治元年率屬投誠命仍原官隸正白旗漢軍二年調寧夏賜白金冠服時秦地初定土寇尙多悍卒復乘釁謀亂芳名既抵任彈壓剿禦訓練撫綏總督孟喬芳奏獎之時降將武大定叛固原賀珍叛漢中大軍攻剿賊竄遁芳名俱在事有功三年寧夏兵變戕巡撫焦安民芳名方赴鞏昌剿賊聞警馳回知營官王元馬德倡亂狼狽負嵎乃計遣德攝篆花馬池以分其



勢偵元將逸出鎮城與逆寇洪大誥合先設伏河畔元至伏發賊死拒都司樊朝臣守備姜友成等夾攻元敗奔副將馬寧等追剿之大誥遁芳名飭部將搜斬大誥是時德尙署東協副將聞王元旣擒懼河西道袁噩赴任過花馬池德方患痔未迎謁噩曰噩善醫他病皆應手愈惟心病難療耳德聞之益懼四年三月芳名偕河東道馬之先出師惠安德乘間糾黨劫本營軍資遁入山合賊渠賀宏器等自紅古城出口襲陷安定螺山賊王一林殺參將張純往附橫行寧固平慶間七月芳名率鎮兵抵亂麻川挫賊鋒俘馘無算復追襲於預望城斬一林德僅以四騎走翌日及於河兒坪陣縛德寸磔之餘黨盡殲十月詔予投誠各官世職授芳名三等輕車都尉十二月擢四川提督命佩定西將軍印尋奉旨以都統祖澤潤代芳名以右都督仍鎮寧夏五年香山賊李彩糾亡命四出劫掠芳名以兵抵賊巢掘濠環攻礮矢如雨賊窮蹙其黨張斌等執彩獻軍門誅之初馬德之就擒河兒坪也芳名副將劉登樓預有功登樓居榆林之寧塞狡猾多力旣誅德益自負其能六年附大同叛鎮姜瓖與延安營叛將王永強爲亂僞稱大明招撫總督殺靖邊道夏時芳易冠服長驅西犯花馬池興武各營堡望風從逆直逼寧州時定

邊屯蒙古札穆素叛逃賀蘭山窺同寧境芳名方堅壁以待聞靈州告急檄調各協營將士授機宜分兵進剿大敗賊兵斬賊首劉永昌等登樓竄走定邊潛結札穆素叛屬寇寧夏西境復糾餘賊再犯河東陷鐵柱惠安漢伯諸堡靈州復告警會都統李國翰奉詔率禁旅至討蒲城宜川諸賊巡撫李鑑守鎮城以禦札穆素芳名引兵東渡疾趨榆林大破賊於官團莊登樓退據漢伯城我軍絕其水道攻圍十二日克之斬登樓從賊皆就撫榆林平當諸將環攻漢伯時芳名獨據東南要衝近賊壘矢石頻及有勸之者曰當移數武避賊鋒芳名厲色叱之曰死則死耳何怯爲且士卒多傷夷而我獨避鋒鏑乎由是軍士感激敵愾益厲先是登樓叛據延安致書芳名芳名以爲汚己也切齒裂眦不與賊俱生封逆書示撫臣鑑囑代奏鑑與督臣喬芳先後疏敘芳名功以聞並得旨嘉獎遇恩詔晉二等輕車都尉九年敘戰功予世襲五次十二年遵旨陳奏鎮兵事宜以寧夏孤懸河外延袤千里額兵屢經調撥兵力單虛請自後征調缺額卽令招補備守禦又請以減等罪人僉發沿邊以資生聚並下部議行十六年調隨征江南右路總兵率寧夏三營將士移駐江寧加左都督銜時海寇鄭成功犯崇明芳名同提督梁化鳳擊



之奪賊舟斬獲甚多十七年八月疏言臣奉命剿賊方期滅此朝食不意水土未服受病難瘳不敢妄請休息惟所攜寧夏軍士臣訓練有年心膂相寄今至南方半爲痢瘡傷損皆水土蒸溼所致及臣未填溝壑敢乞定限更調得旨覽奏知卿抱病江南征防重寄正資料理仍加意調攝以副委任所請敕部議奏九年卒於軍贈太子太保賜祭葬如例諡忠肅所屬將士仍還寧夏本鎮子體仁襲世職

### 李國英

李國英遼東人明總兵隸左良玉部下本朝順治二年隨左夢庚來降隸正紅旗漢軍三年隨肅親王豪格征四川滅流賊張獻忠授成都總兵五年正月擢四川巡撫獻忠之滅也餘黨孫可望劉文秀王命臣等竄踞川南思復逞舊將譚文譚洪譚詣楊展劉惟明等分據川東又與流賊李自成遺黨邢十萬馬超劉二虎郝搖旗袁宗第李來亨等聲援二月洪犯保寧國英敗之命臣據順慶謀襲保寧國英分兵三路水陸並進直抵順慶大敗賊衆復其城擒僞參將李先德朱朝國等而十萬超亦爲保寧肘腋患國英偕總兵惠應詔進剿陣擒僞總兵胡敬及叛逃知縣饒心知復乘夜進襲抵曠盧二壩破賊巢進取潼川賊棄城遁追至綿州擒



偽監紀呂濟民偽參謀石君球尋招降惟明展子偽遊擊璟新龍安綿州達州咸定六年遣副將陳敦剿賊安縣擒偽副將解應甲偽參將楊飛雄又遣參將曹光間偵賊彰明縣遇偽總兵龍甫黃射之墜巖下賊衆奔竄我兵分四路疾進夜奪曲山關甫黃棄關走遂進克石泉縣叛逃知縣謝光祖陰結大定授偽職據寨抗拒國英遣兵攻破賊寨擒謝光祖斬之七年又糾偽總兵馬壽等犯川北國英檄副將曹純忠劉漢臣伏兵邀擊斬偽總兵老鐵匠偽副將黃鷓子九年可望文秀犯保寧賊衆橫列十五里勢熾甚國英督兵擣賊中堅別由間道擊其後殲賊數萬溺死者無算先是敍投誠功予國英二等輕車都尉世職十一年二月甄別督撫晉銜兵部尙書四月偽總督魏勇犯順慶國英遣副將霍光先擊破之斬獲甚衆時成都復爲賊陷重慶夔州嘉定俱附賊十二年國英疏言國家師武無敵而小醜稽誅此封疆之臣畏難避苦利害功罪之念存於中耳今湖南兩廣俱有重兵平西王吳三桂及都統李國翰之師駐漢中宜敕進保寧綱維諸路先取成都嘉定資其肥饒且屯且守次取重慶以扼咽喉然後乘流東下埽清夔關通荆襄之氣脈徹滇黔之門戶卽爲收服滇黔本計至於內外司兵司餉之臣必齊心一

力應如指臂尤成功之要也疏入部議令三桂等相機進取十三年考滿加太子太保廕一子入監十四年詔以國英久任巖疆才猷夙著擢陝西四川總督十五年二月三桂等自漢中進征取重慶遂趨貴州時文洪詣二虎等據忠州萬縣七月合犯重慶總兵程廷俊嚴自明擊之力戰五日賊遁十一月文復合十三家賊逼重慶國英在保寧聞警趨援師次合江詣殺文納款餘賊潰遁國英入城招撫洪亦降僞侯郝承裔僞伯陳達相繼率衆來歸譚文餘黨猶據涪忠二州國英檄總兵王明德進剿擒僞總兵譚益陳貴榮高鶴鳴關起鵬僞參謀高鳳鳴陣斬僞監軍道王文錦張耀僞副將高林起等十七年承裔據雅州府復叛國英統兵至嘉定會提督諸臣分兵三路進剿奪竹箐關賊燒屋國英發兵截擊承裔敗逃黎州追擒於山箐十八年川陝各設總督改國英專轄四川康熙元年明石泉王朱奉鎰煽惑土夷犯敘州馬湖二府國英遣兵剿擒之疏言蜀中逋誅巨寇俱環伺於夔東請暫駐重慶以圖進剿俟賊平還駐成都時搖旗來亨二虎宗第等竄踞山寨爲四川湖廣陝西錯壤州邑患議者欲合三省會剿國英疏言賊巢橫踞險要大兵進攻未能聯合一路宜以荊州宜昌兵剿遠安興山巴東歸州之賊以興



安鄖陽兵剿房縣竹山之賊其夔州建始巫山大寧大昌之賊專以四川兵剿之惟豫會師期使賊三路受敵則彼此不暇兼顧俟一路平後就近會師並進賊可盡滅矣上允所請命西安將軍富喀禪副都統都敏領兵會剿國英先招撫各偽鎮將以散其黨既會三省師期同進又分兵大昌大寧截遏奔逸二年國英同富喀禪等督兵進巫山趨陳家坡攻二虎賊巢二虎挈妻妾奔入天池寨自縊死搖旗宗第夜遁國英遣總兵梁加琦佐領巴達世追至黃草坪破賊四營生擒搖旗宗第及偽部院洪育鼈等又遣總兵李良楨追擒明東安王朱盛瀆於小尖寨偽岐侯賀珍子偽富平侯道寧率所屬降四年疏言全川底定宜因地設防酌議增減官兵增設城守副將一遊擊八都司一守備十七裁留通省兵四萬五千名以馬二步一戰守各半定額從之又疏報建昌番猺跳梁檄總兵王明德深入賊巢平十九寨五年卒得旨李國英久任巖疆積勞病殞深可憫惻下部議卹賜祭葬如例謚勤襄七年追敘巫山剿賊功晉爵一等男以其子爛襲爛卒子永陞襲永陞嘗任南陽總兵以婪取陋規發軍臺效力雍正六年上追念國英擒剿逆寇勞績懋著特召其子孫引見以永陞從弟永安爲參將並召永陞還授參政洊擢工



部尙書十年國英入祀賢良祠

張勇

張勇陝西咸寧人明副將本朝順治三年英親王阿濟格進剿流賊李自成勇由淮安率衆赴九江投誠授遊擊隸陝西總督孟喬芳標下時自成餘黨賀珍武大定賀宏器李明義等分踞漢中興安固原窺犯西安勇同副將任珍馬寧等屢擊敗賊衆四年寧夏叛將馬德結賀宏器陷安定勇與總兵劉芳名率兵赴援擊走之德爲馬寧所擒勇進征固原連拔賊寨宏器明義皆就擒伏誅五年四月逆回米喇印丁國棟踞蘭州作亂糾衆千餘陷臨洮勇同副將陳萬略率兵夾擊敗賊收復臨洮城躡擊至岷州敗之官堡又敗之馬韓山賊竄匿二崖洞盡殲之五月擒明延長王朱識鏐於馬家坪喬芳偕侍郎額色督師攻拔蘭州勇會師合剿遂渡河而西八月抵甘州逆回據城拒勇率兵迎擊屢敗之六年正月總兵南一魁奪西門入勇自西南隅搜剿至東門逆回勢窮夜遁躡跡至北山城殲賊甚衆斬喇印於水泉國棟竄肅州五月勇率兵赴肅州伏兵壕外伺賊出牧四面截殺斬級數百生擒百餘人十一月與副將馬寧督兵樹雲梯登城奮剿殲賊黨殆盡國

棟等就擒伏誅肅州城復特授勇甘肅總兵十年喬芳疏陳勇率兵投誠以來戰功下部議敍予三等輕車都尉世職時明桂王朱由榔據滇黔孫可望李定國等屢犯湖南命大學士洪承疇經略軍務勇請移兵自效得旨張勇久歷巖疆勞績懋著今奏請效力繁劇忠勤可嘉著卽來京以俟簡用尋陝西總督金礦以甘肅重地番部雜處勇整飭有方請仍留鎮會承疇疏言勇智勇兼備部下兵精馬足請移之湖南授爲經略右標總兵上允承疇請仍召見加右都督銜賜冠服甲冑弓矢勇以家口衆乞賜宅京城子雲翥以廕得陝西衛指揮請改隸京衛並得旨俞允瀕行命內大臣索尼等傳諭曰當今良將如張勇者甚少軍務不可懸度宜相機而行勿自負才勇輕視敵人十五年三月隨承疇征貴州七月桂王都督羅大順夜焚新添衛城勇率兵馳剿大順遁入十萬谿勇與南一魁等冒矢石攻克險寨斬獲無算十二月隨信郡王多尼進征雲南至盤江守者焚鐵索橋逸去勇乘夜造橋黎明渡全軍擊敗桂王將白文選於七星關十六年晉左都督十七年授鎮守雲南臨元廣西諸處總兵十八年擢提督康熙二年諭兵部曰雲南提督張勇前鎮守甘肅威名素著屬番讐服著以提督現任職銜仍回甘肅鎮守三年

加太子太保先是青海蒙古戀西喇塔拉水草饒乞放牧勇以其地爲甘肅要隘不容逼處自往飭諭乃謝罪去因設永固營聯築八寨四年蒙古復相繼徙牧至大草灘勇請增設甘肅西寧駐防兵四千五百二十名部議令總督會核得旨張勇所奏增兵事若令總督會核再奏恐致遲誤卽照所請議行五年奏言蒙古徙牧近邊臣遣使飭諭抗拒於定羌廟官軍敗之猶不悛改聲言糾衆分入河州臨洮鞏昌涼州西寧請嚴防禦從之八年給事中張登選劾勇兩足俱癱宜罷斥疏下山陝總督莫洛察核莫洛言勇因昔年征剿右足中流矢傷骨常作痛不能行履至一應邊疆事務尙堪坐理得旨張勇年久勤勞著有功績仍留原任十二年冬逆藩吳三桂反四川總兵吳之茂叛應之十三年春三桂以逆書招勇勇執其使以奏得旨嘉獎冬陝西提督王輔臣叛於寧羌十四年二月甘肅巡撫華善疏言逆賊王輔臣今據關山池西岐山池北黃河池南與蜀賊連結加以西番土回乘隙屢犯河西危甚其得免於淪陷者提督張勇之力目前情勢非提臣不能守非提臣不能戰非提臣不能破賊恢復第事權不重未免掣肘請賜敕便宜行事詔授勇靖逆將軍仍管提督事諭部臣凡總兵以下官員聽勇調遣拔補是月輔



臣遣人將三桂僞印劄及逆書誘勇勇奏斬其使上嘉之封靖逆侯三月勇遣西寧總兵王進寶破賊於皋蘭龍尾山擒遊擊李廷玉復安定縣金縣五月僞總兵潘瑀僞副將曾文耀赴洮河二州諸羌乘隙肆掠勇率兵赴河州文耀聞風遁勇乃別遣土官楊朝樑攻洮州自督兵繼其後瑀敗竄洮河二州平諭曰秦省巖疆重地軍務方殷張勇忠勤懋著謀略優長久鎮西涼奠安疆宇近復躬履行間殫心籌畫屢敗賊衆恢復城池必期殲滅賊衆底定秦隴朕甚嘉之凡用兵籌餉一切機宜均專責任所屬文武各官毋違節制務早奏膚功以副朕委任至意尋敕部優敘以其次子雲翼爲太僕寺卿六月進剿鞏昌僞副將任國治等潛引兵三千入東門合僞總兵陳科鄭元經等自城中分出突犯勇率副將劉宣聖等奮剿截其歸路誅斬過半擒獲四百七十三人先是勇奉旨凡平定地方掃除賊寇惟爾是賴今貝勒洞鄂雖攻圍平涼而逆賊王輔臣嬰城死守恐稽時日又蜀賊已過昌寧驛來援平涼爾可量留官兵守鞏昌親自率兵至洞鄂軍前協力進取勇疏言鞏昌要地兵力難分逆賊吳之茂進屯單家河臣赴平涼賊必乘虛來犯上命廷臣集議議令勇固守鞏昌秦州諸處相機行之十二月同振武將軍佛尼勒

等剿賊西和縣三戰皆捷會寧夏兵變提督陳福遇害勇還守鞏昌薦天津總兵趙良棟才略過人堪鎮寧夏命卽授良棟爲寧夏提督十五年三月勇同護軍統領傑殷敗賊於寧遠縣之馬陽鎮四月紱恢復洮河二州功晉少保仍兼太保是月賊萬餘犯通渭縣勇聞警自伏羌進發至十八盤坡遇賊分兵兩翼衝擊賊潰乘勝追剿斬獲無算復通渭縣五月進征樂門賊據險列十一寨以阻我師勇度地勢橫營山梁復析滿州綠旗各爲攻剿備禦二營分南北以擊賊下令兵皆攜草一束營甫立賊齊出勇與都統赫業各率兵分擊南北山梁諸賊賊兩路來犯我兵分隊衝截槍礮齊發賊退走山梁復堅守壁壘我兵以所攜草填壕直進陣斬賊將及賊衆千餘之茂尋復糾衆出犯勇勒兵衝擊大敗賊衆遂與佛尼勒王進寶等剿平賊寨之茂引衆夜走追敗之牡丹園及西和縣北山之茂僅以數騎遁是時撫遠大將軍圖海已招降輔臣勇復遣兵敗賊於岷州階州平涼慶陽鞏昌所屬州縣悉平諭曰自逆賊煽亂以來奸徒附和侵擾地方張勇一聞蘭州之變卽星馳渡河剿禦收復城邑舉發僞劄緝獲奸謀綏定邊陲厥功甚大及大兵攻取平涼張勇鎮守秦鞏復殫心籌畫調度合宜剿禦四川賊衆屢奏捷音紓朕



西顧之憂功尤懋著於軍功議敘之外應從優加恩酬答勲勞於是晉一等侯加少傅兼太子太師十七年西套厄魯特濟農和囉理爲準噶爾台吉噶爾丹所敗假道赴青海其衆由雙井闌入內地勇親往驅逐出邊二十二年以老病乞休初勇足疾殘廢行以肩輿經十餘年屢疏請代至是上仍慰留之二十三年三月勇因蒙古番衆逼黃城故址游牧率兵赴丹山防守病劇甘州賜醫診視命其子雲翼馳驛偕往四月卒遺疏至得旨張勇韜鈴素裕殫心盡職久鎮巖疆剿禦賊寇固守地方籌畫周詳勞績懋著邊防戎務倚毗方殷奄逝忽聞深爲軫惻下部從優議卹贈少師仍兼太子太師賜祭葬如例諡襄壯以子雲翼襲爵雍正十年入祀賢良祠乾隆三十二年以勇當征剿吳逆時懋建勲績其一等侯爵特予世襲罔替四十七年諭曰朕恭閱皇祖實錄所載埽除吳逆平定川陝事蹟因取張勇趙良棟王進寶三人國史列傳詳加披覽其功績實有不可沒者當吳逆煽亂川陝兩省提鎮王輔臣吳之茂等相率從賊維時邊陲告警張勇以雲南提督調回甘肅授爲靖逆將軍躬履行間殫心籌畫攻取平涼底定秦隴其間收復洮河諸郡及舉發僞筭執斬來使諸事居然有古名將之風而趙良棟之授爲寧夏提督



係張勇所薦又王進寶亦曾隸勇麾下兩人提兵轉戰同心效力趙良棟首先建議直取成都王進寶戡定保寧殲擒渠帥其削平恢復之勳亦不可泯厥後張勇封侯趙良棟王進寶僅得子爵蓋緣兩人各懷私忿互相攻訐較之張勇之勤勞懋著始終無過者實遜然兩人之功究足以掩其過今百年論定瞻念成勞趙良棟王進寶宜量加追敘前於乾隆三十二年特降恩旨令張勇等子孫世襲罔替張勇本係侯爵其元孫張承勳承襲因曠班革去散秩大臣在三等待衛上行走茲特加恩復還散秩大臣照舊供職進取雲南恢復成都趙良棟之功爲最原封三等子著晉封爲一等子仍准世襲罔替並交該督撫查明趙良棟王進寶現應襲職子孫送部候朕酌量錄用以示優眷夫兵可百年不用不可一日不備國家承平日久每溯前勳爰思將帥張勇趙良棟王進寶諸人將才武略獨出冠時名炳旗常賞延苗裔凡在戎行者尙其益勵赴桓以副干城腹心之寄

### 祝世昌

祝世昌遼陽人先世於明初授遼陽定邊前衛世襲指揮十數傳至世昌任鎮江城遊擊本朝天命六年大軍取遼陽世昌率屬三百餘來歸仍授遊擊統其衆命

董築瀋陽遼陽海州三城事竣擢盛京城守總兵天聰五年從征大凌河六年上親閱兵以其訓練有方特加優賚尋遷禮部承政崇德三年疏言俘獲敵人婦女有籍入樂戶者請概釋奉旨滿漢官會議都統石廷柱馬光遠等謂世昌心護敵人與奸細無異應論死籍沒命從寬流徙西北邊境順治二年召還隸漢軍鑲紅旗四年授山西巡撫時土賊踞山作亂攻掠孟縣五臺永寧靜樂交城諸邑世昌連遣將分剿屢奏捷五年十二月大同總兵姜瓖叛世昌疏言前以山賊竊發省城將弁分遣進剿猝聞姜瓖悖叛急調回防守今附近大同城堡已爲賊據朔州岢嵐繼陷代州被困垂破臣檄諸將偵禦因所鎮俱步兵更發營騎六百繼進但賊勢猖狂未易控制乞命大軍從居庸進發急剿大同更選將分兵從紫荆直抵代州與臣會商機宜南北夾攻庶叛賊授首六年正月疏報賊黨姚舉襲據寧武萬練盤踞偏關劉遷攻陷繁峙靜樂及交城東關省城四面受敵急請大兵會剿詔敬謹親王尼堪統師會剿既至太原遂進圍寧武逾月未下移剿大同賊黨乘機奪據保德陷交城石樓永和世昌復疏言自寧武軍圍撤賊漸逼省城雖有蒙古兵防守強弱各半賊不知懼若待殲除姜賊後移師分剿恐益滋蔓且山西一

省歲賦供應軍需實賴省城迤南汾州平陽潞安諸屬撥運若一處被危全省震動惟偏關寧武早得一日則河西賊聞風斂跡請敕發滿洲兵數百守省城如省南有警卽分遣撲剿別撥兵駐代州循次取偏關寧武賊素畏滿洲兵如神臣是以激切上請詔下兵部議行九月曲沃廢官李建泰謀叛世昌得其手書以聞奉敕嚴緝會大軍攻大同姜瓖爲其將楊振威斬首來獻巽親王務達海謙郡王瓦克達等先後攻討諸路賊黨漸滅建泰亦伏誅十二月世昌疏言自姜瓖悖叛羣寇蜂起左布政使孫茂蘭右布政使林德聲按察使張儒秀等與臣協商剿撫運給軍糧惟平道許可用河東道王無黨岢嵐道樓希吳等竭力禦寇保全危城副將范承宗參將湯自道羅映壇遊擊李好賢白璧等率兵攻戰所至立功各分別事蹟具奏並下所司議敘七年卒詔贈兵部右侍郎賜祭葬如例謚僖靖入祀山西名宦祠

### 鮑承先

鮑承先山西應州人明萬曆間積官至參將泰昌元年隨總兵賀世賢李秉誠守瀋陽城遷開原東路統領新勇營副將城守如故經略熊廷弼疏請獎勵諸將承



先預焉加都督僉事銜我太祖高皇帝征明瀋陽由懿路蒲河進承先偕世賢秉誠出城分汛駐守見我兵至不戰而退追斬百餘級俘數千人承先遁入城明年大兵征瀋陽遼陽承先退守廣寧天命七年正月師渡遼河克西平堡承先隨總兵劉渠等自廣寧赴援渠戰死承先敗奔全軍盡殫巡撫王化貞棄廣寧入關遊擊係得功等迎大軍入廣寧城承先竄匿數日隨衆來降仍授副將天聰三年十月上統師證明由龍井關入邊承先隨鄭親王濟爾哈朗略馬蘭峪明兵屢敗承先以書招降其守將進薄燕京復招降牧馬廠太監獲其馬羸及駝我軍自土城關擊敗明兵於德勝門外明寧遠巡撫袁崇煥領兵二萬屯廣渠門外設伏隘口二貝勒豪格兵趨右偏奮進克捷翌日上命我軍勿進攻召承先及副將高鴻中授以密計乃於陣獲兩太監繫所就近並坐假作耳語云今日撤兵乃上計也頃者上車騎向敵營二人來見語良久乃去意袁巡撫有密約此事可立就矣時兩太監佯臥竊聽旋縱之歸果以告明帝遂執崇煥磔之四年正月承先隨大軍克永平招降遷安紳士知縣朱聖臺遊擊卜文煥以城降遂取灤州承先奉命同副將白格等率鑲黃鑲藍兩旗兵駐守遷安創立臺堡五未幾明兵來犯我兵固守

力戰乃卻之明總兵祖大壽等尋集兵六萬攻灤州貝勒阿敏令承先率駐守遷安兵偕降衆移駐永平及灤州失守阿敏棄永平率諸將出冷口東還瀋陽上命翰訊阿敏與諸將棄城奔還罪以駐鎮遷安兩旗將領曾固守城池擊退敵兵諭釋承先白格等明年從征大凌河招降翟家堡八年五月上征明大同明總督張宗衡總兵曹文詔等遣鮑翰齎書請和鮑翰者承先次子也初承先降明人執翰置應州獄至是出之使來由徑路經哈里莊遇土謝圖濟農兵奪其騎斫翰及僕從俱死翰復甦莊民留養數日有馮國珍者送翰至大貝勒代善營令與承先相見遂送翰國珍至御營上問翰來使之由遣國珍齎書回以翰創甚留之九年正月承先疏言臣竊見元帥孔有德總兵耿仲明爲其屬員請敕上許其自行給劄夫上下之分自有定禮今待以諸侯之爵隆寵極矣乃不識國體不諳書史要請無已甚失人臣體古者帝王開國首重名器若任情濫予名器一案賢者退小人進矣倘欲加意招徠遠人可諭吏部分別輕重奏請給劄使恩出上裁使其果能立功報效然後請旨給劄則無功之賞不行百世之規自定矣疏入諭曰元帥率衆航海遠來投誠厥功匪小朕前旨已發豈可食言夫任賢勿貳載在虞書朕推



誠待下自無收回成命之理鮑承先臨陣敗走隨衆乞降今尙置諸功臣之列給  
敕恩養豈遠來歸順各官反謂無功而棄之乎朕此言亦非獨責鮑承先也彼既  
竭誠以入告朕亦開誠以宣示之耳八月大軍征察哈爾凱旋獲元傳國璽承先  
奏請命工部製造寶函諏吉躬率諸臣郊迎入宮以昭符瑞仍以得璽之由書敕  
鈐印頒行滿漢蒙古俾知天命有歸上是之承先尋同文館諸臣寧完我范文程  
隨大貝勒代善內外諸貝勒六部八旗衆大臣請上尊號上以土字尙未一統諭  
辭再三仍固請乃允議改天聰十年爲崇德元年先是承先以寧完我薦入直文  
館至是改文館爲內三院授承先祕書院大學士三年更定官制改吏部右參政  
四年上命以郡王禮祭貝勒岳託吏部誤傳岳託子襲封郡王承先應罰緩得旨  
寬免是年定漢軍旗制承先隸正紅旗五年隨鄭親王濟爾哈朗等圍明錦州令  
防守袁塔因明兵阻我耕種射傷我農人承先坐退避不救論死上宥之尋以病  
解任順治元年世祖章皇帝定鼎燕京召見賜銀幣鞍馬二年卒遣大學士范文  
程視含歛賜祭葬如例子敬襲世職遇恩詔晉爵至三等男初授河北總兵康熙  
四年隨陝西提督王一正剿流賊郝搖旗以縱賊不追降四級回旗後復爲大同



總兵鑾儀衛鑾儀使

王世選

王世選陝西榆林人明副將本朝天聰四年正月大軍克明遵化留兵守世選隨明總兵官惟賢來襲至城南波羅灣我軍出戰惟賢陷陣死世選敗還及我軍攻明副總兵金日觀於馬蘭城總理馬世龍遣世選來援縱入城圍之二月世選來降授總兵七年賞緞疋隸漢軍正紅旗八年五月我軍將入明邊令世選同哨探前鋒副都統圖魯什率兵先行六月上親率貝勒阿巴泰豪格及世選等入上方堡由宣化府攻略朔州崇德元年隨征朝鮮又圍明錦州松山世選俱在事有功授三等子爵四年追議前攻松山時不力將紅衣礮子賸回世選同副將孟喬芳俱革職得旨寬免漢軍初分兩旗至是分四旗每旗設都統一副都統二參領四佐領十人以世選爲正紅鑲紅兩旗都統順治二年世選隨大兵追李自成至潼關又隨征江南破揚州松江杭州嘉興湖州五年隨英親王阿濟格討叛鎮姜瓖復汾州七年以功加二等子年老乞休從之十八年卒賜祭葬如例子之鼎襲官至四川提督

祖大壽

祖大壽遼東人明泰昌元年官靖東營遊擊熊廷弼經略遼東奏獎忠勤諸將大壽預焉天啟二年爲廣寧巡撫王化貞中軍遊擊我太祖高皇帝克西平堡化貞令大壽同遊擊孫得功爲前鋒赴援戰敗卻走平陽橋堡總兵劉渠祁秉忠副將劉徵參將黑雲鶴等皆歿於陣得功乞降化貞棄廣寧遁大壽走覺華島大學士孫承宗督師薊遼以大壽佐參將金冠守覺華島尋令鳩築寧遠城大壽謂是城終不能守築僅十一且疏薄不中程孫承宗欲以此爲關外重鎮用參政道袁崇煥議定高廣規制令副將滿桂參將高見賀謙與大壽分督改築始竣事六年我朝兵圍寧遠穴地道攻城大壽與袁崇煥嬰城力守令閩卒發西洋巨礮傷數百人我軍別趨覺華島斬金冠殪士卒萬餘七年五月大壽同總兵馬桂尤世祿等拒我軍於寧遠城外敗卻入城會溇暑我軍還崇禎元年以崇煥督師薊遼擢大壽前鋒總兵挂征遼前鋒將軍印駐錦州二年我太宗文皇帝統師由喀喇沁之青城分入龍井關大安口遂克遵化薄京師大壽隨崇煥由山海關薊州入衛莊烈帝召對慰勞之命崇煥列營城東南拒戰時有因邊關失守京師受困歸咎於

崇煥殺皮島帥毛文龍且誣其引敵脅和將爲城下之盟者會我朝設間縱所獲太監還以袁巡撫私有成約告遂再召對縛崇煥下獄大壽在旁股慄懼及旣出又聞滿桂總統關寧將卒不肯受節制卽引所部兵掠山海而東桂與總兵孫祖壽營永定門外爲我軍所破並戰死大壽初嘗坐法當斬承宗愛其才密令崇煥救解遂貰之大壽以故德二人至是承宗復督師遣人慰撫且以崇煥獄中手書招之大壽乃斂兵聽令三年正月大兵克永平下遷安灤州各留師鎮守承宗檄大壽率兵入關規復大壽遣諜入永平覘我兵多寡事覺斬於市四月大壽同總兵馬世龍楊肇副將祖大樂祖可法張洪謨劉天祿等襲灤州以巨礮擊毀城樓我兵在城中及永平遵化遷安者皆不能守棄城出關而歸大壽仍鎮錦州明年七月督關外八城兵役築城大凌河未訖工太宗統師圍其城諭從征貝勒大臣曰攻城恐士卒被傷不若掘濠以困之彼兵若出我則與戰外援若至我則迎擊駕臨城南山岡諭永平陣獲明將麻登雲黑雲龍曰善射精兵盡在此城他處無有也於是週列營掘濠盡克近城臺堡殲其出城樵穫及偵者諭大壽以書曰曩者朕心實欲講和聞爾等修築錦州城我因以書付爾使人寄爾言爾若不罷錦



州城工我卽舉兵矣嗣獲爾偵卒我仍欲講和釋而遣歸爾竟不報我兵至燕京  
諄諄致書欲圖和好爾國君臣惟以宋朝故事爲監亦無一言復我朕今厭兵革  
願太平故更以書來惟將軍裁之越數日復諭以書曰自古兩國構兵不外戰與  
和二者今和議旣絕朕是以親率大兵深入幸遇將軍於此倘得傾心從我戰爭  
之事我自任之運籌決勝惟望將軍指示蓋休戚與共富貴同享朕之素願今聞  
城內士卒馬匹死斃殆盡甚爲可惜惟將軍熟思而獨斷之勿惑衆言時明兵七  
千自松山赴援又錦州副將二參將遼澤十率兵六千至先後爲我兵擊敗遁去  
太宗度大壽必期外援夾攻我師親率侍衛設伏別遣營中厮卒執旗幟離城十  
里馳騁揚塵聲礮不絕大壽果率衆出城奪西南隅一臺樹梯將登遇鑲紅鑲藍  
兩旗及蒙古諸營兵齊進奮擊又望見上率侍衛及護軍白山騰躍下始知墮計  
急收衆入城已爲我兵陣斬臺下者十七人中創死者百餘人自是閉城不敢出  
旣而永平監軍太僕寺卿張春遵化總兵吳襄副將張吉甫滿庫王之敬等合步  
騎四萬赴援距城十五里太宗親督師破其營陣斬吉甫庫王之敬殲其兵無算吳  
襄與副將祖大樂金國臣參將祖邦林遊擊祖寬蒙古將桑噶爾寨等俱竄走春

及副將張宏謨楊華徵薛大湖參將姜新遊擊黃澤千總姜桂等皆就擒大壽在城中聞槍礮聲謂仍是設計誘之不遣一人出城中糧絕薪盡殺人爲食析骸而爨太宗命陣獲各官致書大壽招之降以姜桂齎往大壽偕衆官出城見姜桂謂曰我寧死於此城不降也越二日太宗復予大壽及副將何可剛張存仁竇承武書諭曰姜桂還言爾等恐我殺降故招之不從夫我國用兵宜誅者誅宜宥者宥既寬宥者悉加恩養爾等豈未之聞也我非不能攻取不能久駐但思山海關以東智勇之士盡在此城若殺爾等於我何益何如與衆將軍共成大業故以肝膈之言屢屢相勸意者爾等不願與我共事故出此支飾之言耶倘實欲共事可遣人來共莅盟誓既盟之後復食其言獨不畏天地乎幸勿遲疑先是八月丁未大兵圍城至是十月乙丑幾又十月矣所獲小凌河至松山一路牲畜甚多又攻降魚子嶂臺所遺糧糗充積足供圍城步騎一月之需壕壘修築益堅大壽謀突圍出則防守嚴密一人不能逸援兵自外至者又皆敗遁計無所出太宗復遣陣獲參將姜新往招之大壽率衆官出城與揖見乃令遊擊韓棟隨姜新詣御營朝見韓棟以軍容整暇嚴密防衛還白大壽大壽令其從子祖澤洪以書繫矢射出城

復以其養子祖可法送大軍爲質邀副將石廷柱過壕親告以心腹語廷柱過壕與語大壽曰人生豈有不死之理但爲國爲家爲身三者並重今旣不能盡忠報國惟惜身命耳若身雖獲全妻子不能相見生亦何益上果能不回軍進圖大事當設策先取錦州錦州得庶可保吾妻子石廷柱還奏上復遣同巴克什達海往諭曰我旣招降爾等復攻錦州恐我兵過勞爾等降後錦州或以力攻或以計取任爾等爲之不然爾等坐守城中我惟有駐兵圍困而已明日大壽令其中軍施大勇來代奏言降志已決欲令一人潛入錦州偵視倘被詰出虛實奈何或親率兵詐作逃走之狀何如悉惟上裁是時城中各官皆同謀歸降獨何可剛不從大壽令二人掖出城外殺於大軍前途遣副將四遊擊二齋誓書列大壽及副將劉天祿張存仁祖澤潤祖澤洪祖可法曹恭誠韓大勳孫定遼裴國珍陳邦選李雲鄧長春劉毓英竇承武參將吳良弼高光輝劉士英盛忠祖澤遠胡宏先遊擊祖邦武施大勇夏得勝李一忠劉良臣張可範蕭永祚韓棟段學孔張濂吳泰成方一元涂應乾陳變武方獻可劉武元楊名世三十餘人各言率衆歸降後若違心背盟則殃及其身死於刀箭之下太宗率諸貝勒莅盟命巴克什庫爾禪龍什問



大壽曰既經盟誓天地當用何策以取錦州大壽曰我卽親至密議太宗復遣二臣諭曰盟誓雖申民心未定今晚且勿來大壽曰事已定更何疑遂親詣御營是爲本朝天聰五年十月戊辰也上命諸貝勒迎之一里外時初更將盡列炬以俟上出幄大壽欲跪上止之行抱見禮既入幄命坐於左設饌以金卮酌酒親授飲大壽曰願借上酒奉獻遂酌酒跪獻上飲畢與語良久以御用黑狐帽貂裘及金飾鞋帶等物賜之諭曰因在戎行攜物無多不能以嘉物相贈大壽曰蒙上優待如此臣雖至愚豈木石耶遂辭入城明日上用大壽策命貝勒等率八旗諸將及兵四千人俱作漢裝大壽率所屬兵三百五十人以二更起行趨錦州礮聲不絕爲大凌河城中人哭圍奔還狀會大霧人覲面不相識軍皆失隊伍各收兵而還十一月庚午朔諭諸貝勒曰朕思與其留大壽於我國不如縱入錦州令其獻城爲我效力卽彼叛而不來亦非我意料不及而誤遣也彼一身耳叛亦聽之若不縱之使往倘明國別令人據守錦州則事難圖矣今縱還大壽一人而攜其子姪及諸將士以歸厚加恩養再圖進取庶幾有益乃遣人傳諭詢大壽曰今令爾至錦州以何計入城旣入城又以何策成事大壽對曰我但云昨夜潰出逃避入山

今徒步而來錦州軍民俱我所屬未有不信者如聞礮則知我已入城再聞礮則事已成上可以兵來矣遂以其從子澤遠及厮卒二十餘自隨既渡小凌河舍騎徒行遇錦州探卒偕入城越三日遣人至大凌河語其所屬諸將曰錦州兵甚衆將從容圖之爾諸將家屬已潛使人贍養後會有期倘有衷言卽遣人來無妨也於是上將旋師賜敕大壽令毋忘前約大壽復遣人齎奏至言期約之事常識於心因衆意懷疑難以驟舉望皇上矜恤歸順士卒善加撫養衆心旣服大事易成至我子姪尤望垂盼上命毀大凌河城攜大壽從子澤洪等及諸將以還優賚田宅服物器用降兵萬餘咸分隸安業大壽初還錦州自言突圍出明巡撫邱禾嘉信之旋知其已納款以疏聞莊烈帝但羈縻大壽勿罪也惟以蒙古將桑噶爾寨等赴援不力戰敗先遁密令大壽殲之事洩桑噶爾寨率衆蒙古環甲三晝夜欲執大壽來歸本朝大壽慰之曰我視爾如兄弟爾安得若此桑噶爾寨曰聞欲盡殺我等圖自救耳大壽曰殺我自必及爾殺爾自必及我與之盟誓而定敕使至自京師召之者三大壽語錦州將士曰我雖竭力爲國其如不信我何終弗往越二年上遣都統阿山等略錦州賜之書不報明年豫親王多鐸等征錦州大壽自

勒步騎出城五里立營令松山城守副將劉成功等以兵三千迎戰至大凌河西與我前鋒軍遇未接戰豫親王率兵自山而下軍容甚整塵起蔽天明兵不辨我軍多寡大驚奔潰我軍分路追擊擒遊擊曹得功及守備三人殲其兵五百獲馬及甲冑無算大壽竄入城崇德元年上授大凌河降將世職澤潤三等子澤洪可法一等男皆任參政二年以蒙古輸誠朝鮮底定廓清皮島諸捷音敕示大壽使密陳證明之策大壽又不報三年移駐中後所邀阻征山海關大兵互有殺傷上親臨以敕諭之曰數載相別朕謂將軍猶在錦州欲一晤而旋不意將軍乃駐此地出城一見是所願也至去留之意惟將軍是聽朕終不相強若曩則來而釋之今乃誘而留之何以取信於天下乎將軍雖屢與我軍相角爲將之消固所宜然朕絕不以此介意毋因此而見疑尋命移師攻其兵之列營城外者至則大壽已收兵入城矣乃遣俘獲人齎敕再往言曩者大凌河釋汝朕之諸臣每謂朕昧於知人今將軍甚宜出城相見若懷疑懼則朕與將軍可各將親信一二人於中途面語蓋朕之欲相見者一以解朕昧於知人之嘲再則使將軍子姪及大凌河各官皆謂將軍之能踐言也大壽終不敢出我軍攻克旁近諸堡大俘獲而還四年



二月上統師圍松山分兵攻連山塔山杏山城者大壽從子澤遠也大壽令部將三人率兵九百船十隻援之將入城我前鋒軍躡擊俘百人斬五十人獲船一甲四十先是睿親王多爾袞等征明入長城薄京師趨山東明人大驚調大壽兵入援使者數至大壽甫行聞我軍圍松山仍還守寧遠上命大學士希福等齎敕至錦州開陳利害諭大壽妻令其審時度勢導大壽來降毋執迷以及於禍大壽於寧遠揀選壯士良馬約六百餘令副將楊震祖克勇徐昌永等率之趨錦州經烏忻河口爲我分駐兵擊敗震就擒上率四旗護軍馳至錦州攻其山寨搜剿敵衆陣斬昌永擒克勇斬級四百獲馬五百餘上聞睿親王等凱旋乃班師大壽復還鎮錦州五年鄭親王濟爾哈朗率兵屯田義州有杏山城西五里駐牧之蒙古蘇班岱等願來歸王以兵迎護之大壽偵我兵寡令遊擊戴明引兵七百與駐守松山杏山之總兵吳三桂劉周智合兵七千邀我軍我軍分隊衝擊大敗其衆斬副將二參將一獲馬械甚多六年鄭親王等復圍錦州大壽令蒙古兵守城郭蒙古台吉諾木齊等謀歸我使齎降書者縋而下約獻東關已有期大壽覺欲擒衆蒙古日暮整兵至城郭諾木齊等迎戰聲聞城外我軍薄城下蒙古縋繩援

以登合擊大壽退守內城其都司守備以下十餘員及戶口六千餘俱來降八月明總督洪承疇聞大壽危困率兵十三萬赴援上統師進擊屢敗之杏山塔山及高橋諸要隘留王貝勒等圍洪承疇於松山城七年二月城破擒洪承疇及大壽弟總兵大樂遊擊大名大成等並降之大壽方困守錦州一年外援盡絕糧竭食人戰守計窮聞松山城破大懼使人詣鄭親王軍言得見祖大樂卽降鄭親王令使者見之大壽復使人請盟鄭親王怒曰我圍困此城旦夕可取有何顧慮乃與爾盟誓乎將攻之大壽乃遣澤遠及中軍葛勳引罪明日率衆詣軍營叩首獻城事聞諭凡大壽族屬部衆概勿殺召大壽及諸降將賜晏大壽跪奏曰臣昔困於大凌河計窮乞降蒙恩遣還錦州取妻子兄弟皆來臣不惟負恩且屢與大軍對敵今以食盡來歸應萬死上諭之曰爾之背我一爲爾主一爲妻子宗族耳得爾不加誅朕懷之已久此後竭力事朕則善矣命分降衆隸漢軍八旗大壽遂隸正黃旗仍官總兵賜賚優渥降將顧用極奏曰大壽不得已而降其心變易不常恐仍效凌河故轍都察院參政張存仁亦言大壽悔盟負約勢窮來歸卽欲生之待以不殺足矣宜勿任用上以明總兵吳三桂等未附卒厚遇之十月大壽奉命致

書招三桂來降三桂大壽甥也答書不從是時貝勒阿巴泰等征明以明兵固守山海關外五城別由黃崖口入薊州越京師略山東郡邑八年正月大壽奏言臣先執謬自尊其身深愧歸降之晚伏覩皇上寬仁神武一統之業朝夕可定以臣目擊機會先取山海關五城最爲上策明文武官之能否城之虛實兵之強弱臣所洞悉宜乘此時攻取中後所收吳三桂家屬彼必爲之心動其餘中右所中前所前屯衛一鼓可平也破山海更易於破寧遠山海軍士皆四方烏合之衆不諳陣戰絕其咽喉撤其藩籬海運不通長城不守彼京師難保三桂安能固守寧遠也是年六月大軍之證明山東者始凱旋十月鄭親王率兵攻中後所前屯衛中前所取之明年世祖章皇帝定鼎京師凡大壽子姪皆授顯爵順治十三年大壽病卒命祭葬視一品大臣例以從子澤潤爲長子屢敘軍功遇恩詔晉爵一等子加一雲騎尉官至都統次子澤溥官福建總督第三子澤洪官副都統俱別有傳

祖澤潤 弟澤溥

祖澤潤遼東人大壽長子明錦州副將本朝天聰五年隨大壽來降隸漢軍正黃旗崇德元年授三等子任兵部右參政尋擢本旗都統隨鄭親王濟爾哈朗攻克



中後所前屯衛二城敘功晉二等子順治元年同都統葉臣招撫山西軍旅賜銀五百兩五年坐誣訐英親王阿濟格勒索屋價事革職並削世爵尋隨征大同叛鎮姜瓖攻克渾源州朔州左衛汾州太谷縣五城八年敘功授騎都尉澤潤訴前革職屬枉詔復原爵兩遇恩詔晉一等子兼一雲騎尉十二年隨經略洪承疇招撫湖南駐長沙十六年卒於軍十七年賜祭葬如例子植松襲世爵潤弟澤溥明左都督本朝順治元年投誠授一等待衛十八年授山西總督尋調山東時棲霞縣土賊于七糾黨據鋸齒山出掠詔靖東將軍濟席哈往剿破其寨斬馘無算于七竄入海濟席哈班師而崑崙招虎兩山賊之附于七者猶阻險不下康熙元年澤溥率副將劉進寶剿平之二年疏言寧海州之黃島蓬萊縣之海洋等島游氛未靖請暫移居民內地免輸丁糧下部議行會原任浙江按察使宋琬及姪紹祖等爲族人宋一柄挾仇誣告通于七謀叛事下澤溥尋奏琬等叛謀無確據不便強擬事下部議以澤溥不能審取確供請議處命再鞫澤溥執奏如前經部兩議上一照謀叛律置極典一情有可疑杖流寧古塔得旨叛逆重罪理應詳審如實卽應正法如虛卽應免罪爾部將無確據之事懸揣兩議俱屬不合宋琬等著免

罪澤溥亦免議處四年以疾解任六年復授福建總督七年疏言向例各府推官赴省承審欽件今推官裁汰知府有地方專責不便輕離職守同知通判事簡請各輪班赴省承審部議從之八年乞休允之十八年卒

### 祖澤洪

祖澤洪遼東人大壽從子明錦州副將隨大壽修大凌河城本朝天聰五年出降後隸漢軍鑲黃旗崇德元年正月命爲吏部承政六月以大凌河歸附各官照原銜授世職授澤洪一等男尋遇恩詔加一雲騎尉三年定部院官制設滿洲承政一左右參政二澤洪爲吏部左參政先是大壽之降也請歸錦州爲內應縱之去後竟負約六年大軍圍錦州令澤洪以書招之七年授漢軍鑲黃旗副都統八年隨貝勒阿巴泰證明至渾河疊橋以濟明總督范志完拒戰澤洪同參政張大猷擊敗之順治元年詔改參政爲侍郎澤洪仍任吏部尋偕都統葉臣等追斬流賊李自成僞將陳永福克太原二年偕都統李國翰等赴西安敗流賊餘黨孫守法及叛鎮賀珍兵又搜商州餘賊敗其酋二隻虎四年以不稱職解侍郎任六年隨大軍剿叛鎮姜瓖於大同復渾源州左衛澤州汾州太谷縣五城八年敘功晉爵

三等子兩遇恩詔遞加至一等子尋兼授弘文院學士十三年以病解都統及學士任康熙四十年卒賜祭葬如例子良棟襲卒弟良璧襲官至福州將軍自有傳

鄧長春

鄧長春遼陽人明前屯衛副將守大凌河本朝天聰五年隨總兵祖大壽來降賜金幣鞍馬崇德元年授三等男三年授戶部承政尋裁承政漢員改本部右參政七年分漢軍爲八旗長春隸鑲黃旗給人戶爲世管佐領八年鄭親王濟爾哈朗證明寧遠長春任參領攻克前屯衛中後所敘功晉二等男順治元年更定官制名參政曰侍郎長春仍在戶部奏請給京員俸薪得旨俸薪爲養廉重典自不可緩命會同兵部詳列規制以進裁定施行是年十月坐覆免泰安州錢糧不白本部尙書用印信革侍郎專任參領降世職爲一等輕車都尉二年隨豫親王多鐸破流賊李自成於潼關定河南平江南進取杭州遇嘉興敵兵乘勢來犯長春奮擊敗之我兵先後取揚州江陰崑山常熟等城長春皆督兵礮擊有功議敘加一雲騎尉八年從征浙江與副都統吳汝玠等爲前部擊敗舟山海賊三遇恩詔累晉一等男十年以老病休致康熙十五年卒子志琳襲爵



耿仲明

耿仲明遼東人初與孔有德同爲明總兵毛文龍部校後隨有德走登州巡撫孫元化並用爲參將及有德反吳橋其黨李梅者通洋事覺皮島總兵黃龍繫之獄仲明弟仲裕爲龍部下都司謀作亂龍捕斬之疏請正仲明主使罪時有德還攻登州仲明遂糾將士之舊籍遼東者爲內應城陷有德自稱都元帥仲明自稱總兵招致島中副將陳有時毛承祿等龍遣副將尙可喜金聲桓撫定諸島時天津有裨將孫應龍者大言於衆曰仲明兄弟與我善我能令其縛有德來巡撫鄭宗周予以兵二千從海道往仲明聞之亟僞爲有德首以給之應龍舟師抵木城延之入猝縛斬之殲其衆得巨艦以禦黃龍兵後有德出攻萊州敗還明兵合圍登州仲明隨有德攜人衆輜重來歸本朝天聰七年四月命給田宅於遼陽安輯部衆召見晏勞授仲明總兵官恩賚優禮同有德尋隨貝勒岳託證明旅順多斬獲八年二月有德劾仲明侵漁所部財物致告訐者衆仲明旋入奏引咎翼日召有德諭曰耿總兵謂訐彼之人不可留於部下欲改隸元帥以圖和好甚爲合禮其善撫之復召諭仲明曰爾以訐告之人改隸元帥其黨尙有留部下者宜善加撫

養勿念舊惡若日後懷仇虐使是爾不思報國止爲身謀也倘若其人越分妄行自作罪孽國法具在朕亦安肯姑容是年秋從征明由大同入邊至代州屢敗敵兵仲明每奉命出征輒與有德偕其軍營纛旗亦以白鑲皂號天佑兵崇德元年四月封懷順王十一月從征朝鮮敗其援兵二年攻克皮島賚蟒服銀幣旋以部衆違法妄行諭申嚴約束毋蹈故轍三年從征明攻克錦州城西臺戚家石家諸堡又招降大福堡賜所獲人戶牲畜自是上親征松山杏山塔山及遣諸王貝勒攻錦州寧遠仲明皆率兵從與有功七年八月奏請令部衆隸八旗漢軍於是隸正黃旗九月部下參領石明雄許仲明匿所獲松山塔山人戶私收叛逃伏誅之馮有時骸骨致祭及殺斃無辜諸款狀鞠實罰白金千兩八年九月隨鄭親王濟爾哈朗征明取中後所前屯衛十一月部下參領宋國輔潘孝及明雄合謀害仲明仲明以聞下法司鞠實斬國輔等籍財產給仲明順治元年四月隨睿親王多爾袞入山海關擊敗流賊李自成追剿至望都十月上御皇極門宴賚之尋隨豫親王多鐸由河南征陝西二年破自成於潼關進取西安移師征江南凱旋賚貂裘蟒服良馬黃金百兩白金萬兩還鎮遼陽三年同有德征湖南既至長沙分兵

擊敗明桂王總兵楊國棟於牛皮灘合攻衡州祁陽及武岡皆克之擒其總兵郭肇基五年振旅還京賚黑狐紫貂冠服彩帛鞍馬黃金二百兩白金五千兩六年五月賜金冊金印封靖南王命同平南王尙可喜率兵二萬征廣東攜家以隨仲明旣行其部下副都統陳紹宗參領劉養正佐領張起鳳魏國賢收留隱匿逃人事覺諭仲明日陳紹宗劉養正張起鳳魏國賢雖有航海來歸之功今隱匿逃人是犯不赦之條矣曩遣王南征以爲腹心可寄必能利益國家何乃縱屬誘掠實出意外其攜去隨征者甚衆卽嚴察械歸毋隱仲明奉諭旋察出三百餘人械歸上疏引罪法司議仲明應削王爵罰白金五千兩命從寬免削爵仲明未及聞命十一月次吉安自縊死七年禮部議遣官致祭睿親王謂其非令終不當予祭王爵亦不當襲八年上親政乃以其子繼茂襲王爵別有傳

全節

全節廣寧人明參將隸孔有德部下本朝天聰七年隨有德自登州航海來歸授參領尋擢副將順治六年封有德爲定南王統兵征廣西節隨征克桂林授右翼總兵官時流賊張獻忠餘黨孫可望李定國降附明桂王朱由榔踞黔粵間節率



所部攻剿克慶遠駐守其地招降宜山河池思恩荔浦等縣九年七月可望掠湖南陷沅州武岡進犯寶慶有德遣將率桂林兵赴援檄節由慶遠移駐梧州旋聞定國將犯廣西復檄節移兵平樂會同提督線國安總兵馬雄禦擊節方趨柳州定國已襲陷桂林城有德死之柳州副將鄭元勳等叛降敵謀襲節節間道走梧州與線國安馬雄合定國以衆來犯我兵戰失利節負重傷潰圍出乘舟至肇慶請兵於平南王尙可喜可喜遣水師助之乃還定梧州藤縣潯州十年正月攻復平樂馬雄守梧州節與線國安合兵擊敗桂王兵部陳經猷將軍王應龍遂復桂林其衛國公胡一青義寧伯龍韜總兵楊振威等率衆數萬屯陽朔永福間一再來犯皆擊之潰遁敍功加都督銜予爵三等子移駐武宣剿平餘黨於象州賓州擒其總兵韋文有羅天舜復移駐荔浦招撫富川縣之山岡猺獞時猺獞爲明裔朱盛濃及豐城侯李茂先總兵龔瑞等所餌合謀抗拒大兵盛濃茂先據黔楚交錯之山倚險爲寨與可望定國聯絡聲援剽掠郡邑節同線國安遣兵進剿連破其寨陣擒盛濃及其弟盛添諸猺獞俱望風歸順十五年線國安奉詔進征貴州奏請以節移駐柳州十六年督兵進剿至融縣斬級無算陣擒李茂先追擊龔瑞

於懷遠瑞窮蹙乞降康熙元年改右翼總兵爲左江鎮總兵卽以節任之七年七月卒贈太子少保賜祭葬如例先是桂林城陷時節妻溫氏及妾婢數人並自縊子成忠年甫十一被掠去及大兵定貴州經略洪承疇訪得之於投誠總兵趙三才營攜以歸節至是襲三等子爵

吳汝玠

吳汝玠遼陽人明錦州遊擊本朝崇德七年三月大軍取明錦州汝玠來歸授佐領隸鑲紅旗漢軍十一月隨貝勒阿巴泰等證明由黃崖口長城入越京師趨山東敗明總兵張登科和應薦等八年隨鄭親王濟爾哈朗取明前屯衛中後所二城有功尋授參領順治元年隨都統葉臣等征山西流賊李自成已遁入西安賊黨陳永福據太原抗我師汝玠攻克其城復隨英親王阿濟格征陝西進剿流賊至湖廣敗賊將馬進忠於武昌二年擢鑲紅旗漢軍副都統三年敘功予雲騎尉世職復隨肅親王豪格敗叛鎮賀珍武大定等於秦階二州五年改授禮部侍郎六年命以副都統駐防杭州時明魯王朱以海及其臣阮進張名振等踞舟山八年八月汝玠同總督陳錦都統劉之源提督田雄等分兵進剿由定關出海汝玠

同前隊舟師揚帆先發遇於橫洋奮勇邀擊官軍並進敗之擒阮進乘勝抵舟山  
汝玠率衆先登岸大兵繼之薄城堙鑿地道垣堞摧陷海中名振勢蹙縱火自焚  
遂擁魯王遁九年海上鄭成功遣其黨犯漳州汝玠奉詔率師至福建敵聞風毀  
橋列陣拒戰汝玠與平南將軍金礪擊敗之復遣步兵追擊斬獲三千於海岸漳  
州圍解成功復驅衆數萬結營海澄縣東汝玠同礪分兵進剿三戰三捷斬獲無  
算成功遁走十三年寧海大將軍伊爾德統師赴浙江剿舟山餘孽令汝玠及總  
兵張杰分兵自溫台出海會剿過黎陽口遇敵艦三百餘力戰大敗之又擊之於  
崇門洋獲戰船四生擒其將丁宏業論功並遇恩詔晉世職爲二等輕車都尉十  
四年十二月以老病致仕康熙十一年卒賜祭葬如例子國鼎先卒以其孫洪襲  
世職官至甘肅提督

宋權

宋權河南商邱人明天啟五年進士官順天巡撫駐密雲受事甫三日流賊李自  
成陷京師本朝順治元年五月權斬賊將黃錠等籍所部投誠命巡撫如故首獻  
治平三策一議崇禎廟號以彰至德念舊主御宇十有七年民窮寇起卒致篡弒



之禍幸聖主殲賊復仇祭奠以禮凡有血氣莫不感泣倘敕下廷臣議定廟號以光萬世則天下咸頌大聖人之仁至義盡四海可傳檄而定一盡裁加派弊政以蘇民生明朝以軍需浩繁有加派之徵有司假公濟私明徵之外有暗徵公派之外有私派民困已極今請照萬曆初年賦役全書爲正額其餘各項加增悉予蠲免則百姓熙然樂業一廣育賢才以佐上理臣所知者如薊遼總督王永吉原任監軍道方大猷原任蘇州道楊毓楫及原任南京禮部尙書朱繼祚原任戶部侍郎葉廷桂等均濟時舟楫惟皇上召而用之更請敕廷臣各舉所知廣收得人之效奉旨崇禎廟號蠲免賦稅俱已有旨加徵弊政速宜停止所舉各官該部詳察徵用仍傳諭廷臣各舉所知以副求賢圖治之意逾數月奏薦寶坻進士杜立德等十一人又請敕禁外任文武官擅離職守出入京師時權仍駐密雲撫治二十餘州縣兼理軍務旋以遵化當衝要命移駐焉前後擊降流賊餘黨數千人豐潤被賊掠權悉力擒治因賊渠未獲自請罷斥溫旨慰留之部民有以祖軍民壯兩害具訴者權疏言明制祖傳軍籍隸在營路選取民壯隸在州縣身故則勾子孫子孫絕則勾宗族宗族絕則勾戚屬流離逃竄亂由此階請特沛恩綸除茲弊政

又有私雕順天巡撫印信僞爲糾舉咨文投部者事覺逮治權疏言用舍者君人之權黜陟者銓樞之政薦劾者撫按之職請敕各省撫按除商權細事准用咨文外凡有關用舍大典必具疏請不須以咨文從事則百弊俱清疏上並如所請著爲令畿輔旣平詔撥近京荒田及明朝貴戚內監等莊田畫爲旗地凡民田錯雜者另給官田互易權疏言農民甫種易授之田廬舍無依耕種未備請特恩蠲租三年與民休息又言薊州地處荒殘前奉恩詔以大軍經過蠲租一半小民輸納猶艱請照霸州一體全蠲密雲當兵燹之餘流亡未集請將荒地逃丁派徵錢糧悉與豁除其現在貧民將寶坻縣貯倉粟穀分別賑濟已荒地畝仍招徠開墾俟熟起科又言農事旣興屯政宜講計三協屯田舊額十八萬餘畝今請除戰兵外每守兵給田十畝作五月兵糧再酌餘月應額之糧給以牛種俱下部議行會奉詔優卹綠旗陣亡兵每名給家屬銀三十兩權以總計三協費帑金數萬此莫大恩施但恐委之營員或有混冒侵欺之弊奏准特遣部臣莅視散給俾各沾實惠三年擢國史院大學士四年充會試主考官五年以母喪請終制得旨內院機務繁重著照舊入直私居持服六年五月充纂修太宗文皇帝實錄總裁官二月再

充會試主考官九月乞假葬親尤之十月恩詔加太子太保七年還朝值議御史巡方事權力止停差奏罷諸巡方御史八年條陳廢員宜起巡按宜復一疏給事中陳調元王廷諫等以起用廢員已奉明旨權不言於聖旨未行之先而言於既行之後巡按之差在當日權以爲不必行在今日權何又以此爲請且追議其母喪未除入闈主試連疏劾之下吏部部議權老病宜罷歸遂奉詔致仕九年卒於家禮臣奏權被劾致仕應減祭葬之半上以權無大過且入關之初誅流賊黨羽率衆首先投誠功不可泯特贈少保兼太子太保賜祭葬如例諡文康長子忻廕中書舍人次子犖別有傳

王宏祚

王宏祚雲南永昌人明舉人官戶部郎中督餉大同本朝順治元年投誠授岢嵐兵備道宣大總督吳孳昌以宏祚籌畫軍餉協力奏留大同二年總督李鑑薦其堪任臺省改授戶部郎中時中原甫定圖籍散佚部臣以宏祚諳習掌故奏令編訂賦役全書三年加太僕寺少卿銜六年遷太僕寺卿仍兼戶部郎中十年擢戶部右侍郎是時雲南貴州未隸版圖而湖南辰州爲孫可望侵踞宏祚請於江南



江西湖廣豐稔之地採糴米穀厚儲糧餉爲恢復辰州進圖黔滇計又言明白洪武時以沐英鎮滇世襲黔國公迄今沐天波久爲滇省人民士司所信服其僚屬有閒處江寧者宜令往滇招天波爲內應貴州有九股黑苗自都勻黎平蔓延廣西慶遠湖南靖州近來爲孫可望蹂躪亟宜加意撫綏俾傳諭諸土司歸化至其冠服異制當仍其舊使勿驟更易上以所奏有資撫剿令經略大學士洪承疇酌行十一年給事中郭一鶚劾宏祚修賦役全書逾久未成總理錢法巧增鑄爐於宣大裁兵餉銀濛混浮消宏祚疏辨一鶚復劾其巧言飾非詔部臣察議部臣以一鶚所劾各款不實惟各省造冊遲延致稽成書宏祚不舉劾論罰俸尋轉宏祚左侍郎十二年疏言有司私派累民請嚴敕禁又將領借名冒餉敕督撫嚴覈補其虛額汰其老弱革其侵剋俱下部議行十三年戶部援恩詔赦免員外郎朱世德虧缺河西務稅銀部臣咸坐瞻徇降革有差宏祚降三級留任十五年賦役全書成錄宏祚編輯勞還所降級是歲考滿加一級廢一子入監尋擢戶部尙書加太子少保命同大學士巴哈納等較訂律例十六年諭獎勤勞奉職諸臣晉太子太保先是宏祚父母遠在雲南音問阻絕至是大兵平雲南宏祚聞其父母俱病

歿疏請回籍守制得旨覽卿奏具悉至情但部務殷繁正資料理著在任守制不必回籍踰月復諭以卽出供職十八年聖祖仁皇帝御極宏祚乞假歸葬詔允所請旋諭吏部曰前以宏祚情詞懇切特准暫歸今思部務殷繁宏祚才具敏鍊急需總理著事竣卽還朝康熙三年六月補刑部尙書十一月復任戶部尙書六年充會試正考官是年七月輔政大臣鼈拜構陷戶部尙書蘇納海罪引其黨瑪爾賽代之與宏祚理部務輒齟齬大學士班布爾善亦鼈拜黨也與瑪爾賽素相比七年四月戶部有失察書役假印盜庫銀事吏部議戶部諸臣處分援恩詔免班布爾善獨票擬宏祚革職遂罷任八年上察知鼈拜瑪爾賽班布爾善等罪狀起宏祚爲兵部尙書九年以老乞休詔致仕乘驛歸里食原官俸十一年宏祚具疏辭俸諭曰卿在官著有勞績引年乞休特賜祿俸以資頤養不必固辭十三年卒賜祭葬如例諡端簡

李化熙

李化熙山東長山人明崇禎七年進士選湖州府推官丁憂服闋補河間府推官累遷天津兵備道擢四川巡撫方就道改調陝西總督會孫傳庭敗歿於潼關余

應柱往代以逗遛奪職乃擢化熙兵部右侍郎總督三邊時西安已失化熙不能行既而命率總兵高傑援山西未至而蒲州平陽相繼陷及李自成陷京師化熙率所部就食於家本朝順治元年八月化熙遣遊擊吳伸上疏歸誠並題明所部兵馬數目及地方土寇情形詔入朝而天津總督賂養性亦薦其才乞賜徵用九月授工部右侍郎十月化熙疏薦明副都御史竇毓祥太僕少卿劉徽戶部侍郎宋之普給事中韓源等得旨著吏部確校才品酌量起用二年四月轉左四年四月兼兵部侍郎六年十月加右都御史銜八年八月晉太子太保九年十月擢刑部尚書十年四月條奏慎刑五事一恤刑之道宜速查會典每年熱審外五年又一大審謂之恤刑在京刑部會三法司審錄在外遣刑部大理寺官分行直省會巡按御史審錄其矜疑遣釋之數恆倍於熱審前經臣部題請奉旨以順治八年爲始五年一遣但現在直省刑獄難保無冤如必待順治十二年再遣轉恐不得同沾泣罪解網之恩請自今年始卽遣廉幹官員分行直省照例矜恤一死刑之等宜別查律載死刑分立決監候二等斬立決者以待謀反大逆強盜等其餘斬絞俱監候今在外所擬死刑先下臣部核奏巡按御史再行親審始奏處決而在



內死刑一概立決是內外兩法也臣愚以爲一切死刑宜悉遵律例分別兩等以昭畫一一秋決之規宜復查會典每歲行刑必於霜降後所以順天時重人命也誠復監候之例則獄中積死刑漸多宜照審錄舊典於每歲霜降後具題請旨將現監重囚命九卿科道官會同審錄情真罪當者具奏處決其可矜疑及詞不服者另請詳審庶無冤濫一熱審之令宜著查會典小滿後三法司會審現監罪囚答罪釋放徒流以下減等重囚可矜疑者奏請定奪蓋以夏暑恐獄囚非辜瘐死故急爲決遣或令出獄聽候臣謂宜著之會典歲一舉行一罪人逃兩次者例絞人命至重此輩法固難宥情猶可矜請再寬一次經三次立付纆刑疏入下部議行惟卹刑仍遵前旨五月疏言舊例臣部專管覆奏科鈔及御前發審重事卽在內五城各衙門必重犯始送部在外道府州縣小事無須徑達乃今科鈔歲不下千餘件俱須核擬題奏及奉諭旨後又有滿漢各衙門應行咨文及登記檔案等事是一事而更端再四至下三法司者較此又多一番關會招內或未明晰復駁查不已徒成遲滯近復以投旗人逃後專聽臣部歸結其中拏解窩隱居半再如御狀通狀滿洲木牌應行詳審及各衙門未經奉旨事件徑送臣部頭緒不清時

日易滯竊以爲旗下重事既悉歸臣部審理其小事在內宜責成五城御史在外宜責成督撫巡按至拏解逃人更繁尤須有專董之官大理寺事簡請敕令料理他如土賊應歸兵部田土戶口應歸戶部庶臣部得循分盡職一清積案部議均如所請尋大理寺卿魏瑄奏拏解逃人事大理寺無番兵捕役難以專董復下部議增設督捕侍郎詳魏瑄傳化熙以母老乞終養允之並令馳驛還里康熙八年卒賜祭葬如例

### 任濬

任濬山東益都人明崇禎四年進士累官兵部右侍郎兼右僉都御史流賊李自成陷京師濬被執不屈賊釋之本朝順治元年以兵部左侍郎劉餘佑薦授戶部右侍郎督理錢法二年乞假省親八年丁憂服闋補原官尋授倉場侍郎加右都御史駕幸通州賜貂裘等物十一年刑科給事中陳忠靖劾濬不能禁革陋規有負簡任濬回奏部議免罪遷刑部尙書十年正月疏言律多不備例出隨時添註殊欠折衷又八旗事多用靠例如律殺人者抵而例有義憤自首減免之條給主埋葬而例有賠人之條盜賊未獲贓而例有追產賠主之條律有五刑而例自大

辟以下皆止鞭一百如此類頗多律例不符滿漢互異乞皇上敕滿漢堂官專領其事慎選司員一一商榷疑難者請旨裁定靠例可更者一準於律不可更者卽載入律條著爲令又大辟有立決監候兩等按律所言決不待時謂不待秋決非謂招成不待覆奏卽處決也查會典凡在外絞斬凌遲監候者依期俱差官處決如有決不待時重囚詳議具奏卽差官前去審決蓋恐立決中尙有疑情可臨時三覆詳慎人命嗣後凡奉旨依擬立決在內者三法司仍會審覆奏行刑在外者宜復差官審決例庶無冤濫下部議行二月以年老致任十三年卒賜祭葬如例

### 曹溶

曹溶浙江嘉興人明崇禎十年進士官御史巡視西城嘗劾大學士張四知溺職不報本朝順治元年五月投誠仍原官疏陳六事一請定官制使事有責成不相推諉又上下情宜浹洽庶人思效用一請定屯田鹽法錢法規制俾俸餉有所給取一請禁兵丁牧馬踐食田禾一請有司巡緝土賊擒爲首者誅之餘皆勸諭向善則不煩兵力而賊寇自靖一請發帑金於近畿麥熟處平糶以裕倉儲備賑恤一京師採煤西山近因盜賊梗路兩月不至請設兵循徼使無劫掠之虞得旨所



陳六事深切事務下所司卽行六月授順天學政疏言舊例選拔貢生彙八府諸生通考今畿輔當兵燹之後諸生或艱於遠涉宜徧歷各府舉行歲考補給廩額卽於廩生中拔其尤者府學貢二人州縣學貢一人順天府學首善士多請貢六人並令官給路費詣廷試分別選用至各省士子有遊學京師者宜令附順天府學考試其入學補廩充貢俱於正額外另議名數又言褒揚節義有關風教當闢賊煽惑時誓師殉義者不少宜敕學臣詳訪請旌其隱逸之士有深通古今明於治術熟諳韜略周知地利者許特疏薦舉以備徵用又請以遼東十五學改附永平府分設教官如各州縣學例尋疏薦明進士王崇簡等五人請旌殉節明大學士范景文尙書倪元璐等二十八人孝子徐基等七人義士王良翰等五人及節婦十餘人皆下部議行二年冬試竣回御史任三年二月充會試監試官奏請嚴防懷挾傳遞移號換卷諸積弊寬免字畫粗率格式參差之貼例謄錄務期端楷對讀宜令詳審得旨所奏會場事宜簡明切當下禮部卽行三月遷太僕寺少卿先是恩詔錄七品以上京官子弟各一人由附生充監生由廩生增生充貢生溶任學政時所舉充貢監有曾於明季襲世職及中武舉者至是事覺坐失察降二

級調用尋復以選拔貢生逾額革職回籍十年詔三品以上大臣各舉所知大學士范文程等因以上親政前部議降革原奏次第奏覽於是溶與降調給事中林起龍劉鴻儒並荷恩諭曰三人降革皆非品行玷缺者比令來京錄用各復原官十一年授太常寺少卿尋遷左通政十二年正月疏言通政之官職在納言請嗣後凡遇挾私違例章疏卽予駁還仍行劾奏至遠近災荒民生吏治宜許通政司諸臣就章疏所列隨事建言無忝敷奏之任又言開創時隨處駐兵乃一時權宜今當歸併於盜賊出沒險阻不測之地則兵不患少其閒散無事之兵遇缺勿補遇調卽遣則餉不虛糜且當裁併提鎮改增副將以專統轄而重責成又言諸司職掌未有成書請以近年奉旨遵行者參以前朝會典編爲簡明則例以勵官守並下部議行三月擢左副都御史疏請時御便殿召大臣入對以辨其才識品行並賜筆札令面舉所知可杜瞻徇欺蒙之弊又言明代中葉以後議論盛而實事衰至今積習未改欲使羣臣鼓任事之心言官作敢言之氣在斷自宸衷遇諸臣章疏切中利弊者卽敕力行有辨言亂政挾私撓法者卽摘發示戒無概下部議以致稽延上並皆嘉納之擢戶部右侍郎九月詔吏部都察院會奏侍郎寺卿等

官才優經濟者改外用溶預焉遂授廣東布政使十三年遇京察戶部以溶曾任侍郎已改布政使牒吏部同都察院核議溶舉動輕浮應以浮躁例降一級仍外用因降山西陽和道康熙三年山西巡撫白如梅遣溶慶賀萬壽聖節至京溶援朝覲官得條陳利病例疏言大同屯地舊例每頃徵銀不及一兩至兵丁墾沿邊荒地不徵銀名曰贍軍地後因軍餉不敷每頃每月扣餉銀二錢兵已貧乏近因兵額裁減所遺之地分撥現在之兵有每兵三四頃坐扣月餉者爲累滋甚請嗣後限每兵二頃如屯田徵銀之數按月扣餉地少則力可任耕租輕則兵仍足食又請沿邊設墩軍墩每五人每人與近墩荒地一頃免其徵輸使擊拆巡邏兼供修葺邊牆之役下所司議行尋以裁缺歸里十七年詔舉博學鴻儒大學士李蔚杜立德馮溥合疏薦溶以丁憂未赴十九年學士徐元文薦溶佐修明史部議俟服滿牒送史館二十四年卒

衛周允

衛周允山西曲沃人明崇禎七年進士初任浙江金華府推官行取授四川道監察御史本朝順治元年五月大兵定燕京授周允原官巡按真定順德廣平大名



四府九月疏薦明吏部尙書傅永淳湖廣巡撫王夢尹等均下部錄用時畿南州縣正官多缺周允請於現任教職佐貳及原任知縣中選補又請急推巡撫以資彈壓選道府以重地方得旨畿南重地巡撫豈宜久待速推舉用道府州縣需官甚多照缺悉與選補又奉旨察敘三關總兵郝之潤功周允以之潤原明真定副將因流賊勢盛走倒馬關非有三關責亦無總兵銜李自成竄出固關非由倒馬關而之潤自以恢復巖關敘功所敘人皆非地方所識所加銜又皆由己立名且肆掠不法無功可敘奏入下部知之十二月疏言臣巡各處地畝荒蕪百姓流亡十居六七若照舊額責徵是令現在之丁代逃亡者重出墾熟之地爲荒蕪者包賠也臣以爲欲清荒田法在丈量欲清丁糧法在編審澈底清查錢糧自有實數官吏無朦蔽百姓免代賠矣又言順德府屬邢臺南和鉅鹿三縣連遭兵火災荒請照恩詔蠲免例全免三縣錢糧從之二年五月山西孟縣土寇崔思亨韓嗣昌等倡亂蔓延直隸平山縣周允檄井陘道邱茂華發兵剿捕並請敕山西巡撫督兵會剿六月疏薦明通政司參議劉尙信副使成仲龍申爲憲郎中閻禧等閏六月疏言內邱邯鄲兩縣荒蕪實甚請照沙河唐山例全蠲免元年錢糧七月疏言

真定滹沱河泛逼南關廣平漳滏二河壞城垣順德府城深州城內邱隆平邯鄲武強各縣城俱衝塌鉅鹿永年任曲周寧晉唐山各縣田俱沒請恩蠲租賦九月疏言畿輔守城兵因賊已平盡裁汰今荒旱水滂盜賊漸生請酌復又言去冬州縣因辦兵差派民供草豆卽抵應完錢糧至今未消算又據詳辦草豆數已多於應解錢糧宜畫一以免浮增有司陞遷不常誰肯實心任事宜議定規則以免凌躐真定駐兵六千未必俱實每名實給銀三分餬口不足請裁虛糧加給現在諸兵疏入俱議行十月差滿回京掌河南道事三年遷大理寺寺丞五年八月遷本寺少卿十一月丁母憂歸九年服闋補原官十年二月擢工部右侍郎四月調兵部右侍郎七月應詔陳時事五款一各省郡鎮將弁恣肆甚有縱兵嚇詐貽害者請敕各督撫嚴明紀律有寇賊竊發不卽督兵擒剿及擾掠堡寨者參究一招撫原爲止殺安置豈宜養癰直省有未撫寇黨照秦督孟喬芳安置張登李雲例不得假以官銜致生事端一隱匿逃人例當分明如自盛京隨來者曰東人自順治元年至今投充者曰旗下人本自有辨匿旗人與匿東人當有別又逃人隱匿出京與在京紳士誤犯與平民犯者均當有別一武職原不許涉詞訟近來奸人誣

良爲盜武弁濫准鎖拏有司無可如何宜禁止一驛傳積弊日深馬有額設民甚多賠貼牛並無額設每兵差經過用車若干官吏出票濫派分肥牛瘦牛上車下車名色素費民廢耕種實滋賠累無從控訴宜禁革俱下部議行十月因議總兵任珍罪徇黨附和議革職特旨量予罰俸十一年八月因議雲騎尉呂獻忠婪贓一案援赦具奏上以兵部堂司官顯有受賄情弊下諸王大臣議分別降革周允降三級調外用未補官以疾歸十七年卒康熙十二年入祀鄉賢祠

### 李鑑

李鑑四川安縣人明崇禎元年進士累官宣化巡撫本朝順治元年五月投誠授原官鑑與署總兵王應暉等捕斬流寇李自成之僞將軍黃應選僞防禦使李允桂等十五人並疏言闖賊署置僞官其罪俱在不赦之條原其情則有輕重之別請殲渠宥脅以昭皇仁安反側詔令加意招徠防守六月又言宣化一鎮兵多而員冗如本鎮原額經制官軍七萬六千七百有奇按冊則有名用之戰守則無實皆由前朝法紀廢弛弁兵虛冒無核實之法也今索餉者紛紛保無侵蝕之奸應請早定經制裁冗員以節浮費下所司議行二年正月以赤城道朱壽璽貪酷不



法劾之先是壽整知鑑將劾已遣其子囑素識之旗人綽書泰往求英親王阿濟格王與鑑印札令勿治壽整罪及王出師至宣府復召鑑諭之曰壽整忠良宜釋免鑑曰此重犯若擅行釋之王亦不便時綽書泰在側叱之曰爾何不懼王也鑑艱然去王復遣綽書泰與總兵劉芳名強之不可事聞壽整綽書泰俱伏誅上以鑑秉公執法爲國忘私賜黃金五十兩白金千兩鞍馬裘幣並以壽整家產給之鑑奏辭欽賞以佐軍需優旨嘉獎不允其請二月守備霍然訐鑑受賄事下法司勘問擬斬議上得旨李鑑曾著大功免死追贖罰俸六月鑑上疏自訟命刑部會同內院覆勘得白免罰俸尋擢宣大總督命駐大同鑑復具疏懇辭不許是時山西土賊乘間竊發妖婦崔氏倡爲善友會自稱都掌教偏關寧武岢嵐諸屬村莊多爲煽惑黑草嘴賊渠白干侯運庫朔州賊渠武大寬等分路響應所在殺掠鑑令副將侯大節率兵奮擊擒斬大寬朔州賊黨解散會劫灰營賊餘孽數百入善友教與蔣家峪賊渠邢四等聯聲援遂攻破八角堡梨樹窰等城據守許林堡副將尤可望率兵追擊不利鑑檄大節乘勝截擊令參將柳同春蔡調羹都司薛敏恩岢嵐道于重熙等分兵協剿陣斬崔氏及賊黨邱道等擒白干邢四斬之焚其

巢窟餘孽盡殲六月孟縣土賊呂斗等踞寨拒捕旋經巡撫馬國柱討平之鑑以晉省經制已定而各官猶多筭委未實授軍民既已生玩且所在土寇猖獗皆由將領非人因與按察使張毓泰詳議疏請敕部核委署各官功績按次補授當易急行另推官之應裁者其軍器武備亦按冊核存以儲軍用疏入下部知之閏六月岢嵐縣土賊高九英者曾爲寧武總兵高勳所撫至是復叛鑑與撫臣分檄官弁擒斬之殫其黨百餘人初鑑令守備霍然糶售倉米及戶部咨詰鑑以爲由霍然呈請然訟冤鑑乃上疏引咎部議鑑與然有隙欲陷之應褫職詔改降一級仍以巡撫用五年補寧夏巡撫七年恩詔加右副都御史八月卒贈兵部右侍郎賜祭葬如例

胡茂禎

胡茂禎陝西榆林人明總兵福王時大學士史可法督師以茂禎爲中軍本朝順治元年豫親王多鐸南征茂禎來歸二年授鳳陽總兵三年調寧國總兵四年調徽州總兵五年正月叛鎮金聲桓黨潘永禧陳九思汪老五汪伯昇等結寨大山蹂躪徽州諸縣茂禎剿土賊於榆村西溪南吳村西坑等處皆有斬獲三月賊陷



祁門黟縣茂禎趨救賊已入休寧茂禎遣參將孫喜策遊擊趙亮楊鳴鳳分門攻擊自督兵復其城事聞命戴罪立功復分兵夾擊黟縣賊敗走永禧退回饒州四月賊攻婺源茂禎合戶部侍郎敖童兵水陸堵禦九月追斬九思於潭口青石焚其新舊營十月敗賊祁門擒歙縣巨寇吳國禎十二月分兵四路追剿伯昇老五破其木關擒老五餘賊潰江南總督馬國柱奏茂禎智勇兼優調度有方請敘功下部議加都督僉事十年經略大學士洪承疇疏言茂禎營內兵丁多係山陝關遼慣戰士卒令自選馬步兵八百赴湖廣軍前詔如所請十二年三月加都督同知充經略後標總兵官時明桂王將李定國遁南寧而盧明臣馮雙禮等復自辰州趨陬溪龍灣頭逼常德茂禎偕提督李本深總兵楊遇明張鵬程敗之於河濮山口明臣墮水死雙禮遁十月加太子少保尋調貴州總兵十六年承疇以茂禎病入奏部議休致得旨鎮臣職守關係甚大胡茂禎雖稱有病今已痊可亦未可知仍著察明議奏旋經督撫奏患病屬實請令回籍調理康熙元年八月上念茂禎素有才幹令兵部查用九月授寧夏總兵加右都督僉事三年擢湖廣提督以老休致十八年卒賜祭葬如例



高第

高第陝西榆林人入籍河南商邱明山海關總兵本朝順治元年四月投誠授原官敕守關門七月以擅誅悍卒趙文才等奉旨訓飭第乞治罪宥之十月隨豫親王多鐸剿流賊李自成於河南有功二年三月豫親王奏改開歸總兵駐河南府時中州寇尙蟻聚第與隨征侍郎李延齡以計降土寨賊首李際遇及自成餘黨劉忠並武岡許昌允尙遵禮張其倫等營寨千七百餘以次撫定得旨嘉獎加右都督尋斬偃師賊裴時茂永寧賊段竹嵩縣賊李茂華等加左都督十一月移駐襄陽三年二月諭曰爾留守中州肅清巨寇地方寧謐忠勇可嘉賜一品冠服四年山東土賊李化鯨據曹縣逼河南歸德奸民有應之者第聞馳往捕疾渡河直抵曹縣焚其郭大兵集化鯨就擒斬之五年江西叛鎮金聲桓遣人以密書通第第執其人及書以獻上獎其忠誠晉太子少保是年大同總兵姜瓖叛逆黨蔓延第以兵防河無南渡者八年五月授三等輕車都尉世職七月陝西土寇何柴山由商州轉掠洛陽出沒秦豫間第會陝西兵夾剿殲其衆十年以病乞休允之康熙十年卒賜祭葬如例子拱弼襲世職

孔希貴

孔希貴奉天開原人明總兵本朝順治元年四月大兵定燕京希貴迎降十月授  
薊州總兵隨豫親王多鐸剿河南二年三月河南平留希貴鎮歸德府剿柳營砦  
賊首金高招降明副將李聯元李希皋等九人明總兵劉花馬馮甲秦大鵬俱南  
遁九月同總兵祖可法高第等合疏請留漕米充軍食從之十二月奉旨赴總漕  
軍前聽用漕運總督王文奎檄防剿通泰二州如臯縣土賊于錫範劉南陽劉一  
雄等盤踞岔河希貴追剿至洋莊大破之斬錫範南陽擒一雄殲其衆南江賊首  
張爾明聞風遁餘黨悉平三年七月調河南懷慶總兵加都督同知四年正月山  
東范縣土賊孔五掠大名屬之南樂敕希貴速援至則賊遁希貴率遊擊孔國養  
等進擊賊巢破之陣斬孔五七年十二月胡家場賊首范次吾肆焚掠希貴奉河  
南巡撫吳景道檄剿之長垣縣呂律屯偵賊欲逸入太行追斬千餘擒沈千斤等  
隨合中軍趙世泰兵破梁家寨賊窟俘獲無算八年正月追殺馬賊於山西澤州  
獲賊首秦明宇俱下部議敘十年以老病致仕尋卒

張煊

張煊山西介休人明崇禎元年進士由知縣累官河南道御史大學士陳演之戚  
廖於義爲御史考實授屬煊爲之地煊不從尋會推閣臣演誣其徇私下獄遣戍  
尋赦歸里本朝順治元年以侍郎劉餘佑薦授煊河南道御史丁母憂歸三年服  
闋補浙江道御史仍掌河南道事六年疏言有司朘削百姓督撫徇縱不以告寃  
無由伸言官據所聞劾奏乃其職守乞付廷臣公議勿遽下獄對理諭曰嗣後言  
官論人善惡雖有不實不得逕送刑部如係挾仇誣陷仍令革職下部治罪八年  
閏二月疏言文武兩途全才難得近以武職改任督撫恐政體民瘼未必曉暢請  
還本職以全器使又貪官被贓款成招多坐吏役或遇赦輒復原官請將援免之  
人應降者調補閒曹應革職者勒令休致下部議行時煊掌計冊劾御史李道昌  
王士驥金元正匡蘭兆李允岳等巡方乖謬會大學士洪承疇管都察院事議道  
昌降級士驥等均革職並列煊應外轉五月煊劾吏部尙書陳名夏十罪兩不法  
疏曰豕臣陳名夏以故明修撰驟陟尙書不思報國反詔事故睿親王及王事敗  
卸過於同事寧古里夫寧古里一啟心郎名夏乃尙書寧古里革任名夏仍得脫  
然無罪罪一名夏父爲縣民所殺蒙恩賜銀歸葬名夏急於攬權夤緣奪情置父



傷於不問藁葬淺土卹典空懸名教不齒罪二李元鼎以薦舉賊人被黜名夏特疏起用委過於聽從誤用之柳寅東欺君罔上罪三名夏擬太僕寺卿舍傅景星三年俸滿之左通政而越陞黃徽允一年俸淺之少卿徽允爲洪承疇姻親任意迎合罪四董某以謫降三司首領之小官倏陞參議陳之遴以七品編修驟至宗伯私庇同鄉同姓罪五段國璋於二年投誠甫授光祿署丞突推三品之太常寺卿王邦柱初授光祿少卿歷俸八年僅轉四品之右通政紊亂銓序罪六江南督學御史李嵩陽兩經科臣魏裔介糾參物議沸騰名夏以鍾愛門生私囑洪承疇曲意保全把持計典罪七奉旨處分表奏不職之憲臣卓洛等盡革任而徐起元與名夏同鄉同年僅議調用若借口守鄖有功則卓洛等誰無汗馬勞績罪八御史吳達廷糾邪黨之馮銓名夏噤不一語及銓臥病名夏屢往候安革職侍郎孫之獬爲盜所殺名夏素與厚力主優卹不顧人品公論至嚴旨駁正罪九名夏利人厚資與富商牛射斗結姻歲索數千金屈體市井貽羞縉紳罪十太常少卿龔鼎孳被參丁憂後援赦免議名夏忽於選司說當補官之時批降二級用專擅威福不法一御史崔士俊四年大計拾遺涉虛援赦免議名夏忽批降外府推官用

不法二又名夏與洪承疇陳之遴於火神廟屏左右密議不知何事疏入詔王大  
臣鞠議吏部尙書公譚泰袒名夏援事在赦前免名夏及承疇之遴罪而以煊所  
言多不實且先爲言官不言乃於外轉後挾私誣讎論絞死九年正月上諭內院  
曰朕觀往籍自古欺君誤國之權臣有正法顯戮者亦有道刑倖生者其生也雖  
生猶死摘奸發伏之言官有吐氣伸志者亦有蒙冤就死者其死也雖死猶生總  
之真假是非未有日久而不別白者也原任吏部尙書譚泰剛愎成性狂悖妄行  
當朕親政之初把持六部干預萬幾彼時陳名夏亦任本部尙書去年五月內張  
煊憤不顧身列款參奏陳名夏洪承疇其時朕狩於外一切政事暫委之巽親王  
務達海王集諸王大臣逐件審實將名夏承疇羈之別所以事關重大馳使奏聞  
譚泰聞之艱然不悅遂萌翻案之心及朕回京敕諸王大臣等質審廷議譚泰咆  
哮攘臂力庇黨人務欲殺張煊以塞言路諸王大臣憚彼兇鋒有隨聲附和者亦  
有俛首無言者內亦有左袒者入奏之時朕見罪款甚多不勝驚訝譚泰挺身至  
朕前誑言告詞全虛又係赦前誣陷忠臣於死罪應反坐譚泰忌左袒者之異已  
蔽不以聞朕以爲衆議僉同遂允其奏而執意譚泰之欺罔至此也自欺罔得售

因而造罪多端諸王大臣俱以爲朕親信譚泰朕慮延遲日久則國是漸非而干連者衆遂執譚泰數其罪款於昨年八月十七日正法訖因思張煊當日告款甚多驟寘重典疑有冤枉之處故將名夏承疇復發鄭親王同承澤親王及內院刑部大臣再爲審理承疇招對俱實獨名夏厲聲強辯閃爍其詞及詰問辭窮乃哭訴投誠之功朕始知名夏爲輾轉狡詐之小人也名夏罪實難道但朕有前旨凡譚泰干連之人一概赦免今將名夏革任同漢軍閒散官隨朝洪承疇火神廟聚議事雖可疑實難懸擬送母歸原籍雖不奏私遣然爲親甘罪情尙可原姑赦其罪仍留原任以責成效朕念張煊含冤受死著厚加卹典其子以父官官之仍加二級卹典敕部議奏庶足以慰忠魂而闢言路著將譚泰罪狀並張煊啟狀詳爲刊示暴之天下以明朕之無偏私也二月議贈煊太常寺卿賜祭葬錄其子基遠如所贈官歷官禮部侍郎十一年名夏爲大學士寧完我劾奏奸狀鞫實以絞死

### 徐起元

徐起元江南合肥人明舉人累官鄖陽府知府崇禎時流賊張獻忠自陝來湖南鄖陽危急起元與按察使高斗樞招降賊渠王光恩戰頻捷賊不敢犯後李自成



陷襄陽分遣賊黨路應標等數萬寇鄖陽環攻三年賴起元善守光恩善戰湖南北十四郡皆陷鄖獨存事聞莊烈帝擢起元右僉都御史撫治鄖陽自成恨鄖不下復遣應標等增兵急攻起元夜襲賊營斬應標圍解本朝順治二年二月英親王阿濟格追剿流賊於陝西將至湖南起元遣光恩戮襄陽賊衆復均州光化穀城南漳備舟濟大兵投誠以王光恩署總兵官起元仍以原官視事疏言英親王體皇上好生之心凡賊黨歸順者俱寬宥安置但此輩虎狼成性難保無虞查承天荊州襄陽宜城鄧州荆門俱有降賊居州城中今一隻虎李過賊數萬盤踞當陽遷安其心叵測倘大兵遠離賊乘間蠱惑降衆患且不測請將新降之衆分散四方聽各撫節治毋令養癰上報可六月起元駐襄陽遣參將劉世安屯南漳副將王光泰屯宜城以遏賊鋒十二月賊黨劉體純犯襄陽起元同光恩鏖戰三日殺傷甚多賊不支遁三年入京陛見授都察院右副都御史五年遷左都御史六年加太子太保八年三月甄別部院大臣上以起元不稱風憲之職著調用十年二月以原銜管大理寺卿事四月得旨徐起元堅守鄖陽投誠有功年老可念著以原官致仕馳驛歸里仍廕一子入監讀書十六年卒賜祭葬如例諡僖靖

賈漢復

賈漢復山西曲沃人明副將本朝順治二年豫親王多鐸南征漢復詣軍門降隨入都隸正藍旗漢軍十年補佐領十二年遷都察院理事官管京畿道十三年七月擢工部右侍郎八月奉命往興京陵視工十四年改兵部左侍郎巡撫河南十五年三月以壇殿工成授職雲騎尉六月疏言河南驛通數省差分兩路自河決後由山東者皆遶道豫中加以湖南軍差絡繹馬斃役逃今黃河已歸故道請更正驛路行差於勘合火牌註明經由某省則兩河不致偏累下部議行十一月疏報墾官民自首地共七萬二千五百餘頃每歲增正供四十萬八千餘兩上以其實心任事下部優敘加兵部尙書銜十二月左都御史魏裔介請定衛所丁田歸併州縣下各省督撫議漢復疏言河南省宜武陳州潁州歸德睢陽彰德懷慶河南宏農南陽信陽汝州各衛羣牧嵩縣潁上林縣唐縣鄧州汝寧各所既無漕船押運又無邊境修防且地畝錢糧不多間坐落江南直隸隔屬徵追不便應裁併附近州縣衛所官役亦全裁部議從之十六年正月大兵進取滇黔部撥河南庫銀四十萬兩半充湖廣兵餉半交漢復轉運漢復未半年已全解議敘加太子太

保八月海賊鄭成功陷江南鎮江瓜州等處警連河南歸德汝南漢復檄總兵張應祥赴宛南援剿賊敗餘黨竄光州商城勾土賊楊玉環等劫獄散筭惑衆漢復遣參將苗成龍蘇養元等平之十二月經略大學士洪承疇請增雲南綠旗官兵部議調河南南汝鎮遊擊守備各二兵千五百赴滇漢復疏言南汝標兵二千八百餘分防均襄新鄧兵千六百僅存千二百餘不足抽調懇留本鎮俸資捍禦從之十七年二月疏言懷慶距山西星輶驛有兩路一由黑石嶺程六十一遠碗子城程八十明時以鄭藩墓在嶺前故紆道碗子城至萬善驛今請裁歸黑石嶺以省冗費下部議行七月刑科給事中姚啟聖列款劾漢復貪污部議解任敕總河朱之錫察究中有墾荒緣坐令民包賠一款屬實應降調援赦免先是漢復曾餽內監銀十八年事覺部議復援赦降抵仍罰銀百兩特旨革雲騎尉世職留京候補康熙元年二月補授陝西巡撫八月疏言舊例兵丁月外加給米三斗後總督孟喬芳議裁尋以興安鎮標白土紫陽各營歲荒兵苦仍給加米折銀四錢自買其時漁渡舊縣並漢中協路尙有興屯本色可支故未議及今屯兵已撤屯糧全無請照興鎮等營加月米三斗如所請行三年九月疏言陝西驛遞有先衝而今



屬首衝者有先首衝而今爲極衝者有次衝而今屬簡僻者卽盡裁簡僻驛站銀已不足補衝驛之數而近日狄道渭源蘭州金縣鎮安等處尤爲極衝請增站銀三千二百餘兩及夫馬工料銀七千餘兩得旨允行先是順治十三年河流東徙韓城逼河壩有沙灘淤泥開墾陞科後河流西徙復多衝沒至是漢復奏免其賦七年詔漢復回京另用未及補官卒賜祭葬如例

張天祿 弟天福

張天祿陝西榆林人明末與弟天福以義勇從軍積功至總兵官福王時大學士史可法督師爲瓜州前鋒駐瓜州本朝順治二年五月豫親王多鐸下江南福王就擒天祿及天福率所部三千餘人隨忻城伯趙之龍迎降豫親王令以原官隨征後隸漢軍正黃旗時明僉都御史金聲家居休寧受唐王朱聿鍵右都御史兼兵部侍郎職糾鄉勇十餘萬據徽州貝勒博洛遣都統葉臣往剿天祿從十月偕總兵卜從善李仲興劉澤泳等由旌德縣進連破十餘寨至績溪縣生擒聲及中軍吳國禎副將陳有功守備萬全等諭降不從斬於軍徽州平十二月明唐王大學士黃道周率兵犯徽州天祿擊斬其將程嗣聖等十餘人擒總兵李堯先等三

年正月大敗道周兵於婺源擒道周諭降不從斬之分兵從祁門江灣街口黃源四路追剿餘黨至浙江開化縣降其城二月加都督同知授徽寧池太總兵官五月賜一品冠服初天祿之定徽州也營於城外兩山禁將卒毋入城滋擾至次年霖雨連月城中父老敦請天祿入天祿曰三軍方在泥途何忍獨安終不下山徽民至爲感泣巡撫劉應賓奏其事得旨嘉獎十二月明嵩安王朱常淇擁衆數千擾婺源之小坑天祿率副將許漢鼎等剿之抵嚴坑擒常淇及監軍江于東等四年四月授江南提督五年三月敍投誠功授三等輕車都尉八年五月晉三等子爵九年十月海賊圍漳州天祿奉命赴閩援剿沿途搜剿土賊甚衆抵延平擒賊首黃雲紀陳天鐸等殲其衆下部議敍會都統金礦已解漳州圍天祿留駐延平剿各山賊十一年明魯王定西侯張名振由浙江犯崇明天祿馳還松江調將出洋撲剿正月奪稗沙老營追至高家嘴名振遁入浙尋乘潮突犯吳淞深淘港傷兵焚船天祿坐是降三級戴罪剿賊十二年江南總督馬明佩以深淘港告警時多失礮械及舟師三百餘天祿匿不報疏劾之而閩浙總督佟泰亦奏自洋逃回兵稱天祿與名振通書詔並下刑部訊通書無據以隱匿罪革提督降子爵爲三



等輕車都尉十六年卒子其龍襲卒無嗣停襲天福初爲明總兵順治二年與兄同降以原官隨征崑山嘉定民不薙髮據縣叛天福同總兵李成棟平之五年四月授陝西漢羌總兵官八月敍投誠各功授一等男爵時明山陰王朱鼎濟聚兵據毛坦關以覃一涵爲元帥六年二月天福自漢中入山攻之擒鼎濟及監軍王守基參將張文秀遊擊單昌祉李之運等八十五人斬馘殆盡一涵投崖死得旨察敍三月延安參將王永祥叛陷延安榆林及同官臨漳等縣花馬池軍民聞風譟變天福同平西王吳三桂都統李國翰從間道擊之大俘獲五月同提督李思忠破蒲城斬賊將二僞官三殲賊衆五千復延安三桂將分兵追剿綏德榆林以延鄜爲扼要地留天福鎮守七月賊犯延安塞天福遣將擊敗之斬首三百餘招降叛將藍基等九年三月北山賊黨劉宏才因我兵四出乘間犯同官圍陳爐鎮天福先遣官兵由捷徑疾趨富平旋親馳至流渠鎮賊聞風南遁追及之賊八千列營拒天福分兩路衝殺大敗之斬千餘生擒賊將魏加隆張敖等二百七十人下部議敍尋以病回旗授散秩大臣子其烈襲世職十七年五月復授本旗都統康熙六年四月卒賜祭葬如例



馬寧

馬寧甘肅寧夏人明參將本朝順治二年英親王阿濟格征陝西寧率衆投誠隸漢軍正白旗委署鳳翔中協副將三年隨寧夏總兵劉芳名剿賊秦鞏會叛將王元馬德殺巡撫焦安民爲亂寧隨芳名馳歸擒斬元德糾賊渠賀宏器等陷安定四年三月擊斬德於河兒坪獲宏器於固原之北山又赴盤屋黑水峪剿賊渠賀珍等擒斬千餘十一月斬逆賊洪大誥於半個城五年正月調陝西兵征四川至洛陽譟歸寧率兵追至伏羌誅首逆撫定餘衆三月甘肅逆回米喇印丁國棟殺巡撫張文衡反臨洮蘭岷洮河諸回皆叛應連陷郡邑圍鞏昌總督孟喬芳遣寧往援大破之鞏昌圍解與副將劉友元進攻臨洮賊衆潰洮岷河三州皆復五月進平蘭州賊西竄躡斬米喇印於水泉古城窰國棟奔肅州嬰城守六年三月喬芳移師討大同叛鎮姜瓖以滅賊委寧十一月破其城擒國棟河西平敘功加都督同知先是宜君賊劉宏才據北山寇略西安諸州縣八年寧剿平之九年三月剿邵陽流賊擒其渠雷學鎮梁鎮虎等尋擢四川右路總兵駐保寧十一年以軍政卓異賜鞍馬弓箭十五年隨定西將軍李國翰克復重慶進取遵義復由水西

天生橋進兵征明桂王朱由榔十六年由榔遁入緬甸加寧右都督領兵進剿十七年改授援剿雲南前鎮總兵駐大理府十八年正月移駐猛卯十一月吳三桂分兵入緬寧偕副都統石國柱總兵沈應時祁三昇馬寶高啟隆馬惟興等由姚關至木邦時由榔將白文選屯錫箔潛遣其黨馮國恩來木邦糾集土兵我軍驟至斬國恩文選竄茶山寧等馳追至猛養及之文選降衆萬餘康熙元年敍功加左都督三年剿旣降復叛之水西宣慰司安坤四年剿烏撒宜良寧州喬甸池東鎖里孟撒等各山城箐峒皆捷逆酋祿昌賢等以次擒斬餘黨悉平十一年遷湖廣提督十二年調山東提督十三年隨順承郡王勒爾錦征逆藩吳三桂加太子太保十八年敕寧還京十九年卒賜祭葬如例

### 常進功

常進功遼東寧遠衛人明副將本朝順治二年豫親王多鐸兵下江南進功投誠給副將劄尋隨貝勒博洛征浙江分剿富陽於潛及牛頭堰天竺山白石尖迷山嶺康嶺等處均在事有功五年授定海左營遊擊十一年遷杭州城守副將十二年兼攝提督參將事十四年擢浙江水師總兵賜甲冑弓矢裘帽十六年調福建

水師總兵征海上鄭成功直抵衙前賊遁追破其衆於定關康熙元年敍功授騎都尉兼一雲騎尉世職命隸漢軍正黃旗三年遷廣東水師提督六年以賊鯨入甲子港口不親剿革職十四年復授浙江水師提督時海敵犯温州進功同總兵朱萬化自定海關出洋剿禦破敵於沈家門等處十六年敵據舟山進功復出定海偵剿大破之於螺頭門椗齒畧朱家尖等處斬殺無算諭部議敍十八年以年老休致二十五年卒孫履謙襲世職

盧光祖

盧光祖遼東海州人明總兵本朝順治二年隨左夢庚來降隸漢軍鑲藍旗三年正月隨肅親王豪格剿流賊張獻忠於四川斬之師旋光祖署夔州總兵明桂王朱由榔經略朱天麟總督樊一蘅等結連川中諸賊犯順慶光祖敗之通花三壩是時搖黃賊渠袁韜據列南溪李鶴子余大海據合州馬超邢十萬據遂寧蓬溪甘良臣據廣安岳池天麟部將王命臣陷順慶降將李開藻密約命臣攻保寧己爲內應光祖偵知之斬開藻同總兵柏永馥馬化豹左勤分三路取順慶復其城五年四月加都督僉事實授夔州總兵五月遣參將呂英傑同永寧副將蕭鳳祚



等破賊黨李登甲於來蘇寨斬僞將梁士義等七月賊楊秉允等踞渠縣李毅城光祖由小斌山進偕化豹及副將趙萬邦分剿賊敗退閉關拒守求救於賊黨劉惟明光祖繞渡三匯河敗惟明援兵秉允聞之遁光祖追至龍泉關大斬獲秉允走匿川東六年十二月賊渠陳三台投誠其黨甘一爵朱德洪據鄰水大竹三縣光祖同巡撫李國英遣將領任魁知縣王文彩往撫被殺光祖會永寧敘州西路兵及布政使吳之茂等合剿戰七晝夜斬一爵德洪降碕寨十餘鄰水大竹平八年敘功授一等輕車都尉九年孫可望陷敘州將軍李國翰調重兵夾剿光祖殿行至停溪猝遇賊戰一晝夜寡不敵衆遂敗上宥其罪令圖功自贖十年改授川北總兵以順慶要地預遣副將霍光先往防十一年賊將魏勇果率衆來犯光先擊敗之十三年卒上以光祖久鎮巖疆盡瘁殞身命與祭二壇再加祭二壇造墳安葬子奇襲職騎都尉兼一雲騎尉

### 高進庫

高進庫陝西宜川人明副將本朝順治二年豫親王多鐸兵下江南進庫投誠給參將筭尋授江寧副將大學士洪承疇檄同副將馮君瑞楊武烈等以兵三千赴

江西援剿三年正月江西總兵金聲桓以明唐王朱聿鍵大學士楊廷麟總督萬元吉據吉安遣將李士元攻之不克進庫兵至檄往剿生擒其前鋒邱龍等四人賊敗遁入城翌日悉衆出拒進庫等奮擊擒其將張應魁等斬二百餘人遂克吉安十月移兵克贛州進攻南安望風潰進庫等以援剿年餘兵力勞苦江西土賊漸平請還江寧休息承疇以聞詔可四年三月南贛總兵柯永盛巡撫劉武元先後奏言南贛要衝應設兩協防守進庫及湖廣援剿副將徐啟仁諳地利兵精足用請留啟仁爲右協駐南安進庫爲左協駐贛詔如所請五年金聲桓叛啟仁附逆陷南康饒州九江與其黨王得仁謀趨江南懼贛兵躡其後遂圍贛進庫力戰堅守城克全會廣東提督李成棟叛附金聲桓糾衆犯贛進庫出禦破賊營數十斬首萬餘成棟退走信豐六年正月我軍圍信豐賊遁追擊之成棟馬蹶墮水死時聲桓亦伏誅江西平加都督僉事賜蟒衣一襲七年賊渠彭順慶據寧都進庫同副將劉伯祿參將鮑虎等大破之擒順慶八年調赴廣東剿賊渠李明忠於高州斬賊二千餘明忠遁餘黨悉降九年擢廣東高雷總兵康熙四年以老病乞休尋卒

霍達

霍達陝西武功人明崇禎四年進士官御史累遷江蘇巡撫本朝順治四年以浙江總督張存仁薦授山東道監察御史巡視西城五年巡按福建八年授浙江嘉湖道十年遷太僕寺少卿十一年轉太常寺少卿尋遷大理寺少卿十二年正月奏請以帝鑒圖說貞觀政要大學衍義諸書令講官日講一二章上嘉納之三月遷大理寺卿四月授兵部督捕右侍郎十五年擢兵部尙書廕一子入監讀書十六年加太子太保十七年二月調工部尙書七月兼管都察院左都御史事十月奏言外官內陞之例原酌其才品今不論才品不俟薦舉但以品級相對爲準甚至五品堂官缺出適當外官內陞卽以一年之僉事充之未免冒濫請嗣後凡司道有薦剡功績經三四任者方許內陞每歲不得過兩人又言吏部爲用人行政之本必有畫一規制如各部司官降級留任者旣難陞轉又無開復何日方可湔洗宜確議開復定例俾得更新自效戶部入不敷出日事補苴不可不講經久之方至外省州縣易知由單細字模糊不識官吏卽冒徵混派應速改正使愚民俱曉禮部磨勘試卷年餘方結難免揣擬奔競應定限以清弊竇兵部鑿儀衛官以



校尉諸人充之無偵緝汗馬功濫膺爵賞諸將功臣之後殉難之廢虛注外委銜者酌量議用刑部諸事廢弛推諉久蒙皇上洞鑒特設科員查核然積玩難返應更振作工部貴精釐剔督撫請留制造者多未開銷而再請部查又多沈擱此估計開銷二事宜命一科臣綜核蘆政十年未楚糾參整飭宜責部臣臨清磚料與京廠燒造無異乃磚價不及京廠之半致窰戶逃亡宜議增至六科與六部相表裏職在糾察如條奏及部覆有不妥者許各科臣指實駁正庶事有責成又言吏治四事一聞山東武定卽墨諸處革職官交代不清同聚一縣積至六七員蠶食該地深爲民害直隸等省似此者亦不少請敕各撫按速結如隱縱事發連坐一州縣官署印每營謀多費取償地方至錢糧從來徵多解少且多支衙役工食以圖加二加三之扣嗣後凡署印官徵解存支當計任內日期造冊報部察核如有解不及額存支過額者追補治罪一丁憂官撫按一面委署一面題報銓補如遲緩科道指參一流寓游民當勒令回籍若已開荒納糧仍聽安插惟兇徒霸占民產或勒人取贖或轉賣厚價宜嚴察驅逐以靖民害又言陝西西安府各屬額賦外多派累咸寧長安兩縣尤甚私派名色不下三十餘項每縣歲派二萬餘金百

畝之家一充里役身家立盡積弊急宜滌除諸疏俱下部議行十八年卒賜祭葬如例

### 吳六奇

吳六奇廣東豐順人明亡附桂王朱由榔爲總兵以舟師踞南澳本朝順治七年平南王尙可喜等自南雄下韶州六奇與碣石總兵蘇利迎降六奇故貧時乞食他郡習山川險夷至是請爲大軍嚮道招徠旁邑自效十一年五月潮州總兵郝尙久據城叛寇大埔程鄉鎮平時靖南王耿繼茂剿桂王將李定國於肇慶靖南將軍喀喀穆自江寧奉命征粵東未至六奇奮力守禦十月隨大軍進圍潮州以雲梯兵克城尙久投井死逆黨悉平十一年三月可喜繼茂並奏言饒平地接漳潮海敵出沒六奇率先投順招撫有方其所團練鄉勇皆勁旅糧糗器械畢裕自郝逆倡亂六奇親赴軍前奮勇殺賊請給銜以示激勵詔授六奇協鎮潮州總兵統兵一千駐饒平是時海上鄭成功狡稱受撫掠泉漳潮惠諸郡四月羽黨李增等分道寇饒平大埔土賊江龍劉道璋爲內應六奇遣遊擊曾蘭等率師禦之多斬馘乃遁六月諭曰總兵吳六奇先經投誠後調集本部舟師累著勞績所授職

不足償功宜再加超擢乃以六奇爲左都督詔防禦鄰境盜賊十二月成功率衆來犯六奇期蘇利水師援剿不至戰失利揭陽澄海普寧三城皆陷十三年二月六奇率所部兵攻揭陽斫其水營敵溺斃者三千餘盡獲旗甲復仰射城上其渠黃廷中二矢墮城遁入舟六奇潛以巨艦載火器塞潮溝並欲縱火截我師會火器發敵大潰奪舟二十以遁復敗之新墟澄海普寧亦復十五年二月成功復犯南澳六奇夜截之鮑浦有斬獲復隨靖南王耿繼茂拒卻之生擒其將蘇興黃亮等斬於軍十七年敍捐造戰船及禦敵功加太子太保康熙三年六月考滿晉少傅加太子太傅四年四月遊擊邱義訐六奇匿桂王子爲贅壻又與故明崇禎帝子通問湖廣又私開礦銀於燕子山等事靖南王耿繼茂以所訐皆誣入奏義伏法五月六奇病卒先是總兵蘇利旣降復叛踞碣石大軍會剿滅之六奇疏言碣石旣平無須設鎮且臣乃潮人不可久守潮土乞調任他省事下兩藩及督提等議未決而六奇卒至是平南王尙可喜疏言六奇所屬汛地最爲衝險所部之兵俱投誠時隨帶頻年恢剿招徠築建城堡捐造戰船不遺餘力今旣物故其子啟豐乃將士宿所推服請量加職銜准令統率部議總兵無世襲之例應請上裁得



旨吳六奇蘇利同時投誠利尙抗拒久駐島中六奇卽率屬建堡築城駐防年久六奇所屬官兵卽令伊子吳啟豐管轄不爲例尋贈六奇少師兼太子太師賜祭葬如例諡順恪啟豐及弟啟爵皆官至總兵啟爵在瓊州征生黎有功

### 陳世凱

陳世凱湖北恩施人初附明桂王爲忠州副總兵本朝順治十六年川陝總督李國英率兵駐重慶世凱來降授副將銜康熙十年流賊李自成遺黨劉二虎郝搖旗袁宗第等據楚蜀間山寨合賊數萬犯巫山縣世凱城守卻之尋隨國英同西安將軍富喀禪進剿賊平敘功加總兵銜十一年實授杭州副將十三年三月逆藩耿精忠叛浙江總督李之芳統師駐衢州令世凱赴金華援剿甫渡江聞賊犯龍遊卽遣兵馳擊以通衢州餉道駐守金華賊犯武義亦遣兵擊之七月僞總兵閻標由永康武義來犯世凱同副都統沃申迎擊發大礮二敗之八月同總兵李榮擊賊於湯溪追至後大堡賊踞兩山拒敵卽先分兵拒賊後親攻其前擒僞監軍道徐福龍等九月僞都督陳重由東陽來犯世凱同都統瑪哈達往剿擊敗於山口村復敗諸山河岸追至鄭店破賊壘十月僞都督葉鍾由浦江來犯世凱督

同副都統石調聲等敗賊於五都漕又敗僞總兵蔣魁於蔣家村敗僞都督陳遙於張澤村僞總兵周彪別犯義烏世凱敗之於八里店進拔荷葉口賊寨生擒僞都司凌汝經等時温州處州並爲賊踞之芳屢奏世凱戰功詔授温州總兵加都督僉事銜十一月僞都督徐尙朝合賊數萬逼金華世凱迎擊於城南十二里莊乘賊甫集大呼先進斬僞前鋒葉應龍徐有功賊大潰追奔十餘里殲戮過半尙朝復與僞總兵馮公輔踞積道山立木城壘石寨屯賊五萬餘爲窺伺計世凱乘大霧進師破賊木城分兵三路攻擊斬馘萬餘尙朝等棄寨遁時大將軍康親王傑書由杭州進軍駐金華令世凱同瑪哈達李榮恢復處州十四年正月世凱復永康進攻縉雲尙朝等領衆拒戰我師分擊敗之復其城僞總兵沙有祥踞處州賊衆越桃花嶺結寨固守世凱同瑪哈達李榮三路進攻賊潰走奪嶺進至泉坡有祥等聞風棄城遁遂復處州三月尙朝與僞總兵連登雲由温州分兩路犯處州世凱同瑪哈達等迎擊於陳潭頭斬僞參將郭美才等擒僞參將陳亮等五月擊賊於十八都敗之進抵石塘僞參將鄭文登拒戰我兵分路馳擊斬馘八百餘復移師松陽之石佛嶺擊敗僞總兵陳得功等賊敗走遂率師從貝子傅喇塔進

攻温州十五年二月僞都督曾養性同叛鎮祖宏勳糾合閩賊及平陽瑞安賊衆四萬餘來犯我軍世凱同提督段應舉奮擊擒僞副將何賓僞參將盧公義等五月傅喇塔奉詔由處州進征福建世凱率兵從過三角嶺養性屯賊衆於得勝山下之古溪據險以扼我師世凱同副都統吉勒塔布等攻破賊營又以礮擊破江中賊艘道乃通八月副都統穆赫林剿登雲於石塘賊堅拒未能下世凱同沃申等由旁徑襲擊連破其營二十八擒僞官四十九復雲和縣又招撫松陽縣等僞官二百餘僞總兵馮公輔等皆來降泰順縣亦復九月精忠降於康親王招養性宏勳歸福建世凱還鎮温州十六年三月敍功加左都督給雲騎尉世職九月招降海上鄭錦之僞副將林麟詹天樞等十二月招降僞都督陳彬等十九年四月分遣官兵敗餘黨於南鎮雙頭洞十一月署浙江陸路提督降僞將軍劉天福等二十二年六月復敍功晉世職騎都尉十二月入覲賜鞍馬貂裘朝服諭曰自吳逆煽惑以來爾提兵征剿戮力用命埽蕩逆氛建立功績朕甚嘉之爲將之道務在輯兵愛民使兵民相安則地方受福爾亦可永保勳名朕每見功大者易生驕傲以致文武不和地方多事爾其以此爲戒二十三年正月擢浙江提督二十五



年閏四月疏言兵之所習惟戈矛槍戟所尙惟投石超躍好勇鬪狠之心日月漸積罔識大義或遇敵退避不知報國或觸犯法網不顧辱親如叛逆耿精忠等皆由不知忠孝故也請敕直省將軍提督率所屬營伍照文職例講讀上諭十六條俾荷戈將士咸知忠孝綱常永無匪行得旨陳世凱身爲武職乃能洞悉理義詳切敷陳深爲可嘉自古武職名臣皆讀書明理諳通經史斯能保守功名克全臣節嗣後武職官員遇閒暇俱應覽觀書籍於忠孝大義講究明晰其各交相勸勉以副職任世凱又撰擬十六條宣解援引經史所載有關營伍可爲法戒者依類附註爲書三卷奏進詔予頒行世凱又言舟山爲浙江門戶向以形似稱名第舟在水則搖曳不寧遇風則傾欹莫靜海外重地名此似非所宜請御書新名勒碑作鎮得旨俞允改名定海山又奏春秋丁祭文廟應令武職一體行禮下九卿議行二十八年十一月入覲命回任以疾作未行十二月卒得旨陳世凱效力行間茂著勞績簡任提督居官素優忽聞溘逝深爲軫念下部議卹遣領侍衛內大臣佟國維侍衛馬武往奠茶酒賜祭葬如例諡襄敏子天培襲世職三十二年天培請效力兵部引見議以都司錄用得旨陳世凱向在行間勞績茂著其子陳天培

著以遊擊用仕至浙江提督其騎都尉世職世凱之孫思遠再襲後循例停襲乾隆三十一年特予恩騎尉世襲罔替

### 田雄

田雄直隸宣化人明總兵本朝順治二年豫親王多鐸統兵征江南明福王朱由崧遁走蕪湖護軍統領圖賴等以兵斷其去路雄與明總兵馬得功縛福王來獻豫親王令以原銜隨大軍征浙江尋授杭州總兵時明魯王朱以海稱監國於紹興福王大學士馬士英總兵方國安等往依之擁兵嚴州屢渡錢塘江窺杭州雄與總督張存仁副都統朱瑪喇等禦剿先後奏捷三年擢浙江提督賜冠帶鞍馬六年江西贛州推官蘇進泰遣使謁雄爲叛鎮李成棟致逆書雄執其使以奏得旨褒獎加左都督銜八年追敘投誠功授爵一等子先是大將軍定浙江明魯王竄入海繼復與其臣阮進張名振等據舟山至是雄同都統金礪進戰艦乘潮出海擒阮進於橫洋至舟山掘陷其城名振擁魯王遁去十一年奉旨移駐定海十二年阮進餘黨阮思陳六御等復踞舟山命寧海大將軍伊爾德統師征剿雄晝夜督治戰艦攻具留參將徐信傅長春遊擊劉登瀛等扼要隘通聲援而自率精

銳會大軍誓師登舟由定海大洋進烈港思等連兵迎戰雄與伊爾德麾兵並進以礮毀數船思等習風濤左右衝突雄恐兵志未定稍卻必爲所乘因揚帆據上游攻其巨艦副將常進功等從右奮擊思衆大潰投海死者大半轉戰至日夕乃振旅還翌日復統水師出洋雄見思衆益熾與伊爾德計以橫洋金塘爲舟山要路今爲所據宜分兵急擊破之則舟山可達於是張水師爲兩翼直薄之四面夾攻殲其衆無算獲其船思赴水死捷聞加少傅兼太子太傅賜冠服甲冑雄鎮海疆久以舟山不難於復而難於守請調兵駐防增戰艦設水師分汛偵剿上以所奏悉合機宜下所司議行十五年奏請歸隸旗籍以弟豹代己入侍許之於是隸漢軍鑲黃旗時海敵鄭成功擾海濱一圍象山再犯台州復陷遂安平陽諸邑兵部劾雄失守城池罪得旨寬免令立功自贖十六年四月羽黨將犯太平雄遣兵迎戰生擒百餘人餘望風遁五月鄭復傾巢犯寧波雄出城督戰陣斬五百餘級賊退出定關造木城爲久踞計雄分兵三路進剿羽衆潰竄入海十八年晉三等侯雄疏辭兼請解提督任得旨卿擒福王投誠隨大兵攻戰功績懋著且鎮守海疆有年故特授侯爵用示眷酬宜祇遵成命益殫忠猷以副倚任勿遜辭康熙二



年卒贈太傅賜祭葬如例諡毅勇以從子象坤襲爵乾隆十五年定世襲侯號曰順義



清史列傳 卷七十九

貳臣傳乙

孫得功

孫得功遼東人初爲明廣寧巡撫王化貞中軍遊擊天啟元年瀋陽遼陽失守化貞率兵十餘萬駐廣寧明年正月我太祖高皇帝統師圍西平堡化貞令得功會總兵劉渠等赴援未至而西平已潰副將羅一貫死焉渠與總兵祁秉忠副將劉徵參將黑雲鶴遊擊李茂春張明先迎戰於平洋橋堡皆歿於陣化貞素任得功爲心腹而得功已輸款本朝還言兵已薄城城中大亂化貞從廣寧踉蹌走大凌河得功遂偕守備黃進千總郎紹貞陸國志石天柱等出城三里至望昌岡備乘輿設鼓樂執旗張蓋迎上入駐巡撫署士庶夾道俯伏歡呼萬歲時天命七年正月二十四日也鎮靜堡參將劉世勳大清堡遊擊閻印大凌河遊擊何世延西興堡備禦朱世勳右屯衛備禦黃宗魯錦州都司陳尙智鎮撫堡都司金勵劉式章李維龍王有功平洋橋守堡閔雲龍鐵場守堡俞鴻漸錦安守堡鄭登團山守堡



崔進忠鎮寧守堡李詩鎮遠守堡徐鎮靜鎮安守堡鄭維翰鎮寧守堡臧圖祚鎮邊守堡周元勳大康守堡王國泰等各率所屬兵民歸順廣林遊擊羅萬言先匿山中至是亦來降命各仍原官賞賚有差得功以遊擊轉降衆移駐義州天聰八年五月追敘得功倡廣寧將士獻城嗣守義州獲明諜捕斬竊掠之蒙古十七人予二等男世爵是年以年老乞休尋卒長子有光襲爵任參領隸正白旗漢軍隨證明錦州及中後所前屯衛率所部發礮破敵順治五年剿山西海賊及大同叛鎮姜瓖並有功洊晉三等子次子思克官至提督副將軍別有傳

### 馬光遠

馬光遠順天大興人明建昌參將本朝天聰四年大兵克永平光遠率所部投誠授副都統隸漢軍鑲黃旗賜冠服鞍馬五年上親證明圍大凌河光遠從招降城南守臺百總一男婦五十餘人卽令光遠撫之七年詔於八旗滿洲佐領分出漢人千五百八十戶每十丁授綿甲一以光遠統轄授一等子爵九年甄別漢軍以各堡生聚多寡爲黜陟計丁減原額三之一者奪職爲民光遠疏言各堡逃亡多寡不同而管堡各官功次不等旣邀國恩予世職概罷爲民衆情驚懼臣聞雷霆

之後必有雨露懇聖主大施格外之恩免削世職仍令戴罪視事庶國法人情兩得其宜上從之崇德元年從征朝鮮克平壤江華島二年分漢軍爲左右翼授光遠都統轄右翼三年上征明錦州光遠同左翼都統石廷柱連火器先行尋與恭順王孔有德以礮攻克臺五復與廷柱攻克李雲屯柏土屯諸處獲人畜一千計我軍攻錦州城旁一臺敵兵拒守光遠率參領郎紹貞等圍之光遠以離汛地敵乘間遁及覺又不追擊有旨詰問光遠復以我兵不能抵敵致辨部議應革世職解任詔從寬罰鍰是年上復親征明光遠率兵從以右翼兵攻克松山西南隅臺降其將楊文顯時城中尙堅守不下上登松山南岡相度城垣形勢命光遠以本旗兵同懷順王耿仲明攻城南門池東毀其堞會日暮旋營翌日議穴城南地道遇錦州蒙古兵三百來援我兵不能達遂罷攻城議師旋追論攻松山時光遠等詭言礮子已盡今猶贖回玩誤軍機疲敝士馬法不容貸詔集漢官於篤恭殿大學士范文程等宣諭數光遠等罪令在家閑住光遠所轄參領李世昌鑄礮子鎔鍊未淨不堪用下所司鞠訊復得光遠徇庇不舉狀光遠坐論死罰贖上念光遠罪由無知特加寬宥六月分漢軍兩旗爲四旗仍起光遠爲都統轄兩黃旗順治

四年以老病乞休從之康熙二年卒賜祭葬如例諡誠順從子思文襲爵

沈志祥

沈志祥遼東人明皮島總兵沈世魁從子官副將本朝崇德二年命武英郡王阿濟格等征皮島世魁戰死志祥收潰衆走石城島欲得世魁敕印監軍者弗予乃自稱總兵明發兵剿之志祥遣部將吳朝佐金光裕齎疏詣盛京納款旋挈家及部衆四千餘由黃石島至安山城三年四月遣學士胡球等宴賚之令於鐵嶺撫順自擇駐所志祥願駐撫順遂給車騎俾移衆安輯七月召見崇政殿授總兵錫賚優渥四年封續順公六年率所部隨大軍圍錦州七年凱旋賜貂裘及降戶志祥請令部衆隸八旗漢軍於是隸正白旗順治元年四月隨大軍入山海關擊敗流賊李自成追剿至望都十月上御皇極門宴賚凱旋諸王大臣志祥與焉三年詔以孔有德爲平南大將軍征湖南志祥率兵從五年湖南底定振旅還賜黃金百兩白金二千兩尋卒無子兄子永忠襲公爵

謝陞

謝陞山東德州人明萬曆三十五年進士歷知三河遵化雄滑四縣內除禮部主



事天啟時遷吏部文選司郎中崇禎初選太常寺少卿嘗求巡撫於吏部尙書王永光會當推薊鎮引疾以避及推太僕卿忽報病痊御史毛羽健劾陞與永光朋比宜並罪永光召對文華殿力詆羽健請究主使者以大學士韓爌言乃不究羽健而陞罪釋不問洊遷至南京吏部尙書尋廷推都察院左都御史以御史路振飛疏陳其醜狀不果用七年詔內閣九卿各舉堪勝吏部尙書者時溫體仁柄政與陞及南京都御史唐世濟善囑其鄉人大理卿朱大啟並舉二人果用陞爲吏部尙書而世濟掌都察院八年給事中許譽卿以鳳陽皇陵被焚劾溫體仁誤國體仁怨之陞希體仁意欲出譽卿官南京大學士文震孟以譽卿資深當擢京卿語侵陞陞慍適山東布政司勞永嘉賄營登萊巡撫列之舉首爲給事中張第元何楷御史張纘曾所劾陞疑出譽卿及震孟意遂劾譽卿營求京缺不欲南遷並及震孟體仁擬旨削譽卿籍震孟並罷去唐世濟薦用逆案霍維華陞不糾駁御史李夢辰劾之給事中王士鏞至指陞及溫體仁楊嗣昌薛國觀爲四凶十三年晉太子少保改禮部尙書兼東閣大學士又加少保加太子太保改吏部尙書兼建極殿大學士十五年我太宗文皇帝克錦州及松山塔山杏山等城明御史米

壽圖疏劾監軍松山先衆竄逃之兵部郎中張若騏罪狀謂恃鄉人謝陞爲內援陞奸險小人應與若騏駢斬初兵部尙書傅宗龍出任陝西總督代之者陳新甲告以上慮關外各城難守欲息兵議和宗龍與陞語及之後陞因召對邊事遂述宗龍言且曰倘肯議和亦可恃及出語給事中方士亮倪仁楨朱徽等曰人主以不用聰明爲高今上太用聰明致天下盡壞又曰此事諸君不必言上祈籤奉先殿意已決於是士亮仁楨與給事中廖國遴等交章劾陞誹謗君父洩禁中語大不敬無人臣禮至是壽圖疏入若騏論死繫獄陞亦罷歸本朝順治元年正月大兵定京師頒詔招撫山東六月陞偕在籍明御史趙繼鼎盧世灌等遣人齎降表赴闕其詞曰闖賊李自成肆逆逞暴神人同憤臣等空切不共之仇愧無回天之力惟皇帝陛下智勇兼錫威靈遐暢篤夙昔之舊好沛拯救之新綸浩蕩仁恩有逾再造先是四月二十七日臣等鼓勵闔州士民礮僞州牧吳徵文僞防禦閻杰誓衆登陴激發遠邇共誅闖賊所置僞官賊將郭陞喪膽西遁謹埽境土以待天庥彼時德藩被執適慶藩宗室曾爲明朝香河令名師欽者避闖過境爲僞州牧所禁臣等暫奉爲號召之資倘蒙陛下興滅繼絕不泯明祀將皇仁益暢於中

外大義卓越乎千古又是臣等所私心冀幸而未敢必者也敬附歸順之私而并及之疏上得旨下吏部察紱時招撫侍郎王鼐永亦具疏薦陞尋召朱師欽以知州用趙繼鼎盧世灌授御史命陞以建極殿大學士原銜管吏部尙書事八月陞至諭曰前以銓除爲國家要務是以欲用卿爲吏部尙書今思內院職任較重宜卽與諸大學士共理機務賜銀幣貂裘諸物十二月與大學士馮銓洪承疇等並賜金二十兩銀一千兩及金玉諸器皿時有自稱明崇禎帝太子至嘉定伯周奎家者奎疏聞下內院集明官及太監辨視皆莫識惟太監楊玉常進節指揮李時蔭等數人證以爲眞陞與銓承疇及吏部侍郎沈惟炳給事中朱徽等請下法司詳勘得劉姓假冒狀與楊玉等數人並棄市二年正月陞以疾劇乞假命太醫診視二月卒贈太傅廕一子賜祭葬如例謚清義

### 金之俊

金之俊江南吳江人明萬曆四十七年進士官至兵部右侍郎流賊李自成陷京師之俊不能死被拷索本朝順治元年大兵定京師之俊降仍原官疏請先下蠲租之詔於畿甸以慰民望又言土寇率衆歸誠者宜赦罪勿論其縛渠來獻者宜



分別敘功就撫之衆宜編置牌甲令各安故業無恆產者宜設法區畫請頒諭各鎮道府遵行尋奏薦故明薊遼總督丁魁楚陝西總督丁啟睿陝西巡撫練國事副都御史房可壯吏部員外郎左懋泰河東守道郝綱等並才堪錄用又劾通州道鄭輝優游養寇剿撫無聞三關鎮臣郝之潤借名誅僞縱兵肆掠俱宜罷斥並請趣畿南北按臣及監司以下官速補赴任禁止滿洲官役額外需索驛遞夫馬疏入悉採納之二年五月以京師米價日增疏言西北糧食取給東南自闖賊亂後南粟不達京師至北地米價昂貴今大兵直取江南計蘇松常鎮及杭嘉湖七郡漕白必抵南庾須急令漕督星馳淮上巡漕御史疾趨瓜揚經理運務俟金陵底定酌留之餘悉轉太倉南粟既來米價自減詔速議行六月條陳漕政八事一衛所旗軍旣裁宜別設運官漕卒一明季舊艘殘毀宜改用投順兵船一南漕抵濟宜別造剝船轉運津通一加耗應照明初舊例餘悉蠲除一徵收宜責正印勿委佐貳一漕道宜駐濟寧專司剝運各省糧道至濟交卸卽押回空其足額與否聽漕道驗報一漕米除蠲餉外視舊額盈餘若干悉爲改折隨漕徵解一漕運官軍除交兌外仍支給坐行二糧疏下所司知之七月調吏部右侍郎三年疏請酌

改銓選進士之制謂故明舊例二甲選部屬知州三甲選中行評博推官知縣不論名次內外互選於政體人情均未協請以二甲前五名選部屬後二十名與三甲前十名選中行評博十一名至二十名選知州二十一名至七十名選推官餘選知縣得旨允行五年擢工部尙書六年請假歸葬許之以礮局失火之俊坐分賠特予寬賞令罰俸三月旋以恩詔加太子太保七年假滿還朝八年遷兵部尙書晉少保兼太子太保十年正月調都察院左都御史會與大學士陳名夏等議革職總兵任珍罪之俊坐黨附論死奉旨從寬削加銜罰俸一年五月疏言審擬盜犯不宜概行籍沒致累無辜請依正律又言旗省提學例以僉事道分遣視事若畿輔爲首善之區江南爲人才之會請以翰林官簡用均報可尋遷吏部尙書十一月授國史院大學士十二月充會試主考官初之俊引疾乞休不允十三年二月諭曰君臣之義終始相維爾等今後毋以引年請歸爲念受朕殊恩豈忍違朕朕亦何忍使爾告歸若決於引退卽忍於忘君矣之俊奏曰臣蒙皇上隆恩但懼不能報效何忍遽違恩眷越日上復諭諸大臣曰昨歲之俊病甚朕遣人圖其容念彼已老倘不起不復相見故乘其在時命工繪像蓋不勝眷戀如此諸臣

亦有衰老者豈不有歸田休養之念但經朕簡用之人欲皓首相依不忍離也之  
俊泣奏曰諸臣中無才者莫過於臣受皇上深恩而負重罪者亦莫過於臣舛誤  
滋多惟恐廢職非忍於離天顏也十五年九月改內三院爲殿閣銜以之俊爲中  
和殿大學士兼吏部尙書十二月同校定律例十六年二月詔立明莊烈帝碑命  
之俊撰文以進是月加太保兼太子太師五月以大學士李蔚於兵部請武進士  
劉炎等俸祿一疏票擬任意之俊看詳疏忽有旨切責部議降二級留任罰俸一  
年旋加恩寬免八月請假歸葬十七年在籍自陳乞罷溫諭來京供職未至加太  
傅十八年改殿閣銜仍爲內三院授之俊祕書院大學士康熙元年予告致仕之  
俊回籍後屢以衰老乞休至是始從所請四年應詔馳疏陳三事一決囚當有定  
候凡監候斬絞之犯請照例秋後行刑一考成尙需通融酌免有司之實降實革  
以責久任分別糧里之欠少欠多以示勸懲一民間挾私叩閭因而陵轍官府以  
案法紀者宜申嚴禁疏入報聞之俊家居數年有撰匿名帖榜其門者多言其賊  
私曖昧事之俊白之總督郎廷佐窮治之牽累不決事聞八年正月諭曰匿名帖  
乃奸惡之徒造寫陷害平人者如見其投擲拏獲理應照律從重治罪若因此究



問則必致株連無辜律載收審匿名帖者將審問之人治罪金之俊將匿名帖送究耶廷佐收受察拏俱生事不合著議處於是廷佐鐫二級之俊削太傅銜九年卒賜祭葬如例謚文通

### 胡世安

胡世安四川井研人明崇禎元年進士改庶吉士累官詹事府少詹事本朝順治元年四月大兵定京師世安降授原官尋裁詹事府授翰林院侍讀學士掌院事十二月賜鞍馬二年遷國史院學士尋充修明史副總裁五年八月遷禮部左侍郎十月丁母憂奉旨在京守制九年三月擢禮部尙書十二月侍宴中和殿賜貂皮朝衣一襲十年以覆審總兵任珍罪徇黨附和部議革職永不敘用得旨著降三級留任十二年二月以病乞休上慰留之七月考滿加太子太保廕一子入監讀書十三年三月副都御史魏裔介廣東道御史焦毓瑞交章劾世安受大學士陳之遴囑薦其同鄉安肅令沈令式爲知府令式庸劣旋爲總督李蔭祖所參植黨營私確有可據命世安回奏世安疏言保舉令式憑學臣鹽臣薦章非因之遴推舉下部議以世安失於詳慎罰俸一年四月諭曰胡世安在禮部最久乃典禮

甚多未協有負委任著革去太子太保降三級照舊辦事十四年充經筵講官十五年晉武英殿大學士兼兵部尙書十六年三月詔以大學士胡世安奉職有年勤勞素著仍加太子太保六月考滿加少傅兼太子太傅十八年正月聖祖仁皇帝御極仍改殿閣銜爲內三院以世安爲祕書院大學士十一月以疾乞休加少師兼太子太師致仕康熙二年卒予祭葬如例

田維嘉

田維嘉直隸饒陽人明萬曆四十四年進士累官吏部尙書崇禎十年變考選例知縣推官政優者得入爲翰林次科道次部主事給事中陳啟新奏考選不公莊烈帝取吏部咨訪冊閱之罪濫徇者貶黜給事中孫晉李右謹御史禹好善葉初春等維嘉懼乃請先推部曹少詹事項煜言維嘉阿大學士張至發優其所親任濬諭德黃景昉亦言素著廉能之成勇朱天麟未預清華選乃命集已授部選及候選者廷試親定甲乙勇等皆改官給事中吳麟徵御史宋學洙交章劾維嘉臧污檢討楊士聰復劾其納周汝弼金用爲延綏巡撫御史史壘爲居間乃逮訊史壘及維嘉家人會有兵事獄久不結壘瘐死事得寢維嘉引疾歸里本朝順治元

年六月維嘉遣子敬宗齎疏自陳倡率饒陽紳士擒斬流賊李自成所置僞令拒卻賊黨康文斗郭壯畿開通道路舉城歸順得旨召維嘉赴京錄用八月維嘉至命以刑部尙書管左侍郎事九月疏陳衰病乞歸諭曰田維嘉星馳趨召具見急公覽奏情詞懇切准其回籍調理病痊起用二年二月卒子敬宗以卹廕請禮部言維嘉未任事卽歸不准卹廕

### 沈維炳

沈維炳湖廣孝感人明萬曆四十四年進士初任香河知縣入爲刑科給事中天啟元年廷臣爭紅丸案兵部尙書黃克纘述進藥始末力爲首輔方從哲辨維炳與同官薛文周劾其昵私交昧大義二年遼東經略熊廷弼巡撫王化貞以廣寧失陷逮勘登萊道佟卜年爲廷弼所薦有訐其謀叛者大學士沈灌兵部尙書張鶴鳴欲藉以重廷弼罪維炳疏言灌因言官列其私跡借廷弼爲抵彈謝過之具廷弼承失地之罪足矣豈必加以他辭鶴鳴左袒化貞角勝廷弼致經撫兩敗獨鶴鳴超然事外今復欲加罪廷弼有背公論實與灌朋謀三年御史郭鞏劾左都御史楊漣等保舉廷弼黨邪誤國維炳疏言諸臣欲殺廷弼特借名報怨非眞爲



封疆起見也漣與廷弼本不相蒙今牽入一案且波及數十人方今乃臥薪嘗膽之日豈報怨爭鳴之日耶四年轉吏科都給事中疏論魏忠賢所用立枷法不可行值吏部尙書趙南星放歸論維炳陳奏過當鐫秩調外用崇禎元年復原官刑科都給事中薛國觀劾其與兵科給事中許譽卿主盟東林把持察典譽卿引疾歸維炳任職如故洊遷吏部左侍郎及流賊李自成至不能死受拷掠本朝順治元年五月睿親王多爾袞定京師維炳投誠令仍任原官六月啟言維炳爲亡國之臣仍舊服官雖朝章不罪其偷生而臣義則能無愧死且年已六十有四兩目昏盲視字如霧足膝疼痛拜跪苦難乞賜投閒睿親王慰留之七月啟言維炳於三四月間幽困賊營今無家可歸卽謝事亦不敢求去願長依輦轂下但素性多執弗克周旋人情恐怨謗日生卽欲矜全亦有不能望早賜罷斥睿親王復諭曰前旣慰留當盡心供職不辭勞怨何得疑慮謗毀豫以私情陳請九月疏言自流賊毒辱搢紳後引遯全生者甚多雖荷新朝寬大廣示招徠乃人情躁競吏員冒正途粟監冒明經生儒冒貢監白丁冒冠裳遠年罪廢而匿情起用輿論共棄而借資求銓總因官制未定人希意外之榮宜盡數察出或姑令任事徐觀其後或

從新改正各還其原卽前朝末政亦多可議臣爲前朝舊臣何忍斥言明政之非然而興朝作新應斟酌因革以爲百世之準疏入得旨沈維炳職掌佐銓宜率屬釐剔公清澄敍使吏稱民安作新治道各官已用者姑免追究以後著嚴加察核不許仍踵陋習違者劾之順治二年正月以吏部銓用御史之葉定秀現爲明福王朱由崧光祿少卿又推補原官之明吏部員外郎左懋泰其兄懋第爲明福王使臣北來弗歸順吏部不檢舉下刑部審擬維炳革職免杖閏六月副都御史劉漢儒劾維炳子宣府推官沈宜憑父勢久招物議今巡按御史張鳴駿薦其堪膺科道顯係徇情且沈宜雖曰明經其考選之文係人代作又維炳曾選其二僕沈永寧沈元貞爲典史冒濫官常宜並斥逐事下刑部問擬沈宜由貢考職部冊可據所指作文之人未預考無代筆事沈永寧沈元貞非維炳僕所糾諸款不實宜復職惟年已老旣罷弗復用

### 房可壯

房可壯山東益都人明萬曆三十五年進士授御史天啟元年三月我太祖高皇帝親統師取瀋陽遼陽明經畧袁應泰自經死可壯疏請起用原任漕運總督李

三才爲經略下廷臣集議通政使參議吳殿邦阻止之四年十月吏部尙書趙南星罷魏忠賢欲用其私人代之侍郎陳于廷不從時可壯掌河南道事與于廷等會推喬允升馮從吾汪應蛟三人忠賢傳旨切責可壯及于廷等並貶黜崇禎元年三月起忤璫諸臣可壯補原官十一月會推閣臣次列禮部侍郎錢謙益尙書溫體仁訐謙益主浙江鄉試時關節受賄諸臣黨比推舉莊烈帝召謙益及給事中章允儒等廷訊事詳錢謙益傳可壯坐黨比降秩尋洊遷副都御史十五年五月吏部尙書李日宣給事中章正宸御史張煊等會推閣臣可壯及侍郎宋玫大理卿張三謨預焉是時大學士陳演以試御史廖於義私囑都察院予實授可壯與張煊持不可於義糾可壯煊不公下吏部議坐於義挾私降調之至是演奏會推事徇私濫舉莊烈帝怒御中左門召李日宣章正宸等語其妄舉日宣奏辨稱可壯峻節練識莊烈帝益怒下刑部定讞日宣等戍邊可壯與宋玫張三謨削籍歸福王朱由崧時御史陳子龍請召用可壯大學士姜曰廣亦薦之行人朱統鑣劾曰廣引用東林死黨把持朝政曰廣乞罷歸議遂寢本朝順治元年六月招撫侍郎王鼐永至山東可壯率鄉人殺流賊所置僞益都令奉表投誠鼐永疏請召



用侍郎金之俊給事中郝傑亦交章薦之三年二月授大理寺卿六月疏言舊制大理寺掌覆核刑部諸司問斷當者定案入奏請再讞近見刑部鞠囚有徑行請旨處決者未足以昭慎重宜仍歸大理覆核會奏並請敕法司早定律令以臻協中之治從之十一月擢刑部右侍郎五年轉左六年遇恩詔加右都御史銜八年八月加太子太保十月以右都御史管左副都御史事九年三月陞左都御史會風霾遵諭陳言請稽古勤民減不急之費廣欽恤之仁並敕督撫申戒有司無悖旨徵收已蠲錢糧培克困民上命實指有司困民狀可壯因奏江南華亭知縣周世昌山東臨朐知縣童本胡苛斂浮徵事下所司鞠實褫職十二月給事中杜篤祐疏言疊奉諭旨申敕都察院陳奏各官勤惰政事修廢無得徇情不言並令糾駁諸臣章奏數月以來左都御史房可壯不聞遵旨赴陳惟有請復關差及添官行商之疏經給事中周之桂孫作齡疏駁及戶部覆奏並不准行是其苟且塞責無以仰副聖懷況大計及按差復命屆期舉劾尤宜公正難容尸位素餐上命可壯回奏奏上篤祐復劾其支飾戀職可壯乃以衰老乞罷詔復原官致仕十年正月御史吳達疏糾吏部尙書高爾儼職任銓衡漫無甄別如房可壯之風紀消磨

直待科臣糾參始自陳引去上以吳達不言於可壯致仕之先切責之五月漢軍正藍旗佐領張榮舉首歸旗候補副將賈漢復奢縱違制等款詞連可壯任左都御史時屢詣漢復家屏人密議下刑部質訊以漢復素識可壯其密議事無左證得旨原宥十月卒於家贈少保廕一子入監

劉漢儒

劉漢儒順天大興人明天啟二年進士崇禎時累官至四川巡撫流賊陷夔州圍太平石砬土司秦良玉率兵援漢儒運長慶米濟其軍太平圍解中書涂原練鄉勇守梁山擊退賊漢儒及巡按御史黨崇雅請用原以蜀人治蜀兵莊烈帝不許并罷漢儒本朝順治元年五月起授都察院左副都御史九月世祖章皇帝車駕將至京師羣臣俱赴通州迎漢儒疏言城守空虛懼奸民竊發請留重臣以鎮中外派守兵以嚴出入遠偵探以杜窺伺下部知之十二月賜鞍馬時流賊自太原直犯井陘結開城殺官仍退據固關漢儒疏言井陘險峻崎嶇一人當關萬夫莫敵且去正定近倘賊兵長驅正定無兵可恃今宜飛檄官兵視賊所向或直搗其巢或分截其路賊可就擒否則我兵南剿賊已近在肘腋土賊響應首尾兼顧鞭

長不及勿謂疥癬毋煩過慮下所司知之二年閏六月疏言頃者南差不用南人乃一時權宜計今天下一統何分南北嗣後遇巡按差缺除迴避本省外酌量隔省資才堪任者列名奏請簡用得旨各省巡按南北一體差用但家鄉鄰近者雖隔省亦不得差是月賜紗蟒衣一襲七月疏言十三道御史原百有二十用以巡劾糾察我朝酌減至六十今差務日繁銓部竟未考滿何以應差請敕部速補詔如所請行八月御史王守履劾漢儒係大學士馮銓黨爲御史江禹緒營求招撫鄖陽漢儒具疏辨並引病求罷得旨劉漢儒無端被誣著益盡心職掌以振風紀三年復以病乞休康熙四年卒賜祭葬如例

### 黃圖安

黃圖安山東堂邑人明崇禎十年進士由推官內陞吏部主事遷員外郎管餉易州尋授易州道本朝順治元年五月圖安率所屬投誠命仍原官時沿河牟山等處賊尙嘯聚而河間巨盜李聯考糾衆萬餘犯易州界圖安親擒賊首餘黨悉平二年四月以剿撫功擢甘肅巡撫圖安以母老疏辭易州民郭世明等亦赴闕懇留得旨黃圖安擢撫巖疆著速赴新任殫力料理所請俱不允三年二月疏言流



賊李自成荼毒中原橫蹂三秦望風皆靡惟故明撫鎮將吏矢志戮力誓死不降如巡撫林日瑞總兵馬爌副將郭天吉歐陽袞遊擊哈惟新張際都司萬恒姚世儒高登科姜宏基守備郭維崎同知藍臺等或甘心白刃或罵賊自刎請敕部旌獎以慰忠魂章下所司六月調寧夏巡撫八月復疏請終養諭部察議以西陲多事借端規避革職四年三月追議圖安於甘肅巡撫任內服用違制已革職永不敘用先是大學士范文程以圖安母年八十一終養乃人子至情吏部不宜遽議斥擬爲申奏值齋期未果白於鄭親王濟爾哈朗睿親王多爾袞知之責文程擅關白下法司勘訊坐削職旣而釋之九年四月文程復爲圖安請起用得旨黃圖安著以僉都御史巡撫用十一年二月復授寧夏巡撫時左都御史魏裔介請裁併各省道員命督撫議奏十三年圖安疏言寧夏係西北重鎮河西道駐鎮城內督徵屯糧兵餉兼理學政所管漢唐等渠引水灌溉裕賦資民關係甚鉅河東道駐靈州東至花馬池接延安定邊西至半個城接固原慶陽北自橫城至長邊所在衝險彈壓料理極爲繁要均難議裁詔如所請十四年考滿加副都御史銜廕一子入監十六年濟南知府賈一奇以貪贓爲山東巡撫程衡所劾給事中姚廷

啟因疏言一奇曾任慶陽同知寧夏巡撫黃圖安保舉匪人貽害地方且圖安自任巡撫絕無勞績可紀卽濫舉一端已足覘其庸劣有素請治罪以爲朦徇者戒下部議圖安降五級調用尋卒

### 高斗光

高斗光山東嘉祥人明萬曆四十七年進士天啟間任直隸南和縣知縣遷保定府知府崇禎末以給事中沈迅保薦擢鳳陽總督流寇張獻忠陷含山犯無爲御史詹兆恆劾之不報後賊臨江欲渡斗光不能禦兆恆陳內外合防策再劾斗光請以史可法代遂罷譴舉主沈迅亦被謫本朝順治元年以錦衣衛百戶危列宿奏薦授偏沅巡撫二年御史吳達劾大學士馮銓語涉斗光在前朝失陷封疆事斗光疏辯請與達質命速赴任不必自求召見尋疏陳安民弭盜二事得旨偏沅重地新經撫定其間安集機宜高斗光當俟到任後詳確入告如此泛陳殊爲無當初湖北常明季時土寇蜂起迄明亡蔓延彌甚是年順承郡王勒克德渾統師征討屢敗賊賊勢漸挫旣班師賊之在湖南者復肆掠偏沅道梗斗光不能達乃駐節武昌三年奏請發大兵往剿命恭順王孔有德爲大將軍率將士趨湖廣斗

光進駐荊州四年故明總兵任宣烈率家屬來降斗光遣宣烈招撫安鄉文田各寨擊走僞將鄭一龍李春輝等扼之洞庭湖口斬首數百溺死無數尋請借荆關料稅開局鼓鑄生息佐軍又請復常德舊局鼓鑄借協餉銀爲鑄本接濟軍需並得旨允行七月安化土賊闖城中文武官出應調遣乘間入城劫掠典史孫煜集兵捕賊賊卻走踞山寨斗光檄長沙鎮兵赴剿盡殲之先是湘鄉諸生蕭漢奇爲仇家誣訐違制蓄髮繫獄知縣劉越薌雪其冤釋之因受漢奇餽謝越薌故貪污至是斗光以越薌於生員蓄髮事嚇詐受財列款糾劾未詳漢奇被誣狀疏入上以斗光但劾越薌劣蹟不窮治生員蓄髮事下部議降二級調用會斗光老病請休總督羅繡錦亦以撫臣右手偏廢入奏部議照所降級致仕尋卒

王永吉

王永吉江南高郵人明天啟進士官至薊遼總督本朝順治二年以順天巡撫宋權薦授大理寺卿四年奏請遣官往直省恤刑尋擢工部右侍郎永吉疏辭上以永吉實非恬退而徒尙虛名特允所請並諭永不錄用以懲陋習永吉既罷家居數年會有旨起用廢員復至京八年閏二月吏部列薦永吉才品可任八月起授



戶部右侍郎九月條奏三事一各衛所屯地分上中下三等請撥上田給運丁以濟運費一各項低色銀請仍令官收官解其本色物料動支折價採買如額足酌加以甦民累一洲田丈量重爲民害請以蘆課并入各州縣考成五年一次丈量皆見採擇明年七月條奏治河事宜略曰黃水自邳宿下至清河口淮泗之水聚於洪澤湖亦出清河口淮黃交會黃強淮弱勢有不敵淮泗逼而南趨四百餘里出瓜洲儀徵方能達江一線運河收束甚緊卽有大小閘洞宣洩而海口不開下流壅滯所以河隄潰決修築歲費金錢九載以來八年昏墊海口之當開固不容少緩者也第海口之在興化泰州鹽城境內者輒爲附近居民填塞乞敕河漕重臣遴委才能親往相度開濬疏通復其故道淮泗水消則黃河勢減矣是時直隸河北諸省皆患水災江以南復旱屢詔所司議蠲賑而湖川閩廣各鎮戰守官兵急需本折糧餉永吉以來年兵馬之餉飢民冬春之苦並當預籌請召見廷臣各抒足餉救荒之策以俟聖斷奉旨王永吉必有良策著詳具以聞永吉因言各省老弱病廢罪革占冒之兵當清而老病弱斃缺額之馬亦當清十汰其二以百萬之餉計之歲可省二十萬卽以裁省之項酌定直省災傷分數詔諭蠲賑自寬然

有餘則兵清而餉亦裕賦減而民更安矣上嘉納之會畿輔姦民有借投充旗下以橫行執法者永吉奏請敕禁諸王大臣濫收漢人投旗以息諸弊十年二月擢兵部尙書十一年二月同刑部尙書覺羅巴哈納等分賑直隸八府三月轉都察院左都御史奏言鄭成功盤踞漳泉惠潮之間悖逆顯著乞諭督撫諸臣製器練兵不可因成功已經受撫心生懈怠更不可顯露張皇以致疑畏反側又奏請以江寧總兵移駐鎮江蘇州提督移駐吳淞劉河上皆從之四月授祕書院大學士八月罷先是永吉任兵部時翰德州褻生呂煌窩逃行賄事審結稽遲出入未當至是下諸王大臣詰問永吉厲聲爭辨尋以鑄級罰俸議上得旨王永吉破格超擢簡任機密當竭力爲國以圖報稱昨諸王大臣會議呂煌一案詰問情由輒張威忿怒全無小心敬慎之意豈非欲效陳名夏故態耶負恩殊甚宜加重懲姑從寬革去大學士降一級調用九月補總督倉場戶部左侍郎奏定領運官盜買侵蝕漕糧追還未清計分科罪之例十二年二月仍授國史院大學士上以銓政重大必清直練達乃稱厥職特加永吉太子太保以大學士管吏部尙書事十四年四月奏言入夏以來亢陽不雨皇上竭誠祈禱恭祀圓丘甘霖旋霈真千載僅見

之盛事然誠敬格天不在升中告虔之日卽欽差大臣清理刑獄一事已通帝座而協休徵矣今直隸各省俗未還醇訟獄繁熾承問者怵於功令恐蹈徇情之罰又且急於定讞附以深文未必準律合情況當耕耘力作之時關檄勾提恐妨農業乞下直省督撫巡按文到之日速行清理獄囚如有殊常冤枉奏請上裁其贖徒以下保釋寧家庶洋澤宏敷不崇朝而遍四海矣奉敕下所司議行十月以地震具疏引罪得旨朕因地震深自惕勵兼命諸臣共加修省王永吉身爲大學士宜實力修省乃反虛飾認罪似此徒博虛名何如盡心實事耶十五年四月以其姪樹德私通科場關節事發降五級調用九月補太常寺少卿十月遷都察院左副都御史十六年二月卒上諭部臣曰王永吉前因好勝沽名故降級示抑欲使省改自新不意遽嬰疾奄逝朕甚悼焉念其服官有年勤勞素著宜加曠典以昭優恤著贈少保兼太子太保吏部尙書照一品例給予祭葬立碑蔭一子遣官護喪歸里賜諡文通

王鐸子無黨

王鐸河南孟津人明天啟二年進士改庶吉士授編修洊陞少詹事充經筵講官



崇禎十一年春進講中庸唯天下至聖章旁及時事有白骨如林語莊烈帝切責其敷衍支吾不能發揮精義鐸惶懼俯伏案前待罪明年大學士張至發奏東宮出閣時設侍班四人講讀六人校書二人皆以翰林及詹事坊局官兼任時廷議舉諭德黃道周至發屏之而鐸爲侍班尋乞假歸里十七年三月擢禮部尙書未赴流賊李自成陷京師明福王朱由崧立於江寧鐸與詹事姜曰廣並授東閣大學士道遠未至大學士馬士英入輔政出史可法督師揚州嗾其黨朱統纘劾曰廣去之鐸至遂爲次輔是年十二月刑部尙書解學龍治從賊獄仿唐制六等定罪庶吉士周鍾曾爲賊草勸進表又上書勸賊早定江南與率先從逆之光時亨僅列二等擬緩決士英傳旨令再議學龍謀之鐸欲緩周鍾光時亨死伺士英注籍上之且請停刑鐸卽擬俞旨褒以詳慎平允士英聞之大怒削學龍籍而置鐸不問本朝順治二年五月豫親王多鐸克揚州將渡江明福王走蕪湖留鐸守江寧鐸同禮部尙書錢謙益等文武數百員出城迎豫親王奉表降尋至京候用三年正月命以禮部尙書管宏文院學士充明史副總裁六月賜朝服四年充殿試讀卷官六年正月授禮部左侍郎充太宗文皇帝實錄副總裁十月遇恩詔加太

子太保八年晉少保是年三月疏言帝王御世莫不重道尊師今上親政伊始百度維新請幸學釋奠並命祭酒司業諸臣於彝倫堂進講先期敕工部修葺聖廟仍照例咨調衍聖公及四姓博士赴京陪祀以襄盛典得旨釋奠大典允宜舉行其令擇吉具儀以進葺文廟如所請行五月御史張煊疏劾吏部尙書陳名夏私庇南人以鐸資深不得陞尙書反陞資淺右侍郎陳之遴爲證名夏謂之遴陞任由尙書譚泰侍郎李率泰等偏詢九卿莫有言鐸居官優者乃推陞之遴得辨釋九年三月授鐸禮部尙書而鐸先以二月間祭告西嶽江瀆事竣乞假歸里卒於家事聞贈太保賜祭葬如例謚文安廕孫之鳳中書舍人長子無黨初仕明爲指揮同知入本朝官山西河東道姜瓖叛時巡撫祝世昌奏其禦賊有功尋遷濟東道次子無咎順治三年進士官至太常寺少卿

### 左夢庚

左夢庚山東臨清人父良玉明平賊將軍後封寧南伯卽以平賊將軍印授夢庚流賊陷京師福王立於南京良玉晉侯爵有自稱莊烈帝太子南來者福王下之獄良玉假辨明太子清君側爲名將以兵入南京至九江病死諸將推夢庚爲帥

總督袁繼咸勸旋師夢庚佯許至池州待朝旨而潛自彭澤順流下連陷建德安慶福王命總兵黃得功破之銅陵夢庚退保九江本朝順治二年閏六月英親王阿濟格追剿流賊李自成至九江夢庚率衆迎降及班師夢庚入京陛見賜宴午門內隸漢軍正黃旗十月疏言臣進京祇帶總兵盧光祖李國英二員其餘如總兵張應祥徐恩盛郝效忠金聲桓常登徐勇吳學禮張應元徐育賢俱奉英親王調發江西湖廣兩處防剿誠恐諸將在外蹤迹未定室家未安訛惑之事不可不籌得旨張應祥等官兵著該地方官安插妥當十二月夢庚爲其父請卹部議以良玉死在夢庚未投誠先旣未效順又非死事封疆例不准行從之五年追敘投誠功授一等子爵六年隨英親王征大同叛鎮姜瓖攻左衛克之尋擢本旗漢軍都統十一年卒賜祭葬諡莊敏從孫元廕襲

許定國

許定國河南太康人明末由行伍官山東游擊以平白蓮教功遷副將崇禎時禦流寇埽地王等於太康有功遷山西總兵官時李自成圍開封久監軍御史王燮趣定國統晉軍刻期渡河次沁水一夕潰被逮論死尋復授援剿河南總兵官福



王時定國以兵駐睢州本朝順治元年十二月豫親王多鐸兵至孟津定國及五寨賊首李際遇各擁衆四五萬請降聞肅親王豪格剿撫山東上書欲攜孥來歸請我兵渡河肅親王諭之曰爾果降速遣爾子來定國遂以明年正月遣其子詣軍門降會明總兵高傑謀由河南開歸取中原至歸德聞定國遣子事乃招定國往會不赴傑邀巡撫越其杰巡按陳潛夫就定國於睢州定國不得已郊迎其杰勸傑勿入城傑輕定國不聽既入定國飲傑酒侑以妓傑酣爲定國刻行期且微及遣子事定國益無離睢意傑固趣之定國遂於是夜伏兵殺傑具疏投誠並請大軍渡河靖傑餘黨得旨許定國計殺高傑歸順有功征南大兵不日卽至著傳諭知之三月豫親王奏令定國隨南征留其妻子居曹縣諭河道總督揚方興安置定國家屬資糧七月定國妻邢氏因病乞歸河南舊里方興代奏得旨許定國家屬著暫居曹縣俟該鎮陞見後奏奪十月江南平豫親王班師定國隨入京隸漢軍鑲白旗三年三月卒五年八月追敘投誠功授一等子爵以其子爾安襲十二年詔大小官直言時政爾安爲睿親王多爾袞頌功請修其墳墓語在睿親王傳鄭親王濟爾哈朗以爾安妄頌睿王元勳比擬周公結黨煽惑應論死特旨從

寬流徙寧古塔爾安所襲世爵准定國他子承襲於是爾安弟爾吉襲

### 趙之龍

趙之龍安徽虹縣人七世祖彜明永樂中以功封忻城伯數傳至其父世新泰昌元年卒之龍襲職崇禎時流賊四起莊烈帝命之龍守南京李自成陷京師福王立於南京大學士馬士英挾擁戴功內結之龍及勳臣朱國弼劉孔昭并鎮臣劉澤清劉良佐等擅朝政尙書張慎言以薦舊大學士吳甡鄭三俊爲之龍等所嫉一日朝罷之龍等羣詣於廷指慎言及甡爲奸黨叱咤徹殿陞伏地痛哭謂慎言舉用文臣不及武臣鬻爭不已又疏劾慎言極詆三俊且謂慎言迎立時阻難懷貳心乞寢甡陛見命議慎言欺君罪慎言遂乞休本朝順治二年豫親王多鐸兵下江南福王就擒之龍率明魏國公徐允爵保國公張國弼隆平侯張拱日臨淮侯李祖述懷寧侯孫維城靈璧侯湯國祚安遠侯柳祚昌永昌侯徐宏爵定遠侯鄧文囿項城伯常應俊大興伯鄒存義寧晉伯劉允極南和伯方一元東寧伯焦夢熊安城伯張國才洛中伯黃九鼎成安伯郭祚永駙馬齊贊元大學士王鐸尙書錢謙益侍郎朱之臣梁雲構李綽翰林程正揆張居給事中林有本陸朗王之

晉徐方來莊則敬及都督副將并城內官民迎降之龍將出降入戶部封庫郎中  
劉成治憤擊之之龍逃免三年六月之龍及允爵等疏繳明鐵券五年八月敘投  
誠功授之龍三等男爵隸漢軍鑲黃旗尋以老病致仕十一年正月卒孫承馥襲  
職

### 梁雲構

梁雲構河南蘭陽人明崇禎元年進士歷官僉都御史福王時授兵部侍郎本朝  
順治二年豫親王多鐸兵下江南雲構隨忻城伯趙之龍等迎降十月大學士洪  
承疇薦雲構堪大任詔交部擬用三年四月起授通政司參議五年八月遷大理  
寺卿九月擢戶部左侍郎六年十月卒賜祭葬如例諡康僖入祀鄉賢祠七年二  
月特賜右都御史廕一子入監讀書

### 劉良佐

劉良佐直隸人明總兵崇禎十年流賊羅汝才等自鄖陽東下敗官兵於宿松令  
其黨搖天動等衆二十餘萬分屯桐城之練潭石井等處良佐同總兵牟文綬敗  
之於挂車河連敗賊於廬州六安十五年同鳳陽總兵黃得功大敗流賊張獻忠



於潛山李自成陷京師莊烈帝殉難南京兵部尙書史可法欲迎立潞王朱常澆良佐同鳳陽總督馬士英總兵劉澤清黃得功高傑送福王朱由崧至儀徵立之議分江北爲四鎮良佐封廣昌伯專轄鳳壽駐臨淮經理陳杞一路而澤清得功傑爭欲駐揚州傑先至大殺掠澤清亦大掠淮上臨淮不納良佐亦被劫可法往解乃皆聽命傑欲趨河南規取中原調良佐赴徐州爲傑聲援後諸軍缺餉皆飢又聞我大兵不日南下乃令良佐同得功扼潁壽本朝順治二年豫親王多鐸下江南福王就擒良佐率兵十萬降以原官隨征丹陽金壇江陰等縣江南平入京陛見隸漢軍鑲黃旗五年敍投誠功授二等子爵隨征南大將軍譚泰剿叛鎮金聲桓王得仁於江西平之詔回京授散秩大臣十八年正月授江南江安提督加總管銜九月疏言臣現行事宜有與敕書不符者二其一甄別將領如將領臧否毫不與聞何爲甄別請將所屬武官賢否容臣年終舉劾其一教習水師沿江一帶水師俱係操江巡撫提調督臣統轄原與臣無涉而敕書開載甚詳應否教習請旨裁奪又廬鳳淮揚四府旣屬駐瓜洲之都督楊捷管轄應將臣敕書內廬鳳淮揚字樣刪去疏下部議以江南提督三員應歸併一員裁江寧廬鳳二缺時直

隸山東山西河南雲南奉旨設立提督議卽以良佐調任直隸去總管銜改左都督從之康熙五年因病休致六年卒賜祭葬如例子澤涵襲子爵

### 劉應賓

劉應賓山東沂水人明進士官吏部郎中流賊李自成陷京師應賓子琪與高珍高鏐等乘亂聚衆聞我朝大兵將至琪南投明總兵劉澤清後被殺應賓亦南逃明福王授以通政使本朝順治二年五月大兵下江南應賓投誠七月擢安廬池太巡撫時明僉都御史金聲據徽州應賓同總兵卜從善張天祿等破擒之三年三月以太平涇縣土賊殺官劫印應賓近駐寧國失防招撫大學士洪承疇疏劾以聞上以應賓有整理殘疆勞免究四月疏言太平府姑溪橋米稅金柱山商稅安慶府江上鹽稅皆創於明崇禎末年商民滋累宜革部議從之又言寧國太平二府界連土賊甚多廣德州北通高溧南通徽寧此剿彼逸日滋延蔓今遣總兵張應慶邱越兵備道高岐鳳副將馬希珍等分路招降賊首鄭壁等二百餘名解散賊衆數萬不服者誅之賊漸平十月疏奏青陽石埭土賊王印伯高近之結衆謀亂遣知府馬宏長推官彭清興分兵緝捕斬之及賊黨曹一揚等又奏江西彭

澤鄱陽等處賊了悟和尚等肆行劫掠檄池州參將折桂往剿俘獲甚衆俱報聞尋洪承疇復劾應賓衰頹不職不能爲地方興利除害濫給武職劄付致奸人藉作護符假公肆擾下部議革職尋卒

苗胙土

苗胙土山西澤州人明天啟二年進士授戶部主事洊陞郎中外轉陝西關南參議道崇禎九年四月擢僉都御史撫治鄖陽時流賊出沒楚豫張獻忠自均州馬守應自新野蝎子塊自唐縣合衆二十餘萬劫掠鄖襄總兵秦翼明兵少不能遏胙土遣使招降爲賊所給兵部尙書楊嗣昌劾論革職遣戍懷慶尋回籍本朝順治二年三月以山西巡撫馬國柱薦授南贛巡撫胙土將之任疏言臣所轄者江西之南安贛州二府福建之汀州一府廣東之韶州南雄二府及惠潮二府內之和平龍川興寧程鄉平遠五縣湖廣之郴州今閩楚尙弄兵東粵未向化以一巡撫率十餘有司翩翻江上以就未附之地殊難濟事若暫用委署不足服人請敕部臣於所屬地方不論已附未附悉遴選道府廳縣及將領守巡各員給憑前來收一府則一府官莅任收一縣則一縣官莅任於地方及候選官皆便疏入得旨



南贛撫屬大小官員速避補星馳前去三年七月疏言南瑞等十一府倏順倏叛頑民以嘯劫爲常而南贛截閩廣聯絡之衝遏湖南入閩之路三省所必爭勢所掎角況新造之區舊兵星散難聚錢糧空乏難徵臣以一文臣提不經戰之士兵嘗試其間誠爲凜慄請敕撥戰兵數千共守南贛時總督洪承疇遣江寧總兵柯永盛領兵與江西總兵金聲桓會剿賊寇胙土因疏言江西各府叛服靡常總以贛州爲觀望贛州不定則江右之亂萌未歇今諸路十餘營環列城外已四閱月豈真無隙可乘由兵將分標號令匪一士卒無統因之旗鼓不振今鎮臣金聲桓柯永盛智勇兼備部下士馬精雄若以一師守南昌一師至贛州令諸營將領悉聽節制庶號令明而蕩平可奏疏下部議令聲桓仍駐南昌調永盛南贛總兵鎮守地方是年九月胙士卒

張鳳翔

張鳳翔山東堂邑人明萬曆二十九年除廣平府推官尋擢給事中時太僕卿南企仲以請罷礦稅鐫級鳳翔迎上意劾企仲他事企仲遂削籍天啟間累遷兵部侍郎巡撫保定以東林黨爲給事中薛國觀劾罷崇禎初復故官二年遷工部尙

書十一月京師戒嚴以軍械不備下獄四年四月久旱求言言者多請緩刑鳳翔得免死戍邊衛尋召還授兵部侍郎十七年三月李自成陷京師鳳翔受拷掠及賊西遁乘間歸里尋至福建爲明唐王朱聿鍵浙直總督本朝順治三年大兵定福建鳳翔投誠授戶部右侍郎五年七月調吏部左侍郎六月遇恩詔加右都御史銜八年閏二月擢工部尙書是年遇恩詔加太子太保九年十二月疏言吏部之官制考戶部之賦役書禮部之禮儀志兵部之兵制考刑部之刑法志工部之水部備考都察院之憲綱臺規宜統送內院開局纂修博選學識老成才品端方之彥準古酌今輯成本朝會典又疏言移風易俗自輦轂始邇來官員非有吉慶典禮每一酒席費至二兩戲一班費至七兩宴會頻仍耗糜物力往來絡繹勞敝精神非所以表率四方宜敕令節省疏並下所司議行十年正月乞休詔乘驛回籍十四年卒山東巡撫耿焞據其孫廕生元靜籲請恩卹爲之入奏疏中有渭濱元老股肱大臣語諭責焞稱許太過仍下部議祭葬如例

吳偉業

吳偉業江南太倉人明崇禎四年一甲二名進士授編修十年大學士溫體仁罷

張至發柄國極頌體仁孤執不欺偉業疏言體仁性陰險學無經術狎暱小人繼之者正宜力反所爲乃轉盛稱其美勢必因私踵陋盡襲前人所爲將公忠正直之風何以復見海宇禍患何日得平疏入不報尋充東宮講讀官又遷南京國子監司業轉左庶子福王時授少詹事與大學士馬士英尙書阮大鍼不合請假歸本朝順治九年兩江總督馬國柱遵旨舉地方品行著聞及才學優長者疏薦偉業來京十年吏部侍郎孫承澤薦偉業學問淵深器宇凝宏東南人才無出其右堪備顧問之選十一年大學士馮銓復薦其才品足資啟沃俱下部知之尋詔授祕書侍講十二年恭纂太祖太宗聖訓以偉業充纂修官十三年遷國子監祭酒尋丁母憂歸康熙十年卒

### 夏成德

夏成德廣寧人明松山城守副將崇禎十四年洪承疇率兵十三萬援錦州次松山我太宗文皇帝親擊敗其衆留肅親王豪格等圍之明年二月成德自松山城內遣其弟景梅詣軍營納款往返者四並以子舒爲質約大兵由成德分守界夜間樹雲梯登城成德率步卒內應我軍如其約及他守將覺則我軍已畢登生擒



承疇及巡撫邱民仰總兵王廷臣曹變蛟等是爲本朝崇德七年肅親王奏斬不降之邱民仰王廷臣曹變蛟而令成德趨詣盛京上命禮部承政滿達爾漢出城宴勞之十五年以成德及隨降壯丁五百餘婦女幼稚千餘隸正白旗漢軍自是賜宴降臣洪承疇等賚貂裘蟒緞等物成德並預焉順治元年敍投誠功授三等子世爵景梅亦授三等輕車都尉八年大兵既定山東授成德沂州總兵時明福王朱由崧據江南其漕運總督路振飛率兵圍降賊副將董學禮於宿遷學禮通款我朝成德赴援敗振飛兵又遣游擊劉范德等取贛榆明都司王有年守備王建仁拒戰敗死餘衆舉城來歸十二月籍沂州久未歸里之大學士張四知等財產疏請入官得旨地方人產非武弁職司夏成德何得越俎下山東巡撫方大猷等察核諭曰前明紳士歸順之後又復逃竄所司自當奏報卽人產入官意在懲前警後非朝廷利其所有若在未經歸順以前止令有司察守俟其投誠給還不得一概籍沒二年正月成德疏請頒給方印并乞敕兵部給其標下將佐條印奉旨夏成德已領關防何得復請方印營將旣屬總兵統轄舊制亦無條記所奏俱不准行三月青州道韓昭宣揭成德越境縱掠成德亦揭昭宣攫金肥己狀昭宣

故明寧遠兵備道來降授官者也河道總督楊方輿疏言道臣鎮臣之互揭皆由久在明季宦途因陋襲弊臣竊見明季文武各官不思奉公守法惟知營私挾仇以致國事敗壞我朝定鼎之初正宜盡泐故習乃昭宣之心力不盡於吏治而近於逐羶成德之兵威不用以防邊而用以勾攝一則貪婪納賄一則橫暴擾民若不大伸國法何以懲儆官邪乞敕審究疏入楊方輿會同撫按勘擬革昭宣職成德撤回京尋病死子璞襲世爵

### 馮銓

馮銓順天涿州人萬曆四十一年進士改庶吉士授檢討父盛明官河南左布政被劾歸銓亦回籍天啟四年魏忠賢進香涿州銓跪謁道左泣訴父爲東林黨陷害忠賢憐之起故官洊陞少詹事充講官副都御史楊璉劾忠賢二十四罪忠賢懼求助外廷銓具書於忠賢姪良卿言外廷不足慮且教之行廷杖輿大獄銓與錦衣衛都督田爾耕左都御史崔呈秀給事中李魯生等並詔事忠賢又引其所取士主事曹欽程爲忠賢養子列十狗之一銓欲害御史張慎言周宗建令魯生草疏囑欽程上之因及李應昇黃尊素而薦魯生及傅樾陳九疇李璠李恆茂梁

夢環等張慎言等四人並削籍先是熊廷弼經略遼東以廣寧失守下獄大理丞徐大化獻策忠賢宜並坐楊璉等納廷弼賄殺之有名忠賢從之銓素與廷弼隙於講筵出書肆所刊遼東傳進呈曰此廷弼所作希脫逃罪耳遂殺廷弼傳首九邊御史吳裕中廷弼姻也銓惡之陰使人嗾裕中劾大學士丁紹軾陷廷弼狀而先報忠賢曰裕中必爲廷弼報仇劾疏上杖裕中百梟至家卒五年八月擢銓禮部侍郎兼東閣大學士入贊機務九月晉禮部尙書改文淵六年正月充三朝要典總裁官四月晉少保兼太子太保戶部尙書武英殿大學士時太監涂文輔爲忠賢腹心人爲之語曰內有涂文輔外有馮振鸞振鸞者銓字也要典成榜東林黨人姓名示天下而於崔呈秀無美辭忠賢心銜之會呈秀亦與銓交惡其黨孫杰霍維華嗾職方郎中吳淳夫上疏力攻之御史盧承欽復劾銓納賄居間數事遂罷職崇禎初忠賢旣伏罪給事中李遇知於臧罰庫得銓罷官後爲忠賢上壽詩百韻劾銓與忠賢交結論杖徒贖爲民十一年我太宗文皇帝遣睿親王多爾袞等證明克繼輔及山東六十餘城銓率鄉人守涿又護送紅衣礮至京師十四年周延儒復入閣銓與延儒同年生其再召也銓爲助謀延儒德之欲援守涿及



運礮功復其冠帶給事中章正宸上疏力爭乃止本朝順治元年四月睿親王統師入山海關擊走流賊李自成定京師承制攝政以書徵銓銓聞命卽至優予冠服鞍馬銀幣令以大學士原銜入內院佐理機務遂與大學士洪承疇請復明初內閣票擬舊例凡內外文武等官條奏部院覆奏本章並下內院擬票尋又同大學士謝陞等議定郊社宗廟樂章十月朔世祖章皇帝御皇極門受朝賀翼日給事中孫承澤言登極之日朝賀諸臣班行錯雜禮節粗疏皆由內院漫無主持銓因與謝陞洪承疇乞罷諭令益殫忠猷以襄新治不必合同引請二年三月定部院官制授銓弘文院大學士兼禮部尙書八月御史吳達疏劾馮銓爲逆黨魏忠賢乾兒故習不移曾向降鎮姜瓖索銀三萬許以封拜因止餽金馬等物大拂其意平日攬權納賄可見內院政本所關銓令其子源淮擅入張宴延學士講讀史館及中書等官歡飲竟日爲結納地其縱子往來貴要招搖納賄又可知請罷黜以肅政本給事中許作梅莊憲祖杜立德御史王守履羅國士鄧孕槐等亦交章劾銓有索招撫侍郎江禹緒金百兩爲子源淮賄招撫侍郎孫之獬充標下中軍諸款並下刑部質問御史李森先又疏言昨疏請仿唐制令諫官隨宰相議事蓋

深憂奸相馮銓誤國旋聞許作梅等同吳達已特疏劾銓奉旨下刑部質問臣未見達疏惟聞其指銓父子招搖納賄一二事竊謂淺之乎論銓也明朝二百餘年國祚壞於奄宦魏忠賢之手而忠賢當日殺戮賢良通賄謀逆皆成於銓一人此通國共知者正如商之飛廉惡來豈可再列周朝之上且銓百萬之富慣於夤緣刑官有不敢問不欲問者倘解縛縱虎爲患更甚乞親御殿廷詢問羣臣命滿洲忠誠親信之人徧訪通國士民商賈婦女小兒有一不稱銓爲奸者請坐臣欺罔之罪如臣言不謬願皇上立彰大法戮之於市播告天下曰有傾覆明之社稷復亂本朝法度如銓父子已服厥罪庶天下熙然向化賢於十萬兵甲疏入睿親王傳集廷臣及科道各官令刑部以所具讞詞再行面質刑部言科道彈劾不實應反坐給事中龔鼎孳言銓實黨附魏忠賢作惡銓亦斥鼎孳曾降流賊李自成語詳龔鼎孳傳睿親王因論明季諸臣黨害無辜以致明亡今科道各官仍蹈陋習申戒之寢其事三年正月銓疏言臣於元年五月特召辦事內院列同官舊臣之前臣固辭不敢蒙攝政王面諭國家尊賢敬客卿其勿讓日下海宇漸平制度略定金臺駿骨但可暫示徠招久假不歸實逾涯分況叨承寵命賜婚滿洲理當附

籍滿洲編氓之末迴繹尊賢敬客之諭輾轉悚懼特懇改列范文程剛林後如以新舊爲次并當列范充裕寧完我之後伏乞聖鑒裁定得旨天下一統滿漢自無分別內院職掌等級原有成規不必再定是年及四年兩充會試正考官六年充太宗文皇帝實錄總裁官恩詔加少傅兼太子太保八年閏二月上命吏部具列各部院堂官職名親加甄別諭曰馮銓先經御史吳達疏參私得叛逆姜瓖賄賂殊失大臣之體便當引去乃隱忍居官七年以來毫無建明毫無爭執著致仕去是年御史張煊疏劾尙書陳名夏十大罪有依附邪黨一款謂當吳達等廷糾馮銓時名夏時爲侍郎徇庇私交噤無一語銓臥病名夏屢爲候視故達遺書責之有堂堂少宰側足小人牀褥語給事中杜立德復疏言納賄弄權之馮銓當時劾之者不止吳達臺臣李森先桑芸及科臣許作梅皆劾之同爲銓所切齒假票擬於數言輕重之中弄機權於旁引曲借之內森先作梅一時革職芸亦無辜降調茲逢聖政方新權奸旣斥仰乞皇上矜察忠讜明年上覽李森先劾銓原疏諭曰諸臣所劾甚當何爲以此罷斥大學士范文程奏曰諸臣疏劾大臣爲君爲國上遂諭起用許作梅李森先原官銓之罷也陳名夏陳之遴相繼入內院之遴尋以



廷翰奸民李應試等交結官吏窩藏賊盜事恐爲所害不敢詰問爲鄭親王濟爾哈朗等劾奏降調代之者高爾儼又衰病不能任事十年三月諭吏部曰國家用人使功不如使過原任大學士馮銓素有才學召入內院辦事數年以來未見有所建明且經物議是以令其致任回籍朕思馮銓原無顯過且博洽典故諳練政事朕方求賢圖治特召用以觀自新諭到之日卽速赴京銓旣至召對內院是夕復召同大學士洪承疇范文程額色赫陳名夏入詢論翰林官賢否諭曰朕將親考其文之優劣可定其高下銓奏曰人有優於文而無能無守者有短於文而能有守者南人優於文而行不符北人短於文而行或善今取文行兼優者用之可也上是其言仍授弘文院大學士四月九卿等會劾刑部擬斬之歸旗原任總兵任珍爲家婢首告怨望及醜行滿洲官皆如刑部所擬管吏部事陳名夏與戶部尙書陳之遴等漢官二十八人擬任珍應勒令自盡又回奏欺飾下廷臣議罪尋議應絞上欲從寬銓奏對失旨越數日上責令回奏且諭曰爾馮銓曩不孚於衆論廢置業已三載以爾才堪辦事不念前愆特行起用以期更新自召至以來讜論未聞私心已露如前日面議陳名夏等一事爾之所對豈實心忠良之言耶

况爾密勿大臣今議一事如此後來用人行政將何依賴銓乃上疏請罪諭曰上有所詢直言無隱臣道當然馮銓與陳名夏素相矛盾朕所習知因言不合理是以有責問之旨今馮銓既已知罪再觀自新仍照舊辦事以後諸臣有如此懷私修怨不公不平者急宜改省十一年正月與大學士陳名夏成克鞏張端呂宮合疏薦舉原任少詹事王崇簡巡按御史郝浴給事中向玉軒中書宋徽璧知縣李人龍可擢任前明翰林楊廷鑑宋之繩吳偉業方拱乾中書陳士本知縣黃國琦可補用又言編修張天植乃順治六年一甲三名及第例不外任仍宜留疏下所司知之三月大學士寧完我劾陳名夏結黨攬權諸罪以既定張天植外轉復與馮銓等保留翰林營私巧計莫可端倪爲一款語詳陳名夏傳尋吏部言郝浴爲平西王吳三桂劾罷馮銓成克鞏等於未劾之先扶同薦舉及命回奏謬以急欲效忠爲詞巧爲支飾應革職詔從寬降三級留任時龔鼎孳爲左都御史疏論任輔弼等事上命指實覆奏鼎孳言銓尺寸靡效罪過頗多因密勿票擬不得察糾非如諸曹有實可指上以鼎孳空言抵塞切責之十二年二月銓與成克鞏呂宮並以降處之後勤慎有加辦事無誤詔復所降級是月丁母憂命入直如故居

持服賜其母祭葬四月諭獎銓翼襄政務稱厥委任加少師兼太子太師會纂修太祖高皇帝太宗文皇帝聖訓孝經衍義並充總裁官十二年二月諭曰大學士馮銓贊勳機務歷有歲年朕近見其齒長力衰難勝繁劇應解院事用便頤養其加太保兼太子太師祕書院大學士禮部尙書致仕念其學問充裕可以文章資朕著在朕左右以備顧問一切經史著述編摩皆令專任銓復請回籍允之十六年二月改內三院爲內閣詔銓仍以原銜兼中和殿大學士康熙十一年十一月死賜祭葬如例謚文敏旨削謚子源淮由侍衛官至總兵源濟由順治十二年進士官至國子監祭酒

李若琳

李若琳山東新城人明天啟二年進士官翰林院檢討本朝順治元年五月投誠授原官七月擢左春坊左庶子署詹事府少詹事薦明翰林陳其慶韓四維林增志高爾儼張元錫成克鞏各授官十月實授少詹事兼管國子監祭酒疏言國子監應仿明初制七品以上官子弟有勤敏好學者列入庠序及郡縣各學諸生年壯學優者令學臣考選送監監臣課其學業分別奏請廷試授官至滿洲勳臣子



弟有志向學者並請送監肄業奉旨允行並諭滿洲官員子弟及漢官子孫有願讀清漢書者俱送入國學仍設滿洲司業一員助教二員教習清書時裁詹事府若琳改翰林院侍讀學士仍管祭酒事尋條奏太學事宜一學正助教等官請於吏部候選進士舉人內選舉一人八旗子弟請以品學兼優者每旗四人充教習如課讀有效咨部考用又請立滿洲八旗書院令三廳六堂教官分居訓迪每月六日赴監考試俱下所司議行二年正月奏請更孔子神牌略言文廟神位稱至聖先師孔子乃明嘉靖大學士張璁建議改置者明白洪武至正德先師諡號皆遵元成宗舊制曰大成至聖文宣王今稱至聖而遺大成於義未備宜追復舊諡詔下禮臣議尋議稱大成至聖先師孔子報可四月遷弘文院學士五月詔修明史充副總裁官七月授禮部左侍郎八月科臣李作梅等交章劾大學士馮銓奸貪不職并劾若琳爲銓黨且庸懦無行官黜治睿親王多爾袞集訊不實事遂寢五年遷禮部尙書六年恩詔加太子太保八年上既親大政命吏部具列部院大臣職名親加甄別會禮部有題取齋詔奉差官員違例冒濫事特旨嚴飭并諭吏部曰李若琳身任禮臣僉檢專擅與馮銓交結親密朋比爲奸著革職爲民永不

敘用罷歸尋死

謝啟光

謝啟光山東章邱人萬曆三十五年進士累官南京兵部左侍郎崇禎十七年流賊李自成陷京師分遣賊將掠山東逼紳士資餉啟光糾邑人殺僞令募壯丁二千餘拒守賊引去本朝順治元年十月啟光投誠授總督倉場戶部侍郎二年六月疏言京通二倉積貯將罄山東漕船雖已開幫僅八萬七千餘石未能供八旗數月需幸天戈直指金陵吳越可傳檄定前朝漕運歲四百萬石江南居十之八今歲五月以前未必盡到江寧乞敕漕臣察核現在未解者責成管糧各官催趲前來庶倉廩可實事下總漕巡撫酌行八月給事中莊憲祖疏劾啟光苛索山東漕船貪圖影射既專督倉場又包攬戶部事日向尙書案前自稱謝侍郎打恭容悅射利毫不知愧比復爲其子鑽營中式工爲行險事下刑部集質啟光辯釋五年七月擢戶部尙書六年遇恩詔加太子太保七年四月給事中杜篤祐疏劾戶部諸臣總司錢糧七年以來不一奏銷致拖欠錢糧幾數百萬兩又差委司員管關不公同註擬及差滿不加考核輒復徇私別差事下部察議以啟光朦朧專擅

降二級罰俸一年十月疏言臣年七十有四臣子世箕恩隆授淮安通判今陞揚州府同知臣止此一子敢援獨子歸養例乞恩許其解任來京侍臣左右疏下部如所請八年閏二月調工部尙書是月甄審部院大臣以啟光前在戶部不奏銷錢糧督倉場苦累運官交兌多費致挂欠漕糧三百餘萬石各關濫差多人需索加倍及註差不循次序任意徇私穢聲盈路大玷官箴著革職爲民永不敘用十年十二月詔來京起用十一年三月御史趙如瑾疏言啟光已經廢置復荷特恩令其洗心滌慮勵精報效今臣侍班殿前見其形容枯朽步履需人扶掖跪拜藉同官提挈始起無論其洗滌與否就此朝露風燭之年安望其勝任愉快上諭吏部曰謝啟光才猷老練特賜召用今來陛見念其年力衰頹難膺政務准以原官太子太保工部尙書致仕遂其頤養仍馳驛回籍稱朕優眷老臣至意十五年死孫琮赴京籲請恩卹下部議祭葬如例

### 孫之獬

孫之獬山東淄川人明天啓二年進士改庶吉士授翰林院檢討丁父憂歸服闋補原官遷侍講七年充順天鄉試正考官時尙書崔呈秀以詔事忠賢其子鐸不



能文而爲之獬取中見明史崔呈秀傳崇禎初忠賢既敗廷臣請毀三朝要典之獬獨詣閣痛哭力爭遂入逆案削籍歸本朝順治元年五月侍郎王鼐永招撫山東之獬率土歸順值土賊王楨等糾衆劫明永鎮等處之獬散家財練鄉勇有守成功賊平山東巡撫方大猷奏其事召入京十一月擢禮部右侍郎賜鞍馬二年六月奏進淄川縣賦冊言明季賦稅煩重小民舊苦加徵臣邑如此他邑可知謹議應徵應減二冊祈敕各撫按臣如式編造使部中執有定額民間知有定數尋復條陳四事一曰本朝制作維新宜辨等威別上下使臣民共守一曰明季諸臣往來宴會結黨營私諸惡習宜懲一曰宜敕學臣勿縱生儒挾持官府武斷鄉曲一曰兵燹後書籍多殘宜搜輯遺編以惠來者疏入下所司議行時英親王阿濟格既定九江府奉詔班師令副都統佟岱偕投誠總兵金聲桓駐守之獬奏請往任招撫奉命以兵部尙書銜招撫江西八月給事中許爾梅王守履等劾大學士馮銓賄囑之獬以其子源淮充招撫標下中軍並追論銓與之獬及侍郎李若琳皆魏忠賢逆黨事下法司詰問睿親王復傳集銓若琳及科道各官面質以行賄無據前朝舊事不當追論十二月給事中郝璧劾之獬前此自請招撫疏稱忠無

不竭知無不爲勇無不決今江右版圖大定襲已成之勢爲救寧之道旦夕可以報效而之獬弗卽宣布德意受事七月無一事入告與前疏大相刺謬其懷欺無實與退縮不前均難辭罪詔之獬明白回奏三年正月之獬疏辯抵任後巡視已定郡邑蠶賦籍職官屬綏輯人戶遣官黃彬等分路招徠曾三疏備陳情狀未知齎遞何以稽遲至廣信建昌二府負固抗拒吉安撫州旣降復叛有江寧大兵助總兵金聲桓進剿可次第奏績疏入命之獬還京先是之獬至江西金聲桓受節制積不能平至是劾之獬擅加副將高進庫劉一鵬總兵銜市恩構釁又言諸將不力攻贛州由之獬主議招撫故懷觀望得旨令之獬回奏之獬奏言前者副將高友才陣亡聲桓欲以高進庫總統兵馬臣念攻取吉安責任非輕因劄委總兵繼聞劉一鵬怨望臣念高友才以衆將不和孤軍進戰殞命乃亦加一鵬總兵銜令率本營兵偕進庫立功以示鼓勵以弭釁端於是進庫以六月不拔之堅城一月取之臣身任闔寄專擅之嫌所不敢避尋至京復自陳招撫南康巨寇王國棟高挺郭賢操等解散賊黨數十萬上以之獬所陳及聲桓所劾事敕部核議部議之獬久任無功市恩沽譽應革職爲民詔如議之獬旣家居值土賊謝遷劫掠長

山章邱諸邑覬踞淄川密結城中奸民丁可澤等爲內應四年六月遷合五百餘賊犯城之獬率家人登城禦守可澤啟門迎賊之獬知賊已入城急馳歸自縊賊解其縊復甦罵賊不屈遂與孫蘭滋蘭藹等男女七人並遇害山東巡撫張儒秀爲請卹下吏部核議侍郎陳名夏金之俊謂之獬抗賊遇害應復原銜循例予卹侍郎馬光輝啟心耶寧古哩謂之獬既革職爲民不應予卹得旨陳名夏金之俊議卹非例不准行之獬子伯齡順治三年進士官至左通政

李魯生

李魯生山東霑化人明萬曆四十一年進士歷知魚臺邯鄲祥符儀封四縣擢兵科右給事中天啟初由大學士魏廣徵引謁魏忠賢列十孩兒之一忠賢每假中旨黜陟朝議憂之魯生獨上言執中者帝用中者王旨不從中出而誰出時忠賢惡經畧孫承宗魯生日承宗所恃者重兵宜以缺餉爲名汰軍以撓其權忠賢乃矯旨汰承宗所轄兵省餉六十八萬四年蘇松巡撫周啟元劾參政道朱童蒙貪虐狀魯生希忠賢意劾罷啟元大學士韓爌罷去魯生復劾之削爌籍五年正月疏薦阮大鍼等十一人復代主事曹欽程草疏劾周宗建黃尊素等因令薦已轉



左給事中會內閣缺人詔推老成幹濟者忠賢欲用馮銓而銓資淺年未四十魯生因疏言成卽爲老而非必老乎年幹乃稱濟而卽有濟於國銓遂入閣六年忠賢盡毀天下書院保定知府祝萬齡議不宜毀魯生劾其非聖誕天削萬齡職七年晉太僕少卿銜崇禎初忠賢伏罪給事中汪始亨疏劾之曰科臣李魯生諂事忠賢由座師魏廣微引進凡廣微傾害善類魯生悉贊成之此投身之第一處也二魏交權同謀殺人魯生復爲廣微之籬犬及見楊漣左光斗酷刑垂斃廣微佯疏救大拂闥意魯生亦棄廣微而竄入馮銓之門詔推閣臣務求老成幹濟而魯生頌銓成卽爲老幹卽爲濟此投身之又一處也崔呈秀賄囑吳淳夫力攻罷銓魯生飽颺飛去又不肯事銓矣崔呈秀其死友也魏良臣其義兄弟也良臣欲請託鬻青衿魯生卽傳之學臣李藩居間過付贓私狼籍行道皆知此投身之又一處也忠賢用事時魯生典試湖廣發策詎楊漣因力詆屈原宋玉逆案旣敗又欲依附清流爲漣等上疏免贓希圖掩飾遂得職任如故於國法爲不平於鵷班爲有玷疏上給事中顧繼祖御史張三謨等復交章發其奸入逆案在第三等謫山西平定州遇流賊李自成亂遁歸鄉里本朝順治元年六月偕其鄉人斬流賊所

置霑化僞知縣李調鼎赴招撫侍郎王鼐永納款鼐永疏薦得旨錄用魯生遂至京十月授順天府丞二年七月遷府尹三年五月以年已七十有五乞休允之先是恩詔錄七品以上京官子弟各一人由附生充監生由廩生增生充貢生至是給事中林起龍疏劾順天學政曹溶所送貢生王鎮遠係明武舉下部察議溶坐濫舉降調以鎮遠由魯生任府丞時印冊考送革魯生爲民尋死

吳惟華

吳惟華順天人先世本蒙古有巴圖特睦爾者仕明賜姓名曰吳允誠封恭順伯子克忠進侯爵七傳至惟英崇禎十六年十二月卒未襲惟華其弟也明諸生本朝順治元年睿親王多爾袞至京師惟華縋城投順自稱應襲恭順侯請招撫山西自效許之時江南未平糧道阻絕惟華以明總兵朱國弼駐淮揚統理漕務請王作書遺國弼部將張國光諭令來歸俾通漕運以給兵食睿親王從其請國弼得書遂納降惟華旣之招撫任宣示恩威代州繁峙崞縣悉歸誠其從流賊受僞官者多據城抗命惟華欲率兵進取恐力弱難決勝於是復陳征西五策一請發重兵出關合力驅剿一請命平西王吳三桂大學士洪承疇統旅西征一請分兵

趨蒲津與賊相持別遣兵由保德渡河擣賊要隘一請調江北諸部蒙古兵由邊外渡河套自延綏榆林接界入口斷賊西奔路一請敕將領凡遇山林險隘加意搜剿以備賊埋伏若向晚安營分番值夜以防劫寨睿親王躋其議遣都統葉臣及覺羅巴哈納等西征令惟華悉心襄贊別遣都統阿山率左右翼將士由蒲州濟河協征流寇九月隨大兵征太原克之汾州平陽潞安俱下擢授總兵鎮太原旋有旨嘉其勤勞令回京候用明年敍迎順功封恭順侯尋加太子太保招撫廣東三年五月以廷議撤諸省招撫官惟華還朝四年兼戶部右侍郎總督漕運六年二月奏言防護運河各有專汛應以梁成珠梅二閘爲界南則漕運任之北則山東督撫任之詔從所請六月裁鳳陽巡撫命漕臣攝其事會廬州土賊哨聚英山霍山爲寇惟華遣兵合剿獲賊黨白玉麟等三十三人進剿貓兒潭四柱江家峰尖嶺諸寨賊渠余化龍等悉降明年加右都御史先是惟華得專事權任用匪人恣意貪黷偏聽副將畢振武同知陳標推官蔡國傑等蠹剝欺公泰州高郵患漕漕精無出知州請具疏改折不可納賄三千金而後許之廢官李寓庸家僕爲盜斃於獄惟華拘治寓庸寓庸恐重賂乃釋凡委署州縣及各稅務僉差查緝稽



馭驛遞因事受財動輒千百修築城工假稱率屬捐助苛派閭閻復縱姦宄侵蝕漕糧漫無覺察給事中李賓尹御史魏瑄並劾其營私誤漕下部議革職至是巡漕御史張中元復列款劾其貪婪不職狀遂逮訊九年八月讞成皆實論死上念其投誠功詔免死削封爵褫職永不敘用十五年與原任大學士陳之遴等交結內監吳良輔事覺部議應絞決又奉詔貸死杖戍寧古塔籍其家聖祖仁皇帝御極惟華以輸工作贖罪恩旨赦還原籍康熙七年七月密疏請徵各州縣鎮市房稅及江南沿江洲田三十餘處令民納價領種上惡其害民斂財下部論罪應流徙復得旨免罪令入旗尋死

土國寶

土國寶山西大同人明總兵本朝順治元年投誠以原官錄用適內黃有土賊王鼎鏐蘇自興鄧名揚等國寶奉大名道張之俊檄同署總兵王燦剿擒之二年隨豫親王多鐸定江寧王令同侍郎李率泰招撫蘇州松江諸郡遂奏授江寧巡撫國寶以武夫不習文事疏辭得旨慰留時明總漕田仰踞崇明犯福山國寶率中軍副將曹虎等擊敗之俘斬甚衆明職方主事吳易當史可法督師揚州時爲監

軍至是竄太湖遙受明唐王朱聿鍵官爵國寶招之降不從因檄兵防剿會松江副將杜永和擒偵卒國寶詰之言蘇州諸生王伯時及文震孟之子文乘皆易黨謀內應國寶縛二人殺之籍其家上以伯時乘非陣擒者比宜錮禁請旨切責國寶擅殺下所司察議坐降調四年八月命以布政銜管江南按察司事五年五月仍授江寧巡撫蘇松常三府白糧明季僉民戶輸運民以爲苦至是復明初官運制國寶言民戶一遇僉點往往傾家今改官運一切皆給於官而經費不敷請計畝均派運費民皆樂從諭曰僉點固屬累民加派豈容輕議下部察核官運經費果不敷否部臣言經費未嘗不敷惟嚴絕剋減虛冒諸弊則用自裕黜國寶奏不行華亭縣有義田四萬八百餘畝明光祿寺署丞顧正心置以膳宗族助差徭者國寶初撫吳卽令有司收其米四萬三千餘石給兵餉及國寶降調周伯達代爲巡撫以改充織造匠糧入奏戶部議令察勘義田在明時曾否題明創置者有無子孫至是國寶以實覆奏戶部尙書巴哈納謝啟光等核議義田所以卹貧助徭非入官之產宜仍令顧正心子孫收穫至兵餉匠糧皆有正項取給其擅用義田米責國寶償還六年國寶疏請加派民賦佐軍需給事中李化麟疏言加派乃明

季弊政民窮盜起大亂所由我朝東征西討興師百萬未嘗累民間一絲一粟今國寶遽議加派開數年未有之例滋異日無窮之累上復黜國寶奏不行八年十月巡按御史秦世禎疏劾國寶藉增造營房名於蘇州府城按廛納稅斂銀數萬兩又逾額濫設胥役婪取銀數千兩嘉定知縣隨登雲爲拔富之術每指富家爲盜黨入財乃釋以所得給中軍參將鄒錫祥納之國寶左營遊擊楊國海國寶甥也市私鹽及硝磺月饋國寶銀三百民間因有土埋金謝土好之謠疏上命革國寶及登雲錫祥等職下總督馬國柱同世禎訊鞫國寶將就逮畏罪自經死鞫證皆實追贓入官

### 魯國男

魯國男順天太興人明昌平副將本朝順治元年英親王阿濟格進剿流賊李自成於山西國男詣軍門降委署總兵官二年正月同大同總兵姜瓖擊敗賊黨高一功於保德寧武一功遁復其城尋隨征陝西收復榆林延安陝西平入京陛見八月授永平中協副將四年遷正定總兵加都督僉事五年疏言恆鎮爲京師咽喉額設三營轄大名廣平順德正定四府今大名賊盜猖狂深州寧晉饒陽武強



之間土賊充斥東路梗阻正定差務益繁兵已不敷護送若復分剿勢益孤弱請於順德廣平大名三府各增兵千專將統領防剿本屬汛地臣統精銳往來馳擊庶無顧此失彼其增設之兵就近於保定宣大山海關等營進撥應用另募補伍詔如所請行時山東曹縣爲土賊李化鯨所據國男奉命會剿克之六年姜瓖叛從逆副將林世昌以逆書僞檄投國男拒之並首其書檄得旨褒嘉七年山西土賊張五桂王天平等犯龍泉關守備梁士治等禦之賊屢逼關危甚國男往援出長城嶺至石嘴賊懼奔山國男率遊擊吳應彩等追抵冀家莊賊據西寨我兵直上擊之破寨五斬僞將張岐劉定等俘獲無算下部議敘紀錄二次八年三月奉總督張存仁檄會剿山東榆園賊渠梁敏等至開州搜剿何家寨苦陀村積賊復破開州東南一帶單家寨李家莊賊巢十月會總兵孔希貴張大治兵擊賊老營適邊水驟發賊奔竄斬梁敏等十一年刑科給事中張時成列款劾國男貪淫殘縱狀詔下督撫嚴察得實革職十八年山東巡撫朱裴疏劾國男廢斥後戀居臨清占州田應勒令回籍從之尋病死

陳之遴

陳之遴浙江海寧人明崇禎十年進士授編修遷中允本朝順治二年投誠授祕書院侍讀學士五年遷禮部右侍郎六年恩詔加都察院右都御史八年擢禮部尙書時御史張煊劾大學士陳名夏結黨營私語涉之遴鞠訊不實免議尋加太子太保九年授弘文院大學士十年鄭親王濟爾哈朗等奏之遴承審奸民李應試時默無一言問之則云上果立置應試於法則已或免死則我身必爲所害是以不言似此緘默取容之人恐不堪重任詔之遴回奏仍上疏引罪上以之遴旣知悔過將觀其自新遂調任戶部尙書會與名夏等集議革職總兵任珍罪狀與同官兩議得旨責問復以支飾欺蒙論死詔從寬削官銜二級罰俸一年仍供原職十二年正月奏請照律例以定滿洲官員有罪籍沒家產降革世職之法下所司議行二月復授弘文院大學士加少保兼太子太保疏陳營務三策一曰修舉禮功請擇每旗才幹大臣一員并諳練農田水利官二三員將本旗地巡閱招集士民講求蓄洩以備旱澇算工佑費及時修築所費雖多一勞永逸一曰寬恤兵力漢兵經費甚多而有急輒用滿洲八旗請敕各省督撫提鎮所轄將士悉照滿洲兵法訓練精強逃亡亦照例行法人知警畏自能力戰因守滿洲八旗可以養

威息力不至久征多費一日節省財用請制滿洲兵民典例凡吉凶諸事務從儉約毋過豐華則月節歲省自致豐饒從之十三年上召吏部尙書王永吉等責其輕出虧帑司員朱世德之罪復諭之遴曰朕不念爾前罪復行簡用且屢誠諭爾曾以朕言告人乎抑自思所行亦曾少改乎之遴奏曰皇上教臣安敢不改特才疏學淺罪過多端不能仰報耳於是左都御史魏裔介劾奏之遴當皇上詰問時不自言其結黨之私力圖洗滌以成善類而但云才疏學淺不能報稱其良心已昧如囑禮部尙書胡世安保薦庸劣知縣沈令式爲知府旋被督臣糾劾植黨徇私確有所據密勿之地恐之遴一日不可復居給事中王禎亦劾奏之遴係前朝被革詞臣來投闕下不數年超擢尙書旋登政府不圖報效市權豪縱皇上面加呵斥凜凜天威之遴不思閉門省罪卽於次日遨遊靈佑宮逍遙恣肆罪不容誅乞重加處分疏入並敕之遴據實回奏且下部察議尋議革職永不敘用上念之遴旣已擢用位至大臣不忍卽行斥革以原官發遼陽居住是年冬上復念之遴效力多年不忍終棄令回京入旗十五年之遴以賄結內監吳良輔翰訊得實擬卽處斬得旨陳之遴受朕擢用深恩屢有罪愆疊經貸宥前犯罪應置重典特從



寬以原官徙居盛京復不忍終棄令還旗下乃不知痛改前非以圖報效又行賄賂結交犯監大干法紀本當依擬正法姑免死著革職流徙家產籍沒後死徙所

### 劉正宗

劉正宗山東安邱人明崇禎元年進士由推官行取授翰林院編修本朝順治二年以山東巡按李之奇奏薦起授國史院編修六年遷侍講九年由弘文院侍讀學士遷祕書院學士十年四月上親試翰林分別外轉正宗留原職五月擢吏部右侍郎仍兼祕書院學士疏請澄敍官職一宜重郎署之選令各部堂官於選授時精覈才品凡脂韋鬪茸者毋收若任職廉能卽薦揚優擢一宜專方面之員藩臬大員徇縱所屬守令貪婪敗檢不卽舉劾者並治其罪又言朝廷用人必兼兩法新進之士宜循資以杜徼倖殊尤之才宜破格以勵賢能上是其言閏六月命爲弘文院大學士十一月諭曰吏部居六部之首尙書員缺宜慎加選用大學士劉正宗清正耿介堪充此任特加太子太保管吏部尙書事十二月以疾乞休奉溫旨慰留復辭吏部尙書職命以兼銜回衙辦事加少保兼太子太保十四年考滿晉少傅兼太子太傅是年冬乞假回籍爲兄正衡治喪明年還朝改授文華殿

大學士初正宗在吏部時因御史楊義論部推越次事辨執至詬詈於是給事中周曾發御史姜圖南祖建明交章劾其銓選參差欺蒙自逞御史張嘉劾其昏庸衰老背公徇私宜罷職上俱命正宗回奏仍敕部議以事皆無據得釋給事中朱徽復劾正宗擅擬僉事許宸內陞通參不由會推又不專疏題明正宗以疏忽引咎部議應罰俸援恩詔免十六年上以正宗器量狹隘終日詩文自務大廷議論輒以己意爲是雖公事有誤亦不置念降旨嚴飭並諭曰朕委任大臣期始終相成以愜簡拔初念故不忍加罪時加申戒須痛改前非稱朕優容恕過之意十七年二月應詔自陳乞罷不允六月左都御史魏裔介浙江道御史季振宜先後奏劾正宗陰險欺罔諸罪命明白回奏正宗以衰老孤蹤不能結黨致摻誣劾自訟下王貝勒九卿科道會刑部提問正宗反覆申訴裔介與振宜共質之讞成列其罪狀曰正宗前自陳不以上諭切責已罪載入疏內裔介所劾是實董國祥爲正宗薦舉以降黜之員外越授郎中後坐賄流徙正宗不引罪檢舉裔介與振宜所劾是實裔介劾正宗知李昌祚係叛案有名票擬內陞今訊稱姓名相同但前此不請察究有意朦朧是實正宗弟正學順治四年投誠復叛爲李成棟參將七年

復投誠裔介劾正宗暗囑巡撫耿焞題授守備正宗回奏祇稱正學因擒獲逆犯  
敘功題授不言從叛情事飾非諱罪是實裔介劾正宗與張縉彥同懷叵測之心  
縉彥爲正宗作詩序詞句詭譎正宗聞劾卽刪毀其序誑云未見其欺罔罪實應  
絞奏入奉旨劉正宗性質暴戾器量褊淺持論矯激偏私罔揆於理處事執謬自  
恣務顯所長悻復瑣屑負氣乖張惟以沽名好勝爲事弗顧國家大體時或適意  
則驕矜誇詡偶拂其意則忿然不平絕無休休老臣之度凡其劣狀朕素知之特  
以才學故加錄用屢行誡飭冀其省改乃置若罔聞性愈恣睢量愈褊急卒無悔  
悔罪過滋多大負擢用深恩本當依擬處死特念任用有年姑從寬免死革職追  
奪誥命籍家產一半歸入旗下不許回籍明年聖祖仁皇帝御極以世祖章皇帝  
遺詔內曾及正宗罪狀當置之重典念其年老特予寬免未幾病死

周亮工

周亮工河南祥符人明崇禎十三年進士官御史流賊李自成陷京師亮工間道  
南奔從明福王朱由崧於江寧本朝順治二年豫親王多鐸兵下江南亮工詣軍  
門降奏授兩淮鹽運使三年調揚州兵備道四年遷福建按察使尋遷布政使十



一年授左副都御史十二年疏陳閩海用兵機宜言浙之衢州閩之建寧江西之廣信爲山賊出沒之地與海敵聲援廣信去衢州止百里宜令浙閩總督兼轄庶軍機可以無誤至海敵以廈門爲窟穴宜密敕廣東督撫令潮州鎮兵合剿往襲其後更請增設水師以防海口疏下所司議行又請斬鄭芝龍停招撫鄭成功決意進剿疏入報聞既而福建巡撫佟國器奏獲芝龍與其弟鴻逵及成功交通私書芝龍伏誅遷亮工戶部右侍郎亮工任按察司時福建武舉王國弼及貢生馬際昌穆古子蔡秋浦蔡開南史東來等創立南社西社蘭社黨類繁衆作奸犯科亮工申請督撫勘明定罪勒石南臺列際昌及餘黨姓名尋際昌秋浦國弼開南四人斃於獄是年五月督臣佟岱抵任際昌等親屬具牒辯冤佟岱列亮工貪酷諸款以聞命亮工回奏尋解任赴福建聽質會海敵從閩安入內地焚掠南臺進圍福州城中騎卒僅數十勢甚危巡撫宜永貴從士民請以亮工守西門城敵乘大雨薄城亮工手發大礮擊殪渠帥三人羽衆解圍去城賴以全事聞下兵部以亮工係革職質訊之員未准敘錄先是亮工未就質時按察使田起龍等據證佐定讞謂亮工得贓四萬餘兩應擬斬籍沒及亮工至質問皆虛巡撫劉漢祚疑推

官田緝馨等受賄徇情並逮送刑部十六年部議亮工被劾各款雖堅執不承而前此田起龍等已憑證佐審實計贓累萬情罪重大仍應立斬籍沒上以前後辭證不同再下法司詳審十七年法司論罪如前讞恩詔予減等改徙寧古塔未行會赦得釋聖祖仁皇帝御極諭吏部曰周亮工被劾原案既多屬子虛前宜永貴疏敘亮工在閩守城獨當射鳥樓一面擊死賊渠三人應否量授職銜錄用爾部會同刑部確議具奏康熙元年部議復亮工僉事道職起補山東青州海防道五年調江南江安糧道八年漕運總督帥顏保劾亮工縱役侵扣諸款得旨革職逮問論絞九年復遇赦得釋十一年死

錢謙益

錢謙益江南常熟人明萬曆三十八年一甲三名進士授翰林院編修天啟元年充浙江鄉試正考官五年聽勘御史崔呈秀作東林黨人同志錄列謙益名御史陳以瑞亦疏劾之罷歸崇禎元年起官不數月洊擢詹事禮部侍郎會推閣臣謙益慮禮部尙書溫體仁侍郎周延儒並推則名出己上謀沮之囑其門人給事中瞿式耜言於主推者擯體仁延儒以成基命及謙益等十一人列上先是謙益主

試浙江時所取士錢千秋首場文用一朝平步上青天句分置七義結尾爲給事中顧其仁舉發謙益先伺知卽具疏劾奸人金保元徐時敏僞作關節撞騙得賄下刑部鞠訊時敏保元皆遣戍千秋逾年始至亦論遣謙益奪俸至是體仁追論謙益賄賣關節不當預選延儒亦言會推名雖公主持者止一二人餘皆不敢言卽言徒取禍耳莊烈帝御文華殿召對延儒諸臣謙益辭頗屈命禮部進千秋卷閱竟責謙益謙益引罪遂褫職下法司議以謙益自發在前不宜坐體仁復言獄詞出謙益手詔下九卿科道再勘乃坐杖論贖千秋荷校死十年常熟人張漢儒訐謙益貪肆不法巡撫張國維巡按路振飛交章白其寃乃下刑部逮訊謙益嘗爲太監王安作碑文爲司禮曹化淳所知及獄急求救於化淳體仁聞密奏交結狀化淳時見信任自請按治刑斃漢儒且發體仁他罪狀體仁引疾罷獄乃解謙益削籍歸十七年流賊李自成陷京師明臣史可法呂大器等議立君江寧謙益陰推戴潞王常澆與馬士英議不合及福王由崧立謙益懼得死罪上疏頌士英功士英乃引謙益爲禮部尙書謙益復力薦閹黨爲阮大鍼等訟寃大鍼遂爲兵部侍郎而憾東林仍不時會捕獲妖僧大悲欲引謀立潞王事盡誅東林諸人謙



益亦預焉士英不欲興大獄乃已本朝順治二年五月豫親王多鐸定江南謙益迎降尋至京候用三年正月命以禮部侍郎管祕書院事充修明史副總裁六月以疾乞假得旨馳驛回籍令巡撫巡按視其疾痊具奏五年四月鳳陽巡撫陳之龍擒江陰人黃毓祺於通州法寶寺搜出偽總督印及悖逆詩詞以謙益曾留黃毓祺宿其家且許助資招兵入奏詔總督馬國柱逮訊謙益至江寧訴辯前此供職內院邀沐恩榮圖報不遑況年已七十奄奄餘息動履藉人扶掖豈有他念哀籲問官乞開脫會首告謙益從逆之盛名儒逃匿不赴質毓祺病死獄中乃以謙益與毓祺素不相識定讞馬國柱因疏言謙益以內院大臣歸老山林子姪三人新列科目榮幸已極必不喪心負恩於是得釋歸越十年死於家乾隆三十四年六月諭曰錢謙益本一有才無行之人在前明時身躋膺仕及本朝定鼎之初率先投順洊陟列卿大節有虧實不足齒於人類朕從前序沈德潛所選國朝詩別裁集曾明斥錢謙益等之非黜其詩不錄實爲千古綱常名教之大關彼時未經見其全集尙以爲其詩自在聽之可也今閱其所著初學集有學集荒誕悖謬其中詆謗本朝之處不一而足夫錢謙益果終爲明朝守死不變卽以筆墨騰謗尙

在情理之中而伊既爲本朝臣僕豈得復以從前狂吠之語列入集中其意不過欲借此以掩其失節之羞尤爲可鄙可恥錢謙益業已身死骨朽姑免追究但此等書籍悖理犯義豈可聽其留傳必當早爲銷毀其令各督撫將初學有學集於所屬書肆及藏書之家諭令繳出至於村塾鄉愚僻處山陬荒谷並廣爲曉諭定限二年之內盡行繳出無使稍有存留錢謙益籍隸江南其書板必當尙存且別省有翻刻印售者俱令將全板一併送京勿令留遺片簡朕此旨實爲世道人心起見止欲斥棄其書並非欲查究其事通諭中外知之三十五年上觀錢謙益初學集御題詩曰平生談節義兩姓事君王進退都無據文章那有光真堪覆酒甕屢見詠香囊末路逃禪去原爲孟八郎四十一年十二月詔於國史內增立貳臣傳諭及錢謙益反側貪鄙尤宜據事直書以示傳信四十三年二月諭曰錢謙益素行不端及明祚旣移率先歸命乃敢於詩文陰行詆謗是爲進退無據非復人類若與洪承疇等同列貳臣傳不示差等又何以昭彰燿錢謙益應列入乙編俾斧鉞凜然合於春秋之義焉

魏瑄

魏瑄山東壽光人明崇禎十年進士官御史本朝順治二年二月以御史傅景星薦授湖廣道御史五月巡按甘肅疏言甘肅西接回番明代有市馬之利宜卽舉行以柔遠人資蕃息部議從之十二月涼州兵以索餉鼓譟劫參議道蘇名世署名世同副將毛銷獲倡亂者二十餘人瑄疏言西陲兵卒驕悍沿自明季由專事姑息致養奸滋亂今宜嚴爲創懲有犯無赦得旨倡亂兇惡旣經擒獲著核擬正法兵丁沿明季囂風肆行譁譟深可痛恨後有犯者首從皆駢斬著爲令四年任江寧學政七年還京掌河南道事八年二月漕運總督吳惟華請自輸銀萬兩復綜核各項羨餘得九萬三千兩解京助餉瑄疏言淮揚連年水旱惟華輸助並非出之橐中皆分派屬吏而屬吏仍取自民間輾轉追呼狀難悉數乞賜察究下部議會巡漕御史張中元發惟華貪黷狀遂逮訊褫惟華職三月瑄劾鄖陽巡撫趙兆麟遇甄別大典薦舉文職多至五十餘員僅糾劾兩典史一教官舉薦武職亦有十一員而糾劾者僅一老病之守備得旨申飭兆麟并誠督撫諸臣不得僅劾微員苟且塞責九年擢順天府府丞十年二月以大學士洪承疇薦召同戶部侍郎孫廷銓太僕寺卿衛周祚入對五月遷大理寺卿疏言刑部持天下之平都察



院執法糾正皆主問大理之職在取其所問者而平反之請舉行舊典凡事下三法司者刑部定擬後卽送大理寺覆覈若罪不合律或情詞不明駁回再擬又言秋審待決之囚卽法司鞫定之案死者固鮮含冤但執法不敢不嚴原情不可不慎請敕會審諸臣慎之又慎於矜減外復多緩決以副欽恤之意並下所司議行先是八旗逃人屬兵部督捕至是部臣以樞務綦繁議歸大理寺統之瑄疏言大理不設刑具無番兵捕役難督緝且訟逃者率八旗大員而大理少卿多參領佐領兼攝卽正卿亦僅三品不宜董其事於是下九卿議增設兵部督捕侍郎如戶部倉場侍郎例別立專署所屬員外郎中主事司獄等官專理緝捕又言逃人日多以投充者衆不皆戰陣所獲本主弛縱成習聽其他往迨日久不還概訟爲逃人蒙睿鑒原宥犯逃至再罪止鞭百而重懲窩逃猶沿舊例論斬籍人口財產給本主與叛逆無異非法之平請敕議寬減疏下九卿等議改斬爲流免籍沒六月瑄疏言窩逃之人斃於獄者其妻子應免流徙又言時遇熱審窩犯亦宜一體減等得旨滿洲家人係戰陣所得故窩逃之禁甚嚴近已節次寬減止於徒流今逃人多至數萬所獲不及十之一魏瑄更於減中求減顯見偏私市恩下諸王大臣

議處尋議瑄巧寬逃禁應革職論絞詔從寬降三級調用七年補通政司參議先是德州生員呂煌以窩逃事覺囑旗員呂獻忠行賄本主爲本主首告煌伏罪流徙獻忠由兵部援赦免議上以事屬行賄不在赦款詰問革獻忠職命諸王大臣察究原議諸臣自尙書以下降革有差以瑄會鞠呂煌時同官欲坐德州知府佟昌年失察窩逃罪瑄倡言阻止并議瑄前曾疏請熱審減等巧爲呂煌寬貸應革職流徙奏入如議瑄尋死於遼陽十七年詔吏部列奏建言得罪降革流徙諸臣上以瑄情罪尙輕宥其家俾歸故里

### 潘士良

潘士良山東濟寧人明萬曆四十一年進士累官刑部右侍郎本朝順治二年以招撫山東侍郎王鼈永薦起補兵部右侍郎奉命撫治鄖陽三年三月流賊餘黨李錦犯荊州劉體純圍鄧州士良馳赴襄陽飭將弁分擊敗之降賊三千餘八月遣副將馮雄遊擊孔純仁參將王光泰等剿土賊陳蛟敗之朱家寨蛟乞降散其衆十月疏言明襄藩世封襄陽原有山莊并護衛儀衛各屯今明藩已故衛宜俱撤前項屯地宜清查以佐國用現委同知陶天培查出各衛所成熟屯地八萬四

千六百餘畝每畝照例徵糧三升共糧二千五百四十石零卽以抵給道府各官廩俸人役工食之費又疏言皇上以各府同知通判多冗員令議裁併臣屬鄖陽府通判二一管糧一捕盜應裁管糧缺歸捕盜通判荊州同知二一清軍一坐鎮施州衛應裁坐鎮缺歸清軍同知至襄陽府同知通判各一南陽府同知一通判二俱係要缺毋庸議裁二疏均下所司知之十二月湖廣總督羅繡錦劾士良猶豫寡斷請別調用得旨潘士良旣才不勝任不必又請調用尋敕士良解任回籍時鄖襄總兵王光恩以罪解京弟光泰倡亂殺署總兵楊文富及道府各官陷鄖陽事聞諭曰鄖陽被陷害潘士良雖稱解任未經交代何所辭罪著革職尋死於家

### 李猶龍

李猶龍陝西洵陽人明末由貢生官兵部主事福王時監左夢庚軍尋遷太僕寺少卿本朝順治二年猶龍隨夢庚降英親王檄猶龍巡撫江南安慶時江北之六安州英山霍山舒城潛山太湖河南之固始湖廣之羅田等縣及洋山橫山張山飛旗女兒等寨俱受明唐王箚付招叛兵爲應猶龍檄各路兵剿撫飛旗橫山各



寨相繼降三年正月疏言潛山太湖二縣被兵十餘年民逃地荒雖蒙恩蠲賦稅之半其半亦斷難及額請再行酌免從之四年改授天津巡撫五年三月巡按羅國士劾猶龍不能堵剿土寇致慶雲縣失陷請議疏防罪得旨李猶龍著住俸戴罪督剿是時西淀賊首楊四海僞稱明熹宗太子糾衆倡亂有三河縣民婦張氏者自稱熹宗后與其黨王禮張天保等造旗印及詔謀爲應五月猶龍同總兵蘇屏翰密遣弁擒之於西淀事聞下部鞠實伏誅七月餘黨任萬金伺郡城空虛聚衆靜海縣之赤隆河通營兵以爲內應約期攻城猶龍偵知飭將弁星夜進剿斬賊首萬金並張相楊天瑞等八月土寇常元輔謀犯東津猶龍檄屏翰剿擒之時積寇尙多猶龍以招撫爲名赴賊營會飲事覺革職十年巡視中城御史王秉乾疏劾猶龍旣經廢斥潛寓京邸不回原籍恐致滋事得旨李猶龍著速回籍再延究罪未幾猶龍死

王之綱

王之綱順天宛平人明總兵福王時大學士史可法奏以之綱鎮河南開封府本朝順治二年豫親王多鐸兵下河南之綱走江寧大兵渡河隨忻誠伯趙之龍降

委署徐州總兵時土賊散踞山險劫掠之綱同總兵蘇見樂擊斬賊任應乾殲其衆隨收剿龍駒嘴天門寺黃藏峪各山賊焚斃白土洞賊衆五百餘追擒賊王清宇徐庫趙世科孟宗玉等斬之徐州平入京陞見授福建雲霄總兵六年加都督僉事鎮汀州七年正月遣副將黃承國等擒斬楊坊寨賊首楊昌期及僞官楊奇六月遣副將高守貴復石城縣降各寨賊又破衝天寨及紅石巖賊巢七月江西賊洪國玉張自盛李安民等衆數萬犯邵武總督陳錦檄之綱援剿十一月至泰寧縣與巡撫張學聖兵合賊走江西據新城縣之老山嶺進擊大敗之獲國玉安民及其黨數十下部議敘八月移師剿土賊葛登標於寧化縣之巫家湖斬獲無算九年冬自盛復犯延平邵武十年五月之綱剿擒之十二年敗延平積寇楊日灼楊成洪於大埠溪壘成洪中礮死日灼就擒敘功加都督同知十三年汀屬左龍坊妖婦謀不軌之綱斬之十五年三月以結交內監吳良弼納賄營私奉旨逮問革職擬斬改流尙陽堡未至道死

### 任珍

任珍河南宜陽人明副將守河州本朝順治二年英親王阿濟格追剿流賊李自

成於陝西珍自河洲殲賊黨收文武僞勅來降以副將銜隸總督孟喬芳標下三年漢中叛鎮賀珍糾賊黨胡向宸等犯西安喬芳令珍守城西門鏖戰八晝夜乃卻賊追敗之濠泗河尋與中軍陳德攻剿蒲城擒王交張留復同副將王平攻克興安城賊渠孫守法竄湖廣是年敘功賜冠服鞍馬金幣令赴部擢用喬芳請留署固原總兵事四年授興安總兵時楚蜀未平興安爲羣盜出入之路北山南山土賊復肆逞喬芳奏增步騎四千屬珍鎮守胡向宸踞盤屋縣之黑水峪珍搗其巢遣王平追擊潰衆斬向宸降將武大定自鳳翔叛突掠紫陽縣珍督兵擊走之賀珍寇漢中爲肅親王豪格軍擊敗竄郾襄連結石梁山賊穆文相米國軫李世英李應全王國賢等窺興安珍以兵迎擊於白土關賊敗遁竹谿倚山立寨進圍之斬國軫世英師還擊北山賊李奎於鎮安魔王坪殲其衆五年穆文相等寇竹山珍遣兵擊走獲其輜重賊復謀西掠漕船珍分遣游擊王承光張寶正設伏黃泥港自率精騎誘賊血戰伏發賊敗擒應全進征石梁山陣斬王國賢盡平賊壘賀珍遁入蜀文相竄匿山箐食盡其黨俞尙智斬其首以獻六年蜀賊寇掠西鄉平利韓城諸邑珍分兵赴援自扼要隘截擊陣斬僞副將唐仲亨總兵焦賚監軍



鄧林春等械赴西安伏誅七年督剿南山賊斬級無算抵階峪射賊渠王大漢墮崖生擒之先是珍兩敘軍功晉左都督至是復加太子太保遇恩詔授三等子爵九年以疾解任還京隸漢軍正黃旗十年二月追論珍在興安時自治其家屬淫亂擅殺多人行賄兵刑二部降世職爲一等輕車都尉四月珍爲其婢訐告被謫怨望言動狂悖諸罪狀下三法司鞫訊論斬決籍沒兩奉諭覆勘仍前議得旨任珍曾立軍功從寬免死徙置遼陽其子仍令襲職用昭法外之恩尋以其長子宏祖襲一等輕車都尉

### 梁清標

梁清標直隸正定人明崇禎十六年進士官庶吉士福王時以清標曾降附流賊李自成定入從賊案本朝順治元年投誠仍原官尋授編修累遷侍講學士十年五月遷詹事閏六月遷祕書院學士十二月擢禮部侍郎十一年敕賑直隸八府災民清標與侍郎祝世允分賑保定所屬二十州縣三衛一所并順天府屬騰驤永清二衛屯丁之在保定者還奏稱旨十二年調吏部右侍郎奉詔陳政事得失清標疏言民生休戚繫乎牧令請令督撫重視州縣官勿使疲於趨承假以便宜

俾興利除害無或掣肘臺臣職居言路舊有部郎改授之例宜令各部堂官擇端方讜直者與卓薦州縣各官一體考選吏部掌人材進退宜於選功二司設記功記過二簿於序俸陞選中仍分別察核以昭懲勸山林隱逸屢奉詔薦舉未有應者請敕九卿公舉數人禮聘入京召見咨訪以收旁求實用下部議行是年轉左侍郎以本生母喪歸十三年四月遷兵部尙書八月同尙書衛周祚等奉敕督賑順天府屬二十七州縣十六年海上鄭成功由鎮江犯江寧給事中楊雍建疏言海氛告警宵旰焦勞樞臣職掌軍機於地形之要害防兵之多寡剿撫之得失戰守之緩急不發一謀不建一策僅隨事具覆依樣葫蘆不曰今應再行申飭則曰臣部難以懸擬旣不能盡心經畫決策於機先又不能返躬引咎規效於事後請天語嚴飭以儆尸素詔兵部回奏時尙書伊圖奉使雲南清標同侍郎額赫里劉達李棠馥疏辯自有海警以來凡調發機宜隨時斟酌審勢議覆未敢依樣葫蘆因循推諉得旨樞臣職司戎務調度機宜盡心籌畫方爲不負委任此回奏巧言飾辯殊不合理著再回奏於是自引咎下吏部察議三侍郎皆降二級清標降三級各留任十七年二月京察自陳諭曰梁清標經朕特簡昇掌中樞自當殫竭心

力以圖報效乃凡事委卸不肯擔任勞怨本當議處姑從寬免其痛自警省竭力振作五月上以歲旱令部院諸臣條奏時務清標與李棠馥疏言兵馬往來之地應用米豆薪芻牛酒羊豬及鍋斲槽樁諸物上官取諸下司下司取諸民間賠累無窮又奸民捏告通賊謀叛蠹役貪官借端取貨生事邀功致善良受害應俱嚴行敕禁得旨所奏上官取諸下司下司取諸民間及借端取貨生事邀功著確指其人於是復奏邇年地方官藉兵馬往來濫派民間則有丹徒知縣陳經筵合肥知縣岳呈祥等爲巡撫張中元總督蔡士英所劾藉通賊謀叛名魚肉平民則有桐城知縣葉桂祖常熟知縣周敏等爲給事中汪之洙巡按何元化所劾其未經劾奏者不知凡幾故請旨敕禁懲前以毖後疏下部知之康熙五年調禮部尙書六年充會試正考官旋遇京察革職八年輔政大臣鼈拜以專擅獲罪拘禁詔復前此無故黜革諸臣原官清標預焉十年補刑部尙書十一年調戶部尙書充經筵講官十二年平南王尙可喜請撤藩歸遼陽命清標往廣東經理藩屬遷移事旋以逆藩吳三桂反仍敕可喜留鎮清標還京十八年給事中姚締虞請寬科道糾劾不實處分許以風聞言事上召詢九卿等清標奏曰言官奏事原不禁其風



聞恐有藉稱風聞挾私報怨者是以定有審問全虛處分之例宜如舊上是其言二十一年命九卿等議改強盜不分首從皆斬例刑部尙書果斯海等議盜犯爲從者免死清標與左都御史徐元文等謂宜循舊例別爲一議上召詢清標奏曰法外施仁原屬至美之事但強盜皆係兇惡難分首從或罪果可矜間行寬減應出自特恩若預定一例則將僥倖於不死而愈恣爲盜上曰朕因每歲盜案處決甚多究其所劫之物甚微豈盡甘於爲盜或以飢寒所迫深爲可憫故與爾等商之今所言極是當仍舊例別思弭盜良法二十三年命以戶部尙書管兵部事二十七年授保和殿大學士是年湖北巡撫張汧貪婪事覺清標曾保舉爲布政使部議革職得旨降三級留任三十年死遺疏入得旨梁清標簡任機務宣力有年勤慎素著忽聞溘逝朕心深爲軫惻下部議賜祭葬如例所著有蕉林文集

黨崇雅

黨崇雅陝西寶雞人明天啟五年進士官至戶部侍郎福王時以崇雅曾降附流賊李自成定入從賊案本朝順治元年七月以總督賂養性薦徵授原官崇雅以老病請罷不允九月調刑部左侍郎疏言臣按舊制凡刑獄重犯自大逆大盜決

不待時外餘俱監候處決在京有熟審朝審之例每歲霜降後方請旨處決在外直省亦有三司秋審之例未嘗一罹死刑輒棄於市皆委曲爲恤刑計也皇上好生之德同揆先聖凡罪人之決不待時與秋後處決者望照例區別以昭欽恤臣更有請者在外官吏乘茲新制未定不無逞臆舞文之弊并乞暫用明律候頒行新例再畫一遵守二年二月復疏言流寇暴虐三秦被禍尤烈今剿滅殆盡恐寇黨株連下民未獲寧止請速頒恩赦以固人心至督撫爲綱紀之宗司道乃旬宣之寄而府州縣各官撫字凋殘所繫尤重簡用務在得人庶可廣皇仁而布實政並得旨允行六月百戶安啟懋訐奏原任天津總督賂養性貪婪通賊辭連崇雅下法司訊啟懋坐誣削職八月給事中莊憲祖劾崇雅讞獄含糊遇事少明決卽律令之損益屢荷明旨而至今未定其衰庸可知請予罷黜奉諭以所指無實免議崇雅因上疏備述衰老情狀並言科臣所指事款聖明既有洞鑒無庸置辯但謂臣形骸雖具神理已離卽臣自言不及科臣所言之真切乞鑒臣庸衰立行罷黜溫旨慰留之五年遷刑部尙書六年加太子太保八年閏二月調戶部尙書八月加少保兼太子太保十年四月引疾告歸上以崇雅服官操潔命在籍歲支原

俸督撫按臣時加慰問十一月特召還朝崇雅疏辭奉旨覽奏以親病不忍遠離且言衰老步履艱難情詞懇切但朕求賢圖治倦念老臣卿年雖七十猶堪任事宜勉遵前諭十一年授國史院大學士十二年復引年乞休詔加太保兼太子太傅予告馳驛還籍崇雅奏謝上見其衰頹憐之賜冠服諭曰卿今辭朕歸籍不能復見朕矣抵里後服朕賜衣卽如見朕崇雅叩首泣謝瀕行復召見賜茶溫語慰勞命大學士車克送之十三年賜之敕曰太保大學士黨崇雅樹品端方禔躬清慎久典邦禁明允蜚聲洊歷司農廉勤益著召參密勿作朕股肱翼翼小心夙夜匪懈正期益殫猷略佐理昇平乃以齒屆懸車抗疏解綬高風恬致足表儀型今間闕年餘深繫朕念特遣副理事官程可進御前近侍孫尙德齎敕存問賜羊酒卿其頤養天和茂膺壽祉劭乃德康乃身副朕至意尙時事有闕勿吝嘉謨入告卿尙敬念之哉康熙五年死賜祭葬如例

衛周祚

衛周祚山西曲沃人明崇禎十年進士官戶部郎中福王時以周祚曾降附流賊李自成定入從賊案本朝順治元年起授吏部郎中三年丁父憂吏部侍郎金之



俊啟心郎寧古里等以周祚掌銓務清慎勤練議給假治喪一月卽出任事周祚具疏乞終制上如所請服闋補原官九年遷太僕寺少卿十年以大學士洪承疇薦授刑部左侍郎疏言各省逮捕土賊坐黨輒數十人恐累無辜請自今令所在有司必鞫訊得實始具獄詞解部而釋其誣者京師五方雜處奸民逞詐訐訟者衆請嚴反坐罪以遏之又贖刑所以示矜恤功臣犯法苟非大惡原不宜與平民同論請令所司復收贖之令定議功之典以協平允得旨所奏有裨明刑下部詳議行十一年調吏部侍郎十二年正月疏言六部司屬五年始入京察故循資遷轉者多賢否無所區別宜於歲終令各堂官特糾舉一二人而黜陟之又言知府承流宣化責任綦重請敕督撫詳覈所屬斥其老病者前此疆圉新闢招民百名卽授知縣暫委各官卽予本職乃一時權宜之計今宜試以文義其不嫻者招民改補武職暫委止授佐雜並下部議行五月擢工部尙書十三年八月同尙書梁清標等分賑畿輔尋以重修乾清宮成加太子太保復以奉先殿成加少保十五年調吏部尙書旋授文淵閣大學士兼管刑部尙書十六年詔與奉職勤勞晉少傅兼太子太傅充會試副主考官十七年四月同大學士巴哈納等校定律例十

一月考滿晉少師兼太子太師廕一子入監十八年復內三院周祚改國史院大學士復充會試副考官會吏部尙書孫廷銓假歸奉命暫攝部事康熙二年乞假葬其兄周允明年還朝充武會試正考官六年充纂修世祖實錄總裁官八年三月以疾引退命乘驛歸予俸如故九月周祚疏辭俸諭曰卿著有勞績特給祿以資頤養勿辭十一年四月諭吏部曰原任大學士衛周祚品行端方清慎素著曩以引疾請告回籍調治今閣務殷繁贊理需人卽令乘驛來京入閣辦事六月授保和殿大學士兼管戶部尙書先是令各省皆鑄錢嗣有以銅貴請停者下部議遂盡罷各省採鑄至是周祚言銅鉛產自山澤取之不乏開採之省卽以鼓鑄俾泉布流通民用益裕於是復著爲令時上肇舉經筵日講周祚請令講官於尙書大學衍義貞觀政要諸書擇其最切治道者抽繹闡明以廣聖德資政理又言各省通志尙多闕略宜敕儒臣修纂舉天下地理形勢戶口田賦風俗人才燦然具列彙爲一統志以備御覽上並嘉納之十二月周祚疾遣侍衛太醫問視周祚再疏乞罷詔原官致仕仍乘驛回籍予俸十四年死賜祭葬如例後大學士馮溥告歸上以周祚居鄉謹厚若未嘗任顯秩者特舉以諭溥云四十二年上西巡駐曲

沃遣內大臣酬酒於墓並諭有司存撫其孫四十五年入祀鄉賢祠

### 戴明說

戴明說直隸滄州人明崇禎七年進士由戶部主事累遷兵科都給事中流賊李自成陷京師明說從賊賊遁明說逃歸原籍本朝順治元年六月以招撫天津錦衣衛百戶危列宿薦起原官九月疏言井陘太原盜賊尙多剿除宜速其各路兵馬經制既定者按時撥餉各處錢糧恩詔蠲緩者令撫按實力奉行十月又言天下初定人情尙懷疑貳請嚴縱容盜賊之罪優盤獲奸細之賞二年二月疏言流賊李自成兵敗氣奪應急發兵剿擒秦中士民或曾爲賊用當湔雪以安反側遣督撫督率官吏專心撫字俱下所司知之五月遷太常寺少卿九月調大理寺少卿四年遷太常寺卿五年擢戶部右侍郎六年加右都御史銜七年給事中杜篤祐劾戶部不奏銷錢糧及徇私註差等事尙書謝啟光降二級明說罰俸八年甄別部院大臣諭曰戴明說在戶部於同官貪婪不能秉公力爭反唯唯聽命歷來銷算事屬同官者必據爲己有明係希望有司求己銷算其操守不潔可知姑念年力尙壯降三級調外用十年補河南汝南道十一年四月遷廣西布政使七月



諭吏部戴明說年力富強才識明敏向經降調懲誠必洗滌自新遇京堂缺補用十二年正月授刑部右侍郎二月轉左三月擢戶部尙書十三年二月因河西務分司朱世德虧缺額稅明說議援赦免罪上責其贖徇降四級調用六月調太常寺少卿十四年遷右通政十五年遷太僕寺卿丁母憂歸十七年左都御史魏裔介劾明說居心浮躁前在戶部時家有慶賀事必徧告司官希圖餽送丁憂回籍後私入京師有乖禮制疏下部議革職尋死

劉餘祐

劉餘祐順天宛平人明萬曆四十四年進士歷知嘉興登封河內三縣行取遷刑部郎中出知平陽府累遷河南布政使應天府尹工部侍郎福王時以餘祐曾降附流賊李自成定入從賊案本朝順治元年睿親王定京師餘祐投誠授原官時京東土寇竊發疏請移順天巡撫駐密雲薊州道駐遵化從之又薦故明尙書仇維禎侍郎任濬副都御史賈毓祥御史張煊霍達傅景星莊憲祖舉人孫奇逢梁維本等九人下部知之六年加太子太保七年初設六部漢尙書擢餘祐兵部尙書八年閏二月調刑部八月晉少保九年四月疏陳律例六款一斬絞雖同一死

畢竟有別概論斬則過重應照例分別處決一流徒律各有等流則地分遠近徒則限分年月凡流罪惟隱匿逃人應解部彙發今則流罪俱解部徒者鞭責外竟放不充輕重多失竊思流者以罪不至死故量定三等且里數亦就本犯之地論如一概解部而後流徒則遠省跋涉多至數千里不死於道路者寡矣律原不言解部應改正徒罪亦照律簽發限滿釋放一誤傷致死律應絞自五年奉旨改責四十板賠一人夫以賠人作抵命是開散法之端死冤不雪應仍照律定擬一強盜論斬律文不云籍沒且自甘爲盜安有厚家乃籍沒之物甚微而稽查有無騷擾鄉里起送押運反費腳價至妻子則罪人不孥豈容增累今除強盜正法外其妻子家產應免籍沒一隱匿逃人窩主免死流徙關外須提取妻子盤費不得不監候有妻產已到而戶部以人數零星必積至數起始押發一次時或病死獄中今應敕部陸續押發卽隱匿之家亦有至情可憐如父母之於子與子之於父母離別重逢天性難割與常人有心隱匿者不同乞量與分別一投旗漢人生事害民前已敕部曉示凡投充犯法與民屬一體究治今復奉旨不許稽禁旗人則凡自稱旗人者地方官莫辨真假何以措手今除真正旗下舊人犯事卽送部審不

許監禁外如投充人借勢生事請仍遵前旨一體究治又疏言向例原止許貧民投各旗爲役嗣後有身家地土者一概投充遂有積奸無賴或因圈地而寧以地投或本無地而潛以他人地投甚且帶投之地有限恃強霸占百弊叢生地方有司不敢究治請將投充之人總發州縣查明占地各還原主俱下部議行十月調戶部先是餘祐任刑部時興安鎮總兵任珍以疑擅殺妻妾懼罪行賄已而事覺十年二月法司勘問得實餘祐革職杖徒永不敘用尋死

### 龔鼎孳

龔鼎孳江南合肥人明崇禎七年進士授兵科給事中十六年大學士周延儒罷歸舊輔王應熊赴召將至鼎孳疏劾應熊結納延儒營求再召政本重地私相援引延儒甫出應熊復來天下事豈堪再誤疏入留中未下會延儒被逮在道不卽赴冀應熊先入爲之解莊烈帝知之命應熊歸賜延儒死時兵部尙書陳新甲獲罪棄市鼎孳又疏詆呂大器爲陳新甲私人不宜令總督保定山東河北忤旨鐫秩及流賊李自成陷京師鼎孳從賊受僞直指使職巡視北城本朝順治元年五月睿親王多爾袞定京師鼎孳迎降授吏科右給事中尋改禮科二年九月遷太



常寺少卿三年六月丁父憂請賜卹典給事中孫昌齡疏言鼎孳明朝罪人流賊御史蒙朝廷拔置諫垣優轉清卿曾不聞夙夜在公以答高厚惟飲酒醉歌俳優角逐前在江南用千金置妓名顧眉生戀戀難割多爲奇寶異珍以悅其心淫縱之狀哄笑長安已置其父母妻孥於度外及聞父訃而歌飲留連依然如故虧行滅倫獨冀邀非分之典誇耀鄉里欲大肆其武斷把持之醜請敕部察核停格疏下部議降二級調用尋遇恩詔免九月補原官十年擢刑部右侍郎奏定本部事宜一諸司問擬大小獄情宜悉依律文確議不得棄律科罪一折獄務得其情虛者卽爲申雪實者推詳定案毋持兩可一獄訟宜令滿漢司官會訊錄詞呈堂復審或擬罪或釋放加以勸語付司存案一處決重囚宜令科臣將應決人犯詳註姓名其有情罪失當者許卽時執奏一遣戍罪人宜就原籍遠近定地發遣一畿輔州縣旗民交訟惟命盜案情仍赴部質審鬭爭細事請卽令各州縣審擬申報督撫結案一老幼篤病律有收贖之條請再爲申明凡重犯連坐之家屬卽與依律科斷下所司議行明年二月轉戶部左侍郎五月遷都察院左都御史十一月疏請招納流民先擇寺院聚處編列保甲互爲稽查仍仿京城賑粥例有司親爲

經理其往他省者卽令所在道廳招集量給資本留屯毋令失所十二年八月詔停刑部秋決鼎孳疏請令內外概行停決以彰一視之仁又奏每年六月審定立決重犯俟七月具題正法並下部議行先是給事中許作梅莊憲祖等交章劾大學士馮銓睿親王集科道各官質問鼎孳曰馮銓乃背負天啟黨附魏忠賢作惡之人銓曰流賊李白成陷害明帝竊取神器鼎孳反順逆賊竟爲北城御史鼎孳曰豈止鼎孳一人何人不曾歸順魏徵亦曾歸順太宗王笑曰人果自立忠貞然後可以責人鼎孳自比魏徵而以李賊比唐太宗可謂無恥似此等人祇宜縮頸靜坐何得侈口論人遂罷不問嗣以陝西地震鼎孳疏論任輔弼酌銓敘責考課諸事上知其意必有所指令指實回奏又語涉馮銓上以馮銓果有罪卽宜糾劾何待責令回奏始引銓抵塞諭責之至是上以鼎孳自擢任左都御史每於法司章奏倡生議論事涉滿漢意爲輕重敕令回奏鼎孳具疏引罪詞復支飾下部議應革職詔改降八級調用尋以在法司時讞盜事後先異議又曾薦舉納賄伏法之巡按顧仁再降三級十三年四月補上林苑蕃育署署丞閏五月大學士成克鞏論鼎孳黨護左通政使吳達隱其弟吳達通賊事請勘訊下部察問鼎孳以不

知達爲達弟申辯罰俸一年十七年詔甄別京員以鼎孳素行不孚衆論復降三級調用罷署丞康熙元年諭部以侍郎補用明年起都察院左都御史奏免康熙元年以前催徵未完錢糧三年遷刑部尙書疏言法司審擬事件若非徇私枉法雖或議罪稍輕引律未協旣行改正應免處分從之五年轉兵部八年轉禮部九年充會試正考官十二年再充會試正考官八月以疾致仕九月死賜祭葬如例諡端毅

### 劉昌

劉昌河南祥符人明天啟五年進士官至戶科給事中以駁尙書張鳳翼敍廢將陳壯猷功被斥崇禎十五年御史張肯堂請召還建言被遣諸臣復昌原官福王時以昌曾降附流賊李自成定入從賊案本朝順治元年睿親王定京師昌投誠仍授原官六月疏陳定經賦立官制頒俸祿重守令明等威立規模審廟算推誠心集羣策施實惠十事詔從所請旋擢太常寺少卿奏設金太祖世宗陵寢奉祀官二年授太僕寺卿四年擢工部右侍郎尋轉左六年八年兩遇恩詔晉太子太保九年奉命致祭闕里以私歸原籍論奪俸十年正月遷工部尙書四月以會議



革職總兵任珍罪徇黨失實下九卿議擬流徙奉旨寬免鐫秩一級供職如故會雨澤愆期應詔求言疏陳時事其略曰西山之民惟藉採煤爲生且產煤之山已供正賦今復責之輸煤轉運已多勞費重徵亦擾追呼非所以廣皇仁而定賦式也請特恩蠲除又易州額貢紅螺炭例遣工部主事往州監造官役供億日繁漸啟需索之弊請敕令撫按止委佐貳一員駐州督辦均得旨允行著爲令十一年河道總督楊方輿奏報河水浸溢給事中許作梅請復九河故道詔廷臣集議昌隨衆議以故道久湮事難懸擬請敕督撫會同詳勘給事中林起龍劾方輿不塞決口致河北被淹并劾昌任工部尙書借會議主詳勘故道之說以掩方輿不塞決口之罪應逮問時昌分賑直隸飢民敕還對質不實起龍以誣奏坐罪十二年正月給事中饒宇式復劾其察勘河工因循玩忽製造鐵斛推諉遷延請敕部勘訊上令昌回奏昌以河工屢有咨催鐵斛火候難強奏辯遂免議三月調刑部尙書十二月以巡按御史顧仁納賄事覺昌坐濫舉奪俸十三年三月考滿加少傅兼太子太傅四月上以昌自任刑部後獄訟未清深負委任命削加銜降三級留任七月詔復原銜諭以洗心滌慮改過自新九月奉命往正定諸府審錄罪囚十

四年以葬親假歸十五年還朝補工部尙書十六年值會推江寧巡撫誤以降級外用之沈文奎列名陪推部議奪俸十七年以老病乞休奉旨卿謹慎練達歷著勤勞念年齒已邁著以原官致仕并敕馳驛回籍廕一子入監康熙九年死賜祭葬如例諡勤僖

### 孫承澤

孫承澤順天大興人明崇禎四年進士官至刑科都給事中福王時以承澤曾降附流賊李自成定入從賊案本朝順治元年五月起授吏科都給事中七月疏薦霸州道劉芳久才堪辦賊請加銜久任詔以霸州土寇未絕芳久無功所舉爲循私切責之十一月遷太常寺少卿提督四譯館事二年四月遷左通政八月遷太常寺卿四年六月遷大理寺卿五年擢兵部右侍郎八年調吏部九年四月都察院疏糾承澤兩耳失聰請敕部革退因解侍郎任五月上以承澤無罪不應革退命如舊供職八月轉左侍郎兩遇恩詔加太子太保都察院左都御史銜十年二月吏部尙書高爾儼以疾乞罷承澤奏言吏部尙書權衡所寄得人爲難伏見大學士陳名夏在吏部時頗能持正請以名夏分理部事必能仰副澄清之治上覽

奏謂閣臣曰朕見承澤此疏洞其隱微代爲含愧彼意尤其所請而用名夏則於彼有利否則又將使朕猜疑名夏也因以侍郎推舉閣臣有乖大體責令回奏承澤戰慄引罪自陳愚昧乞宥諭侍臣曰凡人自知有過宜卽行引罪若強自置辨則獲罪滋大乃釋之尋上幸內院覽諸奏章及明萬歷時史書言及承澤所奏諭大學士洪承疇等曰六部大臣互相結黨殊不合理祇宜爲君爲國秉忠持義善善惡惡爲是皆叩頭謝先是正月承澤引疾乞休上以其年力未衰不許三月再請乃許承澤旣歸御史楊義劾承澤素附陳名夏表裏爲奸積年罪狀可據承澤上書自訟十一年部議應休致遂不復用康熙十五年死賜祭葬如例所著有五經翼春明夢餘錄庚子銷夏記

熊文舉

熊文舉江西新建人明崇禎四年進士官吏部郎中福王時以文舉曾降附流賊李自成定入從賊案本朝順治元年投誠仍原官二年授右通政遷吏部右侍郎會大兵平江南明福王朱由崧就擒文舉疏陳四事一江浙閩粵等處明季加派賦額宜悉蠲貸一福王所授官多市井冒濫雖已投誠不可委用一山林隱逸有



清望素著潛修博學者請下郡縣徵舉一國家初定凡率先效順歷著勤勞者請特加優異得旨允行旋以疾去官八年閏二月吏部列薦詔起用八月補吏部左侍郎時江西自叛鎮金聲桓蹂躪之後逋賦積壅詔悉蠲順治五年以前積逋文舉請廣皇恩斷自七年以前又以有司丈量荒地奉行無實或借端苛索請敕撫按清釐嚴剔又言大臣不知進退大節無以表率下僚請敕勵羣臣毋貪持祿位頽病者致仕親老者終養務敦名節以肅官常九年請諭各省大吏約束守令禁幕客家人招搖及縱蠹役爲民累又江右甫經兵燹無貢生應考學官之人武生雜流俱資緣委署應請命撫按學臣察革擇舉人之文行兼優者充之諸疏並下所司議行初文舉投誠時其父洪在籍明福王逮下獄文舉子鼎華請以身代得釋而鼎華遂以瘐死江南平有司上其事詔旌鼎華至是洪卒文舉聞訃告歸康熙元年起爲兵部左侍郎二年以病乞假歸八年死賜祭葬如例

### 薛所蘊

薛所蘊河南孟縣人崇禎元年進士任山西襄陵縣知縣卓異授翰林院檢討尋遷國子監司業福王時以所蘊曾降附流賊李自成定入從賊案本朝順治元年

五月睿親王多爾袞定京師所蘊迎降六月授原官二年二月疏言河南受賊荼毒村社盡墟當專設勸農墾荒官資以牛種俟三年成熟陸續補還奏入報聞四月遷祭酒五月奏稱滿洲學生皆沈毅聰俊志趨向上國學僻處東北隅遠者十五六里近亦有數里奔馳道路辰巳間始到監申刻回家就食功課止午未二刻有名無實惟晝夜在監讀書庶有實益而號舍供結未定宜敕部院酌議得旨滿洲子弟就學請分四處每處用伴學十名勤加教習十日一次赴監考課五日一次就本處演射務令文武兼資以儲實用八月疏言前監臣李若琳請漢一品至七品官子孫入監讀清漢書未詳內外文武現任原任之互異及入監數日多寡乞定文京官四品以上外三品以上武官二品以上俱准送一子入監讀書年老致仕病歸及降革者現任所送仍准留監革任後不准從之四年正月因誤收學臣咨送貢監濫額降一級調用尋補太僕寺寺丞五年轉通政司右參議七年遷順天府府丞八年晉太僕寺卿九年六月改詹事府詹事八月疏言署後舊建經庫又設司經局官兵燹後散佚無存請敕部直省學臣量動學租及缺官缺廩銀購遺書解藏經庫至國子監現存十三經二十一史並乞頒發以司經局官典守

得旨允行九月教習庶吉士十年轉弘文院學士十一年十月擢禮部右侍郎十二年二月轉左十四年御史高爾儼劾所蘊年老每會議渺無識見宜引退所蘊亦乞休致康熙六年死賜祭葬如例

### 李元鼎

李元鼎江西吉水人明天啟二年進士官至光祿寺少卿流賊李自成陷京師元鼎從賊授僞光祿寺少卿本朝順治元年睿親王定京師元鼎投誠授太僕寺少卿二年二月裁太僕寺缺命爲原官四月遷本寺卿尋轉太常寺卿七月擢兵部右侍郎八月疏言臣鄉襟江帶湖據金陵上游控閩粵而連浙楚舊有江西巡撫控制全省又有南贛巡撫分理承平無事且不可一日缺人況又地方多事非得人料理恐殘兵餘寇再肆蹂躪懇恩遴簡重臣二員速往受事下所司知之三年疏言吉安一郡祇臣一人受職盛朝負固之兵視臣家爲仇讐倡亂之衆以臣家爲魚肉致臣弟逼死臣母驚病家口流離盡皆散失今吉安已復懇恩給假歸省疏下吏部以樞務正繁未許因私請假得旨著照舊辦事四月因元鼎曾薦私人倪先任於順天巡撫柳寅東聽用後獲劫盜劉傑等稱先任是其同黨鞠實先任



正法部議元鼎職係樞臣輒送匪人聽用雖稱不知爲盜未可遽信應擬斬寅東不查來歷收用先任後雖斥退亦擬杖特恩免元鼎寅東罪姑革職八年閏二月吏部尙書譚泰陳名夏等遵旨薦舉人材稱元鼎歷任清勤前緣事褫革非賊私可比請錄用以備驅使詔起送來京八月復原官十年以總兵任珍前任興安擅殺妻妾懼罪遣人至京行賄至是事敗兵刑二部株連得罪者十餘人元鼎議罪尤重應絞恩詔仍免死杖徒折贖未幾死子振裕累官禮部尙書

傅景星

傅景星河南登封人明崇禎十年進士授山西平陽府推官尋遷山東道監察御史巡按陝西未行流賊李自成陷京師景星從賊授僞兵政府侍郎掌職方司本朝順治元年錄明舊臣授原官二年正月巡按順天二月疏言民房應給旗下者當寬限俟移後令管業又州縣清查絕產產既入官老稚無依衛地入官屯軍亦無棲止請量給閒房仍編入戶口嚴禁逃亡八月疏言田地被圈之民俱兌撥賦薄屯地請照原額起徵倘支解不敷再於支解額中量省九月疏言完縣地瘠賦重原額止五分零後加至七分有奇較各州縣三四分不等請照原額徵收均下

部議行先是商民出海運糴有禁十一月景星以天津僑居者衆民食取給山左  
本年歲本歉收賴商販接濟請弛禁聽商民自便詔如所請三年正月疏言皇上  
初以滿兵未有恆產令圈種無主田地又以滿漢雜處未便令擇處一方去年已  
有定區續撥將蔓延無制且莊房必近圈地以便耕鑿乞詔部發示所撥地畝察  
其與去年之圈地相隣者不必復及他方其莊房亦止於原地內所有者不必圈  
及城內更除大路鎮店免撥以便行旅三月疏言奸徒謀充莊頭於續撥之田任  
意圈種請究治示懲又請蠲靜海興濟青縣三縣荒地錢糧俟成熟照例起科俱  
得旨允行四年遷太僕寺少卿六年轉左通政八年遷通政使九年遷左副都御  
史十年遷工部右侍郎十二年二月給事中韓庭芑劾景星久居風憲羅利無恥  
繼轉工部值河決一籌莫展且年老臃腫請賜罷斥得旨傳景星自行回奏五月  
以病乞假歸尋死

### 葉初春

葉初春江南湖口人明崇禎元年進士初爲常州府知府曾櫻屬吏以行取擢御  
史後東廠誣櫻行賄莊烈帝命械赴京初春知其廉於他事微白之詔詰問因言

櫻實不知賄所從至巡撫沈猶龍巡按張肯堂俱力白櫻寃乃釋罪初春轉給事中時宣府總兵李如松以父子兄弟並居重鎮勢驕橫屢被言官論劾俱不報初春請更調之乃命如松與山西李承恩更鎮遷初春太僕寺卿尋擢工部左侍郎福王時以初春曾降附流賊李自成定入從賊案本朝順治元年大兵定京師初春赴闕投誠仍原官十二月賜鞍馬二年正月丁母憂時江西寇氛未靖道途阻塞詔令初春在京守制八月江西平疏請回籍葬親許之初春隨具疏爲其父母及妻請祭葬禮部議以初春投誠首附簡任司空恭值大工鼎建任事拮据念茲經始勞臣恩卹宜及所生應照例與其父母祭一壇減半造葬至伊妻止有附葬之例未便預爲題覆上如議行初春遂歸葬其親尋死於家

張若麒

張若麒山東膠州人明崇禎四年進士任清苑縣知縣十一年行取考選得用給事中檢討楊士聰劾吏部尙書田維嘉考選行私莊烈帝因親策諸臣若麒僅得刑部主事大失望謀改兵部會少詹事黃道周劾大學士楊嗣昌奪情起復嗣昌亟購人劾道周若麒鄉試爲職方司郎中王陞所取中至是陞以密結嗣昌新擢



太僕少卿示意若麒若麒遂疏詆道周曰頃者大布王言諄諄然以正人心息邪說爲治天下之大本舉黨同伐異之隱情招權納賄之狡術無不見其肺腑數日以來羣黨藉藉或擲鈔傳之邸報而怒視或引不論之遠事而詆譏有謂召對之日黃道周犯顏批鱗古今未有而上爲之理屈者又謂堅求一死而上左顧言他始終無如道周何者要使古今未有之好語盡出自道周之口而凡可以歸過君父者無所不至蓋飾六藝以文姦言務在假託道學以把持朝廷而顯行其呼朋引類之計舉國如狂莫之敢指臣何敢畏其兇鋒雷同不言疏入貶道周六秩調外嗣昌以若麒知兵調爲兵部職方司主事尋遷郎中十四年我太宗文皇帝圍錦州總督洪承疇集諸鎮兵來援未敢決戰兵部尙書陳新甲遣若麒往商於承疇欲分四路夾攻承疇慮兵分力弱議主持重若麒以圍可立解入告新甲益趣承疇進兵若麒屢報捷洊加光祿寺卿旣而諸軍自松山出戰我師擊敗之殲殪各半若麒自海道遁還新甲庇之復令出關監軍十五年二月松山城破若麒復自寧遠遁還時大學士謝陞與新甲庇若麒並爲廷臣交章糾劾御史米壽圖劾若麒本不諳軍旅諂附楊嗣昌遂由刑曹調職方督臣洪承疇孤軍遠出若麒任

意指揮視封疆如兒戲虛報大捷躡光祿卿冒功罔上恃鄉人謝陞爲內援當駢斬以慰九廟之靈於是若麒論死繁獄及流賊李自成陷京師縱出之受僞職爲山海防禦使本朝順治元年睿親王多爾袞定京師若麒迎降授順天府丞暫管府尹事七月若麒啟請撥付兵馬往剿其鄉賊寇以濟南兗州東昌聽招撫侍郎王鼐永經理而已分任登萊青三府睿親王以府尹不便領兵進征諭止之先是吳三桂爲明總兵若麒素相識及我朝封三桂爲平西王若麒數通餽問睿親王諭責之曰大小臣工只應辨本等職業不宜諂上瀆下今察知順天府差人取魚向各王府投送恐各官效尤諂瀆成風自後不得勞民獻諛有乖政體若麒啟辨各王府從未輕謁惟平西王係舊知曾往弔其父喪又值生辰一往拜壽亦無取魚投送之事此有人設謀陷害故造爲謗言也睿親王諭以事豈無因姑不究旣往九月若麒父熙家居被土賊葛欽焚宅劫財傷亡疏請丁憂回籍得旨解任在京守制二年四月乞假葬父允之又爲父請卹下部議准予祭奠五年九月起補順天府丞七年遷大理寺少卿旋遷太常寺卿管太僕寺卿事九年四月擢通政使八月乞假歸省母病十年三月以母病未愈已亦患病乞在籍調理十三年遇

京察以久病休致死於家

唐通

唐通陝西涇陽人明崇禎七年以榆林守備從總督陳奇瑜征流賊於鄖陽尋遷遊擊守漢中復遷宣府副將官至密雲總兵十四年我太宗文皇帝遣兵圍錦州久薊遼總督洪承疇令通及馬科王樸吳三桂李輔明曹變蛟白廣恩王廷臣八總兵合兵十三萬援錦州次松山通與曹變蛟屢迎戰輒敗太宗文皇帝親統大軍圍之度明兵必遁密授諸將機宜設伏邀擊明兵乘夜奔竄自杏山池南沿海東至塔山傷斃及溺海死者甚衆通與樸三桂科廣恩等皆脫走十五年松山破洪承疇就擒明法司論諸逃將罪斬王樸餘皆以賄免通貶秩仍鎮密雲是冬太宗文皇帝遣兵自黃崖口入薊州越京師趨山東凡克城八十有八通始守牆子嶺繼乃尾後聲言赴援不敢一戰及大軍凱旋通與廣恩等合兵邀拒於螺山潰還密雲十六年五月大學士吳甡將赴武昌討流賊尙書張國維請以通與馬科兵及京營兵共一萬隨甡南征大學士陳演又以關口不可無備奏留唐通裁密雲總兵改通薊鎮中協總兵九月我世祖章皇帝遣兵征寧遠通率兵赴援至則



李輔明已戰死中後所前屯衛中前所三城俱破以寧遠城得全還報明帝移通守薊鎮西協召見稱卿而不名賜蟒服玉帶十七年三月以流賊李自成陷大同封通定西伯與總兵吳三桂左良玉黃得功並徵入衛三桂等遠不能至通逾宿卽抵京陛見賜銀幣慰勞再三發內帑銀四千兩犒其軍命偕太監杜之秩守居庸通至聞賊已抵柳溝遂與之秩並從賊賊入關遣僞兵政府侍郎左懋泰偕通守山海關通遺三桂書盛誇自成禮賢啖以父子封侯三桂甫領兵入衛兵至永平聞其妾陳沅被虜還兵擊通通敗僅以八騎走其標下兵八千盡潰降三桂自成聞之令降將廣恩援通兵亦潰自成別以兵二萬守關而遣通齎銀四萬兩犒三桂軍欲因以招之三桂佯受金緩賊而書乞本朝兵入關睿親王多爾袞統師由寧遠進通率數百人迎戰於一片石敗卻自成率賊三十餘萬自北山橫亘至海列陣以待睿親王令我兵向海鱗次布列三桂分列右翼末各對陣奮擊大敗賊衆通隨自成西遁至府谷見賊勢蹙不足恃力糾集散卒擊走賊將李過還駐保德州本朝順治元年九月山西總兵高勳以通願歸順乞兵共剿賊入奏十一月英親王阿濟格統師至寧武關通隨勳迎謁王令往保德州河岸造筏濟大軍

通尋遣裨將赴京齎繳定西伯銀印命隸正黃旗漢軍晉封定西侯詔以總兵官鎮守保德州殺賊自效二年正月雙山土賊高一功陷榆林通與巡撫趙兆麟逐之賊遁七月同陝西巡撫雷興剿敗張果老崖土賊黃張飛等疏言土寇侵擾淳化耀州三原富平久爲民害黃張飛等拒剿負險恃衆抗拒官兵二旬四戰參將柏言遊擊史萬宰等殺賊四五千人墮崖死者以數萬計獲大旗十鐵甲十三盔七馬十六羸二驢七十四請分別賞卹有功及陣亡諸弁兵以示獎勵得旨疏內旣稱殺賊四五千人跌死數萬何以所獲旗甲等物止有如許此係明季惡習以後不得沿陋入報下部嚴飭行九月疏言三秦已定臣應回京供職請以保德仍歸寧武鎮管轄所有兵馬當留陝西爲城守之需得旨准回京陛見其兵馬留陝西督撫察明留用五年四月奏繳定西侯印乞改賜世襲爵職下部議予一等子襲十四次康熙三年二月以年老乞休詔原品致仕遇朝賀隨班行禮四月死賜祭葬如例其一等子爵子翰輔孫之汾相繼襲之汾任鑲紅旗副都統五十一年卒所司以其子祝應襲請諭曰唐通原係前明總兵官不能出力反降順流賊後雖投誠本朝未著功績其世職不必承襲

董學禮

董學禮陝西廣武人明花馬池副將流賊李自成陷陝西學禮從賊授僞總兵駐筭懷慶本朝順治元年豫親王多鐸兵下河南學禮降並以書招降寧夏僞節度使陳之龍賊將牛成虎獲其書盡殺學禮家屬會賊犯孟縣學禮渡河來援殺賊千餘二年隨英親王阿濟格平陝西署鳳翔總兵部議以鳳翔例不設鎮令學禮來京另用尋入京隸漢軍正黃旗五年敍投誠功授一等子十六年海寇犯温州加左都督銜充隨征浙江總兵官駐温州十八年擢湖廣提督時桂王將李來亨等踞湖廣西山康熙二年二月學禮同總兵穆生輝于大海高守貴由間道襲剿敗之於李店擒其將宋段俘獲無算來亨退據譚家寨我兵四面圍之別遣將恢復歸州巴東巫山等處直達夔州撫輯西山洞寨百餘處得旨嘉獎七月來亨乘大霧來犯我營學禮督兵夾擊斬首七百餘三年來亨以內訌舉家自焚學禮以書招降其黨王光興蔣尙膺等五年死子永蕃襲職

駱養性

駱養性湖廣嘉魚人明崇禎時官錦衣衛都指揮使洊遷左都督加太子太傅當



周延儒與吳甡同秉政欲引用養性甡持不可且因召對言廠衛弊害延儒附和之養性怨甡並怨延儒行人司副熊開元養性鄉人也劾延儒罪莊烈帝怒其讒譖輔臣令錦衣衛逮至嚴訊時給事中姜垞以遊玩詔旨亦下錦衣衛養性告同官以奉密旨令斃兩人於獄同官舉天啟時掌衛事鍛鍊殘酷崇禎初伏誅之田爾耕許顯純爲戒養性懼漏語於同鄉給事中廖國遴國遴以語同官曹良直良直疏劾養性歸過於君而自以示恩若無此旨不宜誣謗卽有之不宜洩請誅養性疏入留中會吳甡以出征襄陽延緩罷任養性構陷之謫戍金齒延儒督師通州飲酒娛樂而日騰章奏捷養性陰刺其軍中事以聞延儒罷歸養性復與中官結騰蜚語莊烈帝乃盡削延儒職遣緹騎逮至京令自盡開元垞並出獄遣戍養性任職如故流賊李自成陷京師養性從賊至本朝順治元年睿親王多爾袞定京師養性與御馬監太監張澤民迎降於城外旋與錦衣衛都指揮同知王鵬沖等率旗尉陳設儀仗導引入武英殿王令養性仍原官六月令總督天津軍務七月疏言鹽課一節誠今日兵餉急需然鹽課出自南戶部一時路阻難以膠柱應權刻鹽票以當正引卽令商人赴戶部按引納課發鹽運使掣鹽至徵課舊例每

引徵銀六錢五分七釐有零加徵遼練等餉在各商苦於上納食鹽之民又苦價高病商病民莫此爲甚現在津兵待餉請卽以長蘆鹽課抵兵餉庶爲商民兩便從之又疏請徵納錢糧照舊例每兩加火耗三分其餘停免得旨錢糧徵納每兩火耗三分正是貪婪積弊何云舊例況正賦尙宜酌蠲額外豈容多取著嚴行禁革先後疏薦明尙書張忻侍郎黨崇雅李化熙副都御史房可壯通政使王公弼並得旨徵用十月以擅迎明福王朱由崧所遣使臣左懋第等部議革職爲民上念養性有迎降功革總督任仍留太子太傅左都督銜十二月賜鞍馬二年正月奏言漕糧爲國計所關明舊額四百餘萬皆取於江南北今大兵業已渡河當以總漕大臣前往相度料理隨收隨解庶京庾有儲又兩淮鹽務國計所賴招商裕課亦宜及時圖度疏下部知之五月敕迎順功加太子太師六月百戶安啟懋訐養性貪婪通賊事下法司訊不實褫啟懋職十月疏言守候期年未蒙委任今陞太子太師何敢坐糜廩祿而不思報效伏懇敕諭吏部得旨靜候簡用五年八月吏部以養性原係武職出身前已緣事撤任不應再補文職請敕兵部降用六年二月授浙江掌印都司尋死



陳之龍

陳之龍江西宜春人明舉人歷官三邊監軍道流賊李自成陷陝西之龍降賊授偽寧夏節度使職本朝順治元年大兵定京師之龍舊將董學禮自懷慶降以書招之及英親王阿濟格追賊至陝西之龍詣軍門降委署三邊總督移駐固原二年三月進京陛見十一月授都察院右僉都御史巡撫鳳陽三年三月疏言臣自徐入境見小口河決沛縣首受其害舊黃河水橫衝廬舍邳州宿遷半皆漂沒當議蠲賑淮揚地方文武貪殘冒濫者不少應分別參革更換各屬皆有投順暫駐之兵統馭無人糜餉甚多宜早定經制上嘉納之十一月土寇劉和尚等由湖北蘄州突犯英山縣之龍檄調廬陽六安兩營兵擊走之又招降海賊徐見吾盧瑞宇等四年正月如臯縣土賊趙雲李七僞稱都督指稱明廢官李之椿爲謀主謀攻通泰等處之龍發兵斬賊千餘搜獲之椿鞠訊之椿未與謀因未繳出前明關防遣戍十月協同漕運總督楊聲遠剿鹽城壩灣賊遣標將王永昌等剿廬江賊俱平之五年奏擒奸人黃毓祺於通州法寶寺獲僞印及悖逆詩詞原任禮部侍郎錢謙益曾留毓祺宿且許助資招兵詔總督馬國柱嚴鞠毓祺死於獄謙益辨



明得釋時江西鎮將金聲桓叛攻陷無爲州巢縣等處巡按潘朝選劾之龍不能禦寇縱兵淫掠得旨降二級調用又以審理周龍隱占明逃藩遂平王眷屬一案遲延朦混下部議革職之龍尋死

柳寅東

柳寅東四川梓潼人明崇禎四年進士官御史巡按順天流賊李自成陷京師寅東從賊授僞直指使本朝順治元年投誠授原官疏言頃見吏部除官凡前朝犯賊削職及受流賊僞職諸臣概予錄用恐賢否混淆或爲民害請罷斥禁錮以清銓政又言方今景運方新民志未定犯罪者僅以鞭笞從事不足威衆宜速定律令頒示中外得旨歸順官民旣經擢用不必苛求罪人鞭責本覺過寬自今問刑暫準明律以副朝廷刑期無刑之意又疏言戡亂大計惟流賊最急當調蒙古入三邊而大兵直趨秦晉使賊腹背受敵別遣兵扼蜀漢衝要以防竄逸上嘉納之時畿輔初定賦役尙沿明制州縣額丁遭亂逃亡有司虛立丁口以符原額里甲私編餘丁責銀包納謂之包丁其逃亡荒廢之地里甲加派土著業戶代輸地糧及屯田已報陞科而實未墾者坐令營路納糧謂之荒糧並爲民累寅東奏請豁

免尋復疏請裁冗員並得旨允行二年擢太僕寺少卿三年奉命巡撫順天雄縣  
褫衿許平侯者窩巨盜劉文禹等百餘人行劫謀攻霸州容城爲其黨侯尙志所  
首寅東督兵捕斬平侯及盜首二十餘人餘黨解散尋大興土賊李振宇就撫寅  
東請貸其死官給廩食凡海子紅門諸土賊咸責令偵捕自效從之初寅東與侍  
郎李元鼎善其出爲巡撫也元鼎薦其門下人倪先任才堪使令寅東遂給以參  
將牌筭四年部臣以先任曾爲盜黨寅東濫給牌劄請逮訊鞠實與元鼎並罷職  
歸八年上親政詔寅東仍以巡撫起用十三年湖廣巡撫員缺吏部擬列寅東名  
進給事中姚延啟劾其年老才庸請勒令休致下部議寅東精力已衰應以巡撫  
銜致仕從之未幾死

### 方大猷

方大猷浙江烏程人明崇禎十年進士官直隸井陘道福王時以大猷曾降附流  
賊李自成定入從賊案本朝順治元年五月投誠授監軍副使隨侍郎王鼐永招  
撫山東七月擢山東巡撫疏請頒詔崇祀孔子定闕里儀章典制得旨先師爲萬  
世道統之宗禮當崇祀昭朝廷重道尊師至意下部詳議舉行大猷復請以無業

荒地分給流民及守兵屯種三年後起科開礦長清諸處鑄錢充餉行保甲以弭盜減鹽課以卹商皆議行又疏薦明庶吉士張端主事李森先等得旨錄用時充沂間土賊嘯聚大猷遣兵剿撫屢奏績二年二月給事中韓源劾奏山東吏治弊壞擒獲盜輒賄脫大猷擅逐長山知縣張廷鈺不人告輒以州判梁起禎代縱其貪婪詔大猷回奏大猷言土賊就撫法得寬宥非關賄脫梁起禎貪婪無據張廷鈺由巡撫朱朗鑠議罷不入告咎在朗鑠於是韓源復劾其欺飾朗鑠亦劾大猷擅逐廷鈺有牒可據所奏誣罔事下登萊巡撫陳錦巡按李之奇查核大猷坐謬罔部議革職得旨從寬降調六月授密雲兵備道初長清土賊李明尹三清就撫既而二人械鬪訟縣大猷時爲巡撫令斬之以既降復叛入奏上覽奏未有叛據且不應先斬後奏命陳錦覆勘得實大猷已之道任奉諭嚴責回奏大猷謂李明等不殺終叛急誅之以除後患其時尚未定重辟奏請上裁之例故遽行擒斬乞賜原宥上大猷既經降調免議九月以總漕楊方輿薦調河南管河道時汴梁決口未塞小宋口曹家寨流通集諸處先後衝決大猷初仕明嘗爲管河道方輿謂其練習河務故薦之七年八月河決荆龍口大猷議以來春鳩工於上流築長



隄緩遏其勢乃築小長隄於決口請帑十萬兩有奇期以半年歲事八年二月部推江南按察使方輿奏留之命以按察使銜仍管河務尋以荆龍決口逾期未塞削銜留任十年河決大王廟給事中周體觀林起龍等交章劾大猷耗帑誤工狀方輿爲剖辯得免議十三年總督李蔭祖疏劾大猷曰決河以殃民者河伯也治河以奠民者河道也今百姓不怨河伯而怨河道由大猷奇貪極狡腴削之術旣工錙銖之利必盡慾壑難填民膏已竭因臚列其科斂婪取數十款得旨鞫治詔革職下撫按逮訊得實計贓論絞越四年死於獄

### 陳名夏

陳名夏江南溧陽人明崇禎十六年進士官翰林修撰兼戶兵二科都給事中福王時以名夏曾降附流賊李自成定入從賊案本朝順治二年七月名夏抵大名投誠以保定巡撫王文奎疏薦復原官旋擢吏部左侍郎兼翰林院侍讀學士時大兵定江南九卿科道議南京設官因革裁併事不決名夏以國家定鼎神京居北制南不當如前朝稱都會宜去京之名存設官之實疏入稱旨三年丁父憂命在官任事私居持服並敕部議贈卹復陳情請終制賜銀五百兩暫假歸葬仍給

俸贍在京家屬明年還朝五年初設六部尙書各一卽授名夏吏部尙書定例各  
省道府州縣等官陞遷俱俟三年考滿名夏以地方需人必待考滿勢難懸缺奏  
改歷俸三年撫按薦舉酌量推補尋加太子太保八年授弘文院大學士晉少保  
兼太子太保九年以黨附吏部尙書公譚泰議罪解院任給俸如故發正黃旗下  
與閒散人隨朝初睿親王多爾袞專擅威福尙書公譚泰剛愎攬權名夏旣掌銓  
衡徇私植黨揣摩執政意指越格濫用匪人以迎合固寵及多爾袞事敗御史張  
煊劾奏名夏結黨行私銓選不公諸劣蹟下諸王部臣鞠議會上方巡狩譚泰獨  
袒名夏定議諸款皆赦前事且多不實煊坐誣論死至是譚泰以罪伏誅命親王  
大臣復按張煊所劾名夏罪狀名夏厲聲強辨及詰問詞窮涕淚交頤自訴投誠  
有功冀貸死諭曰此輾轉矯詐之小人也罪實難逭但朕有前旨凡譚泰干連概  
赦免若復執名夏而罪之是不信前旨也因宥之且諭令潔己奉公勿以貪黷相  
尙冀其自新以副倚任十年復補祕書院大學士時吏部尙書員缺左侍郎孫承  
澤請令名夏兼攝上以侍郎推舉大學士有乖大體責令回奏復諭名夏曰爾可  
無疑懼越翼日仍命署吏部尙書上嘗幸內院閱會典及經史奏疏必與諸臣講

求治理兼訓諸臣以滿漢一體六部大臣不宜互結黨與誠諭名夏益諄切焉會  
有旨令集議刑部論任珍家居怨望指奸謀陷諸罪應死狀名夏及大學士陳之  
遴尙書金之俊等二十八人與刑部九卿科道等兩議得旨責問名夏更巧飾欺  
蒙論死復詔從寬典改削官銜二級罰俸一年仍供原職十一年大學士寧完我  
列款劾奏名夏日名夏屢蒙皇上赦宥擢用宜洗心易行效忠於我朝不意其蠱  
惑紳士包藏禍心以倡亂嘗謂臣曰要天下太平只依我兩事臣問何事名夏推  
帽摩其首云留髮復衣冠天下卽太平臣思爲治之要惟在法度嚴明則民心悅  
服名夏必欲寬衣博帶其情叵測臣與逐事辯論不止千萬言灼見隱微名夏禮  
臣雖恭而惡臣甚深此同官所共見共聞者也今將結黨奸宄事蹟言之名夏子  
掖臣居鄉暴惡士民怨恨欲移居避之江寧有入官園宅在城各官集貲三千兩  
代爲納價遂家焉掖臣橫行城中說人情納賄賂各官敢怒而不敢言人人懼其  
威勢名夏明知故縱科道官豈無一人聞之不以一疏入告其黨衆可見矣名夏  
署吏部尙書時因趙延先係其契交驟加陞擢科臣郭一鶚疏言吏部陞官遲速  
不一指延先爲證多開資俸兩月名夏欲罪之劉正宗不平事乃已臣思趙延先



不當陞而陞名夏反欲罪言官其攬權可見矣浙江道員史儒綱係名夏姻親爲浙撫蕭起元所劾革職提問名夏許其復官屢囑起元起元難之遲延三四年不結臣聞之已久一日見名夏票蕭起元疏苛加指駁批從重議處額色黑圖海以爲非人臣言此疏祇宜批該部議奏名夏乃允其欲爲史儒綱報復可見矣翰林張天植告假回南名夏助路費銀百兩天植於其家還銀名夏不知曾言天植得罪於我所以外轉後知銀已還見天植又曰還爾翰林可也臣思甄別翰林出自聖裁而名夏直任去留由己欺詐實甚乃昨見馮銓等薦舉十二人疏內列有天植則名夏之營私巧計更莫測矣名夏與山西牛射斗結姻吏科魏象樞係其姻戚象樞劾司官錢受祺擅委事將巡捕誤作中軍後自檢舉下部核議象樞應降級調用名夏輒票罰俸六個月其護黨市恩顯然矣臣等職掌票擬一字輕重關係公私臣慮字有錯誤公立一簿注姓以防推諉行之已久一日名夏不俟臣等到齊自將公簿注姓塗抹一百一十四字爲同官所阻方止竊思公簿何得私抹不知作弊又在何件本年二月上命內大臣傳出科道官結黨論旨臣書稿底交付內值及票紅發下名夏抹去擠異排孤一語改去明季埋沒局中因而受禍今

方馳觀域外豈容成奸四句作兩句泛語其糾黨奸宄之情形恐皇上看破故欲以隻手障天也請敕下大臣確審具奏法斷施行則奸黨除而治安可致矣遂下廷臣會勘名夏辯諸款皆虛惟留髮復衣冠所言屬實完我復與大學士劉正宗共證名夏攬權市恩欺罔罪讞成論斬上以名夏久任近密改處絞子掖臣逮治杖戍

### 高爾儼

高爾儼直隸靜海人明崇禎十二年進士授編修福王時以爾儼曾降附流賊李自成定入從賊案本朝順治二年四月以庶子李若琳薦授祕書院侍講學士七月遷禮部右侍郎五年調吏部右侍郎六年詔加右都御史銜八年三月轉吏部左侍郎八月擢補本部尙書加太子太保九年侍宴中和殿賜貂鑲朝衣一襲十年正月御史吳達劾爾儼任匪人濫竽漫無銓別且以部事批決於家不宜任冢宰下部察奏以所劾無據免議二月引疾乞休上允之尋諭吏部曰爾儼存心醇謹行事和平近告病謝事其病朕已悉知內院事務殷繁高爾儼仍以太子太保補弘文院大學士其力疾入院辦事毋以疾辭十一年以病解任尋死諭曰大學

士高爾儼和平清謹歷任著勞雖謝事養病恆望痊可以竟謨猷忽聞溘逝朕深  
憫惻應給恩卹著從優察例具奏十二年特贈少保賜祭葬諡文端廕一子爲中  
書舍人

張忻子瑞

張忻山東掖縣人明天啟五年進士初任河南夏邑知縣行取授吏部主事累遷  
太常寺卿崇禎時官刑部尙書給事中姜埰先以言事下獄會歲疫出諸囚埰亦  
出卽謁謝賓客莊烈帝聞之以誥忻忻懼復繫之獄流賊李自成陷京師忻從賊  
至本朝順治二年四月以天津總督駱養性薦授兵部左侍郎兼右副都御史巡  
撫天津閏六月疏言津門防海護漕宜充實營伍糧餉無缺今計兵餉欠支半年  
請敕部給發三年十月疏言滄州當衝要凡奉差船動索繹夫百餘復需馬趕夫  
名爲繹馬係明季相沿陋習借名色以便折價豈有步行人夫用馬追趕者貽累  
地方莫此爲甚應革十二月又言靜海興濟二縣衝疲已極更疊遇災禳地土荒  
蕪仍徵糧賦民力難支請恩旨蠲免疏入俱議行四年靜海唐官屯土寇作亂戕  
副將周天命等忻坐飭防不密喪師掩飾降二級調用尋以病致仕十五年死子



端崇禎十六年進士改庶吉士亦從賊本朝順治二年山東巡撫方大猷薦其才召至京同明庶吉士成克鞏高珩考試大學士馮銓等擬端列中等例授科道部屬因編纂乏人奏授宏文院檢討充明史纂修官三年充江南鄉試正考官五年遷祕書院侍講學士六年正月轉國史院侍讀學士九月遷學士九年正月恭修太宗文皇帝實錄充副總裁五月遷禮部左侍郎十年擢國史院大學士十一年死贈太子太保賜祭葬諡文安廕一子中書舍人

### 白廣恩

白廣恩陝西人明崇禎初流賊四起廣恩從盜魁混天猴攻陷宜君鄜州襲靖邊爲副將張應昌所敗中矢遁嗣總督洪承疇破賊於平涼廣恩降授都司隨總兵曹文詔敗賊金嶺川積功至薊州總兵我太宗文皇帝征明錦州承疇合諸鎮兵來援以廣恩代左光先爲援剿總兵與總兵曹變蛟馬科王樸吳三桂唐通王廷臣楊國柱等合兵十三萬援松山國柱戰死俄聞我太宗文皇帝親臨督陣諸將大懼出戰連敗餉道絕樸先遁廣恩等相繼走遇我軍邀擊大敗松山破承疇就擒并擒廣恩子良弼留養之明法司論諸逃將罪廣恩貶秩尋代馬科鎮山海關

良弼遺之書不報是年冬我軍由黃崖口入薊州廣恩自馬蘭峪同總兵白騰蛟來援而敗以兵入衛京師莊烈帝喜賚銀帛羊酒俄戰龍山口稍有斬獲以捷聞莊烈帝始惡廣恩觀望降旨切責而冀其後效特命敘功明年我軍由山東北旋廣恩合唐通等八鎮兵邀拒於密雲之螺山悉潰敗總督趙光祈請召廣恩入爲武經略廣恩抗不赴召大學士吳甡將督師征流賊請佯逮廣恩治罪而已力救因率以討賊莊烈帝從之廣恩感甡甚受約束無何莊烈帝遣中官齎金二萬犒其軍且諭以溫旨廣恩遂驕不爲甡用大掠臨清關徑歸陝西莊烈帝不得已命總督孫傳庭辦賊廣恩桀驁不可使傳庭惜其驍勇用以統火車營後傳庭自汝州暨賊於寶豐李自成來援廣恩與總兵高傑夾擊敗賊轉戰至郊縣軍飢因還軍迎糧自成帥精騎還戰傳庭問計於諸將高傑請戰廣恩不可傳庭以爲怯廣恩不懌及戰賊陣五重官軍破其三賊驍騎殊死鬪廣恩軍將火車者呼曰師敗矣脫輓輅而奔衆軍大潰高傑陷伏中廣恩走汝州不救傳庭渡河入潼關加廣恩邊寇將軍俾緣邊收潰卒保潼關賊隨至攻關廣恩力戰敗傑以前怨亦擁衆不救關遂破傳庭戰歿廣恩西奔固原賊追擊之卽開門降自成大喜握手共飲

僞封桃源伯本朝順治二年英親王阿濟格剿賊陝西廣恩具疏投誠自陳罪狀得旨白廣恩自矢奮勇殺賊具見苦心不必自陳前罪尋入京隸漢軍鑲黃旗五年八月追敘投誠功授騎都尉世職未幾死以其兄子良柱襲

### 南一魁

南一魁陝西膚施人明副將崇禎末流賊李自成陷陝西一魁降賊僞授參將尋棄之投鄂爾多斯部本朝順治二年英親王阿濟格逐自成至山西一魁來降王令前驅西渡河同明降將康鎮邦招撫延綏東路自黃甫川至安定邊十七堡俱效順殺僞官劉九德隨大軍收西安以功授寧夏總兵時賊黨盤踞香山奸回聚河東一魁招散之并撫定兩河八路城堡陝西平敕來京另用隸漢軍鑲紅旗四年流賊張獻忠餘黨孫可望踞四川平西王吳三桂都統李國翰由陝西進剿一魁統右路總兵加都督同知五年七月平河州叛回總督孟喬芳令協剿文縣賊趙榮貴復其城八月敘功授三等輕車都尉六年十月賊首劉登樓任一貴謝汝德等陷延綏營堡三桂檄一魁往剿次武威遣參將王國英等敗之楊方坪斬僞將王虎復鎮靖堡一貴奔定邊同汝德拒守進圍之賊將齊進才殺汝德降擒僞



官戴治民等花馬池賊黨周四聞風遁連復榆林東西路十八營堡一貴走鐵角城斬之登樓亦爲總兵劉芳名所誅一魁進剿四川九年四月三桂檄同總兵馬化豹復敘州府時兵馬不習水土多死亡一魁憂成疾八月可望率水陸數萬陷敘州府執一魁送貴州十年三月可望犯寶慶府我兵敗之岔路口一魁率把總袁功等兵四十由新化奔回常德總督祖澤遠奏報得旨南一魁抱病遇難自拔還歸情殊可念俟平西王疏到爾部再行覆奏閏六月大學士洪承疇經略湖廣廣東廣西雲南貴州五省以一魁善戰知賊情請爲部將上命一魁以左都督赴軍前補給世襲敕書賜銀千兩及甲冑馬械尋以所蓄慣戰家丁散在陝西各堡寨調聚軍前可成一旅請親赴陝招訪整頓允之十一年集兵千二百馬贏千餘同弟參將一才等抵長沙充經略前標總兵十二年三月明桂王由榔將李定國自新會敗走南寧詔命靖南王耿繼茂合湖南廣西兵進攻承疇遣一魁同左路總兵張國柱協剿十三年定國奔安隆明桂王往依之遂奔雲南承疇留國柱鎮廣西以一魁隨征貴州平之十二月隨大兵入雲南桂王奔緬甸一魁回駐衡州十六年九月加太子少保十八年四月兵部以一魁原隨經略取雲南今雲貴已

平衡州係腹裏既有城守副將總兵官應裁得旨允行一魁回京候補十二月候詔以原職隨旗上朝康熙五年一魁以曾蒙世祖章皇帝特授總兵內大臣公鼇拜大學士范文程皆知之至今未授呈請兵部代題遂私到鼇拜家及傳旨問鼇拜文程皆云不知部議以一魁身爲大臣所陳詐妄又擅往輔政大臣家應革去職銜及世職佐領送刑部得旨南一魁著削去佐領罰俸一年十一年五月以年老免上朝十三年八月死賜祭葬如例子鵬襲職

### 張縉彥

張縉彥河南新鄉人明崇禎四年進士歷清澗三原知縣十年行取入京候考選逾年未得命莊烈帝聞諸臣營競及濫徇狀責問吏部尙書田維嘉維嘉請先推部曹二十二縉彥預焉遷戶部主事十一年給事中吳麟徵等劾維嘉贓私乃召候考諸人及已推部員集中和門試策親定十人爲翰林縉彥改授編修先是縉彥任主事時以前官陝西悉賊勢疏言賊長技在分窮技在合請分設兩軍一追一駐則官兵不受牽制而賊可盡滅至是給事中沈迅薦其知兵改兵科都給事中縉彥疑尙書楊嗣昌嗾迅使之去翰林上疏劾嗣昌十六年兵部尙書馮元飈



見賊勢張稱病去薦李邦華史可法自代莊烈帝不從超擢縉彥爲兵部尙書十七年二月流賊李自成逼畿輔副都御史施邦曜語縉彥急厲士卒固守檄天下勤王兵入援縉彥不爲意莊烈帝召廷臣問兵餉皆不能對因憤惋斥縉彥負國無狀縉彥頓首乞罷三月李自成陷京師縉彥與大學士魏藻德率百官表賀素服坐殿前羣賊爭戲侮之太監王德化叱其誤國四月我朝兵入山海關李自成敗走縉彥竄歸鄉里聞福王朱由崧據江寧馳疏自言集義勇擒僞官收復列城卽授原官予總督河北山西河南軍務印聽便宜行事時方治從賊案刑部尙書解學龍旣分六等擬罪以縉彥已奉錄用別列其名上大學士馬士英方秉政凡大僚降賊賄入輒不問御史沈宸荃疏劾縉彥由部曹拔置詞垣不數年擢典中樞乃率先從賊宜卽加極刑不當屈法錄用給事中李維樾亦糾之曰縉彥闇習失機寸斬莫贖逆賊入宮青衣候點及賊西走乃鼠竄狼奔伏草求活逃散餘魂安能收復河北總督重任奈何遽畀賊臣疏入皆不報縉彥旣受命士英復用其姻婭越其傑爲河南巡撫貪冒不知兵諸弁兵結寨自守莫爲用縉彥奏令總兵許定國王之綱劉洪起等畫疆分守然亦不能馭也本朝順治元年九月都統葉



臣等征山西師過河北縉彥詣軍門納款巡撫羅縉錦趣其赴京縉彥佯稱足疾俟疾愈卽由長垣入朝旋由陳橋渡河而南縉錦聞其已受明福王三省總督之職籍其所留新鄉家產以聞及豫親王多鐸統師定河南江南縉彥乃遁匿六安州商麻山中三年二月招撫江南大學士洪承疇檄總兵黃鼎入山招之縉彥赴江寧納款齎繳總督印及解散各寨士民册承疇疏薦之五月縉彥赴京師議以投誠在江南大定後不用九年河南巡撫吳景道巡按王亮教交章薦下吏部考核酌用給事中魏裔介疏言縉彥在明朝身任中樞一籌莫展有盧杞買似道之奸而庸劣過之當流賊李自成逼北京匿不以報於賊爲功首於明爲罪魁故都城破日爲司禮內監王德化發憤毆擊衆所共覩其喪心無恥雖閹宦羞與爲類幸逢恩赦得飲啄於光天化日之下已爲厚幸若授以帷幄之寄廁諸顧問之班彼既不忠於昔日豈能效用於我朝乞敕部擯棄以協輿論勿使魑魅魍魎白日公行疏入其鄉人給事中蘇文樞奏縉彥屢經薦舉不當追論前朝舊事疏並下吏部議以右布政使用十年二月授山東右布政使甫任事以緝獲私鑄報部戶部尙書陳之遴暨大學士管吏部事陳名夏等奏予從優議敘爲御史王秉乾所

劾上以名夏之遴植黨徇私諭責之十一年遷浙江左布政使十五年擢工部右侍郎十七年二月上甄別三品以上大臣諭曰張縉彥自擢任侍郎不能實心任事且耽情詩酒好結納交游沽名取悅殊失人臣靖共之義著降四級調外用尋補江南徽寧道是年六月左都御史魏裔介劾大學士劉正宗罪惡言縉彥與爲莫逆友序其詩稱以將明之才詞詭譎而心叵測均革職逮訊御史蕭震復疏劾縉彥曰明之亡也始於士大夫之朋黨終於奸臣之賣國縉彥仕明爲尙書在籍時卽交通闖賊及闖賊至京開門納款猶曰事在前朝已邀上恩赦宥乃自歸誠後仍不知洗心滌慮官浙江時編刊無聲戲二集自稱不死英雄有弔死在朝房爲隔壁人救活云云冀以假死塗飾其獻城之罪又以不死神奇其未死之身臣未聞有身爲大臣擁戴逆賊盜鬻宗社之英雄且當日抗賊殉難者有人闔門俱死者有人豈以未有隔壁人救活遜彼英雄雖病狂喪心亦不敢出此等語縉彥乃筆之於書欲使亂臣賊子相慕效乎是其在明季則傾覆天下以利身家在本朝則煽惑人心爲害風俗假令已死尙當鞭戮其屍示戒將來豈容生存漏網請敕明正典刑以肅綱常於萬世疏並下王大臣察議以縉彥詭詞惑衆及質訊時



又巧辯欺飾擬斬決上貫縉彥死褫其職追奪誥命籍沒家產流徙寧古塔尋死  
孫可望

孫可望陝西延長人流賊張獻忠養子也獻忠據四川以可望爲僞平東將軍本  
朝順治三年肅親王豪格奉敕統兵征四川獻忠敗死可望與其黨李定國劉文  
秀艾能奇白文選等率殘衆竄入川南襲重慶殺明守將會英等陷綦江及遵義  
復由遵義入踞貴陽值阿迷土司沙定洲作亂雲南明黔國公沐天波奔永昌可  
望聞之率衆趨滇與沙定洲戰於蛇花口定洲敗遁阿迷可望留定國文秀於雲  
南而自引兵還貴陽會艾能奇死遂并其部衆僭稱平東王以干支紀年鑄錢文  
曰興朝通寶定國在雲南迎天波任職如故與交善聞明桂王據廣東遙附之蔑  
視可望不爲下可望誘定國杖之演武廠以威衆定國益忿尋以兵剿擒沙定洲  
兵力日強可望不能制乃通使降附由榔乞封爲秦王時由榔據廣西我平南王  
尙可喜定廣東定南王孔有德定湖南將來攻廣西由榔欲藉可望爲援許而結  
之於是可望與定國合謀抗拒大兵俄而大兵攻桂林由榔走南寧趣可望出靖  
州定國出武岡以圖桂林文秀出敘州文選出重慶以圖成都可望乃由平溪掠



朝陽堡陷靖州定國由武岡趨全州犯桂林有德督戰失利城陷死之可望同定國縱掠湖南郡邑上命敬謹親王尼堪爲定遠大將軍偕貝勒屯齊進討援衡州定國不戰反走敬謹親王率輕騎躡其後遇伏歿於陣屯齊代之屢挫其鋒定國走廣西可望還貴州遣文選自銅仁窺辰州以書招我總兵徐勇勇執而誅之迎戰荔溪文選數敗卻可望益驅衆助之遂陷辰州勇督兵巷戰手刃賊數十人中創墮馬遂遇害定南將軍阿爾津援辰州文選遁定國復率衆四萬由廣西犯湖南大兵敗之於永州定國由龍虎關逸去掠廣東連陷郡邑可望亦率衆四萬出武岡大兵自永州還寶慶遇之於岔路口分兵逆擊斬馘無算獲其輜重可望遁歸遣文秀以衆六萬乘巨艦千餘來犯常德別遣其將馮雙禮盧明臣犯武昌我寧南靖寇大將軍陳泰遣護軍統領蘇克薩哈伏兵邀擊明臣赴水死雙禮被創遁文秀走貴州時廣東大兵擊敗定國進薄南寧可望乘間遷由榔居安隆擅殺其從官數加折辱復議移之貴陽先是定國戰敗永州可望欲以罪殺之使人約赴沅州議事定國不至自此可望與定國遂絕可望自設內閣六部等官立太廟定朝儀改印文爲八疊盡易其舊由榔懼甚密使人封定國晉王文秀安南王及

可望欲移之貴陽由榔益懼陰使約定國以兵迎衛時文秀在雲南私迂由榔暨定國入居雲南由榔使人慰諭可望可望不受命引兵攻由榔留雙禮守貴州令文選統諸軍前行至三岔河與定國文秀夾水而陣文選陰附定國單騎奔其軍可望遣其將馬寶等由潯甸間道襲雲南而自率衆拒定國戰方合兵潰走貴州定國遣文秀文選及將軍楊武等窮追雙禮爲可望殿後截其子女玉帛降於文秀可望倉皇走湖南遣其將程萬里赴經略洪承疇軍前納款而楊武追至沙子嶺劫掠殆盡承疇遣兵馳援可望乃得脫攜妻子至長沙乞降承疇以聞時順治十四年十月也上以可望革心向化宥其既往授爵爲義王詔曰卿阻在南服十餘年未識朝廷寬仁大度今一旦翻然便爲識時俊傑朕深嘉予可望奏言臣當明季喪亡之際收士卒繕甲兵此心久嚮慕天朝欲以滇黔盡隸版圖今適滇黔內附臣得宣布天朝威德率所部歸誠而李定國白文選等尙假借名號橫逆如故請速張撻伐以遂生民去逆效順之忱上優詔答之遣大學士麻勒吉等齎敕印封可望十五年可望隨麻勒吉至京命簡親王濟度等郊迎翼日入覲宴於中和殿賚白銀萬兩其部下陳傑劉天瑞等百餘人俱授職有差可望奏言大兵征

滇正臣報效之日滇南形勢臣所熟悉或偕諸將進討或隨大臣招撫諸境庶少效奉國初心疏下王大臣議以大兵分三路趨雲南指日奏功無事可望再往寢其奏是年大兵直抵永昌由榔偕沐天波等竄緬甸定國文選分竄孟艮木邦十七年六月可望疏辭封爵上特諭曰王子身來歸孤蹤疑畏抗辭冊印理亦宜然但封爵出自朕裁卿其祇受十一月可望病死諡恪順子徵淇襲未幾卒弟徵灝請襲御史孟飛熊疏言可望爲張獻忠餘黨擁衆久踞滇黔負固不服擾亂邊陲及被舊黨李定國所敗衆散勢孤窮蹙乞降以後未嘗效力軍前前有重罪後無微勞濫膺非分之榮身死後復承襲二次亟宜停止或酌量以次降等予襲無俾世玷崇班疏下部議降爲慕義公以徵灝襲徵灝卒子宏相降襲一等輕車都尉乾隆三十六年奉旨孫可望子孫世職自後不必承襲

白文選

白文選陝西吳堡人明末從張獻忠爲盜本朝順治三年肅親王豪格征四川獻忠伏誅文選與其黨孫可望李定國劉文秀潰走川南尋並附於明桂王朱由榔七年文選攻遵義八年文秀自四川還雲南留文選守嘉定是年大兵南征文選



等敗走大兵入嘉定九年五月文選由遵義出重慶會於嘉定圖成都戰敗七月  
攻陷辰州我總兵徐勇戰歿十三年可望圖自立憚定國未敢發使文選促由榔  
移貴州文選雖爲可望用然心不直其所爲以情告由榔姑遲行以候定國定國  
至安隆文選歸之奉由榔走雲南由榔封文選鞏國公令還貴州慰諭可望可望  
銜其貳於定國也悉奪所部兵羈之軍中十四年九月可望舉兵叛由榔從部將  
馬惟忠言復用文選令統諸軍前行定國文秀率師禦之至三岔河與可望夾水  
而軍文選輕騎奔定國擊敗可望由榔封文選爲鞏昌王十六年大兵取雲南定  
國屢戰敗文選自霑益追及定國定國留之斷後至玉龍關大兵追擊文選戰敗  
由右甸遁走木邦由榔遁入緬甸十七年九月文選由木邦至錫箔所至縱掠進  
攻阿瓦索還由榔阿瓦有新舊二城新城緬甸所居文選急擊之城垂破爲緬人  
所紿退兵十里城中設備反爲所敗乃率兵赴孟良會李定國復赴阿瓦先是由  
榔至緬久居赭硜文選密遣人告由榔云不敢速進者恐有他變必得緬人送出  
爲上策由榔亦以書答之文選乃陰造浮橋迎由榔爲緬人所覺事不果十八年  
會兵阿瓦復遣人求出由榔緬人不許以象兵與定國戰文選引兵橫擊之緬人

大敗退保新城復議以舟師攻之遣人於上流造船爲緬人所焚遂與定國移兵洞烏未幾潰走錫箔定國亦引還十一月平西大將軍吳三桂定西將軍公愛星阿會師木邦定國先奔景線文選據錫箔憑江爲險大兵自木邦一晝夜行三百餘里臨江造筏將渡文選奔茶山總兵馬寧等率偏師追之及猛養文選降十二月軍臨緬城緬人懼執由榔獻軍前定國走死猛獵子嗣興降授都統銜滇南平詔封文選承恩公隸漢軍正白旗康熙元年十一月詔給三等公俸七年加太子少師十四年死賜祭葬如例

清史列傳 卷八十

逆臣傳

吳三桂

吳三桂遼東人父襄明崇禎初官錦州總兵三桂由武舉隨征陣累敘秩後襄坐失機下獄擢三桂總兵以守寧遠有功欲倚以禦流賊封平西伯竝起襄提督京營令薊遼總兵王永吉徙寧遠兵五十萬入衛三桂留精銳殿後甫至山海關聞流賊李自成陷京師入衛兵已潰不敢前自成脅襄以書招之乃進次灤州先是三桂嘗就嘉定伯周奎飲悅歌女陳沅以千金購之聞邊警遘行奎送沅於襄所至是爲賊將劉宗敏掠去三桂聞之作書絕父馳歸山海關遣副將楊珧游擊郭雲龍來我朝借師時順治元年四月睿親王多爾袞奉世祖章皇帝命統師至寧遠三桂上書曰流賊逆天犯闕僭稱尊號罪惡已極天下共憤三桂受國厚恩欲興師問罪奈力弗敵爰泣血求助乞王速整旅入關與三桂合兵直抵都城埽除虐炤昭示大義此千載一時也睿親王得書許卽進兵且曰伯誠率衆來歸當裂



土封王三桂聞自成執襄置軍中糾衆二十萬東益發使趣大兵距山海關十里三桂以賊分趨關外來告睿親王遣兵擊賊於一片石賊敗遁明日三桂率衆迎睿親王令三桂兵肩繫白布爲識遂統師入關自成營北山橫亙至海大兵對賊布陣三桂居右翼末悉出精銳搏戰時大風揚沙戰良久未決大兵呼聲再振風止從三桂陣右衝賊中堅騰躍合擊大破賊追奔四十里是日睿親王令關內軍民皆薙髮進三桂爵爲平西王分隸步騎兵二萬先驅討賊自成遂殺襄於永平返京師盡屠襄家屬載輜重遁三桂與英親王阿濟格等追至望都屢戰皆捷賊走山西乃班師世祖御皇極門授平西王敕印設宴賜銀萬兩尋以英親王爲靖遠大將軍三桂從由邊外趨綏德二年克延安鄜州剿自成於襄陽武昌東下九江召還京宴勞命赴鎮錦州三桂以所給田多饒薄請益復爲所屬將校何進忠楊坤郭雲龍吳國貴高得捷等百二十餘人請世職屬吏童達行陳全國許榮昌錢法裕等請優擢又以父襄母祖氏弟三輔俱爲自成戕乞贈卹並得旨俞允三年入覲賜銀二萬兩五年命移鎮漢中六年與都統李國翰敗賊於階州剿宜君同官滿城宜川安寨清澗定邊榆林府谷賊次第平八年八月入覲賜金敕金印

敕偕國翰征四川流賊張獻忠之滅也餘黨孫可望李定國白文選等遁川南因明桂王朱由榔稱帝於粵降附之並竊王號擁驍健擾川北九年三桂分兵復成都嘉定敘州重慶就食綿州駐師未幾可望糾猥獩衆五萬圍保寧巡按御史郝浴告急三桂移兵擊走之奉詔頒賚將士私以冠服與浴浴不受疏劾三桂擁兵觀望狀三桂摘疏中親冒矢石語劾浴欺罔冒功浴坐謫徙三桂敘功歲增俸千兩子應熊尙主爲和碩額駙授爵三等子尋加少保兼太子太保十四年定國隨由榔入雲南可望與定國有隙戰敗赴長沙大軍降敕三桂爲平西大將軍國翰爲定西將軍進征貴州十五年發漢中過保寧順慶至合州盡獲沿江戰艦定國等據石壺關諸險三桂令騎行山麓步陟巔以礮發其伏悉驚潰遂下遵義克開州國翰卒三桂還駐遵義時經略大學士洪承疇寧遠大將軍宗室洛託由湖南進貴陽征南將軍卓布泰由廣西進都勻安遠大將軍信郡王多尼統禁旅至三桂馳會於平越府之楊老堡議三路出師三桂自遵義赴天生橋聞文選據七星關遂繞出烏撒土司境進霑益州信郡王進曲靖府敗文選卓布泰進羅平州敗定國十六年正月合攻雲南城由榔奔永昌二月三桂同貝勒尙書卓布泰進征



南州破文選於玉龍關渡瀾滄江下永昌由榔先遁我兵渡潞江僉定國設伏磨盤山分八隊迎擊斬殺過半乘勝取騰越州追至南寧乃振旅由永昌大理姚安還由榔部將馬寶李如碧高起隆劉之復塔新策王會劉備馬惟興楊武楊威高應鳳狄三品等及景東蒙化麗江東川鎮雄諸土司先後歸順詔三桂鎮雲南信郡王與卓布泰等班師留都統伊爾德卓羅等分軍駐守並諭吏兵二部凡雲南省文武官舉黜及兵民一切事命三桂暫行總管俟數年後補授仍照舊例時由榔奔緬甸文選奔木邦定國欲迎還由榔緬人不許定國脅以兵緬人益固拒乃屯孟艮復謀入滇以由榔印笱誘元江土司那嵩內應那嵩遂與降將高應鳳倡叛十月三桂由石屏進圍其城掘壕困之逾月乃破斬應鳳那嵩自焚死以其地爲元江府十七年部臣奏計雲南省俸餉歲九百餘萬議撤滿洲兵還京裁綠旗兵五萬之二三桂謂邊疆未寧兵力難減宜如舊時三桂陰懷異志其藩下副都統楊珅說以先除由榔絕人觀望三桂乃疏請發兵入緬殄滅由榔其略曰前者密陳進兵緬甸事奉諭曰若勢有不可慎勿強又諭曰務詳審斟酌而行臣今籌畫再三竊謂渠魁不殄有三患二難李定國白文選等以擁戴爲名引潰衆肆擾



其患在門戶土司反覆惟利是趨一被煽惑遍地蜂起其患在肘腋投誠將士豈無繫念故主者邊關有警攜貳乘機其患在腠理且滇中米糧騰踊輸輓絡繹耕作荒而逃亡衆養兵難安民亦難惟及時進剿淨盡根株乃一勞永逸計疏下廷臣議行遣學士麻勒吉侍郎石圖赴滇密籌機宜奏至命內大臣公愛星阿爲定西將軍率禁旅同三桂進征三桂旣請頒敕印於南甸隴川千崖蓋達車里諸投誠土司示鼓勵復傳檄緬甸懸賞格令擒由榔獻緬人久苦定國攻擾請大兵擊走定國願獻由榔十八年正月三桂遣土官至緬示師期令於猛卯迎我師以副都統何進忠總兵沈應時馬寧等率師由騰越出過隴川宣撫司三月朔至猛卯緬人與定國戰道阻越二甸緬使乃至以緬人望大兵剿除定國告會瘴發進忠等撤兵入邊三桂奏俟霜降後瘴息再進四月遣總兵馬寶高起隆游擊趙良棟等剿馬乃土司龍吉兆進攻七十餘日破賊巢斬吉兆以其地爲普安縣九月三桂同愛星阿及前鋒統領白爾赫圖都統果爾欽遜塔等督兵次大理秣馬逾月出騰越取道南甸隴川猛卯別遣總兵馬寧王輔臣分兵二萬取道姚關鎮康孟定又慮蠻暮猛密二土司爲定國煽惑擋我後留總兵張國柱以兵三千屯南甸

十一月會師木邦文選毀錫箔江橋走茶山我兵行三百餘里瀕江結筏以濟三桂令馬寧等率偏師追文選而自與愛星阿趨緬時定國走景線緬甸屢得三桂檄恐由榔自戕密使人防守盡殺其從官十二月我兵次奮輓坡離緬城六十里緬使詣大軍請遣兵進蘭鳩江濱扞衛遂執由榔及其親屬獻軍前文選爲馬寧等追及於猛養率衆數千降三桂振旅還康熙元年奏捷聖祖仁皇帝賜敕嘉獎晉親王並命貴州省亦屬管轄愛星阿班師是年四月由榔死於雲南三桂以定國在景線恐其由車里入寇令提督張勇領兵萬餘分布普洱沅江防剿未幾定國死三桂遣人招撫遺衆定國子嗣興偕黨千餘人降二年遣總兵王會等剿隴納山蠻搗其巢擒斬賊渠三年遣總兵劉之復李世輝由大方烏蒙分剿水西土司安坤烏撒土司安重聖竝斬之以其地設府治改比喇爲平遠大方爲大定水西爲黔西烏撒爲威寧四年奏裁雲南省綠旗兵五千有奇五年剿土司祿昌賢於隴箐取寨數十池東土賊俱平設開化府永定州六年三桂疏辭總管任初三桂逐由榔入緬經略洪承疇以巖疆難靖援明黔國公沐英世鎮例請移藩久鎮三桂遂奉詔鎮滇其藩屬五丁出一甲甲二百設一佐領積數十佐領轄以左右



都統設前後左右援剿四鎮總兵副將皆自擇分降兵萬有二千爲十營以馬寶等十人爲總兵凡文武職官竝擅除擢復請敕雲南督撫受節制移駐提督於大理總督於貴陽踞由榔所居五華山故宮爲藩府增華崇麗藉沐天波莊田爲藩莊假濬渠築城爲名廣徵關市權稅鹽井金礦銅山之利厚自封殖御史楊素蘊嘗劾其專擅三桂摘疏中防微杜漸語請旨詰問素蘊以防微杜漸古今通義覆奏事遂寢至是三桂因目疾辭總管任下部議如各省例歸總督提督巡撫管理雲貴總督卞三元雲貴提督張國柱貴州提督李本深交章侈三桂勞績謂苗蠻叵測非任三桂恐邊釁日滋請敕仍總管得旨王以精力日減奏辭故允所請若令復理事務恐其過勞如邊疆遇有軍機王自應經理尋晉應熊爲少傅兼太子太傅命赴滇視疾卽還京三桂益欲攬事權構釁苗蠻藉端用兵不休私割舊隸麗江府之中甸與番衆屯牧通商互市迨卞三元歸養甘文焜爲總督三桂惡其不附已詐稱邊寇檄赴剿比至復稱寇遁檄還藩屬將弁糜俸餉百餘萬近省輸輓不給徵諸江南歲二千餘萬偶紕則連章入告旣羸不復請稽核當是時平南王尙可喜靖南王耿精忠與三桂分鎮邊疆專兵柄稱屏藩天下賦半爲所耗而



三桂驕恣尤甚會可喜引疾以子之信代理軍事願移藩遼東詔從所請十二年七月三桂亦詭疏請移藩且言所部繁斥昔自漢中入滇漸次分移閱三歲始竣今生齒彌增乞賜土地較世祖時所給錦州寧遠諸區倍廣俾安輯得所疏入下戶兵二部議時廷臣有言三桂鎮服苗蠻不可移者戶部尙書米思翰兵部尙書明珠等以苗蠻旣平三桂不宜仍鎮雲南議應如所請徙藩山海關上命議政王貝勒大臣會核復有言雲南撤藩必多撥禁旅駐守紛擾民驛且致京城兵力減宜仍令三桂留鎮與米思翰明珠等異議奏入上念藩鎮久握重兵恐滋蔓生變非治安長計特允三桂撤歸錦州遣侍郎哲爾肯學士傳達禮齋詔諭三桂曰王鎮守巖疆厥功懋焉但年齒高久駐遐荒朕眷懷良切故允王所請王其率屬北來永保無疆之休已命所司飭庀周詳王至卽有寧宇無以爲念九月哲爾肯傳達禮至滇三桂期以十一月二十四日行陰與左都統吳應麟右都統吳國貴副都統高得捷壻夏國相胡國柱謀亂部署腹心扼關隘入者聽出者有禁先三日邀巡撫朱國治脅之叛弗從榜殺之集四鎮十營總兵馬寶高起隆劉之復張足法王會王屏藩等聽調遣自稱天下都招討兵馬大元帥蓄髮易衣冠哲爾肯傳

達禮被留按察使李興元知府高顯辰同知劉崑抗賊不屈具楚毒置之瘴地顯辰仰藥死提督張國柱永北總兵杜輝鶴慶總兵柯鐸布政使崔之瑛提學道國昌等竝從逆受僞職三桂遂致逆書於平南靖南二藩及黔蜀楚秦官吏舊相識者要約黨附發兵反幟色白步騎皆以白氈爲帽馬寶先驅至貴陽提督李本深應之總督甘文焜聞變馳書荊州告川湖總督蔡毓榮復趣經理移藩之郎中黨務禮員外郎薩穆哈主事辛珠筆帖式薩爾圖詣闕告變自率數騎趨鎮遠辛珠薩爾圖爲賊追殺鎮遠副將江義得逆書以兵圍文焜文焜自刎於吉祥寺貴州巡撫曹申吉黔西總兵王永清沅州總兵崔世祿降賊賊進陷沅州辰州十二月黨務禮薩穆哈馳至京奏聞上召議政王大臣諭曰吳三桂已反荊州乃咽喉要地關係最重遣前鋒統領碩岱率每佐領前鋒各一疾馳赴荊州守禦以遏賊勢命都統尼雅韓赫業朱滿副都統席布根特穆占等率師分馳武昌西安漢中安慶兗州諸要地供調遣諭吏兵二部曰吳三桂藩下人在直隸各省出仕者雖有父子兄弟在雲南概不株連治罪各宜安心守職無懷疑慮其通行曉諭之議政王大臣等以應熊及其從官不可宥請逮治得旨暫行拘禁事平分別請旨尋命



順承郡王勒爾錦爲寧南靖寇大將軍統師之荊州詔削三桂爵宣詔中外曰逆賊吳三桂當明季闖賊入京時窮蹙來歸我世祖章皇帝念其輸款投誠授之軍旅錫封王爵開闢滇南迨及朕躬特晉親王重託心膂本年七月自請移歸故土朕憫其久在邊疆年已衰邁欲令其父子祖孫得以完聚遂允其請爲之區畫居處資給行糧又特遣大臣往滇宣諭朕懷可謂禮隆情至蔑以加矣詎意吳三桂性類窮奇中懷狙詐寵極生驕徑行反叛背參養之恩逞鴟張之勢橫行兇逆塗炭生靈理法難容神人共憤今削其爵遣將統禁旅撲滅刻期蕩平但念陷賊官員兵民或心存忠義不能自拔大兵一至玉石莫分朕心甚爲不忍爰頒敕通行曉諭各宜安分自保無聽脅誘卽或誤從賊黨但能悔罪歸誠悉赦已往不復究治其有能擒斬吳三桂投獻軍前者卽以其爵爵之有能誅縛賊渠及以兵馬城池歸命自效者論功從優敘錄朕不食言十三年正月三桂僭稱周王元年遣僞總兵楊寶蔭陷常德僞將軍夏國相陷澧州張國柱陷衡州吳應麟陷岳州長沙副將黃正卿參將陳武衛以城獻賊襄陽總兵楊來嘉副將洪福叛據穀城鄖陽山寨並爲三桂僞將軍三桂自雲南至常德具疏付哲爾肯傳達禮還奏上諭部



臣曰覽吳三桂奏章乖戾詞語妄行乞請諸王大臣咸以吳三桂怙惡不悛其子孫卽宜凌遲處死義難寬緩朕思亂臣賊子孽由自作刑章具在衆論僉同朕亦不得曲貸之也但以吳應熊久在近侍朕心不忍著將吳應熊及其子吳世霖處絞其餘幼子俱免死入官六月命貝勒尙善爲安遠靖寇大將軍與順承郡王分兵進討尙善移書三桂曰王以亡國餘生乞師殄寇蒙恩眷顧列爵分藩迄今三十年富貴寵榮之盛近代人臣罕比而末路晚節頓效童昏自取顛覆僕竊爲王不解也何者王藉言興復明室則曩者大兵入關奚不聞王請立明裔且天下大定猶爲我計除後患翦滅明宗安在其爲故主效忠哉將爲子孫謀創大業則公主額駙曾偕至滇其時何不遽萌反側至遣子入侍乃復背叛以陷子於刑戮可謂慈乎王之投誠也祖考皆膺封錫今則墳塋毀棄骸骨委於道路可謂孝乎爲人臣僕迭事兩國而未嘗全忠於一主可謂義乎不忠不孝不義不慈之罪躬自蹈之而欲逞志角力收服人心猶厝薪於火而云安結巢於幕而云固也何乃至是殆由所屬將弁煽激生變耳如卽輸誠悔罪聖朝寬大應許自新毋蹈公孫述彭寵故轍赤族湛身爲世大慘三桂得書不報是時雲南貴州湖南爲三桂所據

通番市以茶易馬結裸羅助戰伐山木造層樓巨艦散滇鑄錢爲文曰利用自詡蓄積素盈兼綜庫金倉粟輝耀富饒以餌黨羽勢日猖獗大兵固守荊州武昌襄陽宜昌諸郡禦擊僞將軍劉之復陶繼智王會等未及渡江進剿逆書所至煽動福建則耿精忠廣西則將軍孫延齡提督馬雄四川則提督鄭蛟麟總兵吳之茂譚洪陝西則提督王輔臣竝附三桂據地叛輔臣以三桂逆書誘甘肅提督張勇勇斬其使三桂遣人與達賴喇嘛通好達賴喇嘛爲上書乞赦罪上弗許分遣康親王傑書等率師討之諭趣貝勒尙善進征岳州三桂使僞將軍吳應麟廖進忠馬寶張國柱柯鐸高起隆等抗大兵又分道窺江西一由大江達南康境陷都昌一由長沙入袁州境陷萍鄉安福上命安親王岳樂爲定遠平寇大將軍統師至江西復以簡親王喇布爲揚威大將軍統師鎮江南十四年正月諭岳樂曰湖南一隅四方羣寇所觀望必速滅吳三桂底定湖南則各地小醜聞風自散今荊州兵未能渡江而岳州兵又難驟進宜由袁州直取長沙一以斷賊饒道一以分賊兵勢一以扼廣西咽喉一以固江西門戶烏合之衆自當瓦解荊州大兵即可乘機直追况寧羌告變川賊必通楊洪二賊窺我鄖襄擾我南鄧侵我荆



州後路揆其大勢進兵斷不容緩且延至夏月霖雨連綿大兵坐守日久不但戰馬多斃糧餉亦恐不繼是進兵湖南不待再決計矣王於江西要地宜速行整理稍有就緒卽進取湖南勿誤機會是時安親王遣兵復都昌上高新昌安福賊堅守萍鄉於醴陵築木城以捍長沙於岳州城外掘壕三重環竹木爲坑穿於洞庭湖峽口攢立枿椿阻舟艦凡列營陸地悉設鹿角挨排以阻騎兵三桂自常德至松滋布賊船於虎渡上游截荆岳大兵使不相應陽言將攻荊州決隄灌城潛分岳州賊衆踞宜昌東北之鎮荆山糾王會楊來嘉洪福掠穀城鄖陽均州南漳順承郡王令貝勒察尼都統宜理布等擊敗之賊勢稍沮十五年三桂糾僞將軍七人犯廣東以從逆大理府知府馮甦爲僞廣東巡撫授尙之信僞招討大將軍時可喜病篤之信遂降三桂簡親王奉詔移師南昌安親王剿萍鄉走夏國相下醴陵瀏陽進攻長沙三桂遣僞將胡國柱益兵守長沙馬寶高起隆由岳州赴援別遣僞將軍韓大任高得捷等陷吉安踞之拒大兵於螺子山分犯新淦屯泰和復陷醴陵窺萍鄉斷安親王軍後三桂自松滋移屯嶽麓山是歲撫遠大將軍圖海征陝西招降王輔臣僞將軍吳之茂屢爲靖逆將軍張勇所敗遁還四川康親王



征福建招降耿精忠尙之信馮甦並通款於簡親王延齡之妻四貞定南王孔有德女也與延齡謀歸順三桂使從孫世琮襲桂林誘延齡殺之肆掠柳州橫州平樂南寧十六年貝勒尙善分營馬三千佐安親王軍三桂邀奪於七里臺時簡親王攻吉安既久三桂頻遣賊赴援相持弗能下上命征南將軍穆占由岳州進與安親王夾攻長沙賊不能復顧吉安悉潛遁吉安賊困蹙韓大任等棄城宵竄三桂自嶽麓徙衡州驅賊衆分犯江西南安廣東韶州竝助世琮掠廣西十七年安親王復平江湘陰僞將軍林興珠降穆占攻永興拔之茶陵攸縣鄱縣安仁興寧郴州宜章臨武藍山嘉禾桂陽桂東十二城俱復簡親王與江西總督董衛國進剿韓大任於寧都大任由萬安走福建降簡親王移駐茶陵三桂糾衆犯永興都統宜理布護軍統領哈堯山戰歿賊踞河外營又犯郴州前鋒統領碩岱等戰失利還永興是歲三桂年六十有七僭稱帝僞號昭武既行慶賀禮有犬登其案而坐三桂惡其不祥遂病噎八月病劇口噤取其孫世璠於雲南未至三桂死閉城四日調賊圍永興者入城賊黨擁立世璠於貴陽改僞號曰洪化任僞大學士方光琛僞國公郭壯圖爲腹心時貝勒尙善屢敗賊洞庭湖薄岳州城尙善疾卒命

貝勒察尼代爲大將軍調諸路水師協剿斷賊糧道諭諸路將軍以三桂旣死賊黨必潰宜進兵速剿復命內外臣工曾隸三桂屬下者齎敕招撫陷賊官民諭曰自逆賊煽亂所在官民多被誘惑陷身賊中莫能自拔朕已洞悉情形屢頒敕諭廣示招徠開其自新之路今逆首已伏天誅念在彼脅從文武官員兵民皆朕赤子素受國家恩養非必甘心從賊或志存忠義遲徊待時或勢被迫驅無由歸化朕甚憫焉爾等往布德音相機勸諭令翻然悔悟爭先來歸有密謀內應擒斬賊渠及率領兵民獻城納款者俱赦其罪論功敘錄爾等殫心籌畫以副朕意十一月僞總統吳應麟糾僞將軍江義巴義元杜輝駕巨艦二百餘乘風犯柳林皆貝勒察尼合水師棹輕舟飛越賊艦發礮擊之毀過半賊溺死無算應麟復糾衆五千犯陸石口爲討逆將軍鄂訥前鋒統領杭奇擊走杜輝有子在軍通使謀歸順事泄應麟殺輝十八年賊黨日構隙貲且匱饑運不繼岳州賊乏食僞總兵陳華李超王度冲等率人衆舟艦降應麟收殘卒挾輜重走長沙賊衆震恐亦棄城遁華容安鄉湘潭衡山各歸順順承郡王自荊州渡江賊之在虎渡上游鎮荆山者皆潰走僞將軍洪福分剿松滋松江宜都石門慈利澧州進取常德賊縱火焚廬



舍舟艦遁僞巡撫李益陽僞按察陳寶鏞僞總兵黃志功降簡親王克衡州入城駐守降僞官百餘取祁陽耒陽及寶慶府時吳國貴踞武岡吳應麟踞辰州胡國柱踞辰龍關將軍穆占復永明江華東安道州永州僞將軍柯鐸降安親王自衡州克新寧復武岡國貴以二萬衆據楓木嶺迎戰大敗中礮死世琮亦敗於廣西負重傷竄死僞將軍郭義偕僞官數十人降十九年正月勇略將軍趙良棟破賊成都奮威將軍王進寶破賊保寧僞將軍王屏藩陳君極自殺吳之茂就擒建威將軍吳丹克重慶楊來嘉降三月貝勒察尼復辰龍關克辰州沅州楊寶蔭崔世祿降吳應麟胡國柱走貴陽世璠令國柱偕王會高起隆夏國相掠四川陷瀘州敘州及永寧縣上命吳丹趙良棟於黔蜀要路增兵禦賊相機進取簡親王定廣西安親王順承郡王貝勒察尼還京以貝子彰泰代爲定遠平寇大將軍蔡毓榮爲綏遠將軍授方略同將軍穆占總督董衛國由沅州進征十月克復鎮遠府僞將軍張足法等敗走遂下平越趨貴陽世璠偕應麟奔雲南僞侍郎郭昌同文武僞官二百人降十一月大兵復遵義安順石阡都勻思南等府敗賊於永寧州追剿至公雞背鐵索橋賊焚橋遁土司龍天祐沙起龍李廷試各率屬助戰築盤江



浮橋以濟師僞將軍李本深降二十年正月僞總兵高起隆夏國相王會王永清擁衆二萬餘屯平遠西南山僞將軍線絨巴養元鄭旺李繼業擁衆萬餘據盤江西坡大兵分道進土司安勝祖等相助協剿賊敗潰王會降斬僞巡撫張維堅普安平遠黔西大定諸府州竝復征南大將軍賚塔奉詔自廣西進雲南連敗僞將軍張足法何繼祖詹養王有功於石門坎新城所黃草壩諸隘遂抵曲靖府二月會彰泰蔡毓榮軍於嵩明州分隊進世璠勒步騎萬餘列象陣離城三十里拒戰自卯至酉大兵五合五勝進薄城陣斬僞將軍胡國柄劉起龍及僞總兵九人賊衆自相蹂躪死者枕藉降臨安永順姚安諸路僞總兵及平遠敗竄之高起隆僞東平公張國柱自大理來降世璠以圍急趣馬寶胡國柱夏國相自蜀赴援將軍趙良棟與都統希福提督桑峨等分路邀擊寶由尋甸攜妻子至楚雄聚賊屯烏木山潰敗同養元鄭旺李繼業赴姚安降胡國柱由麗江鶴慶入雲龍州窮蹙自縊死國相敗走廣西總兵李國樑土司儂朋合圍於西板橋國相度不能脫與王永清江義等乞降十月彰泰賚塔蔡毓榮趙良棟合攻雲南城圍之數重僞將軍何進忠林天擎線絨黃明謀擒世璠及壯圖以獻世璠壯圖皆自殺進忠等率屬

迎降穆占與都統馬齊先入城籍賊黨屬擒光琛及其子學潛從子學範磔軍門戮世璠屍函首馳獻闕下雲南貴州四川湖廣諸省悉平十二月恩赦天下詔曰朕蚤夜孜孜勤求化理期於兵革寢息海宇乂安不意逆賊吳三桂負國深恩倡爲變亂陰結奸黨同惡相援滇黔閩浙楚蜀關隴兩粵豫章之間所在繹騷肆騁痛毒吳三桂僭稱偽號逆焰彌滋負罪尤甚朕躬行天討分命六師剿撫竝施德威互濟或繫殞於闕下或駢戮於師中擒剿誅鋤以次收服乃吳三桂旣膺神殛逆孫吳世璠猶復鴟張踞六詔之一隅延殘喘以拒命朕惟賊患一日不除則民生一日不靖策勵將士屢趣師期於是虎旅協心進迫城下賊衆計窮勢蹙通款軍門兇渠授首師克之日市肆不擾邊境晏如捷書旣至上慰郊廟社稷之靈下抒中外臣民之憤神人胥悅遐邇騰歡念自變亂以來軍民荼苦如在水火披堅執銳卒歲靡寧行齎居送千里相望被兵之地旣罹於鋒刃供億之衆復困於徵輸朕憫恤民艱不忍加賦間施權宜之令用濟征繕之需意在除殘事非獲已而身處宮寢之內外厪閭閻之依夜寐夙興旰食不暇愆焉思治八載於茲今羣逆削平疆宇底定悉翦歷年之蠹賊永消異日之隱憂用是蕩滌煩苛維新庶政大



沛寬和之澤冀臻熙皞之風誕告天下咸使聞知諭議政王大臣曰曩者平南王  
尙可喜奏請回籍朕與閣臣而議圖海言斷不可遷移莫洛米思翰蘇拜明珠塞  
克德等言應遷移其餘竝未言遷移吳三桂必致反叛也議事之人至今尙多試  
問當日曾有言吳三桂必反者否及一聞叛亂多有退而非毀謂遷移所致若彼  
時朕諉過於議撤者盡行誅戮則含冤泉壤矣朕自少時以三藩勢焰日熾不可  
不撤豈因三桂反叛遂諉過於人耶今逆賊雖已削平而瘡痍尙未全復宜恤兵  
養民宣化以致太平也又諭曰陷賊之人有曾爲大吏覲顏從逆受僞職者名節  
棄滅大玷人臣之誼惟歸順之後功可抵罪量予留任餘悉罷黜法司以雲南械  
繫逆屬按律議辟入奏詔如議凡助逆肆惡勢迫始降之高起隆張國柱巴養元  
鄭旺李繼業等皆棄市妻女財產籍入官馬寶夏國相李本深王永清江義皆磔  
死親屬坐斬懸世璠首於市析三桂骸骨傳示天下乾隆四十五年館臣進唐桂  
二王本末未載三桂擒由榔事諭曰通鑑輯覽附錄之載唐王桂王所以匹於宋  
之帝昺帝昞以示萬世之實錄也館臣以吳三桂爲叛臣不書其擒桂王由榔事  
而以屬之愛星阿夫愛星阿固爲定西將軍領兵而三桂彼時實爲平西大將軍



且立意殄滅由榔三患二難之議發自三桂卽後之進兵檄緬甸毆李定國降白文選皆出自三桂之籌畫其功固不可泯也然其籌畫豈實爲我國家哉彼時已具欲據滇黔而有之之心由榔定國白文選在伊豈能據之哉且自古權奸無時無之亦無地無之三桂之必欲滅由榔實猶近日之阿睦爾撒納之必欲滅達瓦齊達瓦齊而在阿陸爾撒納必不能據準噶爾則彼之爲我宣力皆所以自爲也今昔相形三桂之奸計畢露又何不可功則功之而罪則罪之乎其依國史三桂傳盡載其入緬事莫刪昔許子將之相曹操兩言撮其要而操亦喜適所舉二人頗甚類之亦在用之而已矣又在先覺之俾毋出我範圍而已矣

馬寶 王屏藩

馬寶陝西人初爲流賊降於明桂王朱由榔封安定伯本朝順治七年二月平南王尙可喜攻廣州不下圍之五月由榔使寶襲清遠以救廣州可喜遣將擊敗之八年十月由榔自南寧遁安隆寶竄伏廣西山谷間九年五月由榔使定國窺兩廣連陷桂林柳州寶嘯聚與李定國相應後見孫可望勢強卽以兵附可望十月攻陷連州十年四月攻肇慶兵敗隨可望走貴州十三年定國奉由榔入雲南十

四年可望據貴州叛由榔使定國討之可望令寶間道襲雲南欲掩執由榔可望部下多不直可望莫爲用寶偵沐天波守雲南已設儲頌兵不進定國擊破可望還救雲南寶以兵附定國由榔封寶淮國公十六年由榔自騰越奔南甸定國兵屢敗寶棄由榔赴吳三桂軍前降三桂見寶獷猛厚結之十七年三桂奏請以降兵爲十營營千二百人以投誠官分統之併擬寶及王屏藩等爲總兵官部議如所請寶以右都督充中營總兵官屏藩以左都督充左營總兵官屏藩奉天人亦三桂所倚任者也十八年三桂率屏藩等趨緬甸遣寶剿馬乃土司龍兆吉斬之康熙五年寶調曲靖武營總兵官十二年十一月三桂反寶屏藩率先從逆僞封寶國公以屏藩爲僞將軍三桂黨謀令寶由貴州窺湖廣屏藩由四川窺陝甘寶卽率賊先驅陷貴州進逼湖南十三年分兵犯江西屏藩亦連陷四川州縣進犯秦州十四年正月上命安親王岳樂進取長沙寶據岳州出沒湖湘間道路爲梗十五年三月大兵攻長沙寶令彝陵南漳諸賊分擾軍營十一月大兵圍長沙寶自岳州馳援長沙圍解十六年九月寶率賊萬餘犯韶州渡河至蓮花山薄羅江大兵營統領額楚等禦之將軍莽依圖等自城中夾擊破其四營寶大敗奔帽峯

山十二日寶率賊赴衡州十七年正月又由宜章入廣西二月復至衡州營江東岸爲聲援八月三桂死寶與賊黨擁立其逆孫世璠十八年上命諸路將軍招撫賊黨五月簡親王喇布給益陽知縣徐璫參議道銜齎諭招撫寶殺之十月上降敕諭寶曰爾等本係吳三桂藩下人三桂反叛爾等率黨抗拒大兵或非本懷爾若能悔罪歸誠前罪悉赦仍論功敘錄標下將士概從寬宥酌量加恩爾其盡釋疑衷勉圖後效寶抗拒如故大兵復湖南廣西寶遁貴州據遵義提督周卜世破之寶棄城走先是屏藩自秦州戰敗退四川據保寧爲死守計十九年正月大兵克保寧屏藩窮蹙自殺三月寶復犯四川糾賊黨陷瀘州敘州二十年二月貝子彰太圍吳世璠於雲南省城世璠危迫趣寶自四川來援寶棄敘州攜妻子奔楚雄六月彰泰使都督希福等擊之寶佯北以誘我兵希福等追至烏木山寶據險相持希福等奮擊大破之寶越山遁僅以身免七月寶逃姚安收潰卒不及百人乃赴希福軍前降諭曰逆賊馬寶所在抗拒大兵今無地可逃力窮勢蹙始來投誠情罪重大斷不可宥其執來京九月磔於市梟其首

李本深



李本深甘肅西寧人明總兵高傑甥初爲明總督洪承疇部將累官至遊擊福王時大學士史可法薦爲總兵隸傑麾下同胡茂禎爲前鋒傑爲許定國所殺以本深爲提督統其軍本朝順治二年豫親王多鐸南征本深率部兵十三萬降以原官隨大軍渡江平桃紅朱門諸砦招撫鎮江府江南平入京隸漢軍正黃旗五年八月敍投誠功授三等子爵十年大學士洪承疇奉命經略五省奏請同行稽查隨征諸將并招沿途舊兵十二年三月加右都督充左標提督總兵官五月大軍進剿湖廣時明桂王朱由榔之將李定國據南寧劉文秀孫可望等據辰州突犯常德本深同總兵楊遇明胡茂禎張鵬程擊卻之文秀退保點溪六月復犯常德本深設伏城外俟寇過半夾擊大敗之文秀遁貴州敍功加都督太子少保十三年三月疏言湖南土荒物貴軍心易搖或逃至常德荊州猶易查解若往山陝河南地方卽難越境緝問兼將領喜其歸來及給糧收伍逃兵畏避乞皇上嚴飭鎮將查拏遇逃兵卽行查本營將本人同家口解赴若將領隱匿督撫查參又官兵家住鄉井者奉旨准移入城家給一合米委屬不足請量增俱下部議行十一月隨大將軍阿爾津復辰州十四年可望降隨承疇進取貴州十六年承疇題授貴

州提督特旨加太子太保時土寇馮天裕等倡亂黔蜀間同總兵胡茂禎等平之貴州水西多兇苗本深擊斬二千八百有奇駐六廣河苗謀劫營本深設伏大敗之諸寨降康熙六年平西王吳三桂辭總管任本深陳三桂功績請勿聽辭語在三桂傳十二年三桂反本深叛應之授僞將軍職十九年貝子彰泰同將軍蔡毓榮穆占等敗賊於鐵索橋進復貴陽本深降械至京磔死

張國柱 楊遇明 楊富 蔡祿 楊來嘉 王永清

張國柱奉天鐵嶺人明副將本朝順治二年自海道率兵來降五年二月授都督僉事充湖廣隨征左路總兵官六年二月予三等輕車都尉世職八年閏二月續順公沈永忠遣國柱同護軍統領馬進功剿湖南賊有功旋從平南王尙可喜復廣東郡縣瓊州土寇竊發據城國柱渡海復其城海寇鄭成功遣黃梧犯瓊州擊破之十二月偕總兵南一魁敗李定國於南寧定國走安隆經略洪承疇令國柱留鎮廣西七年十月授雲南永順鎮總兵官時吳三桂剿李定國於木邦慮蠻暮猛密二土司爲定國煽惑令國柱以兵三千屯南甸未幾定國死康熙二年十二月擢雲南提督三年六月加太子少保四年四月迤東土酋王耀祖反衆至數萬

國柱發兵討之六月三桂疏言土酋王耀祖窺臣遠征水西竊據新興僭號大慶謀犯省城分遣賊黨陷易門寧州嶲峨攻昆陽江川通海宜良彌勒石屏及臨安府城提督張國柱等調兵分路剿捕所向克捷五年正月三桂復疏言雲南諸土酋祿昌賢等作亂臣同國柱等分兵進剿平賊寨數十擒昌賢及其黨王翔張長壽李成林李世蕃李日森沈應麟龍元慶儂得功等悉誅之遠近蠻獠聞風惴伏滇南大定得旨嘉獎六年三桂疏稱日疾乞解總管任國柱素黨三桂疏留之十二年十一月三桂反國柱首從逆受僞職爲定遠大將軍東平公自後提督楊遇明總兵楊富蔡祿楊來嘉王永清悉從賊十三年國柱陷衡州進據長沙復與吳應麟抗大兵於岳州分掠郡縣十六年征南將軍穆占進剿長沙國柱於城外築壕布木蒺藜列象陣以死守穆占連擊敗之國柱走衡州十九年大兵復湖南貴州國柱遁入雲南二十年二月貝子彰泰圍吳世璠於雲南省城遣使招撫諸路國柱自大理府率所部僞官繳印劄詣軍門降二十二年二月伏誅遇明錦州人以守備來降授山東萊州遊擊剿土寇有功累遷至副將順治十二年授湖廣常德鎮總兵官孫可望來犯擊走之康熙元年移廣東新安鎮旋擢廣東提督九年



五月以老乞休家於常德子寶蔭先爲三桂藩下總兵從三桂反率賊至常德遇明爲內應城遂陷遇明尋死十九年三月大兵復沅州寶蔭降三十一年流徙寧古塔富福建漳州人初爲鄭錦僞都督康熙二年來降授左都督三年六月授四川川北鎮總兵官五年十一月調浙江水師左路總兵十一年四月移江西南瑞鎮總兵十三年七月三桂兵犯江西富潛謀內應巡撫董衛國擒斬之祿海澄人自海道來降順治十八年九月授左都督予三等男世爵康熙三年十一月授河南河北鎮總兵官十三年三月三桂犯湖南祿潛結來嘉謀應三桂陽稱捕魚令一軍盡甲增製兵械購贏馬民一夕數徙侍衛觀保馳奏上命內大臣阿密達率兵至懷慶察之阿密達至祿不出迎入城施礮拒敵阿密達擊擒之并斬其子來嘉福州人初爲海寇鄭錦僞都督康熙元年來降三年十一月授湖廣襄陽鎮總兵官十三年三月與副將洪福據穀城叛竝受三桂僞將軍職五月復犯均州九月來嘉犯南漳十一月陷中峰寨十四年三月總兵劉成龍敗之於良坪燬其巢五月來嘉復犯南漳七月大兵擊敗之十一月來嘉分道入寇十五年正月副將四十六破賊於黃實山五月以來嘉據鄖陽乘間竊發設鄖陽撫治九月福復犯

均州十八年大兵自荊州渡江福降來嘉遁十九年正月湖廣總督徐治都擊破來嘉追至巫山來嘉拒戰復破之二月克夔州來嘉走重慶三月重慶破來嘉降逮至京未至死永清遼東人康熙八年授貴州黔西鎮總兵官十二年十一月從逆二十年九月降二十一年二月磔死諡曰王永清身膺重任甘心從賊及大兵抵滇圍困省城爲日甚久猶不歸順乃與夏國相隨在奔竄迨計無復之始來投誠其併捕禁其子籍其家

曹申吉 羅森 吳之茂 陳洪明 崔之瑛

曹申吉山東安邱人順治十二年進士改庶吉士十四年授翰林國史院編修充日講官十五年以才堪外用選湖廣荆南道十六年遷河南分巡雖陳兵備道十七年五月內擢通政使左通政十月遷大理寺卿康熙六年三月擢禮部右侍郎九年十一月遷兵部右侍郎時吳三桂分藩雲南徵調絡繹黔蜀爲往來孔道廷議責重巡撫十年授申吉貴州巡撫而擢陝西布政使羅森四川巡撫森直隸太興人順治四年進士累官陝西督糧道浙江按察使遷布政使以久外任故用之十二年二月申吉疏言設官分職上下相維獨黔省知府知縣各有專轄之地分

徵錢糧竝無經徵督徵之異非所以定經制而專責成也請將貴陽安順平越都勻鎮遠思南銅仁七府知府經管地糧各歸附郭之新貴普定平越都勻鎮遠安化銅仁七縣知縣管理其知府止司督徵庶規制畫一部議從之五月森以招民開墾議加工部右侍郎銜十一月吳三桂反十二月犯貴州申吉從賊十三年正月賊犯四川森與總兵吳之茂竝降申吉喜爲詩招致遊士邀名譽森亦有能吏聲相繼從逆聞者切齒三桂性忌降者多以事見殺及三桂死賊黨復自相屠戮申吉森後俱不知所終之茂錦州人降賊爲三桂任用率僞總兵五人犯秦州後屢敗竄入松潘所至焚掠大兵克保寧擒之茂於陣械至京伏誅封疆大吏從逆者又有廣西巡撫陳洪明雲南布政使崔之瑛洪明遼東人隸漢軍鑲藍旗以筆帖式授戶部主事累遷至郎中康熙十二年二月擢奉天府尹十一月授大理寺卿十三年二月擢戶部右侍郎六月授廣西巡撫八月洪明偕總督金光祖疏言吳三桂遣賊攻陷梧州現督水陸官兵進取逆賊遁走梧州已復得旨嘉獎十一月疏言土寇竊發如李三官七乘機倡亂已分遣將弁蕩平尙有潛伏山陬海澨者應亟除梧州宜設重兵以資剿禦諭曰梧州兩粵接壤要地今粵西有事之秋



李三官七賊寇滅後尙可喜卽撤兵速赴梧州十四年五月洪明遣遊擊陳汝德剿僞總兵李梅友於蒼梧敗之燬其寨十五年二月尙之信叛降三桂洪明從逆十八年復來降二十一年議政大臣等議洪明應革職立絞諭陳洪明前赴任時朕召至乾清門奏稱臣一介草茅蒙皇上知遇務期勉竭愚誠以報知遇及粵東被陷朕意此人未肯從賊且彼竝無父母妻子牽制之情隻身何難自拔而乃深負國恩受賊僞職又具啟吳三桂情殊可惡理應正法姑從寬免死著流徙寧古塔籍其家之瑛霸州人順治十三年授陝西漢羌道康熙二年擢雲南布政使十二年從逆二十年雲南平之瑛論死

### 王輔臣

王輔臣山西大同人明末爲盜號馬鶴子本朝順治五年大同總兵姜瓖叛輔臣從之爲僞副將六年英親王阿濟格圍大同輔臣降隸正白旗漢軍授侍衛十年隨經略大學士洪承疇證明桂王朱由榔擢湖廣總兵隨定貴州十六年雲南旣定吳三桂留鎮奏授輔臣援剿右鎮總兵十八年隨大軍至緬甸取朱由榔康熙三年敍功加銜左都督四年池東土酋王耀祖據新興叛輔臣討之破木城九擒

僞國公趙印選九年擢陝西提督駐平涼十二年三桂反使約輔臣從逆十三年二月輔臣遣子繼貞首三桂逆書得旨褒獎予三等子世襲授繼貞大理寺少卿時湖南四川皆陷賊上命順承郡王勒爾錦征湖南調輔臣隨征旋命兵部尙書莫洛經略陝西四川莫洛奏留輔臣仍駐平涼隨大軍進征四川輔臣疏請入覲密陳韜略上以邊疆正資彈壓諭俟賊平後來京輔臣復疏言昔年隨經略洪承疇出師湖南於土俗民情頗悉其概及任雲南總兵凡地形險要苗獠種類知之最詳願往湖南隨征立功諭以進征四川亦可立功尋莫洛統陝西諸將征四川檄輔臣隨征輔臣懷叛志以乏馬辭莫洛給馬二千輔臣欲搖衆心謂經略盡調我良馬他往以疲瘠者與我欲置我於死地十二月行次寧羌兩營距二里許潛布梟健截諸險隘糾衆逼莫洛營噪以馬羸饑缺莫洛遣從者撫慰輔臣突前礮矢齊發莫洛自出督戰中鳥槍歿輔臣脅經略標兵及運糧兵二千餘自隨還踞略陽通款三桂留莫洛軍營之郎中祝表正時定西大將軍貝勒洞鄂奉詔統師繼莫洛後至沔縣聞變退保漢中入奏上遣輔臣子繼貞齎敕諭輔臣曰昔世祖章皇帝知爾才勇兼優拔於儕伍之中置之侍衛之列繼命隨經略洪承疇進取

滇黔爾殫心抒忠茂建功績遂進秩總戎迨及朕躬以爾勲舊重臣巖疆攸賴特擢陝西提督來京陛見面加詢問知忠貞天稟猷略出羣特賜密諭想爾猶記憶也去冬吳逆叛變人懷觀望爾獨首倡忠義舉發逆札遣子馳奏益悉爾之忠誠純篤不負朕知及經略莫洛奏請率爾入蜀朕以爾與莫洛毫無猜嫌故令同往建功茲兵變之後召詢爾子始知莫洛與爾頗有嫌隙則朕之知人未明俾爾變遭意外忠盡莫伸咎在朕躬於爾何罪朕之於爾任寄心膂恩重河山以朕之惓惓於爾知爾必不負朕也爾所屬官兵行役艱辛變起倉猝朕惟加矜恤竝勿致譴已令陝西督撫招徠安插特再頒專敕爾果不忘累朝恩眷不負平日忠悃歛戢所屬官兵各歸隊伍卽令仍還平涼原任已往之事概不追論勿心存畏疑有負朕篤念舊勲之意十四年正月輔臣得繼貞所齎敕具疏附祝表正還奏而留繼貞弗遣輔臣之在略陽也誘蔡州副將陳善以城叛遂移據秦州其在寧羌脅從之二千衆莫肯爲用各乘間脫走自平涼隨至之卒伍日夜思故鄉散去者亦數百人輔臣乃毀鳳縣之偏橋使叛黨王好文等以兵阻棧道大軍在漢中餉不繼退歸西安於是漢中興安相繼爲三桂賊將所踞輔臣留其黨踞秦州而自攜



舊兵歸平涼三桂賂以白金二十萬兩與僞印曰平遠大將軍陝西東路總兵輔臣爲布逆書要約黨附固原道陳彭受僞巡撫筭定邊副將朱龍受僞招撫總兵筭各叛踞城邑合謀誘脅遊擊袁成樑以鞏昌叛副將江有倉參將潘瑀以階文洮岷叛守備曾文耀以臨洮叛蘭州遊擊董正已潛結撫標弁卒作亂舉城從逆同州遊擊李師膺據神道嶺以叛殺韓城知縣翟世琪陷洛川宜川邠州陝西郡邑騷動延綏鎮屬之嚮水魚河波羅各營葭州及吳堡清澗米脂等縣先後附賊初輔臣之附疏祝表正還奏也謂莫洛激其兵變已弗能禁乞先遣中使撫輯兵衆得所當卽束身歸罪上鑒其狡詐詔在陝諸將申嚴防禦毋縱蔓延而仍命祝表正齎諭慰撫如初輔臣復留表正弗報表正屢切責之旋遇害諭趣統師貝勒大臣分路進討於是貝勒洞鄂克秦州僞總兵陳萬策降安西將軍穆占靖逆將軍張勇克鞏昌僞總兵陳科降西寧總兵王進寶克蘭州僞總兵趙士昇降甘肅總兵孫思克復靜寧平遠將軍畢力克圖復綏德延安陝西提督陳福復定邊城擒朱龍及僞副將倪先德斬之輔臣見大軍所向克捷逆黨漸散乃爲緩兵計以書致貝勒洞鄂乞奏請再頒赦詔遣威望大臣受降洞鄂以聞上諭之曰前屢降

旨王輔臣果悔罪來降當宥其前罪頃秦州諸處官兵來降悉與寬賞輔臣安有不知彼乞降詐也特緩我師爲苟延日月計耳且前遣祝表正尙未歸豈宜復遣大臣爾等宜以王輔臣旣邀恩赦猶不悔禍布告官吏軍民俾知舉兵誅亂之故急合兵攻取平涼是時吳三桂由湖南寇江西勢猖獗輔臣因是觀望其叛黨吳之茂譚洪等由興化犯商州復引四川賊犯秦州屯踞北山截我臨鞏援師路輔臣使僞總兵李國良以衆八千由寧朔入寇別使賊犯靈州大軍分道進剿乃遁十五年二月上命大學士圖海爲撫遠大將軍討輔臣四月張勇剿賊於通渭復其城五月圖海大破賊於平涼城北之虎山墩輔臣窮蹙乞降上宥其前罪頒詔撫慰輔臣使子繼貞僞總兵蔡元繳所受吳三桂僞劄印詣軍門降詔復輔臣官爵加太子太保授靖寇將軍隨圖海駐漢中繼貞亦復原官尋擢太僕寺卿輔臣懷疑懼與其妻妾四人自縊死獨輔臣甦二十年雲南平輔臣奉詔隨圖海入觀至西安病死上從部臣請停其世襲罷繼貞任家屬歸旗

譚洪 子天祕 鄭蛟麟

譚洪四川萬縣人初爲明總兵官本朝順治三年明桂王朱由榔大學士呂大器



督西南諸軍洪與其弟詣及譚文等皆受約束時張獻忠遺黨孫可望等竄川南洪等亦分據川東又與李自成黨李來亨等聯絡聲援五年犯保寧四川巡撫李國英敗之七年可望以川南降於桂王陽奉之陰圖自據桂王大學士文安之念川中諸將兵尙強欲結之以抗可望乃自請督師加諸鎮封爵桂王進洪新津侯李來亨及譚詣譚文等公侯爵有差令安之齎敕印往可望慮安之圖已邀止安之奪洪等敕印可望將圖蜀發兵由川南入而別遣將渡金沙河出黎州陷嘉定洪與詣文竝附於可望十四年可望自貴州降於大軍洪等復歸桂王十五年二月洪進據忠州萬縣七月攻重慶總兵官陳廷俊敗之十六年洪與來亨等由水道襲重慶會洪詣以私忿殺譚文諸將不服安之欲討洪詣洪詣懼率所部來降隨授洪川北總兵官加慕義侯康熙十二年吳三桂叛十三年洪與四川提督鄭蛟麟合謀從賊受僞總管將軍蛟麟明都司自松山來降者也三桂使蛟麟犯漢中爲大軍所破蛟麟復降十五年九月洪欲犯湖廣鄖陽先遣賊衆泊船琵琶灘阻運道招撫楊茂勳偕副都統李林隆提督佟國瑤等敗之十月洪率賊三十餘艘順流下圍鄖陽城將軍噶爾漢等敗之陡嶺更以水陸兵夾擊洪復遁十八年



上以湖南廣西底定賊殄滅可期念洪抗拒有日或由迫脅所致特加專敕令其姪前副將譚天敘齎往招撫十九年二月湖廣提督徐治都復夔州洪遣子僞右將軍天祕齎辯明脅從疏竝繳僞晉國公敕僞廣威將軍印及文武官印親率子姪僞總兵官譚地升譚地晉等詣軍門降未幾三桂陷瀘州永寧敘州洪復叛諭曰譚洪變起倉猝雖盤踞萬縣實屬疥癬但破其出犯之賊則洪無路可歸自必授首乃趣將軍吳丹鄂克濟哈趙良棟總督楊茂勳巡撫杭愛提督王之鼎等分道進擊十月洪與彭時亨等攻涪州十二月復犯夔州上命噶爾漢及川陝總督哈占速進二十年正月洪死時噶爾漢擊敗雲南賊洪子天祕震恐走萬縣天字城寨賊巢以遁於是大兵進取萬縣既而開縣建始忠州梁山悉平六月徐治都檄參將涂鑑諭降哈占復遣官招之天祕猶豫未決大兵圍雲南天祕窮蹙始降二十一年五月磔於市

### 祖澤清

祖澤清大壽第四子康熙六年由參領授廣東高雷廉總兵十四年七月據高州叛降於吳三桂命平南王尚可喜將軍尼雅翰前鋒統領覺羅舒恕總督金光祖

會剿十六年尙之信以從逆反正襲平南親王傳檄兩廣澤清亦投誠事聞諭曰祖澤清先雖被脅從逆仍感戴國恩密謀斬倡亂逆弁陳嘉正擒僞將軍謝厥扶等薙髮歸順其加都督同知仍管總兵事八月澤清執厥扶及僞總兵鄧鎮奇同知謝濟遊擊韓達守備韓元隆韓國勳鄧駿送之信所詔誅之十月命澤清同光祖進取南寧柳州十七年三月澤清復叛諭曰祖澤清先經反叛及投誠後隨加寬宥仍授總兵旋擢鑾儀衛使今復負恩反叛兇惡已極卽行誅滅平南王尙之信將軍莽依圖額楚巡撫傅宏烈總督金光祖可會同商酌速行剿滅未幾澤清勾山海諸寇分犯電白敕之信額楚等速攻剿四月之信同副都統額赫訥等統滿漢兵抵電白澤清設五營據守之信等分擊連破之斬僞總兵江瓊及賊衆四千餘追二十餘里城中賊衆堅守圍之十七日夜原任都司王得功等踰城降之信等馳百八十里抵高州澤清挈家遁入山十八年四月諭兵部曰逆賊吳三桂煽亂以來各處大小文武官員勢窮力竭迫而從賊朕久已洞悉其悔罪來歸者概行寬宥惟澤清父子兄弟向受國恩甚厚前叛時意其必被迫脅不得已而從逆及旣降復叛則甘心附賊可知情罪重大國法難容不許招撫亦不許其投誠

爾部卽密諭各路大將軍將軍督撫提鎮等遵行八月官兵搜山獲澤清及其子良棟送京師十九年二月澤清良棟俱磔死諸子家口籍歿

### 耿精忠

耿精忠漢軍正黃旗人靖南王繼茂長子幼隨父鎮所順治十一年繼茂遣入侍世祖章皇帝念繼茂南征有功授精忠一等子爵尙肅親王豪格女封和碩額駙康熙二年繼茂請令精忠赴閩學軍事聖祖仁皇帝允之十年繼茂疾奏以精忠代理藩事尋卒詔精忠襲父爵十二年七月精忠聞平南王尙可喜將撤藩歸遼東亦具疏請撤得旨允行十一月吳三桂反命精忠仍留鎮三桂以書誘之精忠與藩下左翼總兵曾養性右翼總兵江元勳參領白顯忠徐文耀王世瑜王振邦蔣得輅等潛定逆謀十三年三月踞福州反以兵脅總督范承謨不屈遂幽之及其家屬五十餘人自稱總統兵馬大將軍效三桂蓄髮易衣冠私鑄裕民通寶錢以曾養性白顯忠江元勳爲僞將軍分陷延平邵武福寧建寧汀州藩下佐領黃國瑞林芳孫廖廷雲李似桂護衛夏季旺呂應斗長史陳儀陳斌及凡從逆者各加僞職分播逆書約三桂分寇江西江南約潮州總兵劉進忠擾廣東通海敵鄭



錦於臺灣賂以沿海郡邑倚爲聲援浙江總督李之芳聞變先遣副將王廷梅等擊賊自率兵駐衢州守禦賊衆突越仙霞嶺寇浙江陷江山縣以衢州有備分陷温州處州又別趨江西寇廣信建昌上命平南將軍賚塔帥師之浙江定南將軍希爾根之江西竝敕杭州鎮江水師分防海疆詔削精忠爵收禁其在京兄弟宣諭中外曰逆賊耿精忠庸懦無能癡愚寡識賴祖父之餘勲襲封王爵宜感恩圖報不意其包藏禍心徑行反叛今削其爵遣發大兵進剿凡被賊迫脅之官員兵民有能擒耿精忠投獻軍前者優加爵賞或以兵馬城池納款者論功收錄或力有不逮自拔來歸者亦免罪收用其藩下人在直隸各省出仕者概從寬宥雖有父子兄弟在福建者亦不株連勿得心懷疑畏自罹法網負朕好生之意尋諭部曰曩者耿精忠之祖父耿仲明當太宗文皇帝時航海歸誠優錫王爵效力行間勞績茂著及其身故睿親王不令承襲世祖章皇帝追念舊勲以其子繼茂襲爵俾鎮巖疆爰及朕躬惓懷勳裔恩寵有加後覽繼茂遺疏有民兵凋敝海賊未滅死不瞑目之語忠盡堪念且因精忠自幼曾爲近侍予襲王爵仍鎮閩省望其紹祖父遺訓殫竭忠猷不意爲逆賊吳三桂煽惑一旦叛亂大兵進剿殲滅在卽但

念其無知被誘墮人狡計非素蓄逆謀首倡叛亂者比況自祖父以來受恩四十餘年至精忠之身遽至宗祀斬絕朕心深爲不忍其傳諭精忠果能革心悔禍投誠自歸剿除海賊以贖前罪卽視之如初朕以至誠待天下必不食言遣工部郎中周襄緒偕精忠護衛陳嘉猷齎敕赴閩精忠留之養性誘温州總兵祖宏勳平陽遊擊司定猷並以城叛偕僞鎮海都督林冲僞中軍都督徐尙朝僞總兵閻標宋書聘馮公輔沙有祥曾璽陳理連雲登僞副將吳榮先陳鵬等陷瑞安樂清及仙居太平黃巖窺寧波紹興陷嵊縣連陷處州郡邑進犯金華精忠偕僞左軍都督周列僞總兵王飛石桑明李雲龍僞副將江明等陷廣信建昌饒州復糾合玉山永豐土賊東犯常山陷開化壽昌淳安遂安別犯徽州婺源祁門勢日猖獗上以康親王傑書爲奉命大將軍貝子傅喇哈爲寧海將軍率禁旅並調駐守江南之喀喇沁土默特兵征浙江復命安親王岳樂統師駐南昌簡親王喇布駐江寧諭康親王曰精忠雖背恩反叛念其祖父投誠效力累世舊勳朕豈肯以耿精忠之罪及其先人大兵平定閩省之日其祖父骸骨仍許收葬是時將軍賚塔兵駐衢城賊由江山縣入犯賚塔同之芳率副都統喇哈瑚圖副將王廷梅等擊卻之



副將牟大寅斬偽參將張雄於常山副將洪起元敗賊於紹興復嵯縣副將鮑虎敗賊於淳安之圍屏鎮擒王飛石江明復壽昌遂安副都統沃申瑪哈達石調聲總兵李榮陳世凱參將陳夢暘屢摧賊衆於金華斬閩標宋書聘吳榮先會康親王至金華與貝子傅喇哈率副都統穆赫林等剿賊復金華附近諸邑敗曾璽陳理於台州之黃瑞山斬陳鵬復黃巖太平樂清瑪哈達擊敗徐尙朝沙有祥馮公輔等復處州穆赫林擊敗林冲於白水洋復仙居簡親王以兵助江寧將軍額楚擊走徽州婺源祁門賊衆將軍希爾根復建昌饒州安親王至南昌移書精忠約降精忠答書語多狂悖十四年七月上諭吏部兵部曰逆賊耿精忠負恩附逆煽亂閩疆荼毒生靈罪惡重大凡兄弟族人律應不赦但念其弟耿昭忠耿聚忠及族人等道途遠隔實未同謀竟爾株連朕心不忍其概從寬釋官職悉令如故並命聚忠齋敕諭精忠曰爾祖父宣力累朝勲猷懋著爰俾世襲王爵格外加恩逮爾父病歿令爾襲封鎮閩方謂爾克紹前猷殫忠報國不意爾反爲吳逆狡謀所惑蹂躪土地殘害生民朕猶念爾祖父前功終不忍絕凡爾在京諸昆弟及屬下人概行寬宥給還官職恩禮如常今大軍雲集時勢昭然爾自知之朕復念爾變



亂必由逼迫所致故復下赦書遣爾弟耿聚忠齎至軍前明諭朕意爾若卽悔罪率衆歸誠當復爾王爵如舊鎮守倘能剿除海寇共奏膚功仍復優敘加以爵賞前使臣周襄緒等不遣之歸或別有故朕不介意爾勿聽煽惑之言終懷疑懼負朕始終保全之意聚忠至衢州精忠不納使其黨江元勳徐文耀黃國瑞等扼關隘肆逆如故初精忠將反其母周氏哭阻之藩下都統馬九玉亦以吳三桂不可效爲言精忠勿聽周氏憤死九玉旋從逆爲僞驍騎將軍與僞前鋒都督朱懷德僞總兵馬勝等距江山縣精忠屢迫之犯衢州戰輒敗劉進忠之以潮州叛也受精忠僞職爲寧粵將軍平南王尙可喜奉詔發兵討精忠精忠求援於鄭錦遂引羽黨入潮州據惠州三桂亦驅廣西叛賊逼肇慶可喜慮分禦力竭請敕廣西大兵援廣東精忠益驅僞將軍邵連登劉如桂黃朝用僞總兵馬鵬等助顯忠犯建昌撫州贛州連結三桂賊衆於袁州吉安阻大兵不得達粵可喜子之信遂糾廣州肇慶官屬降三桂乘惠州不守錦使其黨劉國軒等踞之錦尋與精忠構釁盡奪泉州漳州諸地以自屬十五年二月貝子傅喇哈誓師黃巖進征温州連破賊壘曾養性憑江拒戰累月未能薄城上命之芳飭兵固守衢州金華傅喇哈剿除

温州處州賊衆諭趣康親王自金華移師衢州進征福建八月康親王同將軍賚塔督兵敗賊於大溪灘下江山九玉潛遁招降僞參將金應虎遂克仙霞關攻拔浦城縣是時錦侵擾興化及福州精忠與其黨武灝沈偉郭景汾羅萬里等搜掠福寧建寧邵武延平財利以餌衆將不繼又屢爲大兵挫衄勢益窮蹙以范承謨久羈不屈使人害之並戕其幕客嵇永仁及家屬之被繫者康親王進征建陽移書精忠曰爾蒙累朝厚恩世授王爵正當遇時立功以承先緒乃溺於奸計自取誅夷聖上念爾祖父之功凡爾在京諸弟俱留原職如舊參養復遣爾弟聚忠招撫因不得前進還京今大兵屯仙霞嶺長驅直入攻拔浦城浦城乃閩省財賦要地咽喉旣塞糧運不通建寧延平旦夕可下與其繫頸受戮不如率衆歸誠仍授王爵保全百萬生靈況鄭錦與爾有不共戴天之仇攘奪郡邑無已時爾當助大兵進剿立功何久事仇人爲精忠得書猶豫未決答書言自願歸誠恐部衆不從致滋變患望奏賜明詔許赦罪立功以慰衆心乃可率屬降康親王復建寧府次延平精忠震懼無措遣其子顯祚同前齎敕被留之周襄緒陳嘉猷迎大軍十月朔康親王遣官齎敕宣示精忠精忠出城降請隨大軍剿海敵立功贖罪康親王



以聞下王貝勒大臣議奏復精忠靖南王爵屬下官職如舊令精忠率之征剿上乃以耿昭忠爲鎮平將軍赴福州駐守命精忠隨大軍剿海敵旋收復興化泉州漳州逐錦入臺灣進征潮州會之信以廣州歸順進忠亦降精忠駐守潮州十六年四月奏遣子顯祚入侍命列散秩大臣九月康親王令將軍賚塔偕精忠所屬都統馬九玉率將士守潮州撤精忠還福州詔止之諭戒康親王及參贊大臣曰今當招攜撫順之時不宜遽撤耿精忠以疑衆心王大臣等不預請旨卽撤之殊爲失計嗣今凡事當熟籌毋得徑行十一月藩下參領徐鴻弼佐領劉延慶護衛呂應賜典儀陳良棟護軍蘇雲會等具狀遣人赴部首精忠歸順後尙蓄逆謀凡五款一違康親王令不悉舉出奸黨一潛結海賊通音問一與劉進忠執手耳語謂乞降非所願一密令腹心藏鉛藥約俟異日取用一散遣舊兵歸農令分攜兵器勿留供大軍部臣以狀聞昭忠在福州同參贊大臣介山吳努春亦以鴻弼首詞具疏入告上留疏於中十七年春海敵陷海澄長泰平和漳平同安惠安永春等城詔精忠還福州昭忠攜其祖父骸骨還京是年秋三桂死賊之在江西湖南者半竄遁海敵亦敗潰退踞海澄上密諭康親王曰自數年用兵以來所費不貲



民力疲困今大破湖南賊寇餘孽遁入雲貴旦夕殲滅惟福建海敵竊踞海澄倚廈門金門爲營窟大兵進剿並藉水師應撤騎兵之半以甦民力耿精忠在閩尙慮變生意外故暫停撤如降旨令精忠來京或滋疑懼王當令其奏請陛見尋康親王疏劾精忠罪請逮繫正法諭曰今廣西湖南漢中興安俱已底定逆賊餘黨引領以冀歸正者不止百千耿精忠若卽正法餘黨或致寒心如能自請來京庶事皆寧帖王當加意開導之十九年四月精忠疏請入覲得旨以馬九玉爲福州將軍轄藩下兵八月昭忠聚忠並疏劾精忠精忠至上允王大臣等所請以前此留中諸疏下法司勘問精忠辨歸順後絕無叛志法司以鴻弼等首詞可按且有昭忠聚忠劾奏精忠應革王爵與其子顯祚及曾養性白顯忠等俱磔死家口籍歿上命繫精忠俟鴻弼等及逆黨俱至京再核議以奏尋遣聚忠赴福州以罪不株連曉諭藩屬並遷精忠家屬歸旗是年之信爲藩屬首悖逆伏誅明年十月大兵平雲南三桂孫世璠及其黨俱殄滅詔撤舊隸精忠藩下官職之在浙閩者還京九玉亦解任歸旗給事中姚祖頊御史孫必振交章言三桂宜戮屍精忠及逆黨罪狀應按律擬磔上詢廷臣欲予寬減大學士明珠奏言精忠罪較之信尤爲

重大之信不過縱酒行兇口出妄言精忠負恩謀反且與安親王書多狂悖語情無可貸當敕法司明正典刑於是精忠與曾養性白顯忠江元勳劉進忠徐文耀王世瑜王振邦蔣得輶並磔於市懸首示衆顯祚及祖宏勳司定猷黃國瑞林芳孫廖廷雲李似桂夏季旺呂應斗陳儀陳斌武灝沈偉郭景汾羅萬里等咸伏誅籍其家

曾養性 劉秉政

曾養性奉天人初從耿繼茂征廣東隸靖南王藩下累官副都統繼茂移藩福建養性從破海賊於廈門康熙十一年授藩下左翼總兵官十三年三月耿精忠反巡撫劉秉政從逆精忠以養性爲僞都督連陷福寧諸州縣養性率賊萬餘犯浙江之平陽遊擊司定猷縛總兵蔡朝佐迎降遂據平陽五月潛師渡飛雲江攻瑞安不下轉踰桐嶺遊擊魏萬侯迎戰敗死養性進屯温州城外西山六月温州鎮總兵祖宏勳通賊巡道陳丹赤永嘉縣知縣馬瑒遇害養性入據城僞加宏勳威遠將軍聚衆十萬趨台州過樂清攻破之長驅下天台仙居及紹興之嵗縣布僞劄寧海象山新昌餘姚土寇蜂起養性僞授魯朝全爲總兵褚楚白都督使踞大



嵐山擾紹興寧波養性分遣賊犯金華自犯黃巖九月黃巖陷總兵阿爾泰從賊十月養性偕僞都督周列等率賊二萬餘自常山犯衢州將軍賚塔總督李之芳分路奮擊大破之十一月復犯衢州仍敗之十二月養性偕僞總兵徐尙朝等率馬步賊三萬土寇二萬攻金華副都統瑪哈達總兵陳世凱迎戰於積道山破其木城殺賊二萬餘養性退據天台十四年三月養性率僞總兵八人騎六千步卒數萬南至長石嶺北至三江延袤數十里連屯二十五營復遣賊將朱飛熊率水師萬餘舟三百餘艘泊小梁山四月將軍傅喇哈進擊之斬飛熊養性退據茂平嶺扼險抗拒五月巡道許宏勳紹興協都司王得福剿大嵐山賊招降楚白斬朝全養性失援八月傅喇哈自土木嶺間道濟師出茂平嶺背賊驚潰乘勝趨黃巖養性棄營據城拒守傅喇哈進圍其城養性夜突圍走温州餘賊以城降乘勝復樂清從柘溪沿山至青田渡江向温州養性遣賊迎戰於上塘轉戰至線障遇伏橫擊之賊首尾不相顧潰走養性乃濬温州城河圻民居增戰具固守不下傅喇哈圍之十五年二月夜犯大營傅喇哈先營山上令諸軍謹守及曙分兵下山奮擊陣斬僞都督孫可得僞總兵李節等賊大敗追至將軍橋及灰橋扼其歸路



賊盡墮水中斬首二萬餘養性墮馬浮水逃入城困守不能復出九月養性聞大兵入福建精忠降勢迫無所歸十月朔率衆以城降十二月自温州率兵至福州仍爲藩下總兵官耿聚忠疏劾精忠並劾養性旋隨精忠還京二十一年正月養性磔死宏勳定猷並伏誅秉政漢軍正紅旗人初爲直隸雞澤知縣順治九年行取授雲南道監察御史十五年遷太僕寺少卿十六年轉左通政尋擢寧夏巡撫康熙四年裁缺五年補福建巡撫附精忠同謀逆後從精忠出降逮赴京道病死籍其家

### 劉進忠

劉進忠遼東遼陽人初爲明總兵馬得功部校本朝順治二年隨得功在蕪湖迎降旋從剿福建海敵游擢靖南王藩下右路鎮標副將康熙三年遷隨征福建中路總兵官六年改廣東水師左路尋調廣西左江八年復調廣東潮州十三年四月進忠潛通耿精忠擁兵叛先是進忠聞滇閩有變遂萌異志遣其心腹楊希震赴福州納款獻潮州地並請假將軍印以號召續順公沈瑞駐潮知其謀遊擊李成功張善繼亦密約共圖進忠至是沈瑞起兵巷戰兵敗成功等被殺精忠使漳

浦鎮總兵官劉炎統兵至勢益張進忠授寧粵將軍僞職並執瑞及副都統鄧光明官兵家屬驅入福建拘於漳浦七月逆黨陳奠據程鄉八月劉斌據普寧先後爲都統尙之孝等所敗復其城方之孝兵抵潮進忠窺其移營輒鼓衆出犯之孝敗之於新亨分兵克東津筆架山洗馬橋諸隘巡撫劉秉權總兵王國棟亦攻毀潮州城南鳳凰州木城斬僞都督金漢臣合圍潮州十四年海敵鄭錦擾漳泉拔之與精忠有隙閩粵路梗進忠因再用希震策納款於錦錦遣僞總統劉國軒引賊肆掠僞授進忠伯爵之孝與戰不利退守惠州十五年精忠降進忠仍擁衆觀望十六年三月福建既定康親王傑書奏以將軍瑪哈達都統寶塔統兵同精忠進取潮州進忠窮迫歸順上命宥進忠罪仍爲潮州鎮總兵官隨大兵進剿尋授征逆將軍六月疏言臣以遼東武人歷擢潮鎮曷敢一旦背叛自取滅門實由續順公部下都統鄧光明等見臣訓練頓生誹謗乃約遊擊李成功張善繼率兩路兵馬鈔臣前後礮矢如雨臣倉卒應變亦站隊堵禦死亡之際不暇擇人走險求救苟延歲月及聞康親王奉命到閩私幸得瞻天日故差員遠輸誠款雖屢經鄭之調遣臣皆按兵不動抑且漳泉兵食全資惠潮臣隨嚴禁接運所以漳泉之衆

不戰自餒今幸邀聖明赦愆復職又加臣爲征逆將軍仍帶伯銜可謂榮出非分自今以往臣之性命身家均爲皇上再造若不據實陳情是臣旣誤於前又復隱諱於後殆必歸誠之心未堅報效之志未切臣雖萬死不足贖矣疏入報聞六月進忠以康親王傑書招撫文檄潛通吳三桂召兵自救爲尙之信偵獲上聞諭曰劉進忠中懷詭譎非實意歸誠可檄康親王密爲之備尋又命調其標兵剿賊移進忠福州十七年命來京其標員率兵赴廣西效用十九年精忠爲部下徐鴻弼舉發罪狀事涉進忠有與進忠密談結爲心腹語下廷議逮問得實詔與精忠同磔於市

### 尙之信

尙之信漢軍鑲藍旗人平南王可喜長子幼隨父鎮所年十九可喜遣入侍世祖章皇帝念可喜功多授之信秩與公爵同康熙十年聖祖仁皇帝允可喜請令之信赴廣東佐理軍事之信別營新宅以居十二年可喜欲歸老遼東請以之信襲封留鎮部議藩臣無乞休子襲之例令撤藩偕歸會逆藩吳三桂反可喜奉詔留鎮遣次子之孝討叛賊劉進忠於潮州奏請以之孝襲封詔可喜如舊理事俟賊

逆

臣

傳 卷八十

二十五



平以之孝襲旋晉可喜平南親王之孝平南大將軍命之信以討寇將軍銜協謀征剿未幾高州總兵祖澤清附三桂據城叛引廣西叛賊馬雄郭義及三桂所遣僞將軍董重民李廷棟王洪勳等遂陷廣東郡邑海敵鄭錦遣衆萬餘助進忠入擾之孝戰失利退駐惠州十五年春可喜臥疾之信代理事三桂誘其藩屬從逆水師副將趙天元總兵孫楷宗相繼叛之信遂降三桂遣心腹環守可喜藩府戒毋得關白諸事殺金光以徇金光者浙江義烏人隨可喜幕下贊謀畫策最久可喜奏以其計擒佛山鎮奸民江鵬翥得旨敘功授鴻臚寺卿銜常以之信凌虐藩屬不可襲封告可喜者也之信遂授僞職招討大將軍輔德公與海敵議和奪之孝兵柄使閒居廣州三桂屢脅之信出庾嶺抗大軍之信賂以庫金十萬兩乃已可喜卒三桂以輔德親王僞印與之信之信旋遣使赴江西通款大軍密疏願立功贖罪諭曰爾父航海歸誠功猷茂著自吳逆叛亂以來益矢忠藎故特封爲親王授爾爲討寇將軍正期克奮勇略埽除逆賊不圖粵省變亂道路梗阻今覽爾密奏稱父子世受國恩斷不敢懷異志願立功贖罪來迎大師朕知爾父子不忘報國念篤忠貞因倉猝變亂朕心深爲憫惻已往之罪概行赦免果能相機剿賊

立功自效仍加恩優敘十六年之信請敕大軍速進粵是時三桂以董重民爲僞總督踞肇慶初廣西蛋戶謝厥扶當趙天元未叛時先以繪船數百附馬雄誘天元從賊至是三桂令厥扶統轄水師加僞職定海將軍與重民合拒大軍之信密約重民所部兵令以缺饟譟乘間擒重民邀擊厥扶大敗之厥扶遁入海之信遣副都統尙之瑛率兵迎大軍駐韶州疏陳闔屬歸正并言藩下總兵僞授翼勇將軍王國棟藩下長史僞授總兵李天植等贊襄有功並得旨嘉獎下部議敘之信襲封平南親王王國棟等各復舊職俟諸路賊平再議論之信曰今據時勢剿賊吳三桂甚爲緊要亟宜趣兵速進前此賊兵屯聚長沙掘濠立椿僅可支持旦夕誠使諸路進兵彼安能隨處備設椿濠以相抗其滅亡可翹足而待矣尋之信遣使入貢諭曰昔爾先人在時貢獻方物靡不竭誠二年以來粵東事變信使弗通每念及爾先人素日忠貞不二爲國忘家罔不憫傷今王克承先志恢復粵東使人遠來貢獻良屬可嘉但用兵之秋非無事時比況見此物不勝思念爾先人王其安戢粵東恢復粵西湖南以繼爾先人未盡之志朕心深爲期望此等細務勞人費事其暫止是年秋三桂從孫世琮踞桂林之信遣總兵尙從志以兵三千隨

巡撫傅宏烈進征宏烈擊敗僞將軍趙天元復梧州潯州規取平樂桂林詔之信由韶州進取宜章郴州永州之信疏言粵東土賊尙多潮惠人心未定臣宜留鎮省城得旨令將軍瑪哈達賚塔統兵同進潮州劉進忠等知皆已歸順鄭亦敗遁王又以土寇爲辭不離省城倘逆賊各路來犯不惟廣西難復楚賊難滅卽廣東亦難保矣其速統兵前赴韶州剿賊時鎮南將軍莽依圖擊敗僞將軍胡國柱馬寶等於韶州詔移師梧州因之信未具舟艦師行濡滯總督金光祖由潯州進征世琮不勝諭責之信曰金光祖不守梧州輕進失利猶幸梧州無虞萬一梧州失利則進取三桂大兵後路亦阻前調將軍莽依圖等速赴梧州王不亟發船致誤軍行不可謂非王失機也梧州乃兩廣接壤要地其卽遣精兵戍守十七年正月之信疏言臣奉命進取宜章郴永行至清遠以總督金光祖及高州諸處報警遂還省城今海賊又突犯潮陽臣未能統兵遠征得旨潮州惠州既有將軍賚塔等鎮守剿海敵不爲不足今將軍莽依圖深入廣西事機所係甚重且廣西早定則湖南之寇不能自存王其親往廣西策應毋誤軍事之信復疏言高雷廉三郡初定恐爲逆賊煽惑再四熟籌不得不留鎮省城詔精選藩兵遣發暫停親往之信



遣國棟率兵赴宜章九月疏言前者永興危急臣恐國棟不能制賊擬親往策應頃聞吳三桂已死永興賊遁今湖南勢如瓦解臣當進定廣西詔以之信爲奮武大將軍合永興大兵並進十八年大兵自湖南進廣西趙天元降之信疏言前此粵東之變起自江門江門水師之叛倡於趙天元請明正其罪詔卽誅之時世琮寇擾南寧之信旣次橫州進駐韶封俄復退還廣州自陳患痔日劇有事醫療詔移隨征部衆與莽依圖統攝之信令藩下總兵時應運率之往莽依圖已擊敗世琮將進征桂林留應運駐守南寧賊黨范齊韓孟明等竄踞武宣之信疏陳海上未靖未能西剿上復諭趣之十九年三月之信乃率兵西剿初之信旣襲爵以之孝舊握兵爲嫌不欲其居廣州奏請召赴京師之孝旋自請募兵三千效力得旨赴江西剿賊藩屬苦之信殘暴念之孝弗置之信益猜忌素嗜酒怒輒執佩刀擊刺又好以鳴鏑射人叛將孫楷宗之歸順也上宥其罪之信杖斃之護衛張永祥爲之信齎疏至京召對承優旨以總兵擢用之信故阻抑復屢辱以鞭箠怒護衛張士選語忤射之殘其足諸護衛皆不平國棟時爲藩下都統與副都統尙之璋總兵寧天祚每與語憤形於色巡撫金儁察其情疏請諭趣之信西剿留國棟之

璋天祚守廣州至是之信赴武宣永祥士選詣闕首之信跋扈怨望弗願剿賊糜兵餉擅殺人諸罪狀上命刑部侍郎宜昌阿以巡視海疆赴潮州傳諭將軍賚塔移師廣州綏輯藩屬先傳諭王國棟等如能執之信許便宜行事並以罪不株連宣諭藩屬四月宜昌阿至廣州國棟與金僞密議選藩下兵以參領李文科率之馳詣總督金光祖提督哲爾肯副都統金榜選總兵班際盛協擒之信金僞上疏曰自滇黔叛亂以來兵民殞於鋒鏑財賦竭於軍需皇上夙夜焦勞於今七載吳三桂固爲亂首而尙之信實爲亂源何則之信兇殘暴虐賦性豺狼其父可喜深慮其包藏禍心戕害諸弟因有移歸遼東之請三桂卽藉撤藩倡亂耿精忠效之羣逆蜂起皆之信啟其端也可喜復慮其擁兵速禍故請以次子改襲使之信稍有人心當必悔罪效忠顧乃倚賊糾變梟斬鴻臚寺卿金光投順三桂冀爲僞王以逞驕志及三桂與以輔德公僞敕册印又遣馬雄屯三水索助餉銀十萬兩始頽然氣沮復謀歸正天恩待以不死俾襲父爵宜撫心知愧奮志圖功乃不赴韶州征剿不救永興危急抗違詔令養賊鄰封且以奉命宥罪之孫楷宗擅以杖斃目中尙有三尺法乎臣猶憶十七年九月公謙之信語督臣金光祖云上欲我出



兵乃不與我一黃頂帶翌日復議怒責鹽驛道僉事李毓棟云爾甫來此事事與我違拘我一刀砍爾上亦無奈我何昨歲七月讜罷私語臣曰非我歸正爾安得至廣東凡事當順從我不獨吳三桂能殺巡撫朱國治也臣正色叱之乃以酒醉自解其狂悖無忌憚如此昔可喜將終曰必葬我海城之信置若罔聞惟營造藩府終歲不輟其意實欲久踞廣東不忠不孝人皆詈之耿精忠歸正後卽遣子入侍之信三子皆年長有室臣謂入侍不容緩之信曰天下未定豈宜令孩童遠行是則異志猶存叛心未已如見肺肝矣至於兵無實額餉多虛冒致海敵肆擾又其貽誤封疆也臣莅粵兩載具知其父積有功勞諸弟亦小心奉法惟之信悖逆亂常滅絕天理察其近習左右俱義憤不平因密約都統王國棟等共酌機宜之信旦夕就擒乞敕議正法以戒天下爲臣而懷二心者國棟亦上疏自述其與金備尙之璋寧天祚同心密謀狀復代之信母舒氏胡氏上疏曰逆子尙之信怙惡不悛酗酒肆暴殺害善良凌虐官吏甚至奉命出師頓兵不進私回東省遲誤軍機不臣之心久萌謀逆之變可慮恐禍延宗祀不禁飲泣寒心密令都統王國棟等選員擒之請旨正法並收禁其妻耿氏子崇溢乞聖慈垂念先臣忠蓋改令一



子襲爵是時光祖榜選際盛因武宣新復屯兵城外之信入踞城光祖等得國棟檄令兵圍城以永祥士選首告罪款有逮問旨宣示之信之信就逮還廣州上疏辨謂永祥士選以責懲私怨捏款誣陷諸疏並下廷議議削之信爵逮至京鞠訊時藩兵八千在廣西有訛言進征雲南卽分寘戍守者多惶懼逃歸命宜昌阿與賚塔慰遣西征並宣諭曰前尙之信爲屬員張永祥等首告諸不法事朕欲明其虛實故令來京非以所言皆實必欲治以法也平南藩下官兵本朝參養四十餘年世受國恩最爲深厚初無欲行解散之心宜釋去嫌疑各保身家妻子以副朕恩養保全之意七月宜昌阿將逮之信起行藩下長史李天植以發難由國棟白於之信母及其弟副都統之節之璜之瑛誘國棟議事伏兵殺之將軍賚塔率禁旅收捕鞠同謀者自副都統參領佐領至校卒得百餘人天植自服造謀之信辨不知護衛田世雄證之信欲殺國棟使告天植讞成馳奏法司核議之信與之節之璜之瑛天植凡同謀者依律擬斬籍沒之信母舒氏胡氏怨國棟代訴之信謀逆應坐同謀之孝之璋及諸幼弟雖不同謀應革職枷責得旨平南王尙可喜航海歸誠效力行間久鎮粵東著有勞績及吳逆叛反堅守臣節不肯從逆爲逆子

尙之信所迫憤恨殞命朕每念及深爲憫惻其妻舒氏胡氏從寬免死並免籍沒尙之孝尙之璋等免革職枷責皆令赴京尙之信不忠不孝罪大惡極本當如議處斬念其曾授親王姑從寬賜死尙之節尙之璜尙之瑛革副都統與李天植等俱卽處斬應籍資財留充廣東兵餉是年九月之信賜死廣州永祥士選優敘擢用世雄以不先舉發坐杖流上復傳諭宜昌阿曰尙之信雖經犯法其妻子不可凌辱應遣人護送還京向聞廣東有大市小市之利經藩下人霸占可會同巡撫詳察仍歸民間其藩下所收私稅每歲不下數百萬當盡充國賦以佐軍需又各省商販欲倚藩下投入者甚多應察出各復其舊尋命改隸藩下十五佐領於漢軍駐廣東別設將軍副都統轄之之信親屬俱歸旗

### 嚴自明

嚴自明陝西鳳翔人明參將本朝順治元年大兵至陝西自明降三年二月防守漢中招降張獻忠僞將李旺張顛等九月生擒僞將張黑子斬首四百餘陝西總督孟喬芳令率兵收川敗僞先鋒張定邦都督劉孝招降官三十餘員時西充李巽德稱明唐王隆武年號自明敗之復擊斬賀珍餘賊於陽平三年肅親王豪格

進取四川以自明爲副將駐防川北保寧四年招撫權演等於廣元敗趙榮貴於劍州梓潼五年二月明桂王總兵譚洪攻保寧自明斬獲甚衆四月授保寧總兵加都督僉事七年蓬州白蓮教李希先楊允等倡亂自明剿擒之八年剿撫萬山寨賊趙大光平之加署都督同知十一年改守永寧總兵十二年九月招降桂王將軍楊國明總兵武國用十月擢江西提督敍功加左都督康熙七年裁缺九月補廣東提督十三年七月潮州總兵劉進忠叛逆黨陳奠等分據程鄉縣自明分兵擊敗之降僞守備張奉寰得旨嘉獎九月逆藩吳三桂以僞劄遺之自明舉首下部議敍十月授三等輕車都尉世職以其子武進士梅署守備十五年二月尙之信叛應三桂自明從逆十一月糾衆逼南康巡撫佟國楨將軍覺羅舒恕等敗之破其營十七自明退據南安十六年四月致書總督董衛國乞降得旨嚴自明若悔過歸正來迎王師當赦其罪仍前錄用五月自明降後之信亦降疏言自明係吳逆舊屬不知軍旅今粵東初復兵心甫定若復令自明統轄恐兵心未能安貼上命自明以將軍赴廣州閒住尋疏請回京從之十二月授鑾儀使未幾病死

孫延齡



孫延齡遼東人父龍隨孔有德來歸隸漢軍正紅旗授二等男爵世祖章皇帝時封有德定南王鎮廣西龍爲部將有德以女四貞字延齡及有德殉節桂林龍亦歿於陣予卹典以延齡襲二等男復加一雲騎尉時四貞尙幼特賜白金萬兩歲俸視郡主旣長適延齡康熙五年五月聖祖仁皇帝命延齡爲鎮守廣西將軍統轄有德所遺部衆駐桂林八月禮部議給四貞儀從得旨定南王爲國捐軀又復絕嗣世祖章皇帝命其女視郡主食俸今請給儀從如議行後不爲例時吳三桂以平西王爵留鎮雲南凡滇黔官吏悉擅除授延齡效之漸驕縱無忌憚十一年九月御史馬大士疏劾延齡擅銓武職爲部臣駁奏延齡復徇私瀆請乞賜嚴敕以爲恣肆不臣者戒疏下部察議申禁之十二年七月部下都統王永年副都統孟一茂參領胡同春李一第等列延齡贓款及縱屬殃民城門晝閉鄉民不敢入城移牒總督金光祖光祖以聞上遣侍郎勒德洪赴粵審理御史鞠訊疏言延齡職位本微祇因配定南王女是以命之掌管藩兵終屬外姓無承襲勳爵之例乃駐粵以來凌辱職官擅補營員近復委其兄孫延基總管部兵軍心未能貼服訐告紛紛乞敕延齡還京其部兵或歸隸入旗或仍令駐防遣將軍統轄疏下部確

議以延齡既爲永年奏劾特遣大臣往勘應俟讞成再議既而勒德洪翰訊永年所劾屬實請治延齡罪得旨寬免十二月吳三桂反上以廣西境隣貴州授延齡爲撫蠻將軍命與都統線國安固守疆圉會同廣西巡撫馬雄鎮提督馬雄禦剿賊寇三桂以逆書誘之十三年二月延齡遂據桂林叛殺王永年孟一茂胡同春李一第等以兵圍巡撫廨署執雄鎮及其家屬幽寘之事聞詔削延齡職宣諭中外曰逆賊孫延齡素無才能功績祇緣定南王孔有德航海歸誠出師盡節世祖章皇帝憫其遺孤不忍分離仍以所屬官員統之養贍加恩概從優厚迨朕御極念孫延齡既配王女應量加寵榮故授爲將軍使之管理定南王所遺官兵鎮守粵西在孫延齡叨冒崇階自應恪恭職掌殫忠報效乃歷任以來屢有過犯經王永年等劾奏賊罪部議從重處分朕猶以定南王之功曲加貸宥仍令管兵如故近復賜以撫蠻將軍印委任有加恩寵罔替不意其包藏禍心背恩忘義連結逆賊吳三桂徑行反叛國法難容宜加顯戮今削其將軍職銜大兵指日進剿立正典刑但念兩營官兵係定南王舊人受恩累朝忠義素著必不甘心從逆隳棄前勳其有能斬孫延齡投獻軍前者優加爵賞或以兵馬城池納款者論功敘錄或



力有不逮自拔來歸者亦免罪收用至父兄子弟現在京城直隸各省者槩不株連毋得心懷疑畏自罹法網負朕好生之意四月延齡疏言滇黔告變臣兩疏具報因桂林重地臣奉諭集兵守禦屢移咨督臣金光祖居中調度提臣馬雄赴省面商機宜不料督提二臣誘臣部下都統王永年等謀殺害臣幸一朝敗露本旗官兵遂將王永年等翦除督臣金光祖以奸計未遂誘臣作叛誑疏上聞前蒙賜臣撫蠻將軍敕印賚至肇慶督臣執留不發臣未克祇受今衡永之間滇兵數萬與粵爲隣臣固不惜頂踵勉圖報效乃督提二臣視臣如讐是棄臣於陷穽之中也此臣不得不伸之苦衷惟希睿鑒疏入上諭平南王尙可喜及金光祖馬雄曰孫延齡奏督提二臣誘其都統王永年謀害之故不得已翦除王永年此潛通吳逆飾詞誣奏耳然孫延齡雖叛其所部兵曾隨定南王效力國家參養有年恐大兵至日概行誅戮朕心有所不忍前有旨如孫延齡改過來降亦從寬宥爾等不可以此遂緩進剿必孫延齡果悔罪歸誠乃受降具奏又諭可喜光祖曰孫延齡有可剿之勢卽議進剿若未可速進候大兵來粵協力剿滅是時逆藩耿精忠自福建寇掠江西三桂踞湖南諸郡糾賊犯袁州吉安大兵與賊相持未能達粵延



齡遂自稱安遠大將軍移牒平樂梧州諸郡煽誘從逆未幾馬雄亦叛附三桂線國安病死粵西守土文武官或望大兵赴援或被羣賊脅從不復與延齡爲敵三桂徧給僞冊印以叛黨傅奇棟爲僞巡撫李迎春爲僞布政使程可則爲僞按察使延齡招致萬羊山賊衆參以舊軍分設五旗每鎮兵二千縱之寇擾郡邑旋僭稱安遠王有傅宏烈者舊爲慶陽知府當三桂未反時舉發三桂不軌事坐誣謫戍蒼梧延齡旣叛宏烈欲假事權集兵圖恢復受三桂僞職爲信勝將軍與延齡友善數以大義陳說延齡猶豫未決妻四貞約宏烈往迎大兵至卽反正十六年宏烈迎大兵於江西先致書將軍舒恕言四貞欲延齡歸順曾告宏烈謂無刻不以隆恩豢養爲念若賜赦赦延齡罪封四貞爲郡主則粵西可定舒恕以情入奏詔督捕理事官麻勒吉相機招撫授傅宏烈廣西巡撫合大兵進征先是三桂屢脅延齡助寇湖南延齡以部衆不從報謝至是將歸順爲三桂偵知使從孫世琮糾賊逼桂林誘執延齡殺之四貞善騎射能殺賊賊相戒無犯留僞將軍李廷棟於桂林通聲援凡延齡部衆聽其舊將統之世琮別掠平樂潯州橫州南寧爲大兵所敗中傷死宏烈至平樂延齡舊將劉彥明徐洪鎮徐上遠等擒斬李廷棟逐

走賊衆偕線國安子成仁率桂林官吏兵民歸順四貞還京師

馬雄 子承蔭 郭義

馬雄陝西固原人廣西提督馬蛟麟之族子蛟麟撫爲子順治八年襲一等輕車都尉世職九年充定南王標下左翼總兵官十年敍隨征湖南廣西軍功加都督同知十一年九月授二等男鎮守廣西時明桂王朱由榔據安隆遣其將李定國擾南寧十二年定國令其黨李先芳廖鳳等據藤縣雄擊破之擒其所授知府江炎十三年二月靖南王耿繼茂兵抵南寧定國奔南安雄追擒其陽春伯李先芳斬其參將杜紀俘獲無算四月加右都督十五年定國遣其黨閻維龍趙延生等陷橫州防守都司趙連城退屯貴縣雄率兵馳援維龍等棄城遁遂復橫州十六年加雲騎尉世職十七年廣東巡按御史張問政劾雄庇商抗課欠鹽餉部議降二級照舊管事十八年授廣西提督康熙十三年二月孫延齡叛應吳三桂廣西震動雄邀執三桂僞官左江鎮總兵官郭義並舉首三桂逆書得旨加獎義福建海澄人先由海道來降以湖廣鄖陽鎮總兵移鎮左江至是偕雄同守柳州上諭馬雄等曰保固粵西實爾等是賴今大兵已抵武昌倘賊兵犯武岡寶慶爾等率

所部官兵進剿其後大兵迎擊於前自可剋期撲滅尙其謀定後舉以副朕倚任至意六月雄疏言延齡賊衆不下萬五六千人臣雖堅守柳州衆寡不敵乞發兵應援上命平南王尙可喜總督金光祖酌發廣東兵赴援九月雄及郭義俱叛降三桂於是廣西全陷十五年二月雄因高雷兵變率賊犯廣東連陷州縣未幾尙之信叛廣東全陷十二月義偕廣東從逆提督嚴自明進逼南康連兵十七營江西巡撫佟國楨將軍舒恕等擊敗之義等退據南安十六年五月將軍莽依圖進攻南安自明以城降義走廣西先是撫遠大將軍圖海疏言馬雄陷賊其母及族人俱在固原今雄母欲令其孫承先持書赴廣西招降詔給承先遊擊銜遣赴廣西旋命督捕理事官麻勒吉齎敕赴簡親王喇布軍前諭馬雄曰爾世受國恩鎮守西粵勞績素著自吳三桂孫延齡相繼背叛整兵防禦力保孤城邀執僞差矢心報國爾之忠貞朕久洞悉後緣賊氛逼近援絕勢單當力難持守之時爲暫爾自全之計茲各路大兵剿撫並用每念粵西變叛各官陷賊自拔無由以爾據忠有素追溯前勞尤深軫惻今特頒專敕宣諭爾等果翻然悔悟棄逆效順將爾已往之罪並所屬官吏悉行赦免若能剿寇立功仍加恩優敘爾其無懷疑懼以負



朕篤念舊勳至意十七年正月將軍莽依圖疏言雄病死維容諭麻勒吉等曰馬雄雖死其餘黨尙踞粵西著仍隨簡親王偕行以昭朕赦罪論功之意十八年六月之信奏雄子馬承蔭率僞將軍郭義及僞文武官繳敕印來降八月承蔭請效力自贖諭曰原任廣西提督馬雄之子馬承蔭不忘國恩歸誠可嘉應授承蔭伯爵給與將軍敕印隨大兵剿賊其同來歸附文武官弁酌量給筭以示鼓勵旋給義總兵銜協守南寧僞將軍吳世琮犯南寧築長圍守之城中食且盡義嚴守備乘間出戰賊屢卻而復合會將軍舒恕來援義出城策應大破賊兵世琮負重傷遁將軍莽依圖疏言義固守南寧非他人歸誠者比請仍授左江總兵官從之十九年正月承蔭標兵以闕餉譟簡親王喇布戡之承蔭言於簡親王以舊設五營兵少請增援剿二營營各千人喇布以聞諭曰將軍標下無設七營例馬承蔭仍立五營兵五千參將守備各官聽其選擇會剿雲貴二月承蔭復反給傅宏烈登舟遣兵襲破其營簡親王喇布還保桂林上命湖廣綠旗兵二千速赴簡親王軍前協剿五月總督金光祖擊承蔭於武宣敗之將軍莽依圖又敗之於隆安六月簡親王喇布至維容進取柳州承蔭率僞文武官弁詣軍門降諭曰初馬承蔭及

所部兵背叛蹂躪江上擾攘生民罪惡已極後見湖南平定廣西恢復窮迫請降朕欲生民早獲寧息悉貰前罪封以伯爵授爲將軍仍令管兵標員亦分營補用及大兵規取雲貴無故背恩復叛致誤征討大事今因兵敗勢蹙窘急歸降其押解來京承蔭逮至京論死御史孫必正論郭義應連坐諭曰近日言官參奏郭義朕念從賊者前既有旨寬宥又加誅戮於前旨未符朕於大惡決不輕恕其餘若盡論死不太甚乎凡隨從失節者令革職放回原籍以示寬典義還籍尋死

### 線國安

線國安遼東人隨定南王孔有德來歸隸漢軍正紅旗崇德元年授二等男爵隨征海外各島及朝鮮順治元年從大軍入山海關擊走流賊李自成二年隨有德破自成於潼關授定南王前鋒統領移師下揚州渡江克江陰縣三年自成死餘黨李錦郝搖旗等分據湖廣國安隨有德至岳州督兵征長沙衡州永州寶慶所向克捷時明桂王朱由榔與其將胡一青等由武岡竄桂林其貴溪王朱常滂恢武伯向登位章平伯周金湯萬安伯張士舉樂平伯蓋遇時興平伯牛萬才軍門王順祖向文明總兵林國瑞等猶擁衆據湖南有德奉命專征國安從五年二月

克沅州擒常漉登位進攻辰州及石阡思南平溪清浪皆下之擢定南王左翼總兵加都督同知七年正月克新田縣斬金湯二月克新寧縣擒順祖國瑞文明降四月克桂陽降士舉遇時八月克黃陽山斬萬才進攻桂林克之由榔遁八年二月連克柳州梧州潯州平樂南寧太平思恩等府廣西平有德鎮桂林命國安分駐南寧九年擢廣西提督會李定國糾衆陷桂林有德死之國安家屬遇害平樂梧州潯州繼陷國安率兵復梧州又偕左翼總兵馬雄右翼總兵全節復潯州遣游擊戴成功等復平樂留雄守十年正月偕全節復桂林四月胡一青糾衆數萬來犯國安拒之斬級三千生擒二百五十餘城得全收集難丁家口二千一百九十餘給衣食安置投誠弁兵敘功加左都督七月定國復犯桂林諸郡縣多騷動國安悉力守戰獲其賊衆火藥定國敗遁上嘉其功加太子太保十一年九月封三等伯授衆官總領駐鎮桂林十二月由象武追定國至界化土司復賓州橫州潯州南寧思恩太平等府十二年四月給征蠻將軍印統攝猺獞五月回桂林九月賜鞍馬弓矢十五年正月命同征南將軍卓布泰取貴州四月由慶遠復柳州之融縣懷遠羅城慶遠之天河荔波河池南丹六月抵貴州獨山州進趨都勻降



定國衆數萬十一月由羅延河追至羅田斬獲無算越日大敗定國於涼水井又敗之水寨山口定國遁復安隆新城十六年正月同三路大兵取雲南二月追剿定國至永昌騰越戰磨盤山大破之定國遁入南甸遂駐沙木河督造浮橋三月旋雲南省城七月奉旨班師回粵十二月靖南王耿繼茂移鎮廣西諭國安率所部來京十七年二月命爲廣東都統四月諭兵部廣西巖疆當厚集兵力鎮守都統線國安免赴廣東統領定藩下官兵駐廣西應行事宜速議具奏尋議國安應以都統太子太保三等伯鎮守廣西加征蠻將軍總管定藩下官兵再撥與綠旗兵三千駐桂林得旨線國安授廣西等處鎮守征蠻將軍康熙五年以老乞休從之十二年逆藩吳三桂反廣西鄰貴州上以國安素得軍心授都統與將軍孫延齡提督馬雄固守禦剿十三年二月延齡據桂林叛國安與雄相繼從賊十五年奉旨馬雄屢請援師因不卽至勢迫從賊線國安爲延齡逼叛伊等皆受國厚恩大將軍簡親王酌議遣人招撫尋遣督捕理事官麻勒吉賚敕招之未抵桂林國安病死子成仁同延齡僞將劉彥明等歸順

姜瓖

姜瓖陝西榆林人明宣化鎮總兵流賊李自成至居庸關瓖迎降本朝順治元年五月睿親王多爾袞定京師瓖乘機入大同殺流賊僞總兵張天林柯天相等據寧武代州沿邊諸邑奉表投誠睿親王令管總兵事瓖請以明棗強王裔朱鼎珊副藩大同奉明宗社睿親王切責之八月命佩征西前將軍印鎮大同十二月隨英親王阿濟格征陝西保德寧武界斷流賊糧道榆林東西各堡聞風歸順英親王以瓖統攝宣化大同諸鎮兵馬招撫屬邑二年正月僞總兵高一功自延安出犯保德寧武瓖率所部並調蒙古兵迎擊斬獲無算一功遁去六月入覲尋還鎮五年十一月喀爾喀部衆入邊上遣英親王同端重親王博洛等統兵駐防大同總督耿焯率司道各官出城儲待芻糧瓖聞大兵至疑襲已遂據城叛焯奔陽和瓖殺其家屬殆盡十二月僞稱大將軍易冠服遣其黨姚安入朔州明廢弁萬練乘變襲踞偏關瓖卽以練爲僞偏關道寧武岢嵐保德相繼失守劉遷者亦明廢弁也糾亡命受僞左大將軍職略鴈門關及代州繁峙五臺等邑太原告警巡撫祝世昌連疏請兵上遣都統巴顏副都統鄂洛索臣率禁旅赴英親王軍合圍大同先齋敕諭瓖曰前因有事蒙古故命王等來大同如果爾等有罪當誅安用此

詭計爲此必有奸人煽惑離間如能悔罪歸誠仍當宥過恩養瓌負固如故復遣其黨姚舉等四出劫掠明參將王永強據榆林與瓌通謀自稱招撫大將軍殺延綏巡撫王正志及靖邊道夏時芳等窺西安六年正月上遣敬謹親王尼堪鎮國公喀爾楚渾輔國公穆爾祜率禁旅赴太原都統庫魯克阿賴分兵敗賊於石嶺關賊退據忻州復進克之追剿賊衆屢捷斬僞巡撫姜輝三月睿親王統兵出居庸關拔渾源州進薄大同城遣諭瓌降許自新瓌乃託言軍民脅之起事欲以自解請免罪王怒其傲謾益治攻具會豫親王多鐸薨睿親王還京賊援兵五千餘由大同北山至立兩營逼我軍瓌亦率千餘騎出城搏戰端重親王督護軍統領鼇拜及諸將分兵擊破之瓌敗入城是時都統李國翰等已擊敗王永強於同官延綏諸逆漸平惟廢官李建泰等尙與瓌遙應四月大軍克左衛上遣貝子務達海等至軍中更代英親王入京五月萬練劉遷復由清源徐溝分道犯太原署副都統洛碩卦喇等率駐防兵與祝世昌合擊八月遷敗走黃香寨大兵圍破之遷伏誅偏關岢嵐相繼復練自焚死餘賊爲大軍所殺及自拔來歸者甚衆瓌勢日窮蹙上仍命英親王往圍大同城中食盡死傷枕藉僞總兵楊振威及僞官裴季



中等謀斬瓌竝其兄琳弟有光首出降遂復大同明年建泰等亦伏誅

### 李建泰

李建泰山西曲沃人明天啟五年進士官至大學士崇禎末自請督師西剿流寇及京師陷建泰率殘卒數百輦餉銀入保定城賊攻城甚厲建泰倡言曰勢不支矣姑與議降書牒迫署知府邵宗元用印宗元不從建泰中軍副將郭宗杰等內應賊城陷建泰出降順治二年三月詔錄崇禎舊臣五月起授宏文院大學士尋充纂修明史總裁官賜玲瓏鞍馬越日賜黃金二百兩白金千兩八月賜品服貂蟒各一襲十二月祁州知州孫率禮欲揭其前任張宏發虧帑事建泰納宏發賄致書率禮囑止之率禮直揭通政司發建泰書爲左證建泰謀之通政使李天經寢其事率禮候逾月不得旨再控於刑部逮問得實天經鑄二級建泰罷歸四年三月有參將李大生者訐奏建泰鴟伏曲沃招納亡命謀不軌部鞫無據梟責大生建泰免議六年八月山西土賊聚寇曲沃泰通謀以書結翼城令何斯美爲援斯美縛使者首於知府徐來麟及曲沃賊敗建泰遁去巡撫祝世昌以聞得旨逆賊李建泰負恩倡亂深可痛恨著地方官嚴行緝獲時叛鎮姜瓖據大同建泰復

逆

臣

傳 卷八十

三十六

合賊將李大猷房箕尾等馬步賊兵千餘據太平遙應之會謙郡王瓦克達等討平潞安平陽澤州諸路建泰猶負固不下十一月大軍圍太平勢迫乃降七年五月伏誅親屬逆黨竝論如律籍其家

### 金聲桓

金聲桓遼東人初爲明總兵黃龍裨將與大兵戰於旅順龍敗死聲桓遁去後復隸寧南侯左良玉部下爲後營總兵本朝順治二年五月英親王阿濟格追剿流賊李自成至九江聲桓隨良玉子夢庚投誠王奉詔班師聲桓請收江西郡邑以自效王令以提督撫剿總兵銜挂討逆將軍印聲桓遂自九江傳檄下南康南昌移兵駐南昌十月授鎮守江西總兵時明唐王朱聿鍵據福建自號隆武江西郡邑多附之復有益王朱由本據建昌永寧王朱慈炎據撫州聲桓遣副將王體忠擊走由本擒斬其監軍道王養正布政使夏萬亨知府王域推官王允浩史夏隆等復遣副將王得仁圍撫州慈炎棄城遁得仁追殺之建昌撫州袁州相繼歸順三年敘投誠功賜冠服玉帶鞍馬先是聲桓自旅順敗遁其妻子兄弟竝爲大軍所獲太宗文皇帝命贍養之至是聲桓疏請取其孥得旨允行又疏言臣原銜提

督撫剿今更爲鎮守體統迥異請如原銜賜敕印節制文武官便宜行事部議江西寇氛尙熾宜予敕印改鎮守爲提督剿撫事宜會同撫按聽招撫大學士洪承疇裁決我朝無鎮臣節制文官及便宜行事之例聲桓所請冒昧申飭詔如議會侍郎孫之獬以兵部尙書銜招撫江西於聲桓所置官屬多更易聲桓疏劾其劄委專擅之獬坐褫職是年聲桓遣兵克贛州四年克吉安廣信屢剿滅明宗室及故官之踞城匿山寨者江西郡邑底定聲桓自以功高未酬封爵懷叛志王得仁者舊爲自成裨將所稱王雜毛者也助聲桓攻戰久亦自負其功以敘錄弗及心怏怏五年正月聲桓與合謀糾衆據南昌叛圍巡按董學成廨學成遇害邀巡撫章于天於江中拘繫之聲桓僞稱豫國公稱得仁爲建武侯詭云明唐王未死分牒授職書隆武四年遣人四出約期舉兵廣東提督李成棟叛應之得仁偕僞將白之裔潘永禧吳高等分陷南康饒州九江聲桓謀趨南安與成棟通聲援先集衆圍犯贛州三月巡撫劉武元總兵胡有陞嬰城固守屢出兵敗之勢稍沮上命征南大將軍譚泰都統何洛會進討復九江南康饒州進剿南昌聲桓引衆還救爲武元有陞追擊斬殪過半南昌僞守將宋奎光郭天才僞先鋒劉一鵬以迎戰



大兵獲勝報聲桓喜趨得仁速進大敗於七里街乃肅撤屯兵入城大兵鑿濠築壘久圍之六年正月攻城北門潛分兵城南樹雲梯破城斬得仁聲桓中矢投水死磔其尸奎光天才一鵬及諸叛黨皆伏誅

章于天

章于天遼東人崇德六年舉人任禮部啟心郎順治元年七月授山東兗東道駐沂州河道總督楊方興令同河道朱國柱率兵剿滿家洞賊屢戰皆捷會肅親王豪格統師至以于天爲嚮道攻毀賊巢斬獲無算大兵徇曹州明鎮將劉澤清家在焉城中居民既歸順訛言澤清將引兵殺掠復謀遷避于天輕騎入城綏輯之民以無恐復籍澤清家財充軍餉方興奏其能請改充西道駐曹州二年七月部推湖廣荆南道方興復以其練習河務奏留之三年十月擢江西巡撫江西爲明藩封地明亡其宗室逃匿者諸廢紳每挾以號召人衆踞城邑抗拒大兵總兵金聲桓偕副將王得仁等攻剿踰年頗有功于天既之任復檄副將徐文燦湯執中劉一鵬等分剿瀘溪東鄉吉水龍泉浮梁諸寨獲明瑞昌王朱統鑿等復擒斬其總兵王來八盛明世兵部郭應衡郭應銓等于天以諸將功次悉由己論定日驕

縱索賄屢與聲桓隙且謾罵得仁聲桓久懷叛志得仁復憊憊之時郡邑頻罹水旱于天假平糶名搜括諸富室或誣以隱匿廢藩莊田拷索饜欲乃已五年正月于天以巡覈莊田率數十騎赴瑞州得仁向聲桓曰此非獨索賄也其將徑往贛州合鎮兵圍我乎聲桓遂與偕叛據南昌糾黨襲于天於江中挾之歸餌以多金使董造礮車于天遂從賊逾數月大兵圍南昌得仁拒戰大敗聲桓懼于天泄其謀乃殺之

李成棟 袁彭年

李成棟山西人少從高傑爲盜號李訶子後隨傑降明累官總兵守徐州本朝順治二年四月豫親王多鐸兵定江南成棟率所部降從大軍下揚州江寧復隨貝勒博洛渡江分徇太倉嘉定南匯上海皆有功十一月授吳淞總兵明故官荆本徹據崇明成棟攻克之本徹竄入海三年二月敘投誠功賜冠服玉帶鞍馬尋詔博洛爲征南大將軍由浙江進取福建成棟隨征定邵武汀州漳州十月博洛承制以總兵佟養甲署兩廣總督成棟署兩廣提督合軍征廣東是時明唐王朱聿鍵弟聿錫據廣州桂王朱由榔據肇慶成棟先下惠州潮州獲惠州道印卽用其

逆

臣

傳 卷八十

三十八

印給牒廣州報無警使不設備潛師爲賈人裝襲破廣州擒聿鏘及明宗室王世子十三人俱殺之四年由榔退入廣西其大學士陳子壯尙書張家玉等擁衆踞肇慶三水新寧東莞新安等城成棟與養甲次第剿平養甲令成棟進取廣西克梧州明大學士丁魁楚乞降成棟使部將杜永和殺之岑溪掠其貲招撫潯州平樂明總兵李承志李明忠皆以城降遂趨桂林軍北門由榔使大學士瞿式耜守城不能下甘竹灘賊渠余龍連結子壯家玉攻肇慶廣州養甲自廣州告急成棟收軍還援擊走之子壯家玉俱死是年六月授廣東提督加左都督銜先是成棟與養甲共定廣東以部衆爭功漸生隙至是因養甲奉詔總督兩廣而已僅得提督廣東疑養甲有意抑之布政使袁彭年陰勸之叛五年正月江西叛鎮金聲桓遺書招成棟會贛州守將高進庫告急於廣東養甲令成棟赴援彭年故不發餉養甲趣之亟成棟遂擁衆反納款由榔迎之入廣東由榔授成棟惠國公爵使其黨戕養甲及巡按劉顯名潮州總兵車任重等於是廣東郡邑皆從叛八月由榔至肇慶以成棟子元允爲錦衣衛指揮使永和伯爵彭年爲左都御史彭年公安人明進士先以給事中降於大軍至是復叛附由榔與由榔舊臣劉湘客丁時魁



金堡蒙正發相結攬威權倚元允爲助時號彭年等爲五虎元允爲護法韋馱九月成棟糾衆十餘萬分路出信豐南安犯贛州南贛巡撫劉武元總兵胡有陞出戰連破賊營成棟退踞信豐六年正月大軍破南昌誅聲桓乘勝進圍信豐副都統覺善先登破城賊潰遁我兵追躡之成棟馬蹶墮水死由榔以永和爲總督代成棟守廣州元允爲中軍都督授南陽侯爵成棟次子建捷爲威武將軍前軍都督七年正月平南王尙可喜靖南王耿繼茂兵下廣東由榔走梧州使元允踞肇慶建捷人廣州與永和合力抗拒成棟嘗增築廣州城兩翼設礮臺臨江永和等恃險死守十一月攻拔之建捷奔肇慶永和奔瓊州元允建捷尋遁廣西從由榔走南寧旣而出掠欽州繼茂擒之元允建捷並伏誅八年九月永和以瓊州降充隨征左都督康熙元年十二月授福建右路水師總兵官六年閏四月永和死

### 鄭芝龍

鄭芝龍福建南安人明末入海上顏思齊黨爲盜後受撫累官總兵本朝順治二年大軍定江南芝龍弟鴻逵爲明福王朱由崧總兵守瓜州兵敗南還與明閣部黃道周擁立唐王朱聿鍵於福建封芝龍爲南安伯晉平國公芝龍嘗亡命日本

逆

臣

傳 卷八十

三十九

娶倭婦生子森以厚幣迎歸引謁聿鍵賜姓朱改名成功封忠孝伯而芝龍以聿鍵立非己意日與文臣忤又以我招撫大學士洪承疇御史黃熙允與同里通音問密謀歸款三年貝勒博洛師至福建斬聿鍵以書招芝龍降芝龍喜率所部降軍門時成功年二十三阻之不從遁入海四年博洛班師以芝龍歸詔隸漢軍正黃旗芝龍子六長卽成功先爲南安生員後冒稱明裔次世忠世恩世廕世襲世默芝龍入京惟世忠從成功糾衆得數千人據南澳遙奉明桂王朱由榔年號自稱招討大將軍鴻逵據白沙族人鄭彩據廈門鄭聯據梧州互犄角騷擾沿海郡縣五年敍芝龍投誠功授三等子爵是年成功陷同安進犯泉州總督陳錦等以兵援成功遁六年由榔遣使封成功延平公七年成功擾廣東潮州爲總兵王邦俊擊敗還自揭陽襲奪彩軍聯度不敵亦避去成功始據廈門金門八年巡撫張學聖偵成功復擾潮州遣總兵馬得功襲廈門攬其貲成功還復連陷同安漳浦詔安南靖平和海澄長泰進圍漳州九年三月錦赴援戰於江東橋不利退屯灌口爲家奴李忠刺死十月都統金礪援至成功敗遁海澄先是芝龍請留弟芝豹及子世恩守其祖栖庭父士表墓母妻妾及諸子隨入京並請改隸鑲紅旗漢軍

詔允所請仍官世忠爲二等侍衛至是上命芝龍書諭成功及鴻逵降許赦罪授官並聽駐原地方防剿浙閩廣東海寇往來洋船令管理十年詔封芝龍同安伯成功海澄伯鴻逵奉化伯授芝豹左都督使至閩芝豹隨母入京成功不受封擾如故十一年侵漳州千總劉國軒叛獻城芝龍請令世忠偕使往撫成功益驕要地及餉不薙髮書詞悖慢命世子濟度爲定遠大將軍赴閩防剿是時成功分所部爲七十二鎮僞設六官理事假由榔號便宜封拜十二年正月左都御史龔鼎孳疏劾芝龍蒙叅養者十年彌桀驁家僕往來海上信息頻通子弄兵海壩父高枕都下釀禍之根請早除而巡撫佟國器亦獲芝龍與成功私書上之詔革芝龍爵下獄八月成功陷浙江舟山聞大軍南來遁十二月芝龍僕尹大器首其父子交通狀敕芝龍自獄中以手書招成功不降卽夷其族十三年嚴禁沿海奸民與彼販米接濟初成功令僞將蘇茂寇揭陽敗歸惡而殺之至是謀仍北犯留其黨黃梧守海澄梧以茂見殺懼及斬僞總兵華棟以城降詔卽封梧爲海澄公駐漳州梧乃悉發鄭氏墓斬成功所置五官商之爲漳民害者是冬濟度班師成功陷閩安鎮犯福州轉擾浙江温台等郡十四年二月梧薦降將施琅同擊之琅晉江



人初爲成功部將後投誠父及弟姪均被殺梧知瓊智勇故薦之於是擢瓊副將三月梧具揭兵部請速翦芝龍以絕盜根詔流芝龍及其家屬於寧古塔梧等謂不殺芝龍成功之心不死海上諸僞將投誠之意不決總督李率泰以聞上嘉納之是年鴻逵病死成功陷台州十五年陷温州由榔遣使封成功延平王十六年五月成功連艘北犯踰崇明陷鎮江順流犯江寧八月舟至觀音門值貴州凱旋大軍浮江下敗其前鋒成功率率水陸衆數萬圍江寧列巨艦阻江南北要路江蘇巡撫蔣國柱總兵梁化鳳赴援夾攻敵大敗陣斬僞總統余新生擒僞提督甘輝等俘斬甚衆餘黨退犯崇明遊擊劉國玉等復擊敗之成功南遁十月命將軍達素總督李率泰分軍一出漳州一出同安擣廈門尋以戰艦未修引還十七年命靖南王耿繼茂由廣東移鎮福建都統宗室羅託爲安南將軍督剿十八年諭遷瀕海民入內界增兵守邊成功既自江南敗歸又接濟路絕由榔已走緬少聲援勢日蹙乃覬取臺灣以自保臺灣舊爲荷蘭國紅毛番所有芝龍與顏思齊等騷擾時屯於此後仍歸荷蘭至是成功舟抵鹿耳門阻風濤不得入潮驟漲丈餘遂登岸荷蘭人拒之成功給曰此地我先人故物珍寶聽爾載歸地仍還我荷蘭引

去成功入據之其留守銅山僞都督萬儀萬祿等赴梧軍降是冬芝龍及子世恩世蔭世默等俱伏誅康熙元年潮州總兵許龍擒成功從弟成賜於廈門成功之入臺灣也長子錦留廈門與乳媪通生子成功怒遣僞刑都事洪卯禮都事黃副殺錦及錦母董氏且遣僞總兵周全斌盡殺諸僞將留者於是諸僞將擁立錦爲平國公以兵拒殺卯副囚全斌成功聞之恚甚發狂嚙指死臺灣諸僞將亦以成功弟世襲爲招討大將軍尋爲錦所逼奔泉州降授左都督繼茂率泰以成功既死諭錦降不從會錦殺其從伯父鄭泰於金門泰弟僞同安伯鳴駿及泰子賡僞永城伯光緒均赴泉州降鳴駿授遵義侯續緒慕恩伯賡左都督諸來歸者各授爵二年六月詔檄荷蘭夾板船同剿廈門金門兩島於是繼茂率泰簡投誠軍及荷蘭船出泉州提督馬得功出同安梧及提督施琅出漳州十月大軍克廈門敵潰琅以水師同荷蘭衆進擊斬千餘級乘勝克金門及嵵嶼錦與僞忠明伯周全斌宵遁尋犯雲霄鎮總兵王進功擊破之三年正月僞都督杜輝獻南澳授左都督全斌亦降授承恩伯錦與僞永安侯黃廷等擁衆保銅山三月繼茂率泰進攻梧琅先後以兵出八尺門黃廷及僞將軍翁求多等率衆三萬降遂拔銅山焚之



獲仗戰艦無算錦載其孥渡海入臺灣海上諸島悉平七月上以琅諳海疆軍務特授靖海將軍以承恩伯周全斌及降將左都督楊富爲副將進擊臺灣荷蘭復以夾板船至約期攻澎湖會阻風不得進四年廷議撤兵琅乃還率泰遣知府慕天顏齎詔至臺灣諭降錦請稱臣入貢如朝鮮例上弗許嗣錦陰遣人往來島上與沿海民互市頗接濟爲姦利琅密奏若恣錦生聚是養癰也宜速擊六年召琅來京又陳臺灣可取狀下部議以風濤險制勝難必寢其事十三年耿精忠叛應吳三桂據福建結錦爲援錦乃仍稱由榔年號糾衆渡海而西陷泉州事聞上諭總督郎廷佐以耿逆宜剿海患宜撫會潮州總兵劉進忠叛降於錦錦遂入潮州執續順公沈瑞及其孥精忠復結錦圍漳州梧恙卒子芳度嬰城守以計佯與錦和拒精忠命平南王尙可喜發兵援之十四年芳度計泄精忠圍益急總兵吳淑等叛獻城芳度督家丁巷戰力盡赴井死全家遇害十五年康親王傑書奉命定福建精忠降錦遣僞總統許耀以衆二萬犯福州連營烏龍江康親王遣都統喇哈達等渡江奮擊克其營追奔四十里進兵規復興泉汀漳四郡十六年副都統穆赫林等克泰寧建寧寧化長汀清流歸化連城上杭武平永定十縣喇哈達等



克泉州斬許耀錦棄漳州遁十七年春康親王遣知府張仲舉招諭錦不納其黨復由海澄據玉洲等寨分犯石碼江東橋漳泉復告警僞總督林英犯泉州提督段應舉擊敗之於日湖生擒僞總兵林耀等叛黨吳淑復由石碼登岸海澄公黃芳世同都統孟安擊敗之沈其船副將汪國祥亦敗錦子克塽於廟嶺上以餘黨盤踞廈門諸處勾結山賊煽惑地方由瀕海民爲之接濟詔如順治十八年例遷界守邊四月穆赫林黃芳世會師灣腰樹禦其帥劉國軒失利敵遂陷平和漳平及海澄段應舉穆赫林與總兵黃藍皆死之國軒尋圍泉州命趨諸道軍會剿於是將軍喇哈達賴塔總督姚啟聖由安溪出同安巡撫吳興祚由仙遊出永春提督楊捷由興化下惠安總兵林賢黃鎬林子威以舟師由閩出定海八月大軍復平和漳平惠安泉州圍解啟聖同賴塔等追國軒至長泰大破之於蜈蚣山斬四千餘級九月復同安斬僞副將林欽十月賴塔敗敵於萬松關啟聖捷及副都統吉勒塔布等敗國軒於江東橋又敗之潮溝副都統瑚圖敗吳淑於石街盡焚沈其船羽黨遁據廈門金門命厚集舟師取二島十八年四月以萬正色爲水師提督國軒之遁也啟聖遣人入島招之弗從啟聖因疏言鄭錦以臺灣爲穴必不降

招撫無益其僞武平侯劉國軒爲彼渠魁請赦罪許授公爵並赦僞將軍吳淑罪許授侯爵若二人解體投誠則錦勢孤海上可立平報聞十月副都統沃申敗敵於東石斬林英擒僞總兵陳深十九年正月正色請以水師攻海壇而令興祚赴同安與啟聖捷督陸路兵規取廈門正色尋分前鋒兵爲六隊逼海壇親統巨艦繼之又以輕舟繞出左右並力攻以巨礮擊破敵船十六溺死三千餘敵悉潰僞將朱天貴遁據南日湄州等澳二月正色追擊至平海澳與興祚師會天貴糾僞將軍林陞據崇武澳正色乘風自平海南下敵迎拒掩擊破之斬僞總兵吳丙僞副將林勳湄州南日平海崇武諸澳悉下天貴降沃申擊其將張志於大定小定連敗之我兵水陸進趨玉洲國軒走廈門僞總兵蘇堪以海澄降啟聖亦分遣總兵趙得壽黃大來隨賴塔擊陳洲馬州灣腰山觀音山展旗諸寨興祚復同喇哈達等由同安追剿至潯尾遂克廈門金門餘黨遁還臺灣八月命於廈門金門留兵鎮守康親王還京二十年正月啟聖興祚疏請展界俾沿海民復業從之是月錦病死僞侍衛馮錫範等以錦次子克塽襲爲延平王其長子克壘被縊死五月上以臺灣敵衆內亂仍命琅爲水師提督同啟聖剋期進剿時續順公沈瑞被繫



在臺灣與僞行人傅爲霖謀內應事泄遇害是冬啟聖與琅議師期啟聖欲用北風由圍頭進琅欲用南風由銅山進議不協二十一年琅請簡水師二萬戰艦三百獨任討擊又言不破澎湖臺灣斷無取理臣請先取澎湖督臣留廈門濟餉允之二十二年春國軒貽書啟聖請如琉球諸國例稱臣入貢啟聖以聞上弗許趣琅進兵時國軒擁衆二萬餘據守澎湖甚堅六月琅軍發銅山入八罩嶼乘南潮攻澎湖斬僞將軍沈誠等七十餘復以大鳥船五十六分八隊奮擊沈其船二百斬僞官三百餘兵萬餘國軒乘小舟由吼門竄去餘衆悉降七月克塽遺僞官鄭平英等乞降琅請頒赦招撫上敕諭鄭克塽劉國軒馮錫範等曰帝王撫御寰區仁覆無外卽海隅日出之邦無不欲其咸登衽席共樂昇平爾祖父自明季以來出沒海洋盤踞島嶼本朝定閩爾祖鄭成功竊據海隅甘外王化以及爾父鄭錦勾引奸徒窺伺內地屢經剿撫頑梗怙終爾方童穉妄思效爾前人竄伏臺灣恃爲窟穴倚險負固飄突靡常以至沿海居民時遭兵燹朕念中外兵民皆吾赤子何忍聽其久罹水火故特命提督施琅選將練兵出洋進剿旋奏報澎湖已克臺灣指日蕩平總督姚啟聖以爾等降疏奏聞又據來使呈乞恩赦朕體上天好生



之德特頒敕旨前往開諭爾等果能悔罪投誠率所屬僞官軍民人等悉行登岸將前罪盡行赦免仍加恩安插務令得所爾等其審圖順逆善計保全以副朕宥罪施仁至意克塽既奉敕遣僞官馮錫珪劉國昌齎送降表琅令侍衛吳啟爵持榜示入臺灣諭軍民薙髮八月琅率大軍入鹿耳門至臺灣克塽及僞武平侯劉國軒僞忠誠伯馮錫範率僞文武官迎降收僞延平王金印一招討大將軍金印一公侯伯將軍銀印五其地設府一曰臺灣縣三曰臺灣鳳山諸羅自鄭氏據臺灣二十餘載至是始入版圖焉是年克塽至京授公爵隸漢軍正紅旗克塽死爵除

劉澤清

劉澤清山東曹縣人明遼東寧前衛守備遷山東都司僉書加參將本朝天聰四年大兵攻明鐵廠澤清來援距鐵廠十五里遇我軍轉戰至遵化入城守敍功遷副總兵五年以侵軍糧被勘令立功自贖尋與昌平總兵陳洪範副將方登化參將祖寬等復登州遷總兵加右都督統兵防漕十年我兵入明昌平澤清入衛駐新城移守通州加左都督太子太師時山東飢民聚盜曹濮尤甚澤清會總兵楊

御蕃剿捕尋鎮山東防海流賊李自成圍開封久澤清以五千人赴援渡河立營與賊持三日拔營歸軍士爭舟多溺死每妄報大捷又詭墜馬被傷得邀賞令赴保定剿賊不從由臨清大掠而南給事中韓如愈嘗劾澤清後奉使過東昌澤清遣人殺之李自成陷燕京明福王朱由崧潞王朱常淓俱避賊至淮安南京兵部尙書史可法議立潞王鳳陽總督馬士英密結澤清及高傑等迎福王立之時議設淮陽廬鳳爲四鎮以澤清鎮淮北經理山東封東平侯恃擁立功干預朝政請以五月改元又請宥故輔周延儒賊禁巡按不得訪拏賊罪又嚴緝故總督侯恂及其子方域福王皆從之兵部侍郎呂大器劾馬士英澤清阿士英指力詆大器陰懷異圖大器乞休去左都御史劉宗周崇禎時以言事罷歸福王起爲原官宗周疏稱時政語侵澤清澤清遂詆其陰撓恢復激變士心竝誣宗周與姜曰廣吳甡等謀危君父又私繕疏連署高傑劉良佐黃得功名上之得功疏辯不與聞傑良佐亦云不知澤清氣沮本朝順治二年四月豫親王多鐸圍揚州都統準塔分兵由徐州趨淮安澤清率總兵馬化豹等五十餘人兵二千船三十迎降九月至京賜居宅衣服授三等子爵五年五月曹縣賊首李化鯨李名讓張學允等擁立

明裔朱鳳鳴養子李洪基爲僞王陷曹縣定陶武城東明等處上命英親王阿濟格往剿擒名讓學允等解京得澤清密通化鯨書許爲內應奏聞得旨劉澤清係世襲一品官破格恩養或出誣陷亦未可定自後不可私遣人往曹州等處如曹州等處人來亦卽送出以防誣陷八月澤清遣人往東明與從子之幹之檜書事覺命內院會同兵部鞠實請治澤清罪得旨劉澤清荷恩至厚待曹縣事平自見明白可任其同妻子居住止將劉之幹等拏解來京九月械之幹及化鯨洪基至鞠化鯨等爲之幹煽誘澤清潛主謀寄書有不可露我姓名語奏入命內院會同六部研訊確議遂磔於市親屬流徙

馬逢知

馬逢知原名進寶山西隰州人明安慶副將都督同知本朝順治二年進寶聞王師南下首先具啟遣使至九江迎降英親王阿濟格隨令招撫安廬池太巡撫張亮總兵楊振宗副將李自春等文武各官及所統兵萬餘人加總兵銜入京陛見賜一品服色併莊田宅地鞍馬有差旋隸鑲白旗漢軍改正藍旗三年從端重親王博洛南征克金華卽令鎮守六年命加都督僉事授金華總兵管轄金衢嚴處



四府七年九月奏言臣家口九十餘人從征時卽領家丁三十名星赴浙東此外俱在旗下距金華四千餘里關山迢遞不無內顧之憂懇准撥取下部知之十一月七賊何兆隆嘯聚山林外聯海賊爲進寶擒獲隨於賊營得僞疏稿謂進寶與兆隆通往來疏請明魯王頒給敕印又得僞示稱進寶已從魯王進寶以遭謗無因白之督臣陳錦以明心跡錦疏奏聞得旨設詐離間狡賊常情馬進寶安心供職不必驚懼八年五月予騎都尉世職九月總統台溫水陸官兵攻魯王部將阮進張名振於舟山大敗之九年四月加都督同知九月率浙兵協剿海上鄭成功十一年二月閩寇魏福賢犯衢州處州進寶剿平之十二月加左都督隨征福建左路十三年遷蘇松常鎮提督十四年九月詔改名逢知十月以江南總督卽廷佐奏命逢知專管陸兵使與水師提督梁化鳳各無統攝遇有警息兩相掎角共圖戰守十六年海敵鄭成功犯江寧連陷州縣梁化鳳擊退之九月部臣劾逢知失陷城池當鎮江失守擁兵不救敵遁又不追剿應革世職竝現任官撤取回旗得旨馬逢知免革職着解任先是戶科給事中孫光祀密糾逢知當海敵犯江寧時竟不赴援及敵復攻崇明爲官兵所敗反代其請降巧行緩兵之計鎮海大將

軍劉之源江南總督郎廷佐蘇松巡按馬騰陞先後疏報僞兵部黃徵明乃數年會緝未獲之海敵今經緝獲解京其姪黃安自海中遣謀陳謹賁緣行賄計脫徵明竝貽書逢知傳遞關節禮科給事中成肇毅亦疏陳逢知通海情形昭著今雖奉命撤回而蘇松兩郡之民受其魚肉侵凌傾家絕命者指不勝屈請卽逮治竝令撫按嚴究黨羽十七年六月命廷臣會鞫以逢知交通海敵擬並誅其子八月上以未得逢知叛逆實事命刑部侍郎尼滿往江南同之源廷佐確審尋合疏陳奏逢知於我軍在沙浦港獲海敵柳卯卽聲言卯係投誠賞銀給食託言令往招撫縱之使還又海敵鄭成功曾遣僞官劉澄說逢知改衣冠領兵往降逢知雖聲言欲殺劉澄反餽以銀兩又遣人以扇遺成功並示以投誠之本又私留奉旨發回之蔡正不卽斥逐竝將蔡正之髮薙短以便潛往且遣人護送出境是逢知當日通敵情事雖未顯著然當敵犯江南時託言招撫而陰相比附不誅彼黨而交通書信兼以潛謀往來已爲確據疏入仍命議政王貝勒大臣核議尋論罪如律逢知伏誅

曹綸



軍不備藏械突入東華門西華門先期果遣其黨至獨石口與綸約適綸奉差赴熱河不見而去而綸長子幅昌先已受賊之纏頭白布及得勝二字口號矣時值上舉行木蘭秋獮之典回鑾至白澗途次報至卽敕步軍統領回京迅速督捕首逆其入城之賊七十餘名已爲官軍殲獲盡淨賊之未入城者亦以次收捕聖駕回京禁城內外肅清安堵首逆清已就擒其黨供綸父子預逆謀捕幅昌訊之得實遂逮綸十一月至京下刑部勘問綸初不承逆黨董綱太證之綸知不可掩始吐實部議綸罪大惡極依謀反大逆律應磔死親屬緣坐上御瀛臺廷訊綸俯首服罪上如部臣議綸及其子幅昌俱磔於市懸首示衆次子重慶三子鶴齡皆斬同日伏誅叔廷琦兄維姪咸亨亦坐斬命改爲斬監候入本年朝審情實綸妻楊氏及女幅昌妻夏氏子積善及女發各省駐防官兵爲奴並削除旗檔其失察綸父子與知逆情不行陳奏之漢軍科道並失察兵丁幅昌從習邪教及該旗之都統副都統等各黜降有差諭曰本日廷訊逆犯曹綸已盡法懲治按律凌遲梟示並將其家屬應行緣坐各犯分別辦理矣曹綸係正黃旗漢軍伊伯祖曹瑛曾任侍郎伊祖曹成曾任知府伊父曹廷奎曾任同知世受國恩且伊嫡母荆氏生母



孫氏因伊父署南籠府任時苗匪圍城俱自縊殉節曹綸身任都司以四品職官竟敢扶助林清通同謀逆欲爲一二品大員亂臣賊子行同梟獍處以極刑所以彰國憲而快人心至八旗漢軍自我太祖太宗開國之初從龍著績櫛風沐雨勦載旗常我國家視同世僕實與八旗滿洲蒙古無異百數十年以來漢軍中歷任文武大臣名卿碩輔節概炳著者指不勝屈卽現在簡用內外大員亦皆克宣力效忠無愧閱不意竟有曹綸一人敗常蔑本實出人情意想之外諒八旗漢軍聞之自必人人憤恨義切同仇不知此等敗類乃戾氣所鍾譬如萬頃嘉禾間生稂莠鋤而去之無害良畝卽如林清本係畿輔民人敢興悖亂國有常刑祇將逆犯誅殛斷無因林清一犯將近畿數百萬良民皆疑其反側之理現在曹綸一家已銷除旗檔我漢軍臣僕皆當視曹綸爲異類不必引以爲愧所有八旗滿洲蒙古漢軍等惟當感激國家培養厚恩勿忘祖父勤勞世澤共矢天良力抒忠盡無負朕諄諄訓勉至意及朝審勾到諭曰本日勾到朝審官常各犯內斬犯曹廷琦曹維曹咸亨三犯均係逆犯曹綸期親服屬按律緣坐本應予勾但曹廷琦等素因曹綸性情乖張罔顧倫理久經斷絕往來情同陌路不特於曹綸蓄心謀逆毫

文獻通考

清史列傳

不知情卽其從前入教亦並無見聞且曹綸之母荆氏孫氏前在伊父曹廷奎南籠任所因苗匪圍城俱自縊身故曹綸負國昧良不念累朝豢養深恩行同梟獍然朕敕法施仁並行不悖於殉節死難後嗣仍必寬其一線曹廷琦曹維曹咸亨俱著免其勾決交刑部牢固監禁十九年三月諭曰曹綸身爲職官甘心附從逆賊林清謀爲不軌罪大惡極實從來所未有其身已顯伏國法不可不將其逆蹟書之簡冊俾令遺臭萬年著國史館將該逆事實編列逆臣傳以爲亂臣賊子之戒

清史列傳卷八十終

